

SC. SUP. 23. PL. 5.









R. P. Fr. VINCENTII  
CONTENSON,  
ORDINIS PRÆDICATORUM  
Sacrae Theologiæ Professoris;  
THEOLOGIA MENTIS  
ET CORDIS:

S E U

Speculatio universæ Sacrae Doctrinæ,  
pietate temperata; è Partibus, Doctore  
potissimum Angelico derivata.

TOMUS IX. POSTHIMUS.

*In quo de Sacramento Pœnitentiæ differitur:  
ubi etiam de virtute pœnitentiæ agitur.*

Lucere vanum, ardere parum: lucere & ardere  
perfectum. Bern. serm. de nat. Ioan. Bapt.

*ex Libris  
van  
pastoris*



*petri Joane  
Lacrovici  
in Belgiam*

LUGDUNI,  
Sump. LAUR. ARNAUD, PETRI BORDE,  
JOANNIS, & PETRI ARNAUD:

---

M. DC. LXXXI.  
Cum Approbat. & Privilegio Regis.





## LECTORI BENEVOLO.

**T**RACTATVM hunc de Pœnitentia numeris omnibus absolutum habuisses, amice Lector, nisi postremam ei manum invidisset mors, quæ Authorem huic Theologiæ suæ Parti pro ejus momento perficiendæ incumbentem orbi simul & Operi eripuit. Utut tamen in chartis ejus reperta sunt quæ hac de re scripserat, digna cordatis & peritis visa fuere, quæ adjunctâ dispositione in Tomum istum posthumum formata ederentur. In eo, ut in cæteris, imò præ cæteris elucere conspicias Authoris non vulgarem genium, ubertatem, acumen, vim, pietatem, disciplinæ zelum, maturam & canam in virentibus annis eruditionem, cæterasque libri luce digni dotes, quæ facile à te impetrabunt, ut doleas potius quàm succenseas, cum quæstiones aliquas non inopiâ, sed casu acerbo, minùs plenas & accuratè tractatas deprehenderis, eam maximè quæ est de Attritione ex metu gehennæ concepta, in qua, nisi vita defuisset, dignam negotii momento curam & diligentiam impendere Author destinaverat. Equidem in promptu fuisset has lacunas utcumque implere; sed religio fuit Clarissimo Operis Parenti alienos sætus supponere, gratiusque Tibi fore visum est, si purum & germanum, quàm si pleniorẽ hunc Tomum haberes,

beres,

beres. In illo ergo, præter ordinem, & pauca  
ad nectendam titulorum seriem spectantia, ni-  
hil adjectum fuit; sed universa Authoris pla-  
cita quoad fieri potuit, sincera religiosè ex-  
hibentur, ut securus esse possis, Te præter id  
quod interruptus morte labor addidisset, cæ-  
tera habere, qualia ipse Operis Author edidit.  
Hæc Te, Lector, præmonitum voluit, qui  
defuncto Authori manum & operam suam in  
hoc Opere posthumo commodavit, ut de fide  
& consilio ejus certior factus, quid illi, quid  
Authori, quid casui tribuere debeas, æquus  
discerneres. Vale.



# INDEX

CAPITVM, SPECVLATIONVM,  
& Reflexionum, quæ in hac  
Libri XI. de Deo Salvatore,  
Parte tertia continentur.

---

## DISSSERTATIO UNICA.

De Sacramento Pœnitentiæ: ubi & de  
virtute Pœnitentiæ disputatur.

*Præloquium.*

pag. 1.

CAP. I.



*VÆ de Sacramento &  
virtute Pœnitentiæ  
certa vel faciliora  
sunt, præmittuntur. 7*

*SPECVLATIO I. Exi-  
stentia & necessitas Sacramenti Pœnitentiæ  
suadentur. 8*

Peccatoribus sinceram de peccatis post Baptis-  
mum commissis agentibus pœnitentiam;  
dari veniæ locum. ostendimus contra Nova-  
tianos. 9

Pœnitentiam novum esse novæ Legis Sacra-  
mentum. 10

*ad 33*

*Index Capitulorum,*

mentum, adversum Lutheranos & Calvinistas demonstratur. 21

REFLEXIO: 34

SPECVLATIO II. Essentia & partes Sacramenti Pœnitentiæ exponuntur. 37

Materia Sacramenti Pœnitentiæ proxima sunt actus Pœnitentis. ibid.

Remota Sacramenti Pœnitentiæ materia peccata sunt. 51

Partes Pœnitentiæ sigillatim explicantur: & primum contritio. 53

Essentia contritionis. 54

Divisio contritionis. 59

Præceptum contritionis. 64

Objectiones solvuntur; & acceptâ occasione enodantur perutiles difficultates. 69

Secunda Pœnitentiæ pars, Confessio. 85

Tertia Sacramenti Pœnitentiæ pars, Satisfactio. 109

REFLEXIO: 118

SPECVLATIO III. Legitima Sacramenti Pœnitentiæ forma est hæc: Ego te absolvo à peccatis tuis in nomine Patris, & Filii, & Spiritus sancti; quæ proinde non precatoria duntaxat, sed judicialis est: ac ejus minister est solus Sacerdos, ad secretum omni jure astrictus. 123

De ministro Pœnitentiæ. 138

De Sigillo Confessionis. 155

Varia quæ observentur dignissima corollaria derivantur: Ubi etiam de virtute & effectibus pœnitentiæ disseritur. 161

Corollarium I. Actus Pœnitentis à virtute speciali proficiscuntur. ibid.

Corollarium II. Subiectum immediatum Pœnitentiæ

*Speculationum, & Reflexionum.*

tentiæ est voluntas ; remotum est quivis peccati reus, vel capax. 181

*Corollarium III.* Varii pœnitentiæ effectus ordine recensentur. 187

Primus effectus, Remissio peccati mortalis, ibid.

Secundus Pœnitentiæ effectus, Remissio pœnæ æternæ, ac etiam temporalis pro ratione pœnitentiæ. 195

Tertius Pœnitentiæ effectus, Remissio peccatorum venialium. 205

Alii pœnitentiæ effectus breviter enumerantur. 222

REFLEXIO. 224

APPENDIX. Præcipuæ animarum Rectoris & Moderatoris dotes expenduntur. 231

REFLEXIO. 248

---

DISSERTATIONIS UNICÆ.

*De Sacramento Pœnitentiæ,*

CAPVT II. EXaminantur accuratiùs difficiliora quædam circa partes & effectus Pœnitentiæ. 252

SPECVL. I. Dolor de peccatis ex uno pœnarum inferni metu conceptus, bonus quidem ille est, & ad gratiam justificantem in Sacramento recipiendam disponit : non sufficit tamen, si ab omni amore Dei desertus sit. 253

Utilitas & honestas timoris ex metu gehennæ concepri. 257

Timor.

*Index Capitum , &c.*

Timor ex metu gehennæ conceptus sine aliquo amore & inchoatæ dilectionis motu ad justificationis gratiam recipiendam nunquam sufficit, ne quidem in Sacramento ullo, etiam Pœnitentiæ.	260
Solvuntur objectiones.	279
REFLEXIO.	297
SPECVL. II. Gratia per pœnitentiam restituitur, ac cum ea virtutes & merita pristina reviviscunt.	303
Solvuntur objectiones.	312
Declaratur in qua proportionem merita mortificata per pœnitentiam reviviscant.	321
REFLEXIO.	343
SPECVL. III. Sacerdos ne potestate sibi cœlitus commissâ abutatur, peccatoribus in mortalia continuò relabentibus, atque criminosa vitæ seriem post iteratas confessiones minimè emendantibus, donec dignis pœnitentiæ fructibus suæ conversionis sinceritatem probaverint, absolutionis beneficium impertiri non debet.	348
Solvuntur objecta contra stabilitatem de differenda absolutione, temperandaque ejus frequenter relapsis impertiendæ facilitate, sententiam.	390






# LIBRI XI.

De Deo Salvatore,

PARS TERTIA.



DISSERTATIO UNICA.

*De Sacramento Pœnitentiæ : ubi &  
de virtute pœnitentiæ disputatur.*

PRÆLOQVIUM.



ON satis fuisset humanæ infirmitati consultum, nisi renatæ in Baptismo novæ creaturæ, & in Confirmatione auctæ, & in Eucharistia pastæ, alia suppeterent parata remedia, quibus amissa semel innocentia (quæ humanæ naturæ nostræ fragilitas &

Tom. IX.

A

2 *Lib. XI. Pars III. Dissert. unica.*

imbecillitas est , quam in seipso facile quisque experitur) restaurari recuperarique possit. Convenienter igitur providit divina clementia & infirmis veteri meliorem Probaticam Piscinam, quâ ægrotantium morbi sanentur ; & descendentem à Jerusalem in Iericho , id est à gratia ad peccatum ; incidentique in latrones , dæmones scilicet injustos animarum possessores ; & despoliato, id est virtutibus omnibus in baptismo diffusis nudato ; & plagis impositis semivivo relictio, id est ad bonum agendum impoti prædura peccati servitute, & illatis à concupiscentia animo vulneribus , quibus tota dissolvitur spiritalis hominis harmonia , infudit oleum & vinum, ejusque vulnerum alligandorum illis provinciam commisit , quibus dixit : *Quicumque alligaveritis super terram , erunt ligata & in cælo : & quicumque solveritis super terram , erunt soluta & in cælo.* Matth. 18. Denique naufragantibus secundam tabulam , quæ unum æternæ mortis declinandæ perfugium est , porrexit , ad quam nisi confugiant , de eorum sine dubio salute desperandum est.

Sed antequam hujus tam necessariae materiæ adyta perscrutemur & rem ipsam aggrediamur , explicare in limine nominis etymologiam operæpretium est. Cùm enim hujus nominis ambiguitate in errorem multi prolapsi sint, præmittenda omnino est ejus potestas & vera significatio , ne perpetuâ vocis æquivocatione disputatio nostra laboret. Supponendum igitur est, per *pœnitentiam* non intelligi simplicem resipiscentiam , seu mollem cordis affectum , ut hæretici nostri temporis à catholica veritate longissimè remoti arbitrati sunt , existimantes  
pœnitentiam

*Cap. I: Sacramentum Pœnitentia.* 3

pœnitentiam nullum præteriti temporis dolo-  
rem includere, sed unam novæ vitæ institutio-  
nem significare. Hæc enim una fuit præclaræ sci-  
licet Lutheranorum & Calvinistarum reforma-  
tionis sollicitudo, quò in hominum illaberetur  
& facilius influeret animos, carni, sanguini, &  
sensibus lenocinari, pœnitentiam peccatoribus,  
virginitatem Christi sponsis, vota Religiosis,  
cœlibatum Sacerdotibus, jejuniâ fidelibus, uni-  
versæ Ecclesiæ bonorum operum fructus uno  
impetu & velut agmine factò eripere. Certè,  
ut nomen ipsum sonat, de iis tantùm pœni-  
tentia dici potest, quibus aliquid displiceat  
quod antè placuerit; nam pœnitentiam idem  
esse ac pœna tenentiam, & pœnitere pœnam  
tenere, Scriptura & Patres apertissimè declarant.  
Job enim ultimo dicitur: *Ago pœnitentiam in  
cilicio & cinere.* Et Propheta Joël peccatores  
ad pœnitentiam hortaturus: *Convertimini ad  
me,* inquit, *in toto corde vestro, in jejuniis, &  
fletu & planctu.* Et Tertullianus lib. de pœnit.  
*Pœnitentiam norunt passionem quandam esse,  
qua venit ex offensa sententia prioris.* Unde ait  
prodere illam se precibus, lacrymis, ac carnis  
maceratione: *De ipso enim habitu atque victu,*  
inquit, *mandat sacco & cineri incubare, cor-  
pus sordibus obscurare, animum mœroribus deji-  
cere, illa qua peccavit tristi retractatione mu-  
tare, jejuniis preces alere, ingemiscere, lacry-  
mari, mugire ad Dominum Deum dies noctes-  
que, Presbyteris adgeniculari, omnibus fratri-  
bus legationis suæ preces adjungere.* Idem do-  
cent alii Patres: *Pœnitere,* inquit Isidorus lib. 6.  
etymol. cap. ultimo, *est pœnam tenere, ut sem-  
per puniat in se ulciscendo, quod commisit pec-*

4 *Lib. XI. Pars III. Dissert. unica.*

*eando.* Succinit Augustinus, vel alius author libri de vera & falsa pœnit. cap. 8. his verbis : *Pœnitentia est quadam dolentis vindicta, puniens in se quod dolet commisisse.* Et verus Augustinus serm. 57. de tempore : *Ad emendanda crimina vox pœnitentis sola non sufficit : nam in satisfactione ingentium peccatorum non verba tantum, sed opera quaruntur.* Idem in aliis Patribus videre est, qui integros de pœnitentia illa laboriosa libros & sermones ediderunt, è quibus pretiosas gemmas in hujus dissertationis decursu, ubi se occasio tulerit, carpemus.

Vera ergo & christiana pœnitentia, quam qui non egerint, perituros omnes simul Veritas testata est, & propter admissum scelus intimo animi sensu dolet, & ejus sinceri doloris externa signa profert, ut omnibus illis Sanctorum qui in sacris litteris peccatorum suorum pœnitentiam egisse leguntur, exemplis demonstrare in promptu esset, nisi rem omnibus notam & passim obviam confirmare supervacaneum jure merito judicaretur. Et certè fallax est pœnitentia quæ in opera satisfactionis non effunditur, dum facultas adest, neque quominus id faciant ullo impedimento retardantur. Fons vivus esse non potest pœnitentia, saliens in vitam æternam, nisi manantibus lacrymarum aquis foras exundet; nec bonis arboribus, nisi nos fallat Veritas, potest accenseri, nisi bonos fructus pariat. Ut vera, Christiana, Catholicaque Fides sine oris confessione, vera charitas sine bonorum operum proventu; ita vera pœnitentia sine satisfactionis fruge nulla est, æquique illi simillima, quam Christus foliis ornatissimis

*Cap. I. Sacramentum Pœnitentia. §*

ornatissimis refertam, fructu vacuum invenit, & ei maledixit. Quàm piè, quàm nervosè ait ab hæreticis nostris alienus Cyprianus tract. de lapsis: *Si quem de tuis charum mortalitatis exitu perdidisses, ingemisceres dolenter & fletes; facie inculta, veste mutata, neglecto capillo, vultu nubilo, ore dejecto indicia mœroris ostenderes. Animam tuam misera perdidisti: spiritualiter mortua supervivere hîc tibi, & ipsa ambulans funus tuum portara cœpisti, & non acriter plangis, jugiter ingemiscis? Non te vel pudore criminis, vel continuatione lamentationis abscondis? Ecce pejora adhuc peccandi vulnera; ecce majora delicta: peccasse, nec satisfacere: deliquisse, nec delicta de flere. Multis aliis etiam nominibus pœnitentiam Patres appellarunt. Dicitur enim aliquando *manuum impositio*, quia per multa sæcula Sacerdotes peccatori pœnitenti reconciliando manus imponere consueverunt. *Reconcilietur*, inquit Concilium Carthagenense IV. can. 76. *per manus impositionem, & infundatur ori ejus Eucharistia*. Meminit etiam ejus cæremoniæ Augustinus lib. 3. de baptismo, cap. 16. & S. Pacianus epist. 3. ubi ait, *miserandis fratribus Sacerdotum manus exhiberi*. S. quoque Leo epistola 52. cap. 17. ait eos qui escis immolatiis usi sunt, jejuniis & *manuum impositione purgari*.*

Deinde appellatur *exomologesis*, idest confessio, vel communicatio ex pane, quia pœnitentibus post peccatorum confessiones Eucharistiæ usus restituebatur. *Is actus*, inquit Terullianus lib. de pœnit. cap. 9. *qui magis Græco vocabulo exprimitur, & frequentatur, exomo-*

6 *Lib. XI. Pars III. Dissert. unica.*

gesis est , quâ delictum Domino nostrum confitemur , non quidem ut ignaro , sed quatenus satisfactio confessione disponitur , confessione pœnitentia nascitur , pœnitentiâ Deus mitigatur. Itaque exomologesis prosternendi & humiliandi hominis disciplina est. Et S. Cyprianus epistola 9. sic habet : Cum in minoribus peccatis agant peccatores pœnitentiam , justo tempore & secundum disciplina ordinem ad exomologesim veniant , ut per manus impositionem Episcopi & Cleri jus communicationis accipiant. Videatur epist. 11. & 12. necnon S. Paciani epistola 3.

Præterea dicitur pœnitentia à Patribus , secundum post naufragium tabula. Sic Tertullianus lib. de pœnitentia , cap. 4. Eam , inquit , tu peccator mei similis ita invade , ita amplexare , ut naufragus alicujus tabula fidem. Et S. Cyprianus epist. 9. Ne statim nobis pœnitentia subsidii blandiantur , quæ sunt infelicitum remedia : cavendum est vulnus quod dolore curatur. Alud est integrâ nave & salvis mercibus portum salutis intrare , aliud nudum harere tabula , & crebris fluctuum recursibus ad acerrima saxa collidi. Hinc Tridentinum sess. 6. cap. 14. Qui ab accepta justificationis gratia per peccatum exciderunt , rursus justificari poterunt , cum excitante Deo per pœnitentiæ sacramentum , merito Christi amissam gratiam recuperare procuraverint : hic enim justificationis modus est lapsus reparatio , quam secundam post naufragium perperda gratia tabulam Sancti Patres apertè nuncuparunt.

His circa pœnitentiæ nomen delibatis , ut ad rem ipsam accedamus , Sacramentum pœnitentiæ :

*Cap. I. Sacramentum Pœnitentia. 7*

nitentiæ illud dicitur, in quo peccatorum venia pœnitentibus datur. Unde Sacramenti huius vim ignorari necesse est, nisi quæ sit pœnitentiæ virtus rectè intelligatur. Sapientissimè ergo D. Thomas virtutis pœnitentiæ considerationem à Sacramenti pœnitentiæ tractatione indivulsam esse arbitratus est, eo vel maximè, quod ut ex dicendis constabit, virtutis pœnitentiæ actiones materiam præbent in qua pœnitentiæ Sacramentum versatur. Igitur priùs quæ de sacramento virtuteque pœnitentiæ apud omnes sunt in confesso, vel certè minùs difficilia habentur, more nostro præmittenda sunt, quàm ut difficiliores circa utrumque controversias decidamus.

---

CAPVT I.

*Qua de Sacramento & virtute Pœnitentia certa vel faciliora sunt præmittuntur.*

**S**I diligentiam & accuratam operam, quæ à Theologis in unōquoque argumento adhibenda est, ex rei quam tractant pondere & momento metiri oportet, nemo inficias iverit divinorum tractatores nunquam adeo in explicanda pœnitentia diligentes futuros esse, ut satis videri possint. Præsertim quia, ut benè observat Catechismus Romanus, de Sacra-

mento pœnitentiæ quàm de baptismo eo accuratius agendum est, quod baptismus semel administratus iterari non potest; pœnitentiæ verò toties locus datur, ejusque repetendæ toties necessitas imposita est, quoties post baptismum peccare contingit. Si ergo nihil utilius, nihil peccatoribus necessarium magis quàm pœnitentia est, quâ teste Chrysostomo peccatum remittitur, paradiscus reſeratur, contritus sanatur, tristis exhilaratur, mortuus de interitu revocatur, status restauratur, honor renovatur, fiducia datur, virtus reformatur, gratia abundantior refunditur; quâ ligata solvuntur, soluta custodiuntur, adversa mitigantur, contrita sanantur, confusa lucidantur, desperata animantur: ita curandum est, ne rei tantopere necessariæ in nobis incuria reprehendatur, eaque ex Patribus & Sacris Conciliis seligenda sunt, quibus hoc saluberrimum pœnitentiæ medicamentum & suscipi ritè, & suscipientibus prodesse possit.

## SPECVLATIO I.

*Existencia, & necessitas Sacramenti  
Pœnitentia suadentur.*

**S**acramenti Pœnitentiæ existentiam ut demonstremus, probandum est adversùs antiquos Novatianos & modernos hujus temporis hæreticos, pœnitentiam esse verum novæ Legis Sacramentum: essentiam verò exposuerimus, si quibus constat, materiam & formam explicemus:



*Cap. I. Sacramentum Pœnitentia.* 9

mus : partes verò intelligemus , si de contritione , confessione , & satisfactione quæ scitu necessaria sunt exponamus.

*Peccatoribus sinceram de peccatis post baptismum commissis agentibus pœnitentiam , dari veniam locum ostenditur contra Novatianos.*

Certum est ergo primò contra Novatianos & hæreticos hujus temporis , dari in Ecclesia verum pœnitentiæ Sacramentum ad peccata post baptismum commissa remittenda divinitus institutum. Diversis & è diametro oppositis motivis Novatiani & moderni hæretici Sacramentum Pœnitentiæ de medio tollere moliti sunt. Illi in desperationem homines inducentes , nullum pro peccatoribus remedium in Ecclesia agnoscebant , qui idcirco *crudeles* à Patribus nominati sunt. *Quis ante crudelissimum Novatianum* , inquit Vincentius Lirinensis , *crudellem Deum dixit , eo quòd mallet mortem morientis , quàm ut revertatur & vivat ?* Crudellem hunc ideo dicit , quòd in peccatum prolapsis , & ad Ecclesiam lacrymis , gemitu , & dolore pulsantibus divinæ pietatis & paternæ clementiæ viscera clausurit , nec ad fovenda vulnera admisit vulneratos , sed sine spe pacis & communionis relictos ad luporum rapinam , & Diaboli prædā projecit. *Ece abortus est* , inquit Cyprianus epist. adversus Novatianos , *alius hostis , & ipsius paternæ pietatis adversarius hæreticus Novatianus , qui non tantum , ut in Evangelio significatum est , sicut Sacerdos volli*

L. 88

*Levites iacentem vulneratum prateriret, sed ingeniosa & nova crudelitate sauciatus potius occideret.* Videsis B. Ambrosii longè præclarissimos de pœnitentia libros, in quibus sanguinarium illud dogma Scripturarum authoritatis mole graviter premit. Nostri verò econtrà Lutherani & Calvinistæ de divina clementia præsumentes, pœnitentiæ & confessionis necessitatem eliminant, rati solam fidem quâ quis dimissi sibi credit esse peccata, eorundem remissionem satis superque obtinere. Porro Novatianorum error antequam refellatur, operæpretium est hærescos illius historiam, quam brevissimè tom. 4. dissert. 5. perstrinximus, paululum fusiùs ante Lectoris oculos expandere.

Confundunt ob nominum similitudinem Novatum cum Novatiano Eusebius lib. 6. historiæ, cap. 35. Socrates, Theodoretus, & alii. Eos tamen distingui oportere docet testis oculatus B. Cyprianus epist. 44. & 49. ad Cornelium, sub cujus Pontificatu monstra illa crebus excitavit. Idem etiam ex Beato Paciano epistola 2. & 3. liquet. Unde absque dubio hæresis illius architectus Novatus fuit, Novatianus verò illius fuit assertor, sectator, & propagator. Fuit autem Novatus Presbyter Africanus: Presbyter, inquam, & non Episcopus, ut putavit Cardinalis Baronius ad annum 254. eo fretus, quod teste Cypriano epist. 49. *Felicissimum satellitem suum Diaconum ( nec permittente, nec sciente Episcopo ) sua factione & ambitione constituit.* Verùm verba illa non significant: Felicissimum fuisse à Novato ordinatum, sed melis Novatianibus & factione, invito proprio Episcopo

*Cap. I. Sacramentum Pœnitentie. II.*

Episcopo ad Diaconatum fuisse promotum. Unde à S. Paciano, & ab Eusebio in chronico Presbyter duntaxat appellatur. Ait etiam in eadem epistola Cyprianus, Novatum fuisse à suis Presbyteris ejiciendum, nisi ipse secessisset. At Episcopos non à solis Presbyteris, sed à Provinciæ Episcopis deponi & ejici potuisse constantissimum est.

Romam profectus Novatus Novatianum sibi antea adversarium in errorem suum oblatiis honoribus prolectavit: dolore enim succensus graviterque stomachatus Novatianus quòd in Romanum Episcopum non fuisset assumptus, schismaticis se adjunxit, quorum favore à tribus Episcopis rudibus & imperitis in Episcopum ordinatus est, ut constat ex epistola Cornelii Papæ ad Fabium Antiochenum, & ex Eusebio lib. 6. c. 43.

Ad errorem autem Novatianorum quod attinet, paulò superiùs in eo diximus esse situm, quòd in persecutione lapsis, omnia licet veræ pœnitentiæ & conversionis signa præferrentibus, negandam veniam crudelissimè affirmarent. Et sicut in alios immites erant & sævi, ita in seipsos supra modum lenes, seipsos puros, & ab omni labe vacuos intolerabili & odiosissimâ superbiâ dictitabant. Hoc enim superbiorum ingenium, ut amore sui tumentes in alios sint immisericordes. Sic Diabolus Rex super omnes filios superbiæ, superbus natus fuit & invidus; & sicut testante sacro eloquio initium peccati ejus superbia fuit, ita spiritus nequam homicida fuit ab initio.

Advertendum tamen est, eatenus Novatianos censuisse nullam lapsis salutis spem super-

12 *Lib. XI. Pars III. Dissert. unica.*

esse, non quòd negarent peccatorum culpas à Deo posse absolute remitti, sed quatenus vel-  
lent post baptismum lapsos ad Ecclesiæ non  
posse communionem admitti, nec penes Ec-  
clesiæ potestatem esse lapsum ullum aut apo-  
statam traditis ipsi divinitus clavibus reconci-  
liandi. Ita docet S. Pacianus epist. 1. ubi post-  
quam dixit : *Nunquam Deus non pœnitenti*  
*comminaretur, nisi ignosceret pœnitenti ; in-*  
*ducit Novatianum respondentem : Solus Deus*  
*poterit.* At contrà reponit Pacianus : *Verum est ;*  
*sed quod per Sacerdotes facit, ipse potestas*  
*est.* Et epist. 3. Novatiano objicienti : *Pœni-*  
*renti peccata dimittis, cum tantum in baptis-*  
*mate tibi liceat relaxare delictum ?* sic respon-  
det S. Pacianus : *Non mihi planè, sed Deo se-*  
*li, qui & in baptismo donat admissum, &*  
*pœnitentium lacrymas non repellit. Caterùm*  
*quod ego facio, id non meo jure, sed Domini.*  
*Sive baptizamus, sive ad pœnitentiam cogi-*  
*mus, sive veniam pœnitentibus relaxamus,*  
*Christo id authore tractamus. Tibi videndum*  
*est, an Christus hoc possit, an Christus hoc fe-*  
*cerit ?* Idem tradit S. Ambrosius lib. 1. de pœnit.  
cap. 2. *Aliunt, inquit de Novatianis, se Domino*  
*deferre reverentiam, cui soli remittendorum cri-*  
*minum potestatem reservant. Nullum itaque*  
*in Ecclesiâ reconciliandorum peccatorum &*  
*condonandorum criminum jus agnoscebant.*  
*Et quanvis Novatus nullius omnino peccati*  
*post baptismum commissi remittendi potesta-*  
*tem Ecclesiæ concesserit, discipuli tamen ejus*  
*de tanta severitate remittentes, leviorum pec-*  
*ccatorum condonandorum facultatem Ecclesiæ*  
*afferuerunt. Ita observavit S. Ambrosius lib. 1.*

*Cap. I. Sacramentum Pœnitentia. 13*

de pœnit. cap. 2. *Aiunt, inquit, se exceptis gravioribus criminibus, veniam relaxare levioribus. Non hoc quidem author erroris vestri Novatus, qui nemini pœnitentiam esse dandam putavit: ea videlicet contemplatione, ut quod ipse non posset solvere, non ligaret, ne ligando sperarit à se facere solutionem.*

Advertendum est etiam, miram & stupendam fuisse hujusmodi hæresiarcharum in hæresi illa constanda cæcitatem. Quod ex duplici præsertim capite perspicuum est. Primum est, absurdissimum fuisse viros criminosos veniam tantopere indigentes denegare veris pœnitentibus misericordiam. Atqui Novatus & Novatianus non solum culpâ non vacabant, sed ingentibus erant contaminati flagitiis. Novatus quidem, quem scribit S. Cyprianus epistol. 49. fuisse novarum rerum cupidum, avaritiæ inexplebilis, rapacitate furibundum, arrogantiam & stupore superbi tumoris inflatum; curiosum, ut perderet; adulatorem, ut falleret; nunquam fidelem, ut diligeret. Appellat etiam illum facem & ignem ad constanda seditionis incendia; turbinem & tempestatem ad fidei faciendâ naufragia; hostem quietis, tranquillitatis adversarium, pacis inimicum. Infanda etiam illius facinora S. Doct. ibidem recenset, dum ait, ab illo spoliatos fuisse pupillos, fraudatas viduas, pecunias quoque Ecclesiæ denegatas; quin & projectum extra domum patrem, nec fame mortuum fuisse ab illo sepultum; denique uxoris gravidæ uterum calce ab eodem fuisse percussam. Similia legere est apud S. Pacianum epistol. 3. Nihil melior fuit Novatianus: nam ut refert S. Cornelius epist. ad Fabium Antio-

chianum,

ehenum, cæremonias baptismi, quem agrotus in lecto susceperat, sprevit postquam convalevit, & Confirmationis Sacramento obsignari neglexit, & desiderio suscipiendi Presbyteratus flagravit, & metu persecutionis atque amoris vitæ Presbyterum se esse negavit, & incredibili incensus ambitione in Romanum Episcopum ordinari se fecit, Cornelio in Cathedra Petri sedente. Hujusmodi ergo homines peccatorum suorum immensas labe non advertentes, nec ipsas aliorum festucas condonari sinebant.

Secundum deplorandæ eorum cæcitatæ argumentum est, quod veniam peccatoribus denegantes & spem remissionis eripientes, illis tamen pœnas imponere solebant, quasi sola puniendorum, & non remittendorum criminum potestas esset penes Ecclesiam. *O hæretica institutionis inefficax & vana traditio!* (exclamat S. Cyprianus epist. 52. hanc eorum doctrinæ inconsequentiam deplorans) *bortari ad satisfactionis pœnitentiam, & subtrahere de satisfactione medicinam!* Dicere fratribus nostris: *Plange, & lacrymas funde; diebus ac noctibus ingemisce, pro abluendo delicto tuo largiter & frequenter operare, sed extra Ecclesiam post ista omnia morieris: quodcumque ad pacem pertinet facies, sed nullam pacem quam quæris accipies.* Idem docet S. Ambrosius lib. 1. de pœnit. cap. 2. ubi ait voluisse Novatianos ligare quod non resolverent, noluisse solvere quod ligassent: cum tamen Dominus par jus & solvendi esse in Ecclesia voluerit, & ligandi.

His de Novatianorum hæresi deliberatis, hic eorum error potest facillimè confutari. Quid enim in Scripturis frequentius, quid in Patrum  
omnium

*Cap. I. Sacramentum Pœnitentia. 15*

omnium monumentis legimus inculcatius, quam spondere Deum pœnitentibus veniam, & ad pœnitendum omnes esse salutaribus hortamentis permovendos. Si impius, inquit Ezechiel cap. 18: *egerit pœnitentiam ab omnibus peccatis suis qua operatus est, & custodierit omnia præcepta mea, & fecerit iudicium & iustitiam, vitâ vivet.* Et cap. 33. *Nolo mortem impii, sed ut convertatur impius à via sua, & vivat.* Innumera etiam è novo Testamento testimonia erui possent; sed quia illa de pœnitentia ante baptismum peragenda interpretabantur Novatiani, ea loca producenda sunt, quibus lapsis venia promittitur, & revera indulgetur. Huiusmodi est illud Apocalypsis; quod Angelo Sardis, id est Episcopo utique baptizato, dicendum præcipitur: *In mente habe qualiter acciperis & audieris, & serva, & pœnitentiam age.* Paulus etiam 1. Cor. 5: fornicario, satanæ in interitum carnis, ut spiritus in die Domini salvus esset, tradito pepercit & indulgit. *Sufficit illi qui huiusmodi est, inquit, objurgatio hac qua sit à pluribus: ita ut è contrario magis. denetis & consolemini.*

Unde Patres Novatianorum crudelem immisericordiam, utpote Christi mansuetudini adversam, acriter reprehendunt. Nam Pastor ille Evangelicus, ut ponderat Ambrosius, lassam ovem vexisse legitur, non abjecisse. Ideo Dominus Jesus compassus est nobis, ut ad se vocaret, non ut deterreret. Mitis venit, venit humilis; denique Matth. 11: ait: *Venite ad me omnes qui laboratis, & onerati estis, & ego reficiam vos.* Reficit ergo Dominus, non excludit, meritoque tales discipulos elegit, qui domi-

nica



nicæ voluntatis interpretes plebem Dei colligerent, non repudiarent. Unde liquet, infert Ambrosius lib. 1. de pœnit. cap. 2. eos inter Christi discipulos non esse habendos, qui dura pro mitibus, superba pro humilibus sequenda optinantur; & cum ipsi quarant Domini misericordiam, aliis eam denegant. Quid durius quam ut indicant pœnitentiam, quam non relaxent, cum utique veniam negando incentivum auferant pœnitentia? Nemo enim potest benè agere pœnitentiam, nisi qui speraverit indulgentiam. Et cap. 2. Quid quod insolentiores sunt? Nam cum ad misericordiam promptior, quam ad severitatem sit Spiritus Dei, quod ait se velle, id nolunt; quod nolle, hoc agunt: cum vindicare iudicis sit, remittere misericordis. ::: Ut cognoscamus igitur, Deum misericordia magis indulgentem esse, quam severitatis tenacem, ipse ait (Osee 6.) misericordiam malo, quam sacrificium. Quomodo igitur vestrum potest esse acceptum sacrificium Deo, qui negatis misericordiam, cum ipse dicat, nolle se mortem peccatoris, sed correctionem? ::: Si Deus pro nobis, quis contrarios? Qui filio proprio non pepercit, sed pro nobis omnibus tradidit eum, quomodo non etiam cum illo omnia nobis donavit? Quis accusabit adversum electos Dei? Deus est, qui justificat: quis est qui damnet? Christus qui mortuus est, imò qui & resurrexit, qui est in dextera Dei, qui etiam interpellat pro nobis. Pro quibus ergo Christus interpellat, eos Novatianus accusat. Quos Christus ad salutem redemit, eos Novatianus damnat ad mortem. Christus dicit: Tollite jugum meum super vos, & discite à me, quia mitis sum. Novatianus



*Cap. I. Sacramentum Pœnitentia. 17*

*dicat, immitis sum. Christus dicit, invenietis requiem animabus vestris, jugum enim meum suave est, & onus meum leve: his grave onus & durum imponit jugum Novatianus.*

Fundamentum potissimum Novatianorum verbis Apostoli in epistola ad Hebræos traditis innitebatur. *Impossibile est, inquit Paulus, cap. 6. eos qui semel illuminati sunt, gustaverunt etiam donum cœlestē, & participes facti sunt Spiritus Sancti, & prolapsi sunt, rursus renovari ad pœnitentiam. Voluntariē peccantibus, addit cap. 10. post acceptam notitiam veritatis, jam non relinquitur pro peccatis hostia; terribilis autem quadam expectatio judicii, & ignis amulatio quæ consumptura est adversarios. Si impossibile est semel illuminatos revocari ad pœnitentiam, si illis nulla relinquitur pro peccatis hostia, sed illos terribilis expectatio judicii manet; quomodo nos remissionem peccatorum nedum non impossibilem dicimus, sed eam asserimus quotidianam? Quomodo illis non hostiam solum relinquimus, sed etiam familiare & facillimum Sacramentum? Certē nostrā sententia facilitate veniæ incentivum præbet delinquendi, dumque nimis dilatat Dei misericordiam, portam aperit, viamque pandit & munit ad impietatem; facilē enim in eam prolabetur, pro qua noverit omnibus obvium Sacramenti pœnitentiæ esse remedium.*

Respondeo locis illis Apostolicis, baptismi unius, quem pluries posse iterari Judæi non secus ac legalia lavacra & Mosiæcas hostias arbitrabantur, repetitionem impossibilem inculcari, pœnitentiæ aditum non præcludi, ut post Ambrosium, Chrysostomum, Theodoretum,

& Theophylactum in commentariis illius loci exponit Patrum discipulus S. Thomas. Unde frustra in patrocinium sui dogmatis primum locum trahebant Novatiani, frustra ex secundo loco præsidium sui erroris quærebant. Adde primò *impossibile* ab Apostolo expressum idem esse ac summè difficile, si de iis præsertim peccatoribus intelligatur, qui peccatis peccata adjicientes, delinquendi consuetudine fecerunt sibi necessitatem premento blandientem blandiendo prementem, ut loquitur Bernardus: unde significare voluit Apostolus quàm sit periculosa recidiva, & in veteris vitæ peccata relapsus; ubi etiam Calvinus & aliorum sectariorum præfocavit errorem negantem hominem semel justificatum posse gratiâ excidere. Adde secundò cum dæcto Estio in commentario illius loci, inde colligi pœnitentiam duntaxat baptismalem iterum repeti non posse, velle Apostolum: tum quia loquitur de semel illuminatis, quos rursus renovari, idest baptizari posse negat; baptismus enim *Sacramentum illuminationis & renovationis* dicitur, juxta illud cap. 10. *Rememoramini pristinos dies, in quibus illuminati* (id est baptismo suscepto facti Christiani) *magnum certamen sustinistis passionum.* Id etiam indicat verbum *renovari*: gratia etiam renovans, seu novam vitam conferens, est baptismalis, unde baptismus dicitur ab Apostolo Tit. 3. *Lavacrum regenerationis & renovationis.* Unde loquitur de gratia baptismi, quæ dicitur *gratia illuminationis*, quia per illam transfert nos Deus de tenebris in admirabile lumen suum, ut qui fuimus aliquando tenebræ, lux fiamus in Domino: per eam quoque dici-

mur.

*Cap. I. Sacramentum Pœnitentia. 19*

mur participes fieri Spiritûs Sancti, juxta illud Principis Apostolorum Act. 2. *Baptizetur unusquisque vestrum, & accipietis donum Spiritus sancti.* 3. Illud etiam Pauli ad Titum 3. *Per lavacrum regenerationis, & renovationis Spiritus sancti, quem effudit in nos abundè.* Est igitur germanus Apostoli sensus, hominem semel baptismi Sacramento renovatum, si relapsus fuerit in vestutatem peccati, non posse iterum actâ pœnitentiâ eam consequi novitatem, quam in baptismo acceperat. Baptizato enim ita remittitur pœna, ut nihil pro peccatis solvendum superfit: lapsus verò post baptismum etiamsi resipiscat, expectare debet terribile judicium, nisi ipsemet in se laboriosa castigatione vindicet quod peccavit.

Ex his etiam intelligitur secundus Apostoli locus, quem Novatiani lapsis peccatorum veniam negantes, suo errori vendicabant. Eatenus enim, ut ait Chrysostomus, post baptismum voluntariè peccantibus & in gravia delicta relapsis negat Apostolus relinqui hostiam, quatenus in Ecclesia nullus sit secundo baptismati locus, quo iterum sicut prius totaliter tam quoad culpam, quam quoad pœnam scelera remittantur. Convenienter enim baptismus *hostia* dicitur, quia mors & crux Christi, in qua Servator hostiam pro peccatis obtulit, potissimum operatur. Nulla igitur relinquitur hostia, quia etiam pœnitentes manet reatus pœnæ, pro qua post oblatas hostias non solet exigì satisfactio. Voluit etiam divinus Apostolus eò loci significare, voluntariè, id est malitiâ & destinatâ voluntate peccantes, de quibus postea ait, quod filium Dei conculcant, & sanguinem


sanguinem Testamenti pollutum ducunt, & gratiæ contumeliam faciunt, quales sunt qui post acceptam notitiam veritatis retrorsum convertuntur ab eo quod illis traditum est, sancto mandato, quod peccatum Joannes, cap. 5. primæ epistolæ vocat *peccatum ad mortem*, non pro illo dico ut roget quis; quodve Veritas *peccatum in Spiritum Sanctum* nominavit, neque in hoc sæculo, neque in futuro remittendum; voluit, inquam, Apostolus indicare peccatores hujusmodi vix ac ne vix quidem unquam in veram pœnitentiam, nisi ingenti miraculo adduci. Sed prior expositio est magis litteralis: *Non enim dixit*, inquit Chrysostomus, *non est amplius pœnitentia, neque est amplius remissio, sed non est amplius hostia; hoc est, non est amplius crux secunda, hoc enim vocat hostiam.*

Quod verò additur, facilitatem veniæ esse incentivum culpæ, à Patribus occupatum jampridem est, qui volunt veniam non nisi verè pœnitentibus, & pœnitentiæ sincerum affectum fructibus & operibus demonstrantibus impertiri. Unde juxta incorruptum Ecclesiæ sensum peccatoribus crebrò præsertim in peccata gravia relabentibus, quoad vitæ conversionem non verbis sonantibus, sed factis pronuntiantibus monstraverint, venia differtur, communio denegatur. *Vo'o veniam reus speret*, inquit Ambrosius lib. I. de pœnit. cap. 16. *petat eam lacrymis, petat gemitibus, petat populi totius fletibus, ut ignoscatur obsecret: & cum secundo, & tertio fuerit dilata ejus communio, credat remissius se supplicasse, fletus augeat miserabilior, postea revertatur, teneat pedes brachia, oscule-*  
tur

tur osculis, lavet fletibus, nec dimittat, ut de ipso dicat Dominus Iesus: Remissa sunt peccata ejus multa, quoniam dilexit multum. Hac sacrâ praxi nec peccatoribus spēs adimitur, nec facilitate veniæ incentivum peccati præbetur. Unde narrat ibidem Ambrosius, peccatores hac salutiferâ methodo curatos præclaros pœnitentiæ fructus edidisse. *Cognovi*, inquit, *quosdam in pœnitentia sulcasse vultum lacrymis, exarasse continuis fletibus genas, stravisse corpus suum calcandum omnibus, jejuno ore semper & pallido mortis speciem spiranti in corpore prætulisse.* Observat etiam S. Augustinus lib. 50. homiliarum homil. 27. adversam hæreticorum sententiam nullum peccantibus veniæ locum dantem ad iteranda nedum incitare peccata, sed penè propellere: si enim omnis clausus sit veniæ aditus, nonne peccatores tantò magis addent peccata peccatis, quantò sibi magis ignosci posse desperant? Servient ergo libidinibus, facient non quod licet, sed libet, pascentque interim cupiditatem, qui non sperant invenire se posse charitatem, vel fructuosæ pœnitentiæ utilitatem. Quod idem tradit Ambrosius verbis superiùs recensitis.

*Pœnitentiam verum esse nova Legis Sacramentum, adversum Lutheranos & Calvinistas demonstratur.*

Totum rationum & sacrarum autoritatum momentum hoc discursu complector: Signum sensibile permanenter à Christo institutum ad significandam & efficiendam gratiam est verum



novæ Legis Sacramentum, ut ex dictis de Sacramentis in genere claret, nec inficiari satis possunt hæretici quos impugnamus. Talis est pœnitentia, in qua duo inveniuntur, actus nimirum pœnitentis, & absolutio Sacerdotis: quippe utrumque est signum sensibile gratiæ; pœnitens enim dolore suo humili confessione expresso satis significat se recedere à peccato: Sacerdos etiam prolatione verborum significat se peccata remittere, eaque verè remittit etiam quoad culpam. Ergo pœnitentia est verum novæ Legis Sacramentum. Tota hujus discursus difficultas est in eo posita, ut probemus, Sacerdotem verbis quæ profert, confessa peccata dimittere.

Id autem perspicuè colligitur ex illis verbis Joan. 20. *Accipite Spiritum Sanctum, quorum remiseritis peccata, remittuntur eis: & quorum retinueritis, retenta sunt.* Quibus verbis Christus Apostolis, eorumque successoribus remittendorum peccatorum potestatem largitus est, quæ potestas in solo pœnitentiæ tribunali exercetur. Nec potest intelligi de peccatis per baptismum remittendis, vel de remissione per prædicationem excitanda, ut hæretici comminiscuntur: non potest, inquam, ita intelligi & eo subterfugio eludi aut obscurari locus splendidissimus: tum quia alibi tradidit Christus baptizandi prædicandique potestatem. Matt. 28. *Euntes docete omnes gentes, baptizantes eos in nomine Patris, & Filii, & Spiritus Sancti.* Tum quia eadem est remittendi quæ retinendi peccata: at potestas baptizandi & prædicandi, non est potestas retinendi peccata: datur ergo alia potestas procedens cum cognitione causæ, & legitima judicis jurisdictione, qui pro rei meritis

tis aut solvat, aut retineat. Tum, quia facultas remittendi peccata est potestas judiciaria, ut colligitur ex cap. 18. Matth. ubi Christus præcipit, clam peccantem & fraternam correctionem aspernantem, post adhibitos unum vel duos testes, ut in ore duorum vel trium testium stet omne verbum, accusandum esse coram Ecclesia, id est Ecclesiæ judicibus, quibus animadvertendorum delinquentium provincia & potestas commissa est, quorum sententiam esse definitivam & decretoriam, aperte indicat ibidem Salvator immediatè subjiciens:

*Amen dico vobis, quaecumque alligaveritis super terram, erunt ligata & in cælo; & quaecumque solveritis super terram, erunt soluta & in cælo.* Denique ita locum illum intellexere Patres, quibus interpretandarum Scripturarum gratia divinitus concessa est. Pater omne iudicium dedit Filio suo, inquit Chrysostomus lib. 3. de Sacerdotio, cap. 5. Caterùm video ipsum omne iudicium à Deo Filio Sacerdotibus traditum esse, & servorum sententiam Deus confirmat, cùm dixit, *Quorum remiseritis peccata, remittuntur eis.* Et cap. 6. Corporis lepram purgare, vel purgatam ostendere, Judæorum Sacerdotibus licebat. At verò nostris Sacerdotibus anima sordes non dico purgas ostendere, sed purgare prorsus concessum est. Idem docent alii Patres, præsertim Augustinus lib. de adult. conjug. cap. ultimo, & lib. 20. de civit. cap. 6. quæ testimonia prolixius foret recensere. Vide Richardum Victorinum lib. de potestate ligandi & solvendi, cap. 21. ubi sic scripsit: *Extat quorundam sententia tam frivola, ut ridenda potius quàm refellenda videatur: putant enim Sacerdotes non habere*



24. *Lib. XI. Pars III. Dissert. unica.*

*habere potestatem solvendi , sed ostendendi solutos. Sed nunquid Dominus dixit , quod solutum ostenderitis , erit solutum ? Dicunt , Sacerdotes non habere potestatem remittendi peccata , cum Dominus hoc dicat : & dicunt habere potestatem ostendendi remissa , cum Dominus hoc non dicat.*

Eandem veritatem convenientiâ illustrat D. Thomas lib. 4. contra gent. cap. 70. Quia sicut gentilem populum Christus non est passus mori , ita nec redemptum patietur extinguï : quemadmodum ergo instituit baptismum ad remissionem peccatorum ante baptismi suspensionem à gentibus commissorum ; sic bonitatem ejus decuit , Sacramentum Pœnitentiæ in remissionem peccatorum à Christianis patratorum instituere , quo culpæ omnes post baptismum voluntate vel actione susceptæ deleantur. Alioquin in crudelem Novatianorum sententiam relabentes , summæ Dei bonitati & clementiæ diffidere videremur. Ut ergo ad pœnitentiam confirmetur Christianorum lapsorum animus , atque ad spem divinæ gratiæ erigatur , proponendum illis est pœnitentiæ Sacramentum , & apertus in ablutionem sceleris fons irriguus indicandus , quo mundantur peccata , & hominum animæ ne pereant restaurantur. Omnes quidem à recidiva pro virili deterreamus , sed in toto corde suo conversis , & sinceram cordis mutationem operum testimonio probantibus Sacramentalis pœnitentiæ salutiferum offeramus remedium , quod ut Tertulliani verbis utar , cum provolvit hominem , magis relevat ; cum squallidum facit , magis mundatum reddit ; cum accusat , excusat ; cum

condemnat,



condemnat, absolvit; denique peccatorum fluctibus mersum proleuat, & in portum divinæ clementiæ protelat.

Dices: B. Ambrosius in Jure relatus: *Verbum Dei*, inquit, *dimittit peccata*, Sacerdos autem nullius potestatis jura exercet. Cui concinit Hieronymus in illum Matth. 12. locum, *Tibi dabo claves regni cœlorum*, ubi sic habet: *Hunc locum non intelligentes Presbyteri & Episcopi, aliquid sibi de supercilio Pharisaorum assumunt, ut vel damnent innocentes, vel absolvere se noxios arbitrentur; cum apud Deum non Sacerdotis sententia, sed reorum vita quærat. Ergo in Ecclesia non viget remittendorum peccatorum ulla potestas. Maximè quia S. Augustinus lib. de nupt. & concup. asserit, lavacro regenerationis non tantùm peccata præterita, sed etiam posterius admissa remitti. Unde videtur sufficiens Baptisina ad memoriam revocatum.*

Respondeo his testimoniis persuasum Magistrum Sententiarum, aliosque antiquiores Theologos arbitratos fuisse, Sacerdotem dum ait, *ego te absolvo*, non peccata remittere, sed à Deo remissa declarare; pertinere tamen verba illa ad Sacramentum pœnitentiæ, quia gratiam à Deo eo momento datam significant. Sed non videtur ea sententia doctrinæ Concilii Tridentini consentanea: *Si quis dixerit, inquit sess. 14. can. 9. absolutionem sacramentalem non esse actum judiciale, sed nudum ministerium pronuntiandi & declarandi remissa esse peccata confitenti, anathema sit.* Certè cum Sacramenta novæ Legis id efficiant quod significant, significetur verò præcipuè verbis

à Sacerdote prolatis remissio peccatorum, Sacerdotes verè peccata remittere fatendum est. Proportionaliter enim, ut ait D. Thomas, oportet loqui de Sacramentis & potestate ministrorum: unde sicut nostra Sacramenta à veteribus differunt, quòd Christiana gratiam, quam Mosaïca duntaxat figurabant, efficiunt; ita per eandem effectivam causalitatem differre ministros Evangelicos à legalibus certissimè tenendum est. Præsertim quia in Lege veteri pœnitentia non erat Sacramentum, quod Christus specialioris favoris præcipuâ dignatione Legi novæ concessit; unde & majorem nostris Sacerdotibus contulit potestatem. Vel si erat Sacramentum, ut vult Joannes à S. Thoma disp. 32. art. 2. in antiquis tamen statibus ab ea perfectione deficiebat, quâ in lege Evangelica eminet. Sed, ut verum fatear, hæc posterior sententia non videtur Concilio Tridentino consentanea.

Nec obstant adducta Ambrosii verba, quæ solum potestatem remittendi peccata principalem soli Deo eximiam, non ministerialem Evangelicis ministris communicatam excludunt. Hieronymus autem eorum duntaxat ignorantiam vel præsumptionem redarguit, qui datâ sibi potestate abutentes, & indignis beneficium absolutionis se posse impendere, & dignis denegare, innocentisque pro arbitrato damnare ineptissimè existimabant, cum apud Deum non Sacerdotum sententia (sola scilicet, & præsertim iniqua,) sed reorum vita & vitæ mutatio ad Sacerdotum sententiam præexigatur. Cæterum peccatores teneri sententiæ Sacerdotum & Ecclesiæ clavibus peccata sua supponere,

ponere, eamque Dominum quærere, apertissimis Evangelii locis demonstravimus. Unde Hilarius ponderans verba Christi ad Petrum, quibus ei claves regni cœlorum & cujusvis ligandi solvendi que contulit potestatem, sic ait can. 16. Comment. in Matth. *O beatus cœli janitor, cujus arbitrio claves aterni aditus traduntur, cujus terrestre judicium præjudicata auctoritas sit in cœlo, ut qua in terris aut ligata sint aut soluta, statuti ejusdem conditionem obtineant & in cœlo.*

Ad auctoritatem Augustini dicendum, cate-nus S. Doctorem tradidisse, Baptismo posteriùs admissa peccata remitti, quia Baptismo caractere Christianitatis signati sumus, quò jus habeamus ad Sacramentum pœnitentiæ, per illudque remissionem peccatorum suscipiendam. Subdit enim post verba objecta Sanctus Pater: *Quid enim prodesset vel ante baptismum pœnitentia, nisi baptismus sequeretur; vel postea, nisi præcederet.* His verbis significans, quod sicut pœnitentia ante baptismum esset inanis, nisi ad suscipiendum baptismum tenderet; ita frustra quæreretur Sacramenti pœnitentiæ salutare remedium, nisi baptismus præcederet, qui cum sit Sacramentorum omnium janua, omnium debet susceptioni præmitti. Verùm suscepto semel baptismate necessarium esse pœnitentiæ Sacramentum, epist. 23. luculenter tradit idem Doctor Sanctissimus his verbis: *Si parvulus baptizatus, grandævus factus, propria incoeperit habere peccata, per quam gratiam remittetur? Non regeneratione, sed alia curatione resarciri possunt.* Illam autem aliam

curationem Sacramentum pœnitentiæ semper Catholica existimavit Ecclesia.

Dices rursus: Si pœnitentia speciale foret novæ Legis Sacramentum, Christus illud alicubi, vel aliquando instituisset. Atqui nullibi legitur Christum Sacramentum pœnitentiæ instituisse, unde & aliqui Theologi illud ab Ecclesia institutum esse fatentur, ut S. Bonaventura, & Marsilius in 4. dist. 17. Ergo pœnitentia non est speciale Christianæ Legis Sacramentum.

Respondeo certissimum esse, Christum esse authorem Sacramenti pœnitentiæ. *Si quis dixerit*, inquit Tridentinum sess. 17. can. 1. *in Catholica Ecclesia pœnitentiam non esse verè & propriè Sacramentum à Christo Domino institutum, anathema sit.* Et certè cùm institutio Ecclesiæ non minùs ad operationem ministrorum præsupponatur, quàm opus creationis ad operationem causarum secundarum; aliunde verò Ecclesia fundetur in Fide & Sacramentis, consequens est ad ministros Ecclesiæ minimè pertinere sive novos fidei articulos edere, aut editos removere; sive Sacramenta nova instituere, aut instituta removere, vel commutare; sed ad eum duntaxat spectasse Sacramenta instituere, in quo excellentiæ potestas ad Ecclesiam supra tales bases fundandam residet: & hic solus est Christus Dominus, quia non est aliud nomen sub cœlo, in quo nos oporteat salvos fieri; & ipse est summus lapis angularis, cui tota Ecclesia subnixa est: fundamentum enim aliud nemo potest ponere præter id quod positum est, quod est Christus Jesus.

Quo

*Cap. I. Sacramentum Pœnitentiæ. 29*

Quo autem tempore instituerit hoc Sacramentum Christus, non conveniunt Doctores, sed diffidium determinat sacra Tridentina Synodus sess. 6. de justific. cap. 14. his verbis : *Et enim pro iis, qui post baptismum in peccata labuntur Christus Iesus Sacramentum instituit pœnitentiæ, cum dixit (Joan. 20.) Accipite Spiritum Sanctum : quorum remiseritis peccata, remittuntur eis ; & quorum retinueritis, retenta sunt.* Et sess. 14. cap. 1. *Fuit quidem pœnitentiæ universis hominibus, qui se mortali aliquo peccato inquinassent, quovis tempore ad gratiam & justitiæ assequendam necessaria. :: Porro nec ante adventum Christi pœnitentiæ erat Sacramentum, nec post adventum illius cuiquam ante baptismum.* Dominus autem Sacramentum pœnitentiæ tunc præcipuè instituit, cum à mortuis excitatus insufflavit in discipulos suos dicens : *Accipite Spiritum Sanctum, quorum remiseritis peccata, remittuntur eis ; & quorum retinueritis, retenta sunt.* Quo tam insigni facto, & verbis tam perspicuis potestatem remittendi & retinendi peccata, ad reconciliandos fideles post baptismum lapsos ; Apostolis & eorum legitimis successoribus fuisse communicatam, universorum Patrum consensus semper intellexit. Et Novatianos remittendi potestatem olim pertinaciter negantes, magna ratione Ecclesia Catholica tanquam hæreticos explosit, atque condemnavit. Quare verissimum hunc illorum verborum Domini sensum sancta hæc Synodus probans & recipiens, damnat eorum commentitias interpretationes, qui verba illa ad potestatem prædicandi verbum Dei, & Christi Evangelium annuntiandi, contra hujusmo-

*di Sacramenti institutionem falsò detor-*  
*quent.*

Ubi observandum est, sacram Synodum docere, quod Christus *Sacramentum pœnitentiæ tunc præcipuè instituit*, quia nimirum aliis locis Sacramentum istud Salvator insinuavit, ut cum ejus necessitatem inculcavit, & ligandi solvendique potestatem discipulis, Petro etiam claves regni cœlorum largiturum se promissit. Joannis tamen 20. præcipuè hoc Sacramentum instituit, quia tunc tribunal pœnitentiæ crexit, attributâ Apostolis eorumque legitimis successoribus judiciariâ remittendorum retinendorumque peccatorum potestate. Et certè convenienter hoc Sacramentum post resurrectionem usque distulit instituendum Christus; tum quia cum efficacia Sacramentorum ex plenitudine redundantis Passionis fluat, eâ peractâ, piscina probatica debuit ex sanguine Christi confici, in qua sin pleniùs, certè frequentius percipitur virtus Redemptoris. Tum quia in hoc Sacramento peccator resurgit, subindeque pœnitentiæ est Christi resurrectionis imago, quam debuit præcedere archetypus, ut per pœnitentiam non solum Christi resurrectionem exprimamus, sed in peccata non recidentes modum resurrectionis ejus æmulemur, qui in eo positus est, quod *Christus resurgens ex mortuis jam non moritur, mors illi ultra non dominabitur. Quod enim mortuus est peccato, mortuus est semel; quod autem vivit, vivit Deo*, ut dicitur Rom. 6.

Dices 3. Absque Sacramento pœnitentiæ per veram sinceri cordis contritionem obtineri potest remissio peccatorum; contritionem enim

Cap. I. Sacramentum Pœnitentia. 31

ex natura rei comitatur gr̃atia , quæ cum peccato impossibilis est : unde juxta Scripturas & Patres , ut contritionem mente concepimus , peccatorum veniam statim impetramus ; nèque enim minorem habet in lege nova vim contritio , quàm haberet in lege Mosàica atque in lege naturæ , in quibus nullum erat institutum pœnitentiæ Sacramentum. Ergo sola contritio , sola charitas sufficiunt ad operiendam multitudinem peccatorum. Nam Magdalenæ remissa scimus peccata multa, *quoniam dilexit multum* , ut dicitur Luc. 17. Et Isaia 30. juxta versionem Septuaginta legimus: *Cùm reversus ingemueris , tunc* ( id est nullâ interpositâ morâ ) *salvus eris*. Vel ut habet editio vulgata : *Hac dicit Dominus Deus sanctus Israël : Si revertamini , & quiescatis , salvi eritis*. Ad quem locum alludens Cœlestinus Papa in epist. ad Episcopos Gallia , cap. 2. *Vera conversio* , inquit , *mente potius quàm tempore metienda est* , dicente Propheta : *Si conversus fueris , salvus eris*. Succinit Magnus Leo epist. 91. *Misericordia Dei nec mensuras possumus ponere , nec tempora definire , apud quem nullas patitur venia moras vera conversio* , dicente Spiritu Dei per Prophetam : *Cùm ingemueris , tunc salvus eris*. Certè cùm plenitudo legis sit dilectio , & Christianismi character sit charitas , cuncta scelera , quæ animam inquinant , ubi charitas fuerit , solvantur necesse est. *Sicut ignis* , ait Chrysostomus hom. 2. in 1. epist. ad Timot. *ubi sylvam occupaverit , omnia purgare consuevit ; ita & charitatis fervor quòcumque inciderit , omnia perimit atque perrumpit , quæ divinam segetem demoliuntur*.



32 *Lib. XI. Pars III. Dissert. unica.*

*emundatque humum suscipiendis atque fovendis  
altè seminibus. Vbi charitas est, omnia sublata  
sunt mala.*

Respondeo Sacramentum pœnitentiæ esse  
medium ad peccata post baptismum commissa  
delenda omninò necessarium. *Est autem hoc  
Sacramentum pœnitentia*, ait Tridentinum  
sess. 14. cap. 2. *lapsis post baptismum ad salu-  
tem necessarium, ut nondum regeneratis ipse  
baptismus.* Sicut ergo vis charitatis & contri-  
tionis, quantaquanta sit, necessitatem baptis-  
matis non excludit, ita nec Sacramenti pœni-  
tentiæ saluberrimam medicinam in re, vel cer-  
tè in voto susceptam eliminat. Unde eadem  
sancta Synodus sess. 14. cap. 4. sic habet: *Docet  
præterea ( Sancta Synodus ) etsi contritionem  
hanc aliquando charitate perfectam esse contin-  
gat, hominemque Deo reconciliare, priusquam  
hoc Sacramentum actu suscipiatur; ipsam nihilo-  
minus reconciliationem ipsi contritioni sine Sa-  
cramenti voto, quod in illa includitur, non esse  
ascribendam.* Quam sanè doctrinam Sacrum  
Concilium ex Scripturis & Patribus depromp-  
sit: cùm enim Salvator Petro & Apostolis, eo-  
rumque legitimis successoribus claves regnì  
cœlorum concesserit, manifestè hac loquendi  
formula significavit, quod quemadmodum sine  
clavi aperiante januam non patet ad domum  
occlusam aditus, ita tandiu referatum erit  
ostium regnì cœlorum, quaudiu januam cœli,  
quam nobis peccatis nostris occlusimus, suâ  
non aperuerint Sacerdotes remittendorum pec-  
catorum potestate. *Multipla misericordia Dei,*  
inquit Magnus Leo epist. 91. *ita lapsibus sub-  
venit humanis, ut non solum per baptismi gra-  
tiam*



Cap. I. Sacramentum Pœnitentia. 33

tiam, sed etiam per pœnitentia medicinam, spes vita reparetur aterna: ut qui regenerationis donum violassent, proprio se iudicio condemnantes, ad remissionem criminum pervenirent: sic divina bonitatis præsidiis ordinatis, ut indulgentia Dei nisi supplicationibus Sacerdotum nequeat obtineri. Mediator enim Dei & hominum homo Christus Iesus hanc Ecclesia praposisit tradidit potestatem, ut & conscentibus actionem pœnitentia darent, & eosdem salubri satisfactione purgatos ad communionem Sanctorum per januam reconciliationis admitterent. Id ipsum docuit Augustinus lib. I. de adulter. conjug. cap. ultimo: Qua baptismatis, inquit, eadem reconciliationis est causa, si fortè pœnitentem finienda vita periculum preoccupaverit: nec ipsos enim ex hac vita sine arrha sua pacis exire velle debet mater Ecclesia.

Ex quibus sine negotio occurrere est argumento facto, cum catenus contritione etiam charitate formatâ peccata remittantur, quatenus in ea votum Sacramenti pœnitentiæ, cui Deus remissionem peccati in favorem honoris divini hac reparatione refarciendi alligavit, continetur. Præsertim quia quâlibet magnus videatur esse contritionis dolor, de ejus tamen sufficientia semper Patres dubitarunt, nobisque dubitandi rationem inculcarunt, donec fuerit pœnitentiæ Sacramento ratus factus, & Sacerdotis sententiâ confirmatus: Si ministri desint, inquit Augustinus epist. 118. ad Honoratum, quantum exitium sequitur eos, qui de isto saeculo vel non regenerati exeunt, vel ligati. Et Magnus Leo supra laudatus: Si autem aliter

quis eorum pro quibus Domino supplicamus, quocumque interceptus obstaculo, à munere indulgentia presentis exciderit, & priusquam ad constituta remedia perveniat, temporalem vitam humanâ conditione finierit; quod manens in corpore non receperit, consequi exutus carne non poterit. Nec necesse est nos eorum qui sic obierint merita actusque discutere; cum Dominus Deus noster, cujus iudicia nequeunt comprehendere, quod Sacerdotale ministerium implere non potuit, sua iustitia reservaverit: ita potestatem suam timeri volens, ut hic terror omnibus proficiat, & quod quibusdam tepidis aut negligentibus accidit, nemo non metuat. Multum enim utile ac necessarium est, ut peccatorum reus ante ultimum diem Sacerdotali supplicatione solvatur. Vides ergo contritionis quemlibet fervidum motum non sufficere nisi vel in re, vel certè in voto clavibus Ecclesiæ supponatur; nec plenam invehere securitatem, nisi peccatorum vincula Sacerdotum potestate rumpan-  
t.

### R E F L E X I O.

Nisi pœnitentiam egeritis, omnes similiter peribitis. Duplex est ad salutem via, innocentia scilicet, & pœnitentia. Ergo omnes criminis reos, & perditæ peccatis innocentiae conscios æternum sine pœnitentia perituros fatendum est. Et tamen credit Ambrosius plures esse innocentiae custodes (quod tamen in hoc sæculo nequam instar prodigii est) quàm veræ pœnitentiæ. Facilius, inquit, inveni, qui innocentiam servaverint, quàm qui congruè egerint pœnitentiam.

de pœnit. lib. 2. c. 10. Quia nimirum multi se assidue, ut Augustinus ait, dicunt peccatores, & tamen eos peccare delectat: professio est, non emendatio; accusatur anima, non sanatur. Si testantibus Patribus, & definiente Tridentino, ad pœnitentiam non sufficit morum in melius mutatio, & novæ vitæ susceptio, nisi Deo per dolorem, per lacrymas, per contriti cordis & castigati corporis sacrificium satisfiat; ubinam gentium, quæso, pœnitentes invenire est, cum peccatores non solum peccata non desceant, cor dolore non scindant, corpus satisfactoribus non macerent; sed etiam mores in melius non mutant, peccata peccatis cumulantes, apponentes iniquitatem super iniquitates suas, vitæ conversionem verbis pollicentes, factis autem negantes? Anima pœnitens rugit in gemitu cordis sui, miserque facta & curvata usque in finem, tota die contristata ingreditur, & teste Propheta Baruch 2. *tristis est super magnitudine mali, & incedit curva, & infirma, & oculi deficientes*. Ergone pœnitentibus accensendi sunt illi circumornati ut similitudo templi, auro rutilantes, unguentis oblitii, pigmentis effœminati; quos, ut ait Chrysostomus, diceret ad Ecclesiam pergere saluturos, & in domo Dei lasciviæ oblectamenta quærere? Itane benè convenit pœnitentia cum fœricis, & monilibus, & ludis, & choreis, & comœdiis eodem die ab huiusmodi laryvatis pœnitentibus susceptis? Illine pœnitentes reputandi sunt, qui nec præterita mala plangunt, nec plangendo devitant; qui dolent damnum pecuniæ, & non dolent damnum iustitiæ; qui post temporalium jacturam omni merore &

dedunt, post animam perditam vix moventur.  
 Verus penitens ob gehennæ metum, ob repa-  
 randam læsæ Dei majestatis injuriam confi-  
 gens timore carnes suas, & amore voluntatem  
 accendens, levia arbitraturs asperrimæ onera  
 pœnitentiæ, quia qui timet Deum, nihil trepi-  
 dabit; qui timet Dominum, in mandatis ejus  
 volet nimis, & verus amor difficultatis no-  
 men erubescit. Quomodo ergo pœnitenti-  
 bus annumerabimus, quos unius diei jeju-  
 nium, unius horæ oratio, unius Evangelii, vel  
 Thomæ à Kempis, vel Granatensis capituli  
 lectio, ipsa etiam fastiis abdicatio, ipsa co-  
 mellationum interpolatio fatigat & penè op-  
 primit? Ergo rara est, & ferè nulla pœnitentia,  
 non impio & crudeli Novatianorum sensu,  
 qui eam gementibus sincerè conversis dene-  
 gabant, sed Catholicorum abusu, non in to-  
 to corde suo, sed in mendacio revertentium,  
 dolosè agentium in conspectu Dei, labiis do-  
 losis in corde & corde loquentium, malitiam  
 non odientium, astantium omni viæ non bo-  
 næ, & *qua humilitate sermonis accusant, corde*  
*perverso complectentium*, ut S. Fulgentius ait.

Si Princeps Apostolorum baptizandos, qui-  
 bus unda sacra & culpam, & omnis reatum  
 pœnæ remissura erat, ad pœnitentiam, ut pater  
 Actorum 18. hortatur, qualis debet eorum  
 esse pœnitentia, quos à peccatis baptismate  
 mundatos inhonestius maculat iterata facino-  
 rum turpitude? Hanc consequentiam deducit  
 & ponderat Magnus Gregorius lib. de cura  
 Pastoralis, part. 3. admonit. 31. *Illos emendatio-  
 vita sanctificat, quos per pœnitentiam abluens*  
*afflictio fletuum mundat. Hinc Petrus quos-*  
*dam*

dam, cùm terribiles malorum suorum consideratione conspiceret, admonet dicens: Pœnitentiam agito, & baptizetur unusquisque vestrum. Dicturus enim baptismum, pramisit pœnitentia lamenta; ut prius se aquâ suâ afflictionis infunderent, & postmodum Sacramento baptismatis lavarent. Qua ergo mente, qui transactas culpas flere negligunt, vivunt securi de venia, quando ipse Summus Pastor Ecclesie, huic etiam Sacramento addendam pœnitentiam credidit, quod peccata principaliter extinguit?

## SPECVLATIO II.

*Essentia & partes Sacramenti pœnitentia exponuntur.*

**Q**uia omne Sacramentum novæ legis rebus & verbis essentialiter constat, ut ex dictis de Sacramentis in genere satis liquet, essentiam Sacramenti pœnitentiæ tradiderimus, si quâ constat materiâ expositâ, singulas ejus partes, cùm essentielles, tum integrales accuratâ brevitate in hac speculatione explicemus, in sequenti formam hujus Sacramenti exposituri.

*Materia Sacramenti pœnitentiæ proxima sunt actus pœnitentis.*

Hanc veritatem expressè docet Tridentinum sess. 14. can. 4. Si quis negaverit, ad integrum

gram & perfectam peccatorum remissionem requiri tres actus in pœnitente, quasi materiam Sacramenti pœnitentia, videlicet contritionem, Confessionem, & satisfactionem, qua tres pœnitentia partes dicuntur, anathema sit. Ratio verò petitur ex discrimine quod intercedit inter pœnitentiam & matrimonium ex una parte, & cætera Sacramenta ex alia. Etenim in Sacramentis gratiam superabundantem magis ex opere operato quàm ex opere operantis conferentibus materia est res merè sensibilis & externa, ut significetur effectum Sacramenti, effusam scilicet gratiæ plenitudinem, à Deo duntaxat proficisci; quippe qui solus tam visibilibus elementis stupenda gratiæ miracula operari potest; quippe, ut ait Psalmographus, *facit mirabilia magna solus*. Sic in Baptismo, Confirmatione, Eucharistia, Extrema-unctione, & Ordine, actus humani non sunt materia Sacramenti, sed unam meræ dispositionis rationem habent, quâ ad gratiam Sacramentalem suscipientis animus præparetur, peccatorumque, si quæ sint, voluntarii obices removeantur. Cujus etiam signum est, quod gratia baptismalis, cujus tanta est vis, tantaque copia, ut non solum ab omni culpa, sed à cujusvis pœnæ reatu peccatorem innumeris peccatis sordentem, verè tamen contritum liberet & prorsus eximat; hæc, inquam, tanta gratia pueris eliciendo ulli actui imparibus datur: & alia etiam relata Sacramenta valida essent, etiam si nulli elicerentur à suscipientibus actus virtutum, quonvis tunc vel illicita prorsus, si suscipiens esset in peccato mortali, cui eluendo virtutis operatio necessaria esset, vel certè parum fructuosa.

etiosa foret tam jejuna susceptio. At verò in pœnitentia & matrimonio res aliter se habet; effectus enim huic duplici Sacramento correspondentes ita actus humanos supponunt, ut sine ipsis nec esse, nec intelligi quidem possint. Cùm enim in pœnitentia convertatur ad Deum peccator, essentialiter actus pœnitentis desiderantur; ut sicut per actum proprium à bono incommutabili recessit, ita & per proprium motum ad ipsum revertatur; nec poterit unquam sine vera pœnitentia Sacramentum consistere Pœnitentiæ. Similiter cùm matrimonium sit contractus humanus, sine consensu partium verbis vel signis expresso constare nequaquam potest. Ergo sicut in medicinis corporalibus, quædam exterius adhibitis constant adjumentis, ut vñctionibus, lotionibus, cataplasmatibus; quædam verò sunt ipsimet sanandorum actus, ut exercitationes & dietæ: ita in Sacramentis, quorundam materia externa est, & ab aliis applicatur; aliorum verò materia ab ipso suscipiente propriis actibus intus incipientibus, sed foris prodeuntibus ministratur.

Dices: Ergo pœnitens erit minister Sacramenti pœnitentiæ, cùm materiam ministret, partialiter Sacramentum efficiat, eiusque effectum ex parte producat. Consequens autem est in Ecclesia Catholica inauditum: Ergo antecedens, unde deducitur, à veritate alienum est.

Respondeo id non sequi, quia qui solam materiam ministrat, Sacramentique effectum solius exhibitione materiæ producit, minister appellari non consuevit; sed ille solus minister dicitur,

dicitur ; qui formam , quæ dat speciem rei , apponit : sicut non dicitur architectus , qui lapides construendo ædificio portat , sed qui paratos in ordinem & figuram ædificiæ appositè disponit.

Porro illi actus pœnitentis alii non sunt , quàm qui à Tridentino enumerati sunt , contritio scilicet , confessio , & satisfactio. In primis enim quod requiratur confessio , satis per se patet , cùm in omni iudicio intervenire debeat accusatio rei iudici nota ; in hoc autem foro accusator est , qui se non nisi confessione sincerâ accusat. Quod verò desideretur etiam essentialiter contritio , inde convincitur contra Durandum , quia nuda peccatorum externaque confessio , ab interno animi sese accusantis dolore non proficiscens , historica solum narratio est , peccata quidem prodens , sed Sacramentum pœnitentiæ minimè constituens. Et quanvis contritio interior non sit sensibilis immediatè & ratione sui ( ut tacitè fundamentum Durandi convellatur ) benè tamen mediatè , mediis scilicet humilibus confessionis lamentis ; quod sufficit , ut contritio sit signum Sacramentale , quia cognita per confessionem ducit nos in illius effectûs spiritalis cognitionem , quem virtus divina operatur. Denique exigì satisfactionem inde monstratur , quod ad perfectionem iudicii omninò requiritur ut pœna reo , satisfactio læso imponatur. Cujus etiam convenientias sic præclare prosequitur Tridentinum sess. 14. cap. 8. *Sanè & divina iustitiæ ratio exigere videtur , ut aliter ab eo in gratiam recipiantur , qui ante baptismum per ignorantiam deliquerint ; aliter verò qui semel*



à peccati & Damonis servitute liberati, & accepto Spiritus sancti dono scienter templum Dei violare, & Spiritum sanctum contristare non formidaverint. Et divinam clementiam decet, ne ita nobis absque ulla satisfactione peccata dimittantur, ut occasione acceptâ peccata leviora putantes, velut injurii & contumeliosi Spiritui sancto in graviora labamur, thesaurizantes nobis iram in die ira. Procul dubio enim magnopere à peccato revocant, & quasi frano quodam coercent hæc satisfactoria pœna, cautioresque & vigilantiores in futurum pœnitentes efficiunt; medemur quoque peccatorum reliquiis, & viciosos habitus male vivendo comparatos contrariis virtutum actionibus tollunt. Neque verò securior ulla via in Ecclesia Dei unquam existimata fuit ad amovendam imminentem à Domino pœnam, quàm ut hæc pœnitentia opera homines cum vero animi dolore frequentent.

Ejusdem etiam materiæ proximæ in actibus illis pœnitentis sitæ congruentiam egregiè tradit Catechismus Romanus: quia cum animo, verbis, & re peccata in Deum committamus, consentaneum est, ut nos ipsos Ecclesiæ clavis subicientes, quibus rebus Deus à nobis iniquè violatus est, iisdem etiam ejus iram placare, honorem reparare, & peccatorum ab eo veniam impetrare conemur, cordis nimirum contritione, oris confessione, & salutarium operum satisfactione. Sanè cum pœnitentia sit voluntaria & seria delictorum compensatio, ab ejus voluntate profecta qui deliquit, ac Dei arbitrio, in quem peccatum est, constituta; prorsus & compensandi voluntas requiritur,

in quo maximè contritio versatur; & pœnitens Sacerdotis vices Dei gerentis iudicio se humili confessione subijciat necesse est, & constitutam ab eo pro scelerum magnitudine pœnam veraci satisfactione subire tenetur.

Dices: Ipsum Tridentinum actus pœnitentis *quasi materiam* appellat: Ergo non censet actus pœnitentis esse veram hujus Sacramenti materiam proximam.

Respondeo sacrum Concilium hac particula diminuente, *quasi*, discrimen duntaxat voluisse indicare, quod inter hujus & aliorum Sacramentorum materiam intercedit, in hoc consistens, quod aliorum Sacramentorum materia est res aliqua naturalis, vel arte effecta; Sacramenti verò pœnitentiæ materia sunt operationes pœnitentis jam expositæ, quæ cùm in pœnitente ad integritatem Sacramenti, & plenam peccatorum remissionem ex Dei institutione requirantur, hac ratione materia & partes essentielles pœnitentiæ meritò dicuntur. *Neque verò hi actus*, inquit Catechismus Romanus laudatus, *quasi materia à Sancta Synodo appellantur, quia vera materia rationem non habeant; sed quia ejus generis materia non sint, quæ extrinsecus adhibeatur, ut aqua in Baptismo, & chrisma in Confirmatione.*

Dices iterum: Verba absolutionis de præseati significant remissionem peccatorum, nondum inchoatâ satisfactione: Ergo eam ante satisfactionem producant, subindeque ante illam Sacramentum pœnitentiæ peragitur: Ergo satisfactio non est materia Sacramenti pœnitentiæ, cùm materia formam non subsequatur, sed ei supponatur & substernatur, ut ab ea perficia

perficiatur. Maximè quia in aliquo casu validum est & licitum sine satisfactione Sacramentum pœnitentiæ, ut cum quis contritus, confessus, & absolutus repentinâ morte abripitur, nondum inceptâ vel expletâ satisfactione.

Ad hanc difficultatem prompta & expedita pateret responsio, si mos ille teneretur, qui per duodecim sæcula in Ecclesia vixit; ut nimirum posteaquam peccatores omnia cordis vulnera Sacerdoti aperuissent, idonea illis curandis remedia ab ipsis acciperent, quibus scilicet & satisfactionis modus consentaneus imponeretur, & secundum peccatorum differentiam pœnitentiæ tempora decernerentur, ut ait Concilium Carthaginense I II. can. 31. & tempus à Sacra Eucharistia abstinendi, ut docet Concilium Turonense III. can. 22. præscriberetur, & per necessaria temporis remedia obducerentur cicatrices, sicut loquitur Clerus Romanus in epist. ad Cyprianum.

In illis ergo beatis fortunatisque temporibus, in quibus & austerior erat pœnitentia, & culpa rarior, primum peccator peccata confitebatur & pœnitentiam postulabat: pœnitentiam deinde cum consiliorum necessariorum præfatione Sacerdos imponebat: impositam pœnitentiam postea pœnitens implebat, certum ac fixum animo habens, eo se Deum mitiorem ac placabiliorem experturum, quo in seipsum foret severior, juxta illud Augustini serm. 34. de diversis: *Sit oportet in se severius, ut in eum sit misericors Deus.* Illud etiam S. Paciani in paræn. ad pœnitent. *In quantum pœnæ vestra non peperceritis, in tantum Deus vobis parcat.* Post exactam lacrymarum, vigiliarum,

zum, orationum, jejuniorum, & aliarum exercitationum pœnitentiam, sic contrito & humiliato absolutionem, & continuò Sacram Eucharistiam in veræ reconciliationis pignus, signaculum & complementum, cumulum & consummationem, ac velut coronidem Sacerdos impertiebat. Hujus porrò antiquæ & communis olim consuetudinis probationes nonnullas dedimus dum de usu Eucharistiæ, ampliores dabimus inter agendum de absolutione peccatoribus in peccata mortalia relabentibus dene-ganda. Hujus etiam moris meminit tum Leo Magnus epistol. 91. docens concessam Sacerdotibus potestatem in eo versari, *ut confitentibus actionem dent, & eosdem salubri satisfactione purgatos ad communionem Sacramentorum per januam reconciliationis admittant.* Quod & apertè indicat S. Eligius homil. 11. his verbis: *Confessio pœnitentiam monstrat: pœnitentia satisfactionem ostendit: satisfactio veniam sibi divina pietate conciliat.* Cui affine est illud multò antea à Tertulliano de pœnit. cap. 9. prolatum: *Satisfactio confessione disponitur: confessione pœnitentia nascitur: pœnitentia Deus mitigatur.* Quod & confirmat S. Gregorius Papa lib. 16. in 2. Reg. cap. 15. dum ait: *In fructu, non in foliis aut ramis pœnitentiam esse cognoscendam. Confessionis verba nihil aliud esse nisi folia, adeoque non nobis folia propter ipsa, sed propter fructum expetenda. Quia idcirco omnis confessio peccatorum recipitur, ut fructus pœnitentia subsequatur.* Et sanè eò spectasse videtur Concilium Tridentinum, dum definivit omnia peccata non in genere duntaxat, sed in specie & sigillatim esse Sacerdoti aperienda,

aperienda, ut rector animarum, perspicuâ illorum cognitione acceptâ, in piacularibus pœnis præscribendis æquitatem, & ad delicta proportionem tenere queat. Si autem confessio via est & medium divinitus institutum ad pœnitentiam imponendam; si rursus pœnitentia & satisfactio ex Patribus memoratis ad reconciliationem & absolutionem, atque adeo ad sacram Communionem, reconciliationis complementum, via & gradus est, proculdubio prius imponebatur, priusque peragebatur consentanea gravitati peccatorum pœnitentia, quàm peccator ad absolutionem & Eucharistiam admitteretur.

Verumtamen quia jam Ecclesia satisfactionis absolutioni præmittendæ necessitatem non omnibus indicit, præsertim ubi perpetuus in iterata flagitia relapsus non contingit; præsentem autem Ecclesiæ sine prævia pœnitentia absolvendi morem non modò damnare nemo potest, sed etiam quandiu ex Ecclesiæ mente observatur, à nemine sine magno errore damnari posse certissimum est; quia ipsa Ecclesia, quæ corpus Christi mysticum est, de spiritu Christi vivens, ab ipso Salvatore perpetuam in continua temporum vicissitudine unitatem, & inviolabilem in præscribendis tum fidei, tum morum regulis infallibilitatem jugiter accipit; idcirco argumentum solvendum nobis incumbit; unde

Respondeo satisfactionem quæ sequitur absolutionem, non posse habere rationem partis essentialis, sed tantum integralis, ut convincit argumentum, ut etiam apertè tradit Catechismus Romanus, his verbis : *Pœnitentia ex hisce*  
*tribus*

tribus partibus ita constituitur, ut quavis quoad ejus naturam attinet, contritio & confessio, quibus homo justus efficitur, satis sit; tamen nisi tertia etiam pars, idest satisfactio accedat, aliquid ei omninò ad perfectionem desit necesse sit. Licet porro materiam essentialem formæ sub-  
sterni necesse sit, integram tamen eam subsequi sæpe contingit; nam hominem formatum consequuntur dentes, & statura; arborum productam integrant dimensiones & rami: quæ omnia si deessent, merito diminutus homo & arbor imperfecta dicerentur. Accusatio quoque testium, sententia judicis, solutio pœnæ; cum non sint simul, sunt tamen de integritate judicii: & in omnibus, quorum partes quemdam successionis ordinem habent, non oportet singulas simul coëxistere. Hæc ergo tria totam, integramque pœnitentiam constituunt, quæ teste Chrysostomo hom. 29. ad popul. Antioch. consummata ut sit, debet in corde contritio, in ore confessio, in opere humilitas & fructifera satisfactio inveniri.

Instabis: Impositio satisfactionis non est pars integralis pœnitentiæ, neque quoad materiam, cum pœnam non sibi imponat, sed recipiat impositam reus; neque quoad formam, cum in prolatione verborum ab Ecclesiæ ministris adhibitorum non exprimatur: ergo propter paritatem rationis satisfactio etiam non est pars integralis pœnitentiæ.

Respondeo, omissis variis solutionibus, impositionem satisfactionis, sicut & ipsam satisfactionem, esse partem materiæ & formæ per modum complementi & integritatis utriusque; formæ quidem, quia hanc requirit judicium perfectum;

perfectum; materiæ verò, quia eam petunt, illique se subiiciunt actus pœnitentis.

Urgebis: Si satisfactio Sacramentum pœnitentiæ vel constitueret, vel integraret, gratiam ex opere operato produceret; pars enim Sacramenti naturam & virtutem Sacramenti participat: unde cùm de ratione Sacramenti sit gratiam ex opere operato producere, id etiam satisfactioni convenire necesse esset. Atqui satisfactio gratiam Sacramenti pœnitentiæ non producit, sed à Sacerdote absolvente productam supponit: maximè quia alioquin, qui in peccato mortali injunctam sibi pœnitentiam adimpleret, mortalem in culpam incurreret, utpotè Sacramentali gratiæ à satisfactione profecturæ obicem ponens. Ergo satisfactio neque essentialiter, neque integraliter ad Sacramentum Pœnitentiæ pertinet.

Respondeo quod licèt satisfactio gratiam ex opere operato non produceret, à ratione tamen partis integralis Pœnitentiæ minimè deficeret: tum quia, ut ait D. Thomas in 4. dist. 16. quæst. 1. art. 1. quæstiunc. 2. ad 3. *ex proposito satisfaciendi gratia confertur, quanvis satisfactio actualis gratiam prasupponat.* Sufficit autem ut sit pars integralis Sacramenti, quod ex proposito satisfaciendi gratia conferatur, cùm illud propositum inane & inefficax meritò habendum sit, quod intentam satisfactionem opere non complet. Tum quia, ut ibidem ait S. Doctor, *per satisfactionem consequitur pœnitens perfectum effectum gratia peccatum abolentis, quia liberatur totaliter à reatu peccati.* Illud autem meritò pars Sacramenti censendum est, quod ad perfectum gratiæ sacramentalis



talis effectum, reatum scilicet pœnæ tollendum, concurrir.

Verùm idem S. Doctor 3. p. quæst. 90. art. 2. aliquid ampliùs satisfactioni tribuere videtur, eam nimirum augmentum gratiæ habitualis conferre, ait enim: *Dicendum quod satisfactio confert gratiam, prout est in proposito, & augee eam prout est in exequutione, sicut etiam Baptismus in adultis, ut supra dictum est.* Ideo ne ab hac assertionem, quâ opera, satisfactoria à Sacerdote imposita immensum commendantur, recedam: respondeo ad argumentum, quod licet satisfactio gratiam essentialem Sacramenti à Sacerdote productam supponat, ejusdem tamen gratiæ complementum & consummationem ipsa producit, si tamen conditionibus ad satisfaciendum necessariis non careat. Conditiones autem ad satisfaciendum requisitæ eadem fermè sunt, quas ad merendum in tractatu de merito desideravimus, nimirum primò status gratiæ, quia sine charitate nihil prodest ad salutem; secundò status viatoris, post quem *venit nox, quando nemo potest operari*, ut dicitur Joan. 9. Tertiò opus bonum, quia malum opus non pœnæ satisfacit, sed novam pœnam meretur. Quartò opus liberum, vel liberè acceptum, qualia sunt flagella à nobis quidem non suscepta, patienter tamen dum à Deo infliguntur tolerata: quia quod coactè & invitè facimus, nullius pretii apud illum est, qui cor sibi potissimum præberi postulat. Quintò opus pœnale, quo peccator quantum se glorificavit, tantum suscipit tormenti & luctûs; justum est enim, ut Magnus Gregorius ait, ut peccator tantò majora sibi inferat lamenta per  
pœni



pœnitentiam, quantò majora sibi intulit damna per culpam. Non ita tamen requiritur opus pœnale, ut pœna sentiatur; sæpe enim filii Dei accensâ in Deum charitatē, quæ per se gravia sunt, ne sentiunt quidem. Unde omnibus pietatis & virtutum christianarum operibus vim satisfaciendi asserimus, quia etsi amanti vel exercitato levia sint, naturæ tamen corruptæ per se molesta sunt. Sextò exigitur opus supernaturale, vel à motivo supernaturali proficiens; quia enim opera satisfactoria ad finem supernaturalem citius saltem consequendum referuntur, nisi supernaturalia sint, finem illum non obtinebunt, cum finem inter & media proportionem esse necesse sit. Denique libera & gratuita Dei acceptatio requiritur, quia opera nostra innumeris titulis sibi debita, & pœnam peccatis debitam minimè adæquantia nihil ad satisfaciendum prodesse, nisi eis misericordiâ suâ contentus foret.

Utrum autem pœnitentia & satisfactio in peccato mortali peracta peccatum sit, quod obicem gratiæ ex ea manaturæ, si in gratia fieret, ponat, affirmare non ausim; tum quia satisfactionem gratiam sacramentalem producere non est admodum certum, idque duntaxat constans est, opera satisfactoria, ut sunt partes integrales Sacramenti, à pœnæ reatu liberare; gratiam verò tum augere, cum aliis ad merendum conditionibus instructa sunt, quod omnibus pietatis operibus commune est. Tum quia etiamsi sacramentalis gratiæ complementum & veluti coronidem satisfactio conferat, non videtur tamen Sacramento injurius, qui gratiæ essentiali Sacramenti obicem non po-

suit, tametsi ejus ultimum fructum non recipiat. Tum maximè, quia ex pia Ecclesiæ praxi & consuetudine patet, diuturnas gravioribus & inveteratis peccatoribus pœnas imponi, quos tamen in aliquod peccatum mortale naturæ imbecillitate ruituros probabile, aut certè periculosum est; illos tamen à pœnitentia imposita post peccatum Sancti non eximunt, sed ad ea potiùs peragenda & augenda hortantur; tum ut pœnitendi præcepto satisfaciant; tum ut ad similia opera, quando in gratiam redierint, faciliùs elicienda disponantur; tum quia, licèt opera satisfactoria in peccato elicita nihil profint, effectus tamen qui transeuntibus satisfactionis actibus remanet, putà attenuatio & maceratio corporis ex jejuniis, rerum ex elemosinis imminutio, Deo in satisfactionem, recuperatâ tandem gratiâ, offerri poterunt. In hoc tamen futuri peccati periculo author essem, ut Sacerdotes pœnitentiam aliquam ad integrandum Sacramentum brevi perficiendam imponerent; diuturniorem verò in medelam peccati auctoritate judicis, cui obtemperare rei tenentur, præciperent, ut hac ratione satisfactio Sacramentalis in statu gratiæ peragatur, & vindicta tamen de peccatis præteritis sumatur, & futuris quoque lapsibus prudenti cautione provideatur. Pœnitentias porrò & satisfactiones à Sacerdote impetratas vim quandam singularem ac præcipuam obtinere Patres consentiunt. *Afflictiones pœnitentia*, inquit Magnus Gregorius lib. 3. in 1. Reg. *ad delenda peccata tum demùm idoneæ sunt, cùm Sacerdotis fuerint judicio imperata.*

*Remota Sacramenti Pœnitentia materia peccata sunt.*

Hæc positio facilis probatu est : illa enim materia remota alicujus appellatur , circa quam proxima versatur : at materia proxima pœnitentiæ , quæ sunt actus pœnitentis , circa peccata , de quibus dolet contritio , quæ Ecclesiæ clavibus subjicit confessio , quæve emendat satisfactio , occupatur : Ergo peccata sunt remota Sacramenti pœnitentiæ materia ; aliter tamen , & aliter . Nam peccata mortalia sunt materia necessaria ; sufficiens verò sunt venialia ( de quibus potest esse dolor & confessio ) & mortalia aliàs confessa . De mortalibus & venialibus quod diximus , tradit apertè Tridentinum sess. 14. cap. 5. *Venialia* , inquit , quibus à gratia Dei non excludimur , & in qua frequentius labimur , quamquam rectè & utiliter , citraque omnem presumptionem in confessione dicantur , quod piorum hominum usus demonstrat , taceri tamen citra culpam , multisque aliis remediis expiari possunt . Verùm cum universa mortalia peccata , etiam cogitationis , homines ira filios & Dei inimicos reddant , necessum est omnium etiam veniam cum aperta & verecunda confessione à Deo quarere . Itaque dum omnia , quæ memoria occurrunt peccata , Christi fideles confiteri student , procul dubio omnia divina misericordia agnoscenda exponunt ; qui verò secus faciunt , & scienter aliqua retinent , nihil divina bonitati per Sacerdotem remittendum proponunt : si enim erubescat agrotus vulnus me-

*dico detegere, quod ignorat medicina non curat.*  
 Quod verò diximus de peccatis aliàs confessis, hinc patet, quòd variatâ materiâ proximâ, eadem potest materia remota in Sacramentis adhiberi: unde sicut eâdem aquâ, diversâ tamen ablutione plures possunt diverso tempore baptizari, eodem chrismate plures distinctis chrismationibus confirmari: ita eadem peccata distinctis contritionibus & confessionibus absolvi. Et quanvis de eadem causa bis non feratur in foro humano & contentioso iudicium, quia politica iudicia ad liberandos innocentes, puniendos foris reos, litesque in infinitum procedentes compescendas ordinantur: attamen in foro conscientiæ Sacerdotum sententia, quæ ad sanctitatem animæ interiorē instituta est, ad augendum pium, in quem tendit, animarum fructum spiritalem iterari potest.

Quid verò dicendum sit de peccatis dubiis, paucis accipe. Vel dubium est, an peccata sint mortalia vel venialia, & tunc sine dubio huic tribunali exponenda sunt, ut Sacerdos, cujus est inter lepram & lepram distinguere, iudicet feratque sententiam. Si verò dubium sit an peccata illa quæ certò mortalia creduntur admiseris, ea etiam sub dubio confiteri teneris, adiunctis aliis quæ certam materiam præbeant; quia & illa omittere periculosum est, quæ fortassis commissa sunt; & illa sola exponere, quibus irritum fieret Sacramentum, falsæ materiæ, si fortè patrata non sint, appositione, est Sacramenti integritati injurium. Et certè sicut de peccatis dubiis tenentur homines cōteri, ne se damnationis æternæ periculo exponant, ita eadem confiteri omnes tenentur: nam Christus reliquit Sacerdotes

tes sui vicarios, ad quos recurrere tenentur Fideles per confessionem, sicut ad Christum recurrunt per contritionem. Maxime quia, ut alibi jam diffusè ostendimus, in dubiis tutior pars est eligenda, præsertim quando periculum est certum. Sicut morbo periculoso, tamen si dubio tenemur remedium illud adhibere, quod alioquin non nociturum certum est: & quando est dubium, an sit fera, vel homo, à jaculo vibrando abstinere tenemur; & pauperi, quem fame, nisi succurratur, periturum dubium est, piis subvenire eleemosynis præcepto charitatis astringimur, quia etsi calamitas sit dubia, periculum tamen certum est. Planum ergo est, peccata esse materiam remotam à pœnitentia destruendam: ut epim ignis materiam ligna esse dicimus, quæ vi ignis comburuntur; ita peccata, quæ pœnitentiâ delentur, materiam pœnitentiæ rectè Theologi compellant.

*Partes pœnitentia sigillatim explicantur,  
& primum Contritio.*

Quia materia hujus Sacramenti in actibus humanis sita est, ea verò quæ in actionem cadunt, non satis est universè explicare, de pœnitentiæ partibus sigillatim tractare nobis curandum est, ex quibus veræ & salutaris pœnitentiæ ratio à Theologis & ulterius & securius pernoscatur. Et primum de contritione agendum est, quæ ut ait Tridentinum, primum inter pœnitentiæ actus locum sibi vendicat. Quod sequentibus documentis uti clariùs, ita brevius præstabimus.

*Essentia contritionis.*

Sciendum igitur primò , contritionem sic benè definiri à Tridentino sess. 14. cap. 4. *Contritio est animi dolor , ac detestatio de peccato commisso , cum proposito non peccandi de cetero.* Dicitur *dolor* ; ad veram enim contritionem requiritur mentis afflictio ; sicut enim ea conteri dicimus , quæ dura cùm sint minutatim confringuntur , ex quo dolor in his quæ sensibus vigent , sentitur , ita corda nostra quæ peccati superbiâ obduruerant , veræ pœnitentiæ vi contunduntur , unde salutaris mentis mœror consequitur , juxta illas Davidis pœnitentis voces , Psalm. 6. *Laboravi in gemitu meo , lavabo per singulas noctes lectum meum , & lacrymis meis stratum meum rigabo.* Et iterum Isaïæ 38. *Recogitabo tibi omnes annos meos in amaritudine animæ meæ.* Pulchrè Catechismus Romanus : *Quemadmodum ferro tumida ulcera secantur , ut inclusum virus possit erumpere : ita corda quasi scalpello contritionis adhibito incidantur , ut peccati mortiferum virus queant ejicere.* Quare & scissio cordis à Joële Propheta vocata est : *Convertimini* , inquit cap. 2. *in toto corde vestro , in jejuniis , fletu , & planctu , & scindite corda vestra.* Hinc ab Isidoro *compunctio mentis* , à Magno Gregorio *humilitas spiritûs annihilans peccatum* , jure merito nominatur. Ratio verò est , quia vera pœnitentia injuriis Deo illatis satisfacere intendit ; satisfacit autem , vel certè satisfacere incipit , qui voluntario dolore puni-  
tur : unde non sufficit merum sine dolore peccati odium , quod etiam in innocentibus , qui  
non

non peccaverunt, invenitur; sed mentis amaritudo desideratur, quâ nefanda peccati voluptas castigetur.

Additur *detestatio de peccato*, quia non sufficit mentis mœstitia, non sufficiunt lacrymulæ doctæ mentiri, ut loquitur S. Bernardus, nisi sincerum peccati odium interfit; nec est verus, efficaxque voluntatis dolor, nisi odium peccati adsit; quia sicut in omnibus voluntatis aliquid prosequentis actibus amor invenitur (cûm enim amor sit voluntas boni, bonum prosequi sine amore non possumus;) ita in omnibus voluntatis actibus, quibus malum fugimus, odiûm inveniri necesse est, cûm malum non fugiamus aut detestemur, nisi quia illud odio prosequimur. *Declarat igitur Sancta Synodus*, inquit Tridentinum paulò antè laudatum, *hanc contritionem non solum cessationem à peccato, & vita nova propositum & inchoationem, sed veteris etiam odium continere, juxta illud: Projicite à vobis omnes iniquitates vestras, in quibus pravaricati estis, & facite vobis cor novum, & spiritum novum. Et certè qui illos Sanctorum clamores consideraverit: Tibi soli peccavi, & malum coram te feci: Laboravi in gemitu meo, lavabo per singulas noctes lectum meum: Recogitabo tibi annos meos in amaritudine anima mea, & alios hujus generis, facile intelliget, eos ex vehementi quodam antea acta vita odio, & ingenti peccatorum detestatione manasse.*

Porro ille dolor, illa detestatio debent esse de Deo ut offenso: si enim dolentis mentis afflictio ex eo proficiscatur, quod voluntas ab ea quam diligit creatura recedere teneatur, non



propriè dolor de peccato commissio, nec est juris divini satisfactio, sed voluntatis adhuc terrena diligentis & in luto hærentis imperfectio. Verè ergo contritus non ideo dolet, quia creaturam deserit, sed potiùs quia Deum fontem aquæ vitæ peccatis suis dereliquit, foditque sibi cisternas dissipatas, quæ continere non valent aquas; verè contritus peccatum sub ratione formali injuriæ Deo illatæ detestatur, ut ad Deum ultimum finem animum revocet, à quo peccato recesserat. Hinc dolor, hinc lacrymæ fluunt, quas ad significandam internam mœsti animi acerbiteratem Patres tantoperè commendarunt, juxta præclaram Augustini ea de re satis notam sententiam: *Non sunt in te, Christiane, charitatis viscera, si luges corpus à quo recessit anima, animam verò à qua recessit Deus non luges.* Hinc Ninivitæ, David, & Princeps Apostolorum hac contritione perciti, plurimis lacrymis Dei misericordiam implorantes peccatorum veniam impetrarunt. Hinc Peccatrix lacrymis cœpit rigare pedes Jesu, & considerans quid fecit, noluit moderari quid faceret; & super convivantes ingressa, nec iussa veniens lacrymas obtulit, significans quo dolore arderet, quæ flere inter epulas non erubuit. Ratio verò omnium horum est, quia ut infrà dicemus, virtus pœnitentiæ est species justitiæ; justum enim est ut qui Deum offendit ipsi satisfaciat; ideoque ad vindicandam læsæ Dei majestatis injuriam reum punit: Ergo contritio, quæ est actus pœnitentiæ, detestatur peccatum quatenus est injuria Deo illata, non solùm ut summo bono & ultimo fini, & à quo peccando discessit, sed etiam ut supremo Do-



mino & Legislatore, cujus legem contempsit & mandata peccator floccificavit, suis ut libidinibus infandâ perversitate deserviret.

Denique dicitur contritionem esse detestationem *cum proposito non peccandi de cætero.* Nisi enim pœnitens vitæ emendandæ certam & stabilem cogitationem voluntatemque suscipiat, inanis erit dolor, ficta erit detestatio, falsa denique pœnitentia, eruntque speciosi illi pœnitentes, quàmlibet suspiriis anhelent, pectus quàmlibet pugnis contendant, lacrymarum vim quàmlibet profundant, similes illis de quibus ait Psalmographus Psalmo 77. *Lingua sua mentiti sunt ei, cor autem eorum non erat rectum cum eo.* Et Jerem. 3. *Non est reversa ad me pravaricatrix in toto corde suo, sed in mendacio.* Hanc certissimam veritatem his apertè verbis tradit Ezechiel cap. 18. *Si impius egerit pœnitentiam ab omnibus peccatis suis, quæ operatus est, & custodierit omnia præcepta mea, & fecerit judicium & justitiam, vitam vivet, & non morietur: omnium iniquitatum ejus, quas operatus est, non recordabor.* Et paulò post: *Cum averterit se impius ab impietate sua, quam operatus est, & fecerit judicium & justitiam, ipse animam suam vivificabit.* Ac paucis interjectis: *Convertimini, inquit, & agite pœnitentiam ab omnibus iniquitatibus vestris, & non erit vobis in ruinam iniquitas: projicite à vobis omnes pravaricationes vestras, in quibus pravaricati estis: & facite vobis cor novum.* Eandem sincerè propositi necessitatem docet Christus, Joan. 8. cum mulieri in adulterio deprehensæ præscripsit: *Vade, & jam amplius noli peccare.* Paralytico etiam

quem ad Probaticam piscinam curaverat, sic cap. 5. præcepit: *Ecce sanus factus es, jam noli peccare.* Sanè sicut in humanis, qui amico reconciliari vult, quem injuriâ aliquâ affecerit, & doleat oportet quòd in eum injuriosus & contumeliosus fuerit, & diligenter reliquo tempore provideat, ne reconciliati amici necessitudinem lædat: sic recta ratio planè suadet, ad sinceram cordis contriti pœnitentiam, & dolorem peccati admissi, & propositum cautionemque, ne quid hujusmodi in posterum committatur, in primis necessaria esse.

Dices: Dolor respicit malum præsens, quo patiens affligitur; odium verò fugit malum absolutè, provt abstrahit à præsentì, præterito, & futuro: Ergo contritio, quæ circa peccata præterita delenda occupatur, non dolor, sed odiù est.

Respondeo, quod licèt malum præsens sit objectum doloris sensibilis, tamen voluntas quæ non secus ac intellectus abstrahit ab omni tempore, de præterito dolere malo, de eoque spiritualiter affligi potest. Maximè quia malum præteritum fit intellectûs consideratione præsens; sicut etiam contingit dolor in sensu, quando malum præteritum importunâ imaginationis exhibitione fit præsens. Unde ex amara peccatorum recognitione in inferiorem animæ partem, quæ vim sentiendi habet, dolor effluit; unde ad eum declarandum pœnitentes & cineribus asperguntur ( ut patet ex laudabili Ecclesiæ consuetudine, quæ filios suos initio Quadragesimæ, quod est specialioris pœnitentiæ tempus, incinerare solet ) & vestem etiam mutare soliti sunt, ut in Monachis arctioris pœnitentiæ vitam profitentibus apparet.

ret. Quod & Veritas Matth. II. his verbis indicavit : *Va tibi Corozain , va tibi Betsaida , quia si in Tyro & Sidone facta essent virtutes qua facta sunt in vobis , olim in cilicio & cinere pœnitentiam egissent.*

Digladiantur porrò inter se recentiores Scholastici , quænam ex prædictis ratio sit essentialis contritioni , quænam modum proprietatis habeat ; sed non vacat rei gravissimæ pondus tam levibus velitationibus detrahare. Sanè cùm in definitione contritionis hæc omnia S. Synodus complexa sit , essentialia illa omnia esse censenda sunt , cùm nec verus sine peccati detestatione dolor , nec sine sincero peccatorum cavendorum proposito vera detestatio esse possint.

*Divisio contritionis.*

Sciendum secundò, contritionem explicatam duplicem esse, aliam perfectam, imperfectam alteram, quæ posterior solet etiam *attritio* nominari. Contritio perfecta est illa quæ ab amore Dei incipit, unde eam *charitate perfectam* appellat Tridentinum ; ex eo enim quod peccatum est malum divinum , Dei scilicet oppositum bonitati , avertens ab ultimo fine , illum in creatura nefario præposteroque ordine constituens , Patrisque cœlestis amicitiam dissolvens , de peccato dolet filius pietatis paternæ peccando oblitus , sed eâ unicè ad revertendum permotus ; hincque summum & maximum dolorem ex peccatis quæ commissa sunt suscipit, quo nullus major excogitari potest, ut præclare probat his verbis Catechismus Romanus. *Cùm perfecta contritio sit charitatis actio , qua ab eo*

timore, qui filialis est, proficiscitur, patet eundem charitatis & contritionis modum statuendum esse. At quoniam charitas, quâ Deum diligimus, perfectissimus est amor, hinc fit ut contritio vehementissimum animi dolorem conjunctum habeat: ut enim maximè Deus diligendus est, ita qua nos à Deo alienant, maximè detestari debemus. In quo etiam illud observandum est, eodem loquendi genere charitatis & contritionis magnitudinem in sacris litteris significari. De charitate dictum est: Diliges Dominum Deum tuum ex toto corde tuo. Rursus quod ad contritionem pertinet, clamat Dominus per Prophetam: Convertimini in toto cordo vestro. Præterea si uti Deus summum bonum est inter omnia qua diligenda sunt, ita etiam peccatum summum est malum inter omnia qua odisse homines debent; illud sequitur, ut quam ob causam Deum summè diligendum esse confitemur, ob eandem rursus peccati summum odium nos capiat necesse est. Porro dolorem illum summum & maximum ideo appellat, non quòd semper sit magis sensibilis, cùm sæpe his quæ sensibus subiecta sunt, magis quàm spiritualibus afficiamur; unde maiorem ex filiorum obitu vel fortunarum dilapidatione, quàm ex Dei offensa doloris sensum homines iustos capere contingit: sed catenus dolor ille summus dicitur, quatenus rebus omnibus peccati odium iusti anteponunt, ut ne quidem vitæ conservandæ causâ peccaro velint, ut quemadmodum S. Bernardo teste nullus finis, nullusque modus charitati præscribitur (modus enim, inquit ille, diligendi Deum, est ipsum diligere sine modo: ) ita peccati detestationi nullus modus definiatur. Contritio  
verò

verò imperfecta, seu attritio concipitur & incipit communiter, ut ait Tridentinum, vel ex turpitudinis peccati consideratione, vel ex gehennæ & pœnarum metu. Quia tamen attritio vera contritio est, licet imperfecta, ideo peccatum ut Dei injuria est detestatur, eique satisfacere intendit quem violavit, si verus est pœnitentiæ actus.

Hinc sequitur, contritionem & attritionem non differre specie; cum enim uterque ille actus ab eadem virtute pœnitentiæ proficiscatur, cum uterque idem objectum formale sub eodem intrinseco motivo respiciat, peccatum nimirum ut Dei offensa est per compensationem & satisfactionem emendabilis, ad eandem speciem utrumque pertinere necesse est. Quod verò illud juris divini læsi refarciendi, rei que eam ob causam puniendi propositum ex amore Dei, vel ex gehennæ metu, vel ex turpitudine peccati primum oriatur, actui pœnitentiæ extrinsecum & accidentale est, non essentiale.

Ex quibus sine negotio oppositæ sententiæ quorundam recentiorum, quos novissimè sequitur Baptista Gonet, argumenta convelles. Non enim ut illi existimant, objectum attritionis est peccatum sub ratione mali peccatoris, vel sub ratione inhonesti; nam odium peccati prout est malum morale & peccatori nocivum, à sola voluntate proficiscitur; siquidem ab eodem principio procedit amor boni, & odium mali oppositi; docent autem communiter Thomistæ, voluntatem nullo egere habitu ad bonum honestum proprium ut sic prosequendum: ergo nec itidem ad malum proprium ut sic prosequendum. Si verò peccatum ut est malum speciale

speciale cuilibet virtuti oppositum consideretur, sic peccati detestatio ab illa virtute elicitur, cujus bono vitium adversatur, cum ut dictum est, ab eodem principio amor boni & oppositi mali odium semper prodeat. Attritionem verò esse actum virtutis pœnitentiæ nullus Theologus, sed præsertim adversarii, inficiari rationabiliter possunt; cum enim secundum omnes attritio ad recipiendam Sacramenti pœnitentiæ gratiam disponat, & secundum illos sine ullo Dei amore omninò sufficiat, planum est attritionem esse actum virtutis pœnitentiæ, cum secundum D. Thomam & communissimam Theologorum omnium vocem, soli actus virtutis pœnitentiæ ad Sacramentum pœnitentiæ vel disponant, vel sufficiant; ideoque tractantes de Sacramento pœnitentiæ, de virtute pœnitentiæ unà disputant, quia sola illa virtus materiam huic Sacramento suis actibus præbet; unde per *constructionem*, aiunt, *intransitivam* Sacramentum pœnitentiæ dicitur, quia sine actibus virtutis pœnitentiæ non est istud Sacramentum. *Dicendum*, inquit S. Thomas q. 86. art. 6. ad ultimum, *quod actus pœnitentiæ virtutis habet quod sine eo non possit fieri remissio culpa, in quantum est inseparabilis effectus gratiæ, quæ operatur in omnibus Sacramentis*. Quare ab eodem habitu uterque ille actus exoritur, uterque idem objectum, peccatum scilicet, sub ratione formali injuriæ Deo illatæ respicit, sed penes motiva duntaxat extrinseca, juxta clarissimam Tridentini mentem distinguitur, quatenus contritio charitate formata ab amore Dei, attritio à metu gehennæ vel turpitudinis peccati salutariferâ consideratione originatur.

Cujus

Cujus etiam argumentum, nisi meus me fallit animus, evidentissimum est, quòd attritio, quam ad Sacramenti pœnitentiæ gratiam disponere Sacrum Concilium tradit, omnem peccandi voluntatem debet excludere: ergo debet respicere rationem universalem & communem, quæ nullum peccandi affectum retineat, sed omnem eliminet: illa autem ratio communis non potest esse alia quàm ratio injuriæ Deo illatæ vindicandæ, & compensandæ; nam horror intemperantiæ ex una turpitudine ebrietatis v. g. vel luxuriæ concitus, non propterea affectum vanæ gloriæ, vel divitiarum injustè partarum excludit: merus etiam gehennæ metus omnem peccandi affectum saltem conditionatum non excludit, ut cùm aliquis est ita comparatus, ut sola supplicia metuat, & peccatum quod intus amat, vellet facere si posset impunè: Ergo aliud est generalius attritionis motivum, injuriæ nimirum Deo illatæ compensatio & reparatio. Hinc vera attritio, de qua loquitur Tridentinum, omnem peccandi affectum extinguit, à peccato avertit, ad Deum convertit, eumque ut verum justitiæ fontem diligere incipit, ut idem Tridentinum alibi referendum testatur. Unde attritus potest fieri contritus, sicut quod imperfectum est, connaturalem perfectionem comparare potest, ut dum puer adolescit, & tandem vir perfectus evadit: attritio autem est contritio imperfecta, ut expressè definit Tridentinum, solumque penes motivum extrinsecum vel principium remotum à contritione discrepat: ac proinde qui primùm sacro terrore permotus dolere incipit, potest deinde ex amore pœnitere, nunquam tamen actus attritionis



attritionis fiet actus contritionis, ut D. Thomas docet, quia adveniente quod perfectum est, evacuatur quod imperfectum est: unde sicut actus fidei informis nunquam fit actus fidei formatæ, quia ille adveniente charitate transit; ita dolor informis accedente formato desinat necesse est.

### *Præceptum contritionis.*

Sciendum tertio non solum divinum dari de contritione præceptum (ut ex dictis liquet) sed etiam naturale: lex enim naturalis omnibus implantata, injuriis Deo illatis satisfacere præcipit, quæ injurias etiam humanas imperat resarcire. *Fuit*, inquit sacrum Tridentinum sæpe memoratum, quovis tempore ad impetrandam veniam peccatorum hic contritionis motus necessarius; & in homine post baptismum lapsa, ita demum præparat ad remissionem peccatorum, si cum fiducia divina misericordia & voto præstandi reliqua conjunctus sit, qua ad ritè suscipiendum hoc Sacramentum requiruntur. Eandem contritionis necessitatem egregie probat S. Thomas q. 84. art. 5. ad 2. Dicendum, inquit, quod ex quo aliquis peccatum incurrit, charitas, fides, & misericordia non liberant hominem à peccato sine pœnitentia. Requirit enim charitas quod homo doleat de offensa in amicum commissa, & quod amico homo studeat satisfacere. Requirit etiam ipsa fides, ut per virtutem passionis Christi, qua in Sacramentis Ecclesia operatur, querat justificari à peccatis. Requirit etiam & ipsa misericordia ordinata, ut homo subveniat pœnitendo sua miseria, quam



quam per peccatum incurrit , secundum illud Proverbiorum 14. Miseros facit populos peccatum. Unde Ecclesiast. 30. dicitur , miserere animæ tuæ placens Deo. Unde art. 7. ad 1. sic concludit : Dicendum quod de jure natura est, quod aliquis pœniteat de malis quæ fecit, quantum ad hoc quod doleat ea fecisse , & remedium doloris quærat per aliquem modum. Hinc in corpore articuli dixerat , quod hujus Sacramenti materia præexistit à natura : ex naturali enim ratione homo movetur ad pœnitendum de malis quæ fecit. Et certè ex eo quod Deum colere, Deumque diligere præcepto naturali tenemur, dolere de peccatis ut sunt injuria Dei , quidquid Deo displicet detestari , eique pro virili satisfacere eodem præcepto tenemur.

*Objectiones solvuntur , & acceptæ occasione enodantur perutiles difficultates.*

Dices : Contritio<sup>7</sup> est actus supernaturalis, cum etiam de attritione quæ est contritio imperfecta , dicat Tridentinum , donum Dei esse, & Spiritus sancti impulsus , non adhuc quidem inhabitantis , sed tantum moventis. Atqui de actibus supernaturalibus non datur præceptum naturale , sed duntaxat positivum ; nam præcepta naturalia cum sint naturæ nota , objectum naturale , non supernaturale , naturæ ignotum mandare possunt : Ergo non datur naturale de contritione præceptum.

Respondeo certissimum esse , contritionem actum supernaturalem existere , tum quia  
id

id apertissimè tradit Tridentinum in objectio-  
 ne relatum, ipsumque antè tradiderat S. Tho-  
 mas 3. p. q. 84. art. 1. ad 2. *In hoc Sacramento,*  
*inquit, actus humani sunt pro materia, qui pro-*  
*veniunt ab inspiratione interna; unde materia*  
*non adhibetur à ministro, sed à Deo intus ope-*  
*rante.* Tum quia id convincit ratio manifesta:  
 nam dispositio ad formam supernaturalem om-  
 nino supernaturalis est, cùm dispositionem &  
 formam ejusdem ordinis esse necesse sit. At  
 contritio est dispositio ad gratiam, quæ utique  
 supernaturalis est, cùm de ipsa etiam attritione  
 dicat Tridentinum, impulsam esse à Spiritu  
 sancto insitum, quo pœnitens adjutus viam  
 sibi ad justitiam parat, & ad Dei gratiam in Sa-  
 cramento pœnitentiæ impetrandam disponit.  
 Tum quia contritio, sive perfecta, sive imperfe-  
 cta, includit efficax propositum legis Dei fide-  
 liter observandæ, & omnem peccati saltem  
 mortalis affectum penitus excludit, alioquin  
 nec novæ vitæ initium duceret nova creatura,  
 nec radicitus extirparetur peccati virus, quod  
 utique non evacuat mollis animi affectus, nec  
 semivolentia & seminolentia illa desideria,  
 quæ *velleitates* appellant, quibus plenum esse  
 infernum Bernardus testatur. Addi etiam potest  
 ratio in suprâ adductis S. Thomæ verbis in-  
 dicata: nempe quia actus contritionis induit  
 rationem materiæ proximæ Sacramenti pœni-  
 tentiæ, quæ immediatè subjicitur clavibus Ec-  
 clesiæ & sanguini Christi: hanc autem habitu-  
 dinem non importat actus humanus merè na-  
 turalis. Nec sufficit mera denominatio vel or-  
 dinatio extrinseca, sicut in aliis Sacramentis  
 contingit, in quibus materia merè naturalis  
 est,

est, ut aqua, oleum, vel panis, quæ ex sola ministri ordinatione formæ sacramentali subi-  
ciuntur. Nam in Sacramento pœnitentiæ ipse  
pœnitens materiam præbens, objectum ali-  
quod, mediante aliquo motivo per claves Ec-  
clesiæ aperientes januam Regni cœlorum, &  
per operationem sanguinis Christi prosequitur,  
quod totum supernaturale est. Hinc Veritas  
Luc. 13. seriò monet: *Nisi pœnitentiam habueri-  
tis, omnes similiter peribitis.* Et ut non intelli-  
gatur de habitu, sed etiam de actibus pœniten-  
tiæ, de quibus solummodò præceptum datur,  
addit Salvator: *Si pœnitentiam non egeritis,  
omnes similiter peribitis.* Hinc Apocalypsis 2.  
minatur Joannes: *Age pœnitentiam; sin au-  
tem, veniam tibi citò, & movebo candelabrum  
tuum de loco suo, nisi pœnitentiam egeris.* Un-  
de saltem patet, præceptum istud esse, à Deo  
latum, (si fortassis præceptum naturale quis  
in hac parte contumax inficiatus fuerit) cui  
parère pernecessarium est. Nam ut ait Tertull.  
lib. de pœnit. *Audaciam existimo, de bono di-  
vini præcepti disputare. Nec enim quia bonum  
est, ideo auscultare debemus, sed quia Deus  
præcepit. Ad exhibitionem obsequii prior est ma-  
jestas divina potestatis, prior est authoritas im-  
perantis, quàm utilitas servientis. Bonum est pœ-  
nitere, an non? Quid revolvis? Deus præcipit:  
quod igitur Deus tantoperè commendat, quod  
etiam humano more sub dejectione testatur, sum-  
ma utique gravitate & aggredi, & custodire  
debemus.*

Ad argumentum ergo dicendum, hinc mani-  
festè fallaciam hujus objectionis ostendi, quòd

si quid evinceret, peræquè nullum de Deo super omnia diligendo præceptum naturale extarre, contra reclamantem totius naturæ vocem suaderet, cùm dilectio Dei super omnia totius naturæ, maximè verò lapsæ superet potestatem. De pœnitentia ergo, tametsi supernaturali præceptum est, quia actus humanus in nostra cum gratia Dei positus potestate, superioris præcipientis imperio subjicitur, quam gratiam omnibus oblatam sine hominis culpa Deus non subtrahit, quia dum urget præcepto, semper, nisi obicem ponamus, unà præcurrit prævenitque auxilio, qui impossibilia non jubet, sed jubendo admonet facere, quod possis, petere quod non possis, adjuvatque ut possis. Dicitur autem hoc præceptum naturale, non quòd pœnitentiam supernaturalem excludat, sed quia cujus amicitiam violavimus, naturali præcepto dare operam tenemur, ut sarciamus. Et certè si ægroto corpore quisque necessariam adhibere medicinam naturali lege præcipitur, planè relinquitur, non minùs esse naturali lumini consentaneum, ut medicinam ægro animo adhibere teneamur, cùm corpore non minùs animum diligere debeamus. Quare quemadmodum instigante naturæ lege, ait Tertull. lib. de pœnit. & post illum Hieronymus in cap. 7. Eccles. hirundo pullos suos de succo oculat chelidonix, & dictamnium cervi appetunt vulnerati, & cætera animantia bruta medicinas sibi divinitus attributas instigantur ut quærant; ita proculdubio homines rationales incitat innata lex, ut unicum lapsis hominibus remedium ad salutem animæ prosequantur. Videtis Melchiorem

Cano

Cano relect. de pœnit. part. 4. ubi sibi eximiâ & beatâ de Theologicis eleganter scribendi facilitate veritatem istam locupletat.

Instabis : Si contritio deberet esse supernaturalis , de illaque foret præceptum , daretur locus infinitis animi sollicitudinibus & anxietatibus ; cùm enim actûs supernaturalitas sit quid maximè reconditum , & vix ac ne vix quidem actus naturalis à supernaturali internosci discernique possit , nunquam tranquillabitur conscientia , sed semper erimus dubii & penduli , num necessariam pœnitentiæ materiam , sine qua annullatur Sacramentum , porrexerimus. Hunc autem intolerabilem angorem submovebimus , si contritionem naturalem sufficere dixerimus : Ergo ne nimium anxios reddamus scrupulosos , imò piorum & cordatorum animos perpetuâ iterandæ confessionis sollicitudine ne turbeamus , contritionem supernaturalem optandam illam quidem esse dicendum est , at non necessariam item. Nana quando salvâ pietate id facere possumus , confessionis jugum per se satis durum molle faciendum est , nec eo potissimum Sacramento injiciendi laquei sunt , quod in id paratum est , ut ab omnibus laqueis liberemur.

Respondeo Theologorum non esse materias Sacramentorum à Christo institutas permutare ; cùm igitur Concilium sæpe laudatum attestetur , actus pœnitentis Spiritus sancti impulsu excitatos ad integritatem Sacramenti , & ad plenam peccatorum remissionem *ex Dei institutione* requiri , frustra aliud quidpiam assignabimus , frustra aliam materiam obtrudemus ; quia non secundum nostram existimationem , sed secundum

gno cum iudicio monet-sapientissimus Joannes à S. Thoma disp. 33. art. 4. pag. mihi 310. Oportet ministrum esse valde vigilantem in inquirendo motivo ex quo pœnitens movetur ad dolorem, præsertim cum hominibus rudibus & ignorantibus, quos debeat exhortari, ut accedant cum dolore & motivo supernaturali, hoc est regulato per fidem, seu concepto ex motivis qua docet fides, ut ex timore inferni, turpitudine peccati, amore ipsius Dei & virtutis. Sicut enim in aliis Sacramentis minister debet attendere diligenter, ut vera materia sibi adhibeatur ad perficiendum Sacramentum, ut v. g. vera aqua naturalis, vel oleum verum, verus panis, &c. Ita in hoc Sacramento pœnitentiæ debet procurare, quod pœnitens debitam & proportionatam materiam apponat, scilicet supernaturalem dolorem.

Nec tamen propterea omnimodam pœnitentibus securitatem spondemus, tametsi quietem, spem, fiduciamque multam polliceamur. Etenim in hac vita ita nonnunquam vicini sunt veræ pœnitentiæ actus falsæ pœnitentiæ conatibus, ita veras virtutes falsa pietas aliquando mentitur, ut supernaturales actiones à merè humanis affectibus liquidò dignosci non possint. Quia enim ad salutis profectum maneat nos oportet humilis sollicitudo, ut Apostolicum illud præceptum impleamus, *Cum timore & tremore vestram salutem operamini*; latere voluit nos Deus, num pœnitentiæ motus spiritu ipse suo in nobis operetur, an etiam quæ benè agere nobis videmur, occulta concupiscentia efficiat. Non tamen hic timor ejusmodi est, ut quietem ac pacem secum non admit-

tat,

& innumera peccata mortalia hujus præcepti transgressione committeret. Ergo homo ad pœnitentiam agendam naturali præcepto non obligatur.

Respondeo in hujus difficultatis explicatio-  
ne tam varias, tanque inter se dissidentes esse  
Doctorum sententias, ut eas enumerare mole-  
stum, & fortassis inutile fucit. Placet tamen  
gravissima adversarum duarum sententiarum  
fundamenta proponere, & judicio Lectoris  
permittere, ut semota pugnaci pertinacique  
contentione, quam veriore judicaverit sen-  
tentiam liberè tueatur, eandem postea simili  
libertate retractaturus, si melior forsitan opi-  
nionis adversæ ratio occurrat. Te enim, Le-  
ctor optime, ita comparatum crediderim ac  
optari, ut apud te non tantum opinio præju-  
dicata possit, ut etiã sine ratione valeat au-  
thoritas. Ego verò ita me paratum sentio, ut in  
re momentosissima, si quid melius quispiam ad  
hujus difficultatis lucem afferre poterit, id me  
sanè volente & gratulante facturum est.

Prima ergo & communior sententia fert,  
non teneri hominem statim atque peccavit, vel  
quories peccata memoriæ occurrerint, de pec-  
catis suis conteri & pœnitentiam agere. Tum  
quia cùm præceptum de pœnitentia affirma-  
tivum sit, in quo positivus virtutis actus præci-  
pitur, aliorum præceptorum affirmativorum  
conditionem habet: ergo sicut reliqua præce-  
pta affirmativa semper quidem obligant, sed  
non pro semper; ita non est cur ab hac gene-  
rali regula præceptum contritionis excipiamus,  
si nullus instet specialis necessitatis articulus.  
Tum quia non minùs ad salutem desiderantur



fides, spes, baptisimus, & Dei dilectio, quàm pœnitentia. At præceptum fidei, spei, dilectionis, & baptisma non ita obligat, ut protinus in actus fidei, spei, & dilectionis exire teneamur, vel baptismum sine mœra suscipere: ergo pœnitentiam confestim agere non tenetur qui peccavit. Nec urget illa obligatio occurrente peccati memoriâ; quia vis obligatioque præceptorum non ex memoria aut intelligentia nostra, sed ex necessitate rei sumitur: non enim quia intelligimus aut meminimus, obligamur; sed quia obligamur, dare operam debemus, ut legem memoriâ teneamus. Tum Denique, quia cùm nullum jus humanum, divinum, aut Evangelicum proferri possit, quo præceptum adeo durum asseratur, quâ facilitate lex illa ab aliquibus inducitur, eâdem quoque ab aliis rejicitur.

His tamen non obstantibus Alexander de Halès, D. Bonaventura, Sylvester, Paludanus censent præceptum esse pœnitere de peccato simul atque homo peccavit, vel saltem quoties peccata memoriâ occurrerint; eique assertioni, fateor, non parum favet S. Thomas paulò post referendus. Nec desunt rationes longè gravissimæ, quibus hæc sententia confirmetur. Primò, quia non minùs tenetur homo injuriam Deo illatam resarcire, quàm proximo illatum damnum reparare; nec minùs saluti animæ providere, quàm ægrotanti corpori subvenire. Atqui homo damnum proximo in pecunia vel fama importatum illicò compensare tenetur restitutione bonorum, & honoris læsi instauratione: idem etiam homo postquam in morbum incidit, illicò medicinam corporalem omninò necessariam, si occurrat, adhibere astringitur:

Ergo



Ergo à fortiori Deo per peccatum læso, ejusque amicitia per injuriam violatæ pœnitentiâ satisfacere, & animæ per peccatum gravissimè ægrotanti succurrere ex præcepto justitiæ & charitatis tenemur. Nec potest dici, non imminere nobis à peccato grande periculum: non, inquam, id à Christiano dici posse videtur, qui norit peccato mortali æternitatem miseriarum esse paratam, quive attentè Gregorii illud veridicum pronuntiatum attenderit: *Peccatum quod per pœnitentiam non deletur, suo pondere in aliud trahit.* Velle autem periculum, est profectò velle perire; nam qui amat periculum, peribit in illo, juxta Ecclesiastici oraculum cap. 3. Secundò, quia non ita affirmativum est de pœnitentia agenda præceptum, ut aliquid præcepti negativi non habeat; negativo quippe præcepto, Deo ne simus inimici astringimur, cum esse Dei hostem ita intrinsecè malum sit, ut nullo queat colore honestari, & nullo eventu velle Dei inimicitiam citra gravem culpam valeamus. Ergo quandiu homo in peccato mortali perseverat, tandiu præcepto negativo adversatur, præsertim cum peccatorum memoria menti se offert, & pœnitentiæ consilium sacra cogitatio inspirat; tunc enim interiorem pœnitentiam in aliud tempus qui rejicit, eo ipso interpretativè vult in Dei inimicitia perdurare, cui non curat statim se contritione conciliare. Denique non commentitium, aut gratis investum esse istud præceptum, ex illo Ecclesiastici 5. confirmant hi Authores: *Non tardes converti ad Dominum, nec differas de die in diem; subito enim venit ira ejus.* Ergo pœnitentiam in aliud non reservare tempus, & contritionem

de die in diem non protrahere præceptum est, cujus neglectus quàm grave peccatum sit, ex eo patet, quod ei divinam iram Dei nomine Ecclesiasticus interminatur. Cui affine est illud Apocalypseo 2. quod Angelo, id est Episcopo Ephesi dicitur: *Age pœnitentiam, & prima opera fac; sin autem, venio tibi, & movebo candelabrum de loco suo, nisi pœnitentiam egeris.* Affine etiam illud quod ibidem Angelo Pergami Ecclesiæ præcipitur: *Similiter pœnitentiam age; si quo minus, veniam tibi citò.*

Neque ab hac sententia alienus est S. Thomas in 4. dist. 17. quæst. 3. art. 1. quæst. 4. & habetur in Supplemento 3. p. quæst. 6. art. 5. ubi licet doceat contra nonnullos Theologos, non teneri peccatorem ad peccatum confestim confitendum, quanvis periculosum sit differre; de contritione tamen ita censere videtur, ut homo ad pœnitendum obligetur, cum peccata memoriæ occurrunt, & præceptum pœnitendi nullas moras in peccatore permittat, vel inducias, si peccati memoriæ & conscientiam habeat: *Respondeo dicendum*, inquit Doctor Angelicus, *quod cum propositum confitendi sit annexum contritioni, tunc tenetur aliquis ad hoc propositum, quando ad contritionem tenetur, scilicet quando peccata memoriæ occurrunt.* Ne autem dicas S. Thomam olim juvenem hanc austeram nimis sententiam docuisse, quam si Summæ Theologiæ extremam manum imposuisset, vel retractatione, vel certè moderatione aliqua correxisset: audi quid scripserit 2. 2. quæst. 62. art. ultimo, ubi utrumque pariter affirmat, & teneri homines ex præcepto peccatum

tum deferere , & ad pœnitentiam confestim  
agendam non minùs obligari , ac qui rem alie-  
nam furto abstulit , restituere protinus sine  
mora aliqua debet. *Manifestum est autem* , in-  
quit , quod nec per modicum tempus licet in  
peccato morari , sed quilibet tenetur peccatum  
statim deferere , secundùm illud Ecclesiastici 21.  
*Quasi à facie colubri fuge peccatum : & ideo*  
quilibet tenetur statim restituere , si potest. Et  
in responsione ad 1. argumentum, oppositæ sen-  
tentiæ fundamentum sic convellit : *Dicendum*  
*quod præceptum de restitutione facienda , quan-*  
*vis secundùm formam sit affirmativum , impli-*  
*cat tamen præceptum negativum , quo probi-*  
*bemur rem alterius detinere.* Non ergo retra-  
ctasset in Summa S. Thomas sententiam olim  
traditam , cùm eam 2. 2. loco memorato satis  
apertè tradat. Est ergo de mente D. Thomæ  
hæc conclusio , quæ articulo 5. quæst. 6. Supple-  
menti laudati habetur : *Quanquam statim om-*  
*nes de suis dolere peccatis teneantur , & con-*  
*fessionem differre periculo non careat ; de ne-*  
*cessitate tamen salutis non est ut statim peccata*  
*sua quis confiteatur , sed habitâ copiâ confesso-*  
*ris , & statutis ab Ecclesia pro pœnitentia tem-*  
*poribus.* Vides S. Doctorem discrimen inter  
contritionem & confessionem illud statuere,  
quod licet præceptum confessionis aliquas mo-  
ras in peccatore admittat , peccatum tamen spe-  
ciale est pœnitentiam confestim internam non  
agere ac mortale peccatum vel commissum est,  
vel certè dum memoriæ occurrit , vel con-  
scientia stimulat , cujus dictamini homo tenetur  
obnoxius.

Equidem in re vehementer ambigua , ut ve-

rum fatear, non mihi planè satisfacio, nec quidquam audeo contra tot hinc inde motivorum urgentium momenta, nondum mihi perspectâ veritate definire. Nam contra occultam mihi veritatem frustra niti, & nihil aliud quàm gravissimorum Doctorum urgentibus rationibus ultro citroque pugnantium odium quærere, extremæ, ut verbis Salustii utar, dementiæ est. Ex illo tamen opinionum conflictu duo elicio non minùs utilia quàm vera. Primum est, periculosissimum esse pœnitentiam post lapsum protrahere, cùm sententia affirmans dari speciale de peccato confestim contritione delendo præceptum, iis rationum ponderibus, iis muniatur autoritatum momentis, iis præsertim S. Thomæ verbis satis apertis doceatur, quibus (ut mea opinio vel imbecillitas fert) satisfacere nequeo; & si tuum iudicium (Lector cordate) ita adhibeas, ut alienum non nisi cognitâ causâ sequare, ultro fateberis, talia esse posterioris sententiæ argumenta, ut eis evidenter responderi posse planè diffidendum esse censueris. Dices ergo cum Magno Leone epist. 91. ad Theodorum: *Oportet unumquemque Christianum conscientia sua habere iudicium, ne converti ad Dominum de die in diem differat, nec satisfactionis sibi tempus in finem vite sue constituat, quem periculosè ignorantia humana concludit, ut ad paucarum horarum se reservet incertum.* Sed de his plura videsis in reflectione.

Secundum quod elicio est, tunc saltem contritionis urgere præceptum, quando vel mortis periculum instat, vel quando opus agendum est, ad quod interna sanctitas desideratur, putà  
cùm

cùm recipiendum aut ministrandum est aliquod Sacramentum. Cùm enim præceptum affirmativum aliquo tempore obliget, nullum certè assignari potest, quo magis præceptum illud implere debeamus. Quantaquanta porro sit istius præcepti necessitas, illud tamen improbabile mihi semper visum est, quod nonnullis Doctoribus, & in iis Scoto & Gabrieli placuit, præceptum istud diebus festis, & potissimum Dominicis urgere specialius, cùm illius mandati nullum jus afferri possit. Licet enim corporalis quies, & bonorum operum, orationis præsertim praxis nobis Divino & Ecclesiastico præcepto diebus festis præcipiatur, ut Deo vacare possimus; præceptum tamen illud implet qui ab operibus servilibus cessans actibus religionis incumbit, tametsi finem Legislatoris, qui sub præceptum non cadit, minimè assequatur: alioquin cùm finis legis omnis sit charitas, & finis imperati jejunii sit elevatio mentis in Deum, præceptum nullum impleret, qui propter Deum summè dilectum mandata cetera non servaret; nec legi jejunii satisfaceret, qui diebus Quadragesimæ sacris ad Deum contemplationibus mentem non attolleret. Nec opponas illud Levitici cap. 16. *In hac die expiatio erit vestri, atque mundatio ab omnibus peccatis vestris, coram Domino mundabimini: Sabbatum enim requietionis est, & affligetis animas vestras religione perpetua.* Et cap. 23. *Affligetis animas vestras, omne opus servile non facietis in tempore diei hujus: omnis anima que afflicta non fuerit in die hac, peribit de populo suo.* Non, inquam, illa opponas, non solum quia lex vetus abolita est, vimque obli-

gandi eâ solùm parte habet, quâ Legis naturæ præcepta continet: sed etiam quia lex illa de certo quodam die festo, nimirum propitiationis loquitur, in quo Sacerdos semel in anno pro peccatis populi peculiare ad Deum orationes fundebat, hostiasque expiationis mense septimo offerebat, cui Legi annuæ confessionis præceptum successit, ut quod nunc Ecclesia semel in anno facit, in vetere illò populo, cui omnia in figuris contingebant, præsignaretur. Porro nullibi extat lex, quæ hanc singulis festis, & Sabbatis afflictionem præscribat.

Dices tertio: Si daretur speciale de contritione præceptum, opus esset de singulis peccatis singulari pœnitentiâ dolere, cum sit par de singulis ratio: At præceptum non est, quo homo pluribus criminibus involutus totidem elicere contritionis actus teneatur: Ergo nullum extat speciale de contritione præceptum.

Respondeo illud in difficultate hocce argumento indicata certissimum esse, non mediocriter ad pœnitentiæ perfectionem conferre, si ad singula mortalia crimina proprium contritionis, distinctumque dolorem adhibeamus; ita enim Ezechias apud Isaiam cap. 38. contritionem describit, cum ait: *Recogitabo tibi omnes annos meos in amaritudine anime meae.* Etenim recogitare omnes annos, ut Catechismus Romanus interpretatur, est singillatim peccata excutere, ut de eis ex animo doleamus. Sed apud Ezechielem quoque cap. 18. scriptum legimus: *Si impius egerit pœnitentiam ab omnibus peccatis suis, vitam vivet.* Hinc per *discussionem, collectionem, & detestationem*

tionem recogitantem peccata in amaritudine animæ suæ, parari contritio dicitur in Tridentino sess. 14. can. 5. Hac etiam de causa in sacris literis pœnitentia iudicium nominatur. Ezechiel. 18. Si impius egerit pœnitentiam ab omnibus peccatis, & fecerit iudicium. Psalm. 118. Feci iudicium & iustitiam. Ut intelligeremus, quod sicut iudex, cui est iudicandi autoritas demandata, reorum delicta inquirat atque examinat speciatim, ut juxta culparum modum sit moderatio pœnarum; ita peccatores, ut pœnitentis munus fideliter exequantur, non debent esse contenti peccata si solum in genere detestentur, sed seipsos seriò interrogantes singularia debent expendere peccata, ut ex qualitate culparum imponant sibi doloris & pœnitentiæ modum. Sic Apostolico parebunt monito, quod tradit 1. Cor. 11. Probe seipsum homo. Sic pœnitentem Davidem imitabuntur, Psalm. 76. aientem: *Recogitavi dies antiquos, & meditatus sum nocte cum corde meo, & exercitabar, & scopebam spiritum meum.* Vel ut Augustinus legit, *scrutabar spiritum meum*, id est, ut ipse exponit, *seipsum interrogabat, seipsum examinabat, in se iudex erat.* Consentiant huic veritati Sancti Patres. Consideret peccator, inquit Augustinus, vel author libri de vera & falsa pœnitent. cap. 9. 14. & 17. *qualitatem criminis in loco, in tempore, in varietate personæ. Versum puto, qui dolet de crimine; conversum, qui dolet de omni ejus, quam exposuimus, varietate.* Adstipulatur Chrysostomus in fine libri primi de contritione cordis, ubi: *Hoc est, inquit, quod exposcitur à nobis, ut semper recordemur mala nostra, & ad animum reuer-*



82 Lib. XI. Pars III. Differt. unica.

cemus, & conscientiam gestorum nostrorum habeamus ante oculos, ut pro iis supplicemus Deo. Oportebat nos semper ( addit libro 2. circa finem ) non solum scire exomologesi, & confiteri, quia in nobis multa delicta sunt; verum & unumquodque peccatum, & majus, & minus, quasi in libro, ita in corde nostro habere descriptum, idque frequentius recognoscere, atque ante oculos ponere, & tanquam hac nuper admissa lugere. Sed adhuc manifestius hom. 4. de Lazaro, circa finem: Singulis horis & diebus renovemus apud nos hoc iudicium, sententiam adversus nos ipsos feramus, omni modo conemur confiteri Deo. Nam si nosmetipsos iudicaremus, non utique iudicaremur à Domino. Ut igitur nec puniamur, nec poenas demus, in suam quisque conscientiam ingrediatur, vitamque explicet, cunctisque commissis diligenter excussis, condemnet animam que hac patravit, puniatque cogitationem, affligat, crucietque suam ipsius mentem, supplicium à seipso exigat pro peccatis.

Videri etiam debet Magnus Gregorius lib. 4. Moral. cap. 17. & lib. 8. cap. 11. Priori enim loco sic scribit: Dum ad mentem male gesta: poenitendo reducimus, gravi mox mœrere confundimur; perstrepit in animo turba cogitationum, mœror conterit, anxietas devastat, inarumnam mens vertitur, & quasi quodam nubilo caliginis obscuratur. : : Nam dum peccatum quisque quod fecit intelligit; dum pravitatis suae nequitiam subtiliter pensat, mœrore mentem obnubilat, & quasi concusso serena lætitiæ aëre, omnem in se tranquillitatem cordis poenitentia turbine devastat. Posteriori

verè



verò sic habet Doctor Sanctissimus : Confabulabor cum amaritudine anima ; pavore namque divini judicii afflicti , dum quadam male gesta plangimus , ipsâ vi nostra amaritudinis ad discutiendos nos vigilantius excitati , alia in nobis etiam qua amplius defleamus invenimus. Nam sæpe quod torpentes latuit , sentibus subtilius innotescit : & afflicta mens certius invenit malum quod fecerat , & nesciebat , eique rixa sua veriùs aperit , quantum à veritatis pace deviauit ; quia reatum suum , cujus securâ non meminit , hunc in se commota deprehendit. Succrescens quippe amaritudo pœnitentia , verecundanti cordi importunè ingerit illicita qua commisit , districtum contra hac judicem ostendit , suppliciorum minas incutit , pavore animam ferit , pudore confundit , motus illicitos increpat , quierem nôxiæ securitatis turbat. Quæ ei Conditor bona contulit , quæ ipse bonis ipsius mala-rependit , enumerat ; quod mirè ab eo conditus , quod gratuito nutritus , quod rationis substantiâ in conditione ditatus est ; quod conditoris gratiâ vocatus , quam sequi ipse & vocatus noluit ; quod vocantis misericordia neesurdum hunc renitentemque despexit ; quod illuminatus donis , quod suâ sponte pravis actibus etiam post dona cecatus est ; quod à cecitatis suæ erroribus paterna sollicitudinis flagellis expiatus , quod à flagellorum doloribus ad salutis gaudia misericordia medicamento reductus est , quod quibusdam culpis , etsi non gravibus subditus , peccare tamen & inter flagella non desinit ; quod peccatorem suum supernæ gratiæ nec contempta derelinquit. Cum igitur afflictam mentem modò per replicatio-

#### 84 *Lib. XI. Pars III. Dissert. unica.*

*nem donorum, modo per impropria actionis suae tantâ severitate increpat, habet in corde iustorum amaritudo animae linguam suam, quae tantò eis subtilius loquitur, quantò & interiorius auditur. Haftenus Gregorius, cujus verba longiuscula licet, refert visum est, quia modum excitandæ contritionis piis omnibus pernecessarium egregiè declarant.*

Quavis autem hæc ita sint, non arbitror tamen necessarium, ut ad singula peccata mortalia totidem singulares & individuae contritiones requirantur speciei vel numero peccatorum correspondentes, cum uno eodemque actu de multis specie numeroque peccatis conteri valeamus. Debet quidem homo singula quæ commisit peccata inspicere, inspiciendo defflere ut ea detestetur quæ confessione aperit, ne ficta sit fraudulentaque confessio, ut cuncta destruat, pro cunctisque satisficiat quæ patravit: sed ad hoc tamen unica contritio sufficit, si ad cuncta feratur. Et hæc est genuina S. Thomæ sententia, qui catenus specialem atque distinctam ad salutem & conversionem desiderat pœnitentiam, quatenus præter generalem confusamque contritionem, quâ peccatorem se fuisse dolet pœnitens, de singulis insuper peccatis ad memoriam revocatis, dum saltem per angustiam temporis licet, unicâ contritione peccata singula post accuratum examen sibi ante oculos mentis expansa detestatur. *In tempore præcedenti justificationem*, inquit Doctor Sanctus 1. 2. quæst. 113. art. 5. ad 3. *Oportet ut homo singula peccata quæ commisit detestetur, quorum memoriam habet. Et ex tali consideratione præcedenti subsequitur in anima quidam*  
*motus*

motus detestantis universaliter omnia peccata, inter quæ etiam includuntur peccata oblivioni tradita: quia homo in statu illo sic est dispositus, ut etiam de his quæ non meminit, conterreretur, si memoria adessent. Quod & repetit 3. p. quæst. 87. art. 1. his verbis: *Ad remissionem peccati mortalis requiritur ut homo actualiter peccatum mortale commissum detestetur, ut scilicet quantum in ipso est, diligentiam adhibeat ad rememorandum singula peccata mortalia, ut singula detestetur.* Et ratio à priori horum omnium est, quia vera contritio eo motivo ciatur, quo excluditur omne peccatum, cum de peccato, ut est injuria Deo illata, & per pœnitentiam sarcienda doleat. Ergo unica contritio singula peccata delet, nullumque comparitur, si sincerè unâ ratione injuriæ Deo illatæ singulis peccatis communi moveatur. Quod usque adeò verum esse existimavit S. Doctor, ut quæst. 28. de verit. art. 5. ad 4. scripserit, sine speciali peccatorum recogitatione justificationem posse contingere, si præcedat vel sequatur memoria peccatorum, pro quibus satisfaciendum est: *Ad justificationem (verba sunt ejus) non requiritur, quod in ipso justificationis momento aliquis de peccatis singulis cogitet. Recogitatio autem singulorum peccatorum debet vel præcedere, vel saltem sequi justificationem.*

### *Secunda pœnitentia pars, Confessio.*

Confessionem esse partem Sacramenti pœnitentiæ, definit Tridentinum sess. 14. can. 4. *Si quis negaverit, inquit, ad integram & perfectam*

etiam peccatorum remissionem requiri tres actus in poenitente, quasi materiam Sacramenti poenitentiae, videlicet contritionem, confessionem, & satisfactionem, qua tres poenitentiae partes dicuntur, anathema sit. Et can. 6. Si quis negaverit confessionem sacramentalem vel institutam, vel ad salutem necessariam jure divino, aut dixerit modum secretè confitendi soli Sacerdoti, quem Ecclesia Catholica ab initio semper observavit & observat, alienum esse ab institutione & mandato Christi, & inventum esse humanum, anathema sit. Quam veritatem non solum ex perpetuo Ecclesiae usu, cujus initii nulla memoria habetur, sed etiam ex Patribus Sacrum Concilium accepit. Nam confessionis auricularis meminit S. Dionysius epist. 8. ad Demophilum, & Origenes hom. 1. & 2. in Psal. 37. & homil. 10. super Numeros, & Tertullianus initio hujus dissertationis relatus, ex lib. de poenitentia, quam vocat disciplinam prosternendi & humiliandi homines, quāve Presbyteris advolvimur, & charis Dei adgeniculamur. Et Irenaeus lib. 1. adversus haereses, cap. 9. & lib. 3. cap. 4. ubi exomologesin seu peccatorum confessionem commendat. Et Cyprianus serm. 5. de lapsis: Apud Sacerdotes Dei dolenter & simpliciter confitentur, exomologesin conscientia faciunt, animi sui pondus exponunt, salutarem medelam parvis licet & modicis vulneribus exquirunt. Et paulò post: Confiteantur singuli, quāso vos fratres, delictum suum, dum adhuc qui deliquit in seculo est, dum admitti confessio ejus potest, dum satisfactio & remissio facta per Sacerdotem apud Dominum grata est. Et Basilius in regulis brevioribus, regula 228. *Itē,*  
inquit

inquit, peccata aperire debent, quibus credita est dispensatio mysteriorum Dei. Et Ambrosius lib. 2. de pœnit. cap. 6. Si vis justificari, fateri delictum tuum; solvit enim criminum nexus verrecunda confessio peccatorum. Et Augustinus lib. 50. homiliarum, hom. 41. hortatur Christianum abstinere à peccatis: Quia, inquit, si ad ultimum vita steterit, nescit si ipsam pœnitentiam accipere, ac Deo & Sacerdoti peccata sua confiteri poterit. Et homil. 49. cap. 3. Nemo sibi dicat, Occulte pœnitentiam ago, apud Deum ago, novit Deus qui mihi ignoscit, quia in corde ago. Ergo sine causa dictum est, qua solveritis in terra, soluta erunt in cœlo. Ergo sine causa sunt claves data Ecclesie Dei. Frustramus Evangelium Dei: frustramus verba Christi. Et Chrysostomus, qui lib. 2. de Sacerdotio, docet debere ultro sibi persuadere Christianos, Sacerdotum curationi sese submittere oportere. Et lib. 3. cap. 5. & 6. aperte, uti supra retulimus, docet omne iudicium suum Sacerdotibus Christum contulisse, eisque animæ sordium purgandarum potestatem esse concessam. Id etiam in plerisque veteribus Conciliis definitum est, quorum syllabum recensere prolixum esset.

Quare intolerabile est Calvini mendacium, quod contra omnem veritatis speciem in suo Tridentini supra omne venenum pestifero antidoto scripsit, nullum scilicet per annos mille fuisse in Ecclesia Confessionis usum, donec, inquit, Innocentius III. cum pauculis cornutis bestiiis laqueum hunc populo Christiano induxit, quem Tridentini Patres adstringunt. O dammandæ vocis temeritatem! O hominis post hominum memoriam, impudentissimam audaciam.

ciam ! ô stultiloquium satis nunquam animadvertendum ? Itane tandem sterquilinio , mille ducentorum Patrum Lateranensium augustissimam coronam , *pauculas cornutas bestias* , appellare licebit ? Hæccine flagitia evomere , hæc effutire indigna homine benè morato ? Sed de hæresiarcha bonorum extortore , legum omnium contortore finem faciam dicendi mihi , peccandi licet ipse de se finem non fecerit. Maxime cum ejus mendacium his sancta Synodus loci citato cap. 5. verbis contriverit : Cum à sanctissimis & antiquissimis Patribus magno unanimique consensu secreta confessio sacramentalis , quæ ab initio Ecclesia sancta usa est , & modò etiam utitur , fuerit semper commendata ; manifestè refellitur inanis eorum calumnia , quicam à divino mandato alienam , & inventum humanum esse , atque à Patribus in Concilio Lateranensi congregatis initium habuisse docere non verentur. Neque enim per Lateranense Concilium Ecclesia statuit , ut Christi Fideles confiterentur , quod jure divino necessarium & institutum esse intellexerat ; sed ut præceptum confessionis saltem semel in anno ab omnibus & singulis , cum ad annos discretionis pervenissent , impleretur. Unde jam in universa Ecclesia cum ingenti animarum fidelium fructu observatur mos ille salutaris confitendi sacro illo & maxime acceptabili tempore Quadragesimæ. Quem morem hac Sancta Synodus maxime probat & amplectitur tanquam pium & meritò retinendum. Irrideret , scio , sacratissimæ Synodi voces morosissimus & supra Luciferum superbus hæresiarcha : sed ad hæc Augustini verba hom. 50. quid responderet non tam hominis quàm belluæ petulcitas :

tulcitas : Cùm ipse ( peccator ) in se protulerit  
 severissima medicina , sed tamen medicina san-  
 tentiam ( quâ nimium judicat se indignum  
 participatione [Corporis Domini] ) veniat ad  
 Antistites , per quos illi claves in Ecclesia mi-  
 nistrantur ; & tanquam bonus jam incipiens  
 esse filius , maternorum membrorum ordine cu-  
 stodito à prepositis Sacramentorum accipiat sa-  
 tisfactionis sua modum. Quid ad hæc Grego-  
 rii fulmina , lib. 3. in 1. Reg. cap. 5. Afflictio-  
 nem illam pœnitentia ad delenda peccata tum  
 demùm idoneam esse , cùm Sacerdotis fuerit ju-  
 dicio imperata , cùm ab eo consentium actibus  
 discussis , pro modo criminis onus ei decernitur  
 afflictionis. Ratio verò theologica hujus ca-  
 tholicæ veritatis à Sacro Tridentino mox re-  
 lato capite tradita est. Ubi ex institutione Sa-  
 cramenti pœnitentiæ legitimè concludit , insti-  
 tutam etiam esse à Domino integram pecca-  
 torum confessionem. Cùm enim Christus Do-  
 minus Sacerdotibus suis vicariis remittendo-  
 rum retinendorumque peccatorum facultatem  
 eximiam tradiderit , atque proinde judiciariam  
 de peccatis sententiam ferendi potestatem con-  
 tulerit , liquidò & veluti sponte sua , ex eo præ-  
 cepto detegendorum Sacerdoti peccatorum  
 obligatio cunctos fideles astringens fuit , &  
 non fluere revera non potest. Quomodo enim  
 causam incognitam judicabunt constituti à  
 Deo ministri ? Quomodo in pœnis pro modo  
 & gravitate peccatorum injungendis æquitatem  
 servare poterunt æqui prudentesque judices , si  
 in genere duntaxat , & non etiam in specie &  
 sigillatim peccata sibi declarata pernoscant ?  
 Quomodo ignorata vulnera , latentisque mor-  
 bos.



bos eò periculosiores quò occultiores , spirita-  
les medici curabunt ? Ergo admissâ remitten-  
dorum retinendorumque peccatorum Sacerdo-  
tibus concessâ facultate ( non admitti porro  
non potest ab admittentibus Evangelium ) &  
unâ necessitatem confessionis pernegare , est in  
media luce voluntariè cæcutire : lumine enim  
naturali , quod obscurare hæresis quidem po-  
test , extinguere certè non potest , manifestum  
est , non posse æquos judices de peccatis sibi  
ignotis ferre judicium ; nec scire illos posse ,  
utrum solvere debeant , an ligare ; remittere , an  
retinere , nisi judicantibus delicta patrata inno-  
tescant. Certè qui finem necessarium instituit ,  
media etiam præfinivit quæ sunt ad finem il-  
lum necessaria , nisi velimus Legislatorem im-  
prudentem in necessariis deficiendo extitisse.  
Ergo ex potestate clavium ministris Evangeli-  
cis concessâ , peccata confitendi necessitas in-  
victè demonstratur ; frustra enim Christus  
Apostolis eorumque successoribus claves regni  
cælorum contulisset , si aliunde quàm per illas  
claves pateret cælestis januæ introitus , ut Au-  
gustinus superiùs laudatus hom. 49. argumen-  
tatur. Aliter enim nullus planè clavium usus  
in Ecclesia videbitur ; ac frustra is , cui clavium  
potestas data est , quempiam cæli aditu pro-  
hibebit , si tamen aliâ viâ introitus patère  
queat : Ergo ut locum aliquem munitum in-  
gredi nemo potest sine ejus opera cui claves  
commissæ sunt : sic nullus admittetur in cæ-  
lum , nisi fores à Sacerdotibus , quorum fi-  
dei claves regni Dominus credidit , aperian-  
tur.

Dices : Confessionis necessitatem Patres an-  
tiquissimi



tiquissimi inficiati sunt. Nectarius enim Archiepiscopus Constantinopolitanus, Gregorii Nazianzeni successor & Chrysostomi antecessor, confessionem quæ Sacerdotibus fit, abrogavit, ut lib. 9. historiæ tripartitæ, cap. 35. ex Sozomeno refertur, & videri potest Socrates lib. 5. cap. 19. ac Sozomenus lib. 7. cap. 16. Eam autem non abrogasset, si sacramentalis confessio medium esset ad salutem necessarium; in mediis enim ad salutem necessariis nemini patrocinatur ignorantia. Admittitur quidem in hujusmodi mediis excusatio ne homo peccet, quando sine culpa defunt; non admittitur tamen ut sine illis homo salvetur. V. g. quia fides Christi est ad salutem necessitate mediis necessaria, etsi ille qui non audivit Evangelii prædicationem, non peccet ex eo quod in Christum non credit; vitam tamen æternam minimè consequetur, quæ sine fide Christi, sicut nec sine baptismo, à nullo unquam obtinebitur. Nectarii successor Chrysostomus confessione coram uno Deo facta contentus fuit, sacramentalis confessionis usum reliquit arbitrium hom. 2. in Psal. 50. *Peccata tua dicito, inquit, ut deleas illa: si confunderis alicui dicere quia peccasti, dicito ea quotidie in anima tua; non dico ut confitearis conservo tuo qui exprobet, dicito Deo qui curat ea.* Et in oratione de Beato Philogonio: *Ego testificor, ait, ut si quisque nostrum recedens à pristinis malis ex animo vereque promittat Deo, se postea nunquam ad illa rediturum, nihil aliud Deus requirat ad satisfactionem ulteriorem.* Idem docere videtur in serm. de pœnit. & confess. & hom.

hom. 20. in Genesim, & hom. 31. in epistolam ad Hebræos.

Respondeo Melchiorem Canum relectione de pœnitentia, parte 5. pag. mihi 897. fateri Nectarium Chrysostomi antecessorem confessionem secretam de medio sustulisse, Novatianorum pœnitentiæ hostium, quos sibi in rebus fidei consiliarios, teste Socrate, frequenter adhibebat, fraudibus deceptum. Cui succedens Chrysostomus de confessione auriculari verba facere noluit, eamque noluit statim restituere, ne apud populum, apud quem nondum sedatum erat scandalum per occasionem secretæ confessionis exortum, turbæ concitarentur. Nec propterea tamen inde confessionem eliminandam subinferre modernos hæreticos jure merito posse, quia quemadmodum baptismus non statim à passione Christi cœpit esse medium omnibus ad salutem necessarium, sed duntaxat post sufficientem Evangelii baptismique evulgationem; ita confessionis Sacramentum ex eo tempore cœpit omnibus hominibus esse necessarium, quo fuit sufficienter promulgatum: unde non mirum, si Græci, nondum exploratâ & clarè definitâ confessionis necessitate, eam abjecerint. Verùm tanti Magistri, cujus veneratione nihil mihi antiquius, veniâ dixerim, cum non satis oculatè locum illum historiæ tripartitæ inspexisse; nec meam ingenuitatem improbarer Canus, qui eam in dicendo & propriam privatamque sententiam tuendo libertatem in Magistro suo Francisco Victoria tanto perè commendavit, tum in ejusdem relationis parte 4. ferè à principio, tum initio libri duodecimi

decimi de Locis, qui ut ipse ait, nihil pugnaciter pertinacique contentione defendere solebat, sed suam interim sententiam liberè tueri, eandem postea simili libertate retractaturus, si melior forsitan opinionis adversæ ratio succurrisset. Hanc eruditissimi viri modestiam imitari avens Canus : *Si minùs*, inquit, *imitatione tantam ingenii præstantiam consequi possumus, voluntate certè proximè accedimus, magistrumque conamur exprimere. In hoc enim sumus docti, prudentes, facundi, si hæc egregias dotes animi moderatio comitetur : & parum valet ingenium, quàmlibet excellens & eximium, nisi definita animi moderatione gubernetur.*

Quare locum illum historiæ tripartitæ subtiliùs pervestigavit Joannes Hesselius, & ipse eximius Theologus, qui in sententia sua de hoc Sozomeni loco Patribus Tridentinis exhibito, eruditè ex ipso contextu ostendit, à Nectario non auricularem confessionem, sed ejus appendicem quandam, publicam nimirum peccatorum recitationem, vel publicæ impositione pœnitentiæ indicationem, quâ peccatum nobilis matronæ cum Diacono patratum pervulgatum fuerat, prudenter fuisse sublatam, quæ juxta ejus temporis morem à quodam instituto Pœnitentiario coram universo populo veluti in theatro fiebat. *Visum est antiquis Pontificibus* ( verba sunt Sozomeni ) *ut velut in theatro sub testimonio Ecclesiastici populi delicta pandantur ; & ad hanc causam Presbyterum bonæ conversationis, servantemque secretum, ac sapientem virum statuerint, ad quem accedentes*

*accedentes ut qui deliquerunt, delicta propria fateantur.*

Nec obest, ibi Sozomenum asserere, Presbyterum illum debere esse *servantem secretum*, unde de confessione occulta loqui illum infert Canus, quia si non essent occultè recitata peccata, non oporteret servare secretum. Non, inquam, obest; quia licèt occultè peccata Presbytero exponerentur, peccatoribus tamen publica & nota pœnitentia veluti è theatro imponebatur; unde ne graviora scelera patefactâ pœnitentiâ patefierent, nève detrimentum externum lapsis importaretur, voluerunt Patres Presbyterum illum esse discretum, & secreti in impositione pœnitentiæ tenacem: quia tamen id difficillimum erat, si præsertim more illius temporis servarentur canones pœnitentiales, ideo solennem illam pœnitentiæ impositionem, publicæ peccatorum recitationi interdum fieri solitæ æquivalentem Nectarius, aliique deinde Pontifices abrogarunt.

Ad cujus evidentiam sciendum, canones in primitiva Ecclesia servari solitos pœnas etiam externas pro diversitate criminum præscripsisse. V. g. Clericos in fornicationem lapsos ab executione Ordinum Canones antiqui suspendunt, eosque in sortem laïcorum redigunt, ut patet in constitutionibus Apostolicis can. 24. & can. 9. Neocæsarensis Concilii, & Basilii Magni can. 3. 32. 51. 68. Aliæ etiam pœnæ aliis sceleribus præscribebantur; unde Pœnitentiarius ille pœnitentes designatos propalam in locis pœnarum statuebat ( varia quippe loca, & variæ pœnitentiæ in illis primitivis fervoribus delinquentibus

quentibus erant præscriptæ ) unde pœnitentium peccata facilè vulgabantur. Hinc Basilii de uxoribus adulteratis & peccatum suum confitentibus canonem in ordine trigessimum-quartum edidit in hæc verba : *Adulteratas mulieres , & pio animo ob timorem futuri iudicii confitentes publicare Patres nostri prohibuerunt , ne confessis mortis causam præberent.* Ubi *publicare* , *exponere* , non hoc significat , ut optimè Arcudius post Zonaram & Balsamonem expōnit , quasi licitum unquam fuerit Sacerdotibus peccata in confessione excepta divulgare ; sed pro eo accipitur quod est in locis pœnarum secretò confessos statuere. Exempli gratiâ secundum 58. Basilii canonem adulteri quatuor annos cum fletibus stabant , quinque cum audientibus , & duos cum iis qui communione orabantur. Qui ergo vidisset alicujus uxorem extra divinos Ecclesiæ ambitus ex præscripto Pœnitentiarii , quantumvis alioquin *secretum servantis* , ut loquitur Sozomenus , profectò absque laborioso discursu intellexisset , eam illi peccatrici ob adulterii crimen pœnam esse injunctam. Nectarius ergo , Chrysostomus , & alii deinde Præsules publicam confessionem , & publicam etiam pro peccatis occultè confessis pœnæ impositionem ab Ecclesia arcendam esse censuerunt , ne gravia inde fidelium scandala vel detrimenta pœnitentium sequerentur. Hinc Magnus Leo epist. 80. tum ea præcavens damna quæ ex hujusmodi publicatione per se nasci solent , tum timens ne hac praxi ex fervore & plenitudine fidei aliquando frequentata multi à pœnitentiæ remediis arcerentur : *Illam* , inquit , *contra Apostolicam*

*cam regulam presumptionem, quam nuper agnovi à quibusdam illicita usurpatione committi, modis omnibus constituo submo-  
verì: ne de singulorum peccatorum genere libellis scripta professio publicè recitetur, cum reatus conscientiarum sufficiat solis Sacerdotibus indicari confessione secretâ. :: Sufficit enim illa confessio qua primum Deo offertur, tum etiam Sacerdoti, qui pro delictis pœnitentium precator accedit.*

Hæc non improbabiliter & ad solutionem argumenti abundè dicta fuerint. Si tamen veritatem penitiùs indagemus, aliquid certius & ad profligandam Calvinì audaciam forius occurreret. In primis! cum Socrates ejusque exscriptor Sozomenus Novatianorum pœnitentiæ hostium juratorum errorem sectati sint, quis in materia pœnitentiæ, quam ad nihilum redigere volebant, inimicis pœnitentiæ fidem indubiam dabit? Quis ex hæreticorum suspectissimo testimonio, & in hoc potissimum articulo in quo singularis eorum hæresis sita erat, fidem Ecclesiæ Catholicæ non nisi iniquissimè adori-  
etur? Certè nullus, nisi fuerit in Ecclesiastica historia peregrinus, ignorare potest, Socratem & Sozomenum fide græcâ, id est suspectissimâ, litteris commendasse apertissima mendacia, quorum specimen dat author modernus Dominus Armand in opere aureo & accurato vitæ Chrysostomi. Si in alienis & per se indifferen-  
tibus magnifica compertaque mendacia venditarunt, quantò magis indulisse illos pro domo sua, seu pro cardinali suæ hærescos capite falsis narrationibus instillandis credendum est? Ipsa etiam Socratica narratio mendaciis scatet:  
unum

uam seligo omnibus in meridie non excutientibus manifestum.

Etenim falsissimum est, praxini illam constituendi Presbyterum super pœnites, sive privatos sive publicos, tum incepisse, cum Novatiani ab Ecclesia sunt divisi, quod nollent communicare cum his qui deliquerant sub persecutionibus Imperatoris Decii, ut Socrates ait. Etenim longè ante illum Novatianorum schismatis prætextum, regnante Alexandro Severo, & florente Origene praxis illa vigeat, ut patet ex hom. 2. Origenis in Psalm. 117. ubi sic habet: Oportet peccatum non celare intrinsecus; fortassis enim sicut ii qui habent intus inclusam escam indigestam, aut aliquid humoris vel phlegmatis stomacho graviter & molestè imminetia, si vomuerint relevantur; etiam hi qui peccaverint, si quidem occultant & retinent intra se peccatum, intrinsecus urgentur & propemodum suffocantur à phlegmate vel humore peccati. Si autem ipse sui accusator fiat, dum accusat semetipsum & confitetur, simul evomit & delictum, atque omnem morbi digerit causam. Tantummodo circumspecte diligentius, cui debeas confiteri peccatum tuum. Proba prius medicum, cui debeas causam languoris exponere, qui sciat infirmari cum infirmante, flere cum flente, qui condolendi & compatiendi noverit disciplinam: ut ita demùm si quid ille dixerit, qui se prius eruditum medicum ostenderit & misericordem, si quid consilii dederit, facias & sequaris. Si intell. xerit & praviderit, talem esse languorem tuum, qui in conventu totius Ecclesie exponi debeat & curari, ex quo fortassis ceteri edificari poterunt, & tu ipse facile sa-

*nari, multa hoc deliberatione, & satus perito  
medici illius consilio procurandum est.*

Hoc illustri Origenis testimonio non solum evanescit impostura Socratis, qui praxim confessionis, sive privatae, sive publicae, à tempore persecutionis Decii vigere incepisse scripsit, sed etiam multa hinc elicere est ad revincendos modernos hæreticos, præsentemque difficultatem enodandam peropportuna. In primis enim clarum est, confessionem sacramentalem & privatam verbis illis apertissimè declarari, quibus docet peccatori quærendum diligentius esse medicum, *cui debeat confiteri peccatum suum, cui debeat causam languoris exponere.* Arrige aures Calvinianæ: itane confessio vigere cœpit à tempore Concilii Lateranensis sub Innocentio III.

Secundò perspicuum etiam est in quibusdam casibus Sacerdotes post exceptam peccatorum confessionem secretam, pœnitentes interdum obligasse ad exponendum in conventu totius Ecclesiæ peccati languorem. Hic mos Constantinopoli Nectario eam Ecclesiam regente frequentabatur; hinc Pœnitentiarius Constantinopolitanus post audita nobilis matronæ delicta, quorundam ei peccatorum publicam recitationem in pœnitentiam imposuit, ut illa salutari pudore suffunderetur. Hæc pœnitentiæ impositæ limites transiliens, turpem cum ejusdem Ecclesiæ Diacono congressum propalavit. Hinc turbæ, hinc scandala, hinc populum contra Clerum queritari, clamitare, & vehementer offendi. Quibus ut malis Nectarius mederetur, publicam illam peccatorum recitationem vel penitus, vel certè ad tempus abolevit. Dico  
certè



*certe ad tempus.* Nam tempore S. Leonis Magni morem illum in quibusdam Ecclesiis fuisse Nestario superstitem ex præfati Leonis epistola 80. ad universos Episcopos per Campaniam, Samnium, & Picenum constitutos scriptâ constat, cujus verba superius retulimus. Cæterum nunquam abrogatam fuisse in Ecclesia Græca confessionem sacramentalem, patet ex pervetustis Ecclesiæ Orientalis Ritualibus, quos doctissimus P. Joannes Morinus publici juris fecit.

Illud denique diligenter observandum & cavendum est, ut ne confessionem publicam cum pœnitentia publica confundamus. Publicam confessionem, etsi eam in nonnullis ultrò & prompto animo ob peccata publica sua suscipientibus tolerarit permiseritque rarò Ecclesia, nunquam tamen eam absolutè probavit, nunquam etiam publicam pœnitentiam æcturis imposuit. Quia ut ex Magno Leone aliàs diximus, *sufficit reatus conscientiam solis Sacerdotibus indicari confessione secreta.* Publicam verò pœnitentiam etiam in privatorum & occultorum criminum vindictam viguisse, testatur Ambrosius lib. I. de pœnit. cap. 16. *Si quis, inquit, occulta crimina habens. ::: Volo veniam reus speret, petat eam lacrymis, petat gemitibus, petat populi totius fletibus, & cætera quæ alibi retulimus.* Idque ex Tertulliano, Chrysostomo, aliisque Patribus patet.

Et hoc modo intelligendus venit Chrysostomus, quod ipsa contextus verba subinducant, cum eam tantum confessionem non consulat, ex qua erat opprobrium pœnitentibus nasciturum: *Non dico, inquit, ut confitearis ea conser-*

*vo tuo , ne exprobrat. Quod apertius ostendit hom. 4. de Lazaro , ubi & alludit ad consuetudinem illam adducendi peccatores in publicum theatrum : Cave homini dixeris , ne tibi exprobrat. Neque enim conservo confiteris , ut in publicum proferas. :::: Non cogo te in medium prodire theatrum , ac multos adhibere testes.*

Observat etiam eruditè Arcudius libro 4. cap. 2. quod quando Chrysostomus soli Deo ait exponenda peccata , ipsi soli explicanda vulnera , ab eoque pharmaca postulanda , non excludit propterea ministrorum peccata sibi exposita judicantium sententiam , quam infinitis locis vir divinus non solum commendat , sed ad cœlos usque supra Angelicam potestatem evehit , ut de Sacramento Ordinis agentes referemus ; sed quia concursus causæ instrumentalis non impedit quominus effectus causæ principali unicè asseratur , ideo quod ministris exponitur , quod ministrorum operâ fit , uni Deo Sacramentorum præcipuo auctori jure merito ascribit. Sicut ergo propter hanc rationem de Eucharistia loquens hom. 50. in Matth. ait: *Cum Sacerdotem videris tibi exhibentem , ne Sacerdotem id facere putes ; sed Christi manum esse existima , qua se extendit. Minister enim est Sacerdos. Quod & confirmat exemplo Baptismi his verbis : Quemadmodum quando baptizat Sacerdos , non ipse te baptizat , sed Deus est. :::: Ipsius solius est donum.* Ita in eodem planè sensu soli Deo asserit recitanda peccata , ab eoque solo vulnerum curationem flagitandam ; quia sicut qui baptizat , non ut homo & conservus , sed ut Christi nomine baptizat,

tizat , ita & eodem nomine peccata remittit. Noverat enim vir in sacris litteris versatissimus , secundum consuetudinem Scripturarum negari nonnunquam hominem tum agere cum agit , ubi Deus causa est agendi præcipua. Hinc Exodi 16. *Nec contra nos est murmur vestrum*, ait Moyses , *sed contra Dominum* : tametsi paulò ante dictum sit , *Et murmuravit omnis congregatio filiorum Israël contra Moysen & Aaron* ; quippe qui personam Dei gerebant. Et 1. Reg. 8. *Non te abjecerunt , sed me , ne regnem super eos*, dixit Dominus ad Samuëlem, loquens de populo illius vices Dei gerentis imperium detrectante. Et Princeps Apostolorum Act. 5. Ananias agri divenditi pretii partem sibi servanti dixit : *Non es mentitus hominibus , sed Deo*.

Cæterum confessionem Sacerdoti factam, quâ patefiant errata ; quâve pro varietate peccatorum satisfactiones & mûltæ imponantur, variis locis , sed nominatim in præclaris de Sacerdotio libris apertissimè docuit his aureis verbis , & quæ à Sacerdotibus observentur dignissimis : *Non simpliciter pro delictorum modo pœna infligenda est , sed delinquentium simul spectandus est animus ; ne cum vis rupturam sarcire , deteriorem eam facias ; & cum erigere prostratum studes , graviolem casum efficias. Imbecilles enim ac dissoluti , quique majori ex parte mundi deliciis dediti sunt , præterea etiam generis nobilitate ac potentiâ gloriari possunt, sensim quidem ac leniter ad bonam frugem se colligentes possunt , etsi non perfectè , saltem ex parte à malis liberari , quibus detenti sunt. Quod si quis nimia disciplina severitate utat-*

tur, minore etiam eos disciplinâ & emendatione privabit. Nam postquam animus pudorem deposuerit, in desperationem cadit, nec blandis cedit admonitionibus in posterum, nec minis deterretur, nec beneficiis incitatur, verum multò pejor redditur eâ civitate, quam vituperans Propheta dixit: *Frons meretricis facta est tibi, desisti erubescere apud omnes.* Quamobrem pastori multâ opus est prudentiâ, & oculis innumerabilibus, ut undique circumspectè anima habitum intueatur. Quasmodum enim animum despondens mulier, & in salutis propria desperationem cadunt, quod acerbiora remedia perpeti non potuerint: sic sunt alii, quibus quod par delicto pœna non irrogatur, in contempcionem convertuntur, & multò sunt deteriores, ut gravius quandoque peccent. Horum igitur nihil inexploratum relinquentium, sed exactè omnia perscrutando adinveniri conveniens emendatio adhibenda, ne frustra se laborasse comperist. Non potest autem spectari animus, nec innumerabilibus oculis undique anima habitum intueri valet Sacerdos, nec omnia scrutari, nisi interiores ægri animi recessus confessione pandantur. Alium non minùs egregium Chrysostomi locum in responsione ad proximè sequentem objectionem referemus.

Denique quando Chrysostomus variis locis auditores hortatur ut peccata Deo confiteantur, manifestè loquitur de quotidiano conscientie examine ab unoquoque bono Christiano singulis diebus constanter peragendo. Quin & confessionem sacramentalem satis iis in locis indigitat; est enim ejusmodi Chrysostomi sensus: Si erubescis peccata hominì confiteri,

ſiteri, ſi times conſervo tuo privata aperire delicta, illa ſaltem non prætermittas coram Deo recogitare quotidie in amaritudine animæ tuæ, ab animoque tuo dictorum atque factorum ſingulis diebus rationem repoſcere; quia coram illo non confunderis fateri delicta, cujus oculi imperfectum tuum noverunt, nec eſt ulla creatura inviſibilis in conſpectu ejus, ſed omnia nuda ſunt & aperta oculis ejus. Hanc eſſe perſpicuam & planam Chryſoſtomi mentem inde apertè colligitur, quòd homiliæ illæ, unde Calviniſtæ errorem ſuum confirmare nituntur, Antiochiæ à Chryſoſtomo dictæ ſint, ubi abrogatam exemplo Nectarii confeſſionem ſacramentalem nullus ſanæ mentis dixerit.

Dices ruruſ : Sacræ litteræ nobis alia ſanandorum peccatorum remedia, ad eaque delenda efficacia, à confeſſione oneroſâ diſtincta ſubminiſtrat. Nam amore Dei remitti peccata tradit Veritas Luc. 7. *Remittuntur ei peccata multa, quoniam dilexit multum.* Et Princeps Apoſtolorum cap. 4. ſuæ primæ: *Charitas operit multitudinem peccatorum.* Martyrio etiam remittendorum criminum, & ad cœlum perdu-cendi efficacitatem aſſerit Salvator, Matth. 10. *Omniſ qui confeſetur me coram hominibus, confeſtor & ego ſum coram Patre meo: & qui perdiderit animam ſuam propter me, inveniet eam.* Eandem virtutem eleemoſynæ aſcribit Tobias cap. 8. aſſerit & Chriſtus Luc. 11. *Eleemoſyna, inquit ille, ab omni peccato & à morte liberat.* *Dare eleemoſynam, inquit iſte, & ecce omnia munda ſunt vobis.* Remiſſionem etiam peccatorum remittentibus privatas injurias Veritas ſponpondit, Matth. 6. *Si dimiſeritis homini-*

*hinc peccata eorum, & Pater vester cœlestis dimittet vobis delicta vestra.* Sed id saltem contritioni cordis, & sinceræ pœnitentiæ denegari non potest, postquam Ezechiel, 18. dictum est: *Si impius egerit pœnitentiam ab omnibus peccatis suis, omnium iniquitatum ejus non recordabor.* Ergo gratis durum & permolestum, & vix infirmitati humanæ tolerabile confessionis onus imponimus, & conscientiarum carnificinam invenimus.

Respondeo, enumerata illa virtutum opera ad pœnitentiam non parum conferre, pleraque etiam illorum desiderari, sed sine pœnitentiæ Sacramento divinitus instituto minimè sufficere. Unde sicut sine fide Christi explicita, sine lavacro regenerationis; ita sine pœnitentiæ Sacramento in te vel certè in voto suscepto nemo lapsus salutem consequitur, quia sine mediis ad salutem divinitus constitutis nemo salvatur: unde sicut nemo sine baptismo salvus efficitur, quantumvis sive occupatus circa res alias, sive oblitus baptismatis esse fingatur; ita sine confessione voto saltem suscepta, quavis excusatione prætensâ nullus salvabitur; quia sine clavibus non patet aditus januæ cœlestis. Hanc doctrinam præclare exponit os Chrysostomi aureum hom. 9. in epist. ad Hebr. ubi quæ enumerata sunt, ad peccatorum remissionem juvare, & pœnitentiam ipsam munire docet; sed illa tamen pietatis & compunctionis opera obsignare Sacerdotis absolutionem.

Verba Chrysostomi sunt hæc: *Filii mei, quos iterum parturio donec formetur in vobis Christus, attingamus tantum pœnitentiam.*

*Nam*

Nam videte Dei benignitatem & clementiam. Oportebat nos omni modo puniri; & non solum non punit, sed etiam bonis impertiit innumerabilibus, idque perinde ac si res magnas & praeclaras gessimus; iterum lapsi sumus, & ne sic quidem punit, sed dedit medicamentum pœnitentia, quod sufficit ad delenda & abstergenda omnia nostra peccata, si modò viderimus cujusmodi sit medicamentum, & quomodo id sit applicandum.

Cujusmodi ergo medicamentum pœnitentia, & quomodo conficitur? Primum & suorum peccatorum condemnatione, & ex confessione. Delictum, inquit, meum cognitum tibi feci, & peccatum meum non abscondi. Pronuntiabo contra me iniquitatem meam Domino, & tu remisisti impietatem cordis mei. Et iterum: Dic peccata tua prior, ut iustificeris. Et: Iustus est sui accusator in primo sermone. Secundò ex multa humilitate; est enim velut quadam catena aurea, & si initium acceperit, sequuntur omnia. Nam si peccatum fueris confessus, ut oportet confiteri, sit humilis animas eam enim versans & agitans conscientia, efficit ut sit contracta. Oportet autem alia quoque addere humilitati, si talis sit qualem beatus David habebat, dicens: Cor contritum & humiliatum Deus non despiciet. Nam quod est contritum non exurgit, non ferit, sed est paratum ad malè patiendum, ipsum autem non exurgit. Talis est cordis contritio; etiamsi affecta fuerit contumeliâ, etiam malè passa quiescit, nec concitatur ad vindictam. Post humilitatem verò opus est intensis precibus, multis lacrymis: & interdum & nocturnis. Lavabo, inquit,



per singulas noctes lectum meum, lacrymis meis stratum meum rigabo: laboravi in gemitibus meis. Et iterum: Quoniam cinerem tanquam panem manducabam, & potum meum cum fletu miscebam. Et post orationem adeo inensum multâ opus est eleemosynâ. Hoc enim est quod reddit admodum validum medicamentum poenitentia: & quomodo in medicorum adjumentis est medicamentum quod multas quidem capit herbas, sed unam qua obtinet principatum: ita etiam in poenitentia, ipsa est herba qua principatum magis obtinet, & ipsa fuerit universum. Audi enim quid divina dicat Scriptura: Date eleemosynam, & omnia arunt vobis munda. Et iterum: Eleemosynis & fide mundantur peccata. Et: Ignem flammantem exstinguet aqua, & eleemosyna compescet magna peccata. Deinde non irasci, neque injuria accepta meminisse, omnibus peccata remittere. Homo homini, inquit, reservat iram, & apud Dominum querit medelam? Remittite, inquit, ut remittatur vobis. Et fratres ab errore convertite. Vade, inquit, & converte fratres tuos, ut remittantur tibi peccata tua. Et se in Sacerdotes ut convenit gerere. Et si fecerit, inquit, quispiam, peccata remittentur ei. Vides in tam accitata medicamento poenitentia confessione non omisisse Chrysostomum confessionem, qua peccator se in Sacerdotes ut convenit gerit, ut sibi peccata Sacerdotis potestate remittantur.

Quod verò dicitur, præceptum illud confessionis durum esse & grave: respondeo cum Tridentino sess. sæpe memorata, videri id quidam posse, nisi tot. tantisque commodis peccatorum



catorum detegendorum verecundia levaretur, quæ omnibus dignè ad hoc Sacramentum accedentibus per absolutionem certissimè conferuntur. Etenim, ut rectè prosequitur Catechismus Romanus, confessionis beneficio faciliùs peccatorum veniam obtineamus; peccata namque extra confessionem non nisi acri intensoque dolore, qui cum scelerum magnitudine æquari conferrique possit, remitti possunt; unde cum pauci admodum ad tantæ perfectionis gradum perveniant, à paucissimis etiam peccatorum venia speranda foret. At verò per confessionem faciliiori ratione communi hominum salutì consultum est; nam etsi quis eo perfecto dolore non afficiatur, qui ad impetrandam veniam satis esse possit, modò tamen sincerè in Deum convertatur dolens de præterito, cavens de futuro, *Vi* clavium peccata remittentur & condonabuntur. Deinde nihil tam ad solatium animi conferre experimur, quàm si interdum occultas animi cogitationes, facta, dictaque omnia prudenti & fideli amico patefaciamus, qui nos operâ & consilio juvare possit. Quare ad eandem rationem maxime salutare existimandum est iis qui scelerum conscientia agitantur, ut Sacerdoti tanquam Christi Domini Vicario, cui perpetui silentii severissima, & nullo unquam casu violanda lex imposita est, animæ suæ morbos quosvis, & vulnera, vulnerumque recessus ac sinus omnes aperiant. Præterea hac humili & clancularia peccatorum recitatione, multa inveniunt infirmi spirituales parata sibi remedia, quæ non solum præsentis aggritudinis sanandæ, sed etiam futuris præcavendis, vitandis præsentibus

divis opitulantur. Denique, aliis omis-  
 recto confessionis usu tota Christianismi re-  
 formatio pender: si enim pœnitentes cœ cordis  
 contriti humiliatione accederent, si Confessio-  
 narii convenientia apponerent medicamenta  
 salutis, & moderante Christiana prudentia vi-  
 num cum oleo more Samaritani vulneribus ap-  
 ponerent, vinum Ecclesiasticæ disciplinæ ne pu-  
 trescant vulnera, oleum consiliorum, & pater-  
 næ, quin & maternæ teneritudinis curas, hac  
 forti suavique temperaturâ totum Christianum  
 orbem mutatum iri certissimum est. Illud etiam  
 addo, quod sicut quidquid hoc tempore san-  
 ctitatis, pietatis, & religionis in Ecclesia sum-  
 mo Dei penes conservatum est, id magna  
 ex parte confessioni tribuendum est: ita ad  
 Christianæ vitæ conjunctionem, societatem,  
 & securitatem confessio magnopere juvat; non  
 solum quia confitendi verecundiâ delinquendi  
 cupiditati frena injicit, & licentiæ improbita-  
 tem veluti cauterii ustione coërcet; sed etiam  
 quia ejus frequentia occulta nefandaque scelera  
 externis sæpe graviora cohibentur, quæ nulla  
 exterior disciplina curare valet. Unde nihil mi-  
 randum est, si humani generis hostis fidem Ca-  
 tholicam funditus evertere cogitans, hanc  
 Christianæ Religionis arcem, superædificatam  
 super fundamentum Apostolorum & Prophetarum,  
 ipso summo angulari lapide Christo Jesu,  
 totis viribus per impietatis suæ ministros & sa-  
 bellites oppugnare conatur.

*Tertia Sacramenti Pœnitentiæ pars,  
Satisfactio.*

Cùm ex dictis constet satisfactionem esse partem integram Sacramenti pœnitentiæ, evidens est quod quemadmodum iudicium in quo probatus reus sine multa absolvitur, perfectione caret, ita mancum & imperfectum est sine satisfactione pœnitentiæ Sacramentum: ergo necessaria est satisfactio, non solum illa quæ ex arbitrio pœnitentis proficiscitur, sed quæ est iudicii sacramentalis complementum, quæve ut ait Concilium Florentinum, *secundum arbitrium Sacerdotum* imponitur. Debet tamen absolutionis beneficium votum satisfaciendi præcedere, quo se pœnitentes Ecclesiæ potestati subjiciant, ut juxta ejus arbitrium peccata compensent. Unde non est liberum pœnitenti impositam pœnitentiâ prætermittere, alioquin frustra essent Sacerdotes iudices, divinitus constituti, si eorum sententiæ parere non esset necessarium: inanis quippe est illa iudicandi auctoritas, imò & ridicula, & in nullo futura usus, quæ impunè pro iudicatorum arbitratu rejici potest, in eo præsertim iudicio, quod non ad litigandum, sed ad vindicanda scelera institutum est. Certè sicut iudicibus necessarium est pœnam reis indicere, ne iniqui iudices habeantur & sint; ita iudicium illud exequi peccatores tenentur, falsi pœnitentes ne videantur & re ipsa sint. Quem enim, quælibet dolorem de peccatis, quem emendandæ vitæ: minimum ille habere potest, qui pœnitentiâ à iudice

iudice Dei locum tenente justam & æquam  
 nec acceptare vult, nec implere? Quodnam cor-  
 dis contriti & humiliati verum signum dabit,  
 qui pœnam in compensationem injuriæ Deo-  
 factæ subire detrectat? Sicut ægrotus medico  
 salubriter præcipienti parère nolens, nolle se  
 sanari convincitur: ita nulla salutis spes infir-  
 mo spiritali inest, qui præscripta à Sacerdote  
 remedia curationis animæ negligit. Si in hu-  
 manis justitiæ præpositis à Principe ad judi-  
 candum de criminibus delegatis obtemperare  
 rei tenentur, quin si in privatis negotiis judicis  
 vel arbitri propriâ voluntate delecti æquæ sen-  
 tentiæ non parère iniquum est, & judici inju-  
 rium, quæ æquitatis specie judici divina autho-  
 ritate constituto obedire reluctabimur? Nun-  
 quid sacri ministri sicut solvendi, ita & ligandi  
 accepere potestatem? At quæ tandem illi erit  
 ligandi potestas, quam licet impunè rejicere.  
 Quare sicut Sacerdotes, cùm formam Sacra-  
 menti proferunt, vice Dei absolvunt, ita cùm  
 multam pro peccatis indicunt, vice Dei li-  
 gant; quorum proinde sententiæ non minùs  
 in ligando, quàm in absolvendo eandem ha-  
 bere vim censendæ sunt, ac si à Christo, cuius  
 vicarii sunt, latæ fuissent. Quare probari mihi  
 nunquam potuit sententia Scoti vel Cajetani,  
 quorum ille nullum pœnitentem ad injunctam  
 pœnitentiam acceptandam obligari asserit, ta-  
 met si semel acceptam implere teneri velit: iste  
 verò existimavit, pœnitentem nec injunctam  
 pœnitentiam acceptare, nec acceptatam imple-  
 re teneri. A quorum sententiâ non viderur alie-  
 nus Gabriel in 4. dist. 16. quæst. 2. ubi affirmat,  
 quod quoniam pro peccato puniendo duo re-  
 media

media sunt, alterum in hac vita per fructus pœnitentiæ, alterum in futura per peculiare Purgatorii flammæ, potest pœnitens neglectâ injunctâ pœnitentiâ eligere unam futuri sæculi satisfactionem. Sed hæc sententiæ non solum nulla ratione convenienti nituntur quæ accuratè solvatur dignâ, sed ut præmissimus, judicariam ligandi potestatem omnemque satisfactionis rem & nomen ipsum de medio tollunt, & ad nihilum redigunt.

Quapropter præ oculis habenda est doctrina Concilii Tridentini, sess. 14. cap. 8. ubi satisfactionis necessitatem & fructus stabilit contra Novatores, qui culpam à Deo nunquam remitti, quin tota simul pœna absque satisfactionis ullius onere condonetur, affirmarunt. Quam orthodoxam veritatem tot illustribus Scripturarum exemplis & perpetua traditione satis perspicuam confirmat: tum primò, quia justitiæ ratio exigit, ut aliter à Deo in gratiam recipiantur, qui ante baptismum per ignorantiam deliquerunt; aliter verò qui semel à peccati & Dæmonis servitute liberati, & accepto Spiritus sancti dono scienter templum Dei violare, & Spiritum sanctum contristare potius formidarunt. Tum secundò, quia divinam clementiam decet, ne ira nobis absque ulla satisfactione peccata dimittantur, ut occasione acceptâ, peccata leviora putantes, in graviora labamur, thesaurizantes nobis iram in diem vindictæ. Tum tertio, quia & ad futura peccata præcavenda, & ad pravos habitus extirpandos pœnitentiâ omnino necessaria est. Unde concludit: *Debent ergo Sacerdotes Dominicam penitentiam, & prudentia suggerit, per*  
*qualitate*

qualitate criminum & pœnitentium facultate salutare & convenientes satisfactiones injungere: ne si fortè peccatis conniveant, & indulgentius cum pœnitentibus agant, levissima quædam opera pro gravissimis delictis injungendo; alienorum peccatorum participes efficiantur. Habeant autem præ oculis, ut satisfactio quam imponunt, non sit tantum ad novam vitam custodiam & infirmitatis medicamentum, sed etiam ad præteritorum peccatorum vindictam & castigationem: nam claves Sacerdotum non ad solvendum duntaxat, sed ad ligandum concessas etiam antiqui Patres & credunt & docent. Hinc can. 12. & 13. sic pronuntiant: Si quis dixerit totam pœnam simul cum culpa remitti semper à Deo, satisfactionemque pœnitentium non esse aliam quàm fidem, qua apprehendunt Christum pro eis satisfecisse, anathema sit. Si quis dixerit, pro peccatis quoad pœnam temporalem, minimè Deo per Christi merita satisfieri pœnis ab eo inflictis & patienter toleratis, vel à Sacerdote injunctis, sed neque sponte susceptis, ut jejuniis, orationibus, elemosynis, vel aliis etiam pietatis operibus, atque ideo optimam pœnitentiam esse tantum novam vitam, anathema sit.

Eandem satisfactionis necessitatem præclarissimè illustrat Catechismus Romanus non solum præfatis Tridentini verbis, sed etiam quia manifestis Scripturæ locis constat, dimissâ culpâ non semper pœnam certo tempore definitam remitti, ut patet clarissimo Davidis exemplo, cui etsi Nathan dixerat 2. Reg. 12. Dominus transtulit peccatum tuum, non morieris; attamen gravissimas pœnas ultro dedit, divinitus

divinamque misericordiam noctu & interdiu inenarrabilibus lacrymis exoravit. Et adhuc post tantæ humilitatis pœnitentiam, eum tamen Dominus ultionum, tum filii ex adulterio suscepti morte, tum quem unicè diligebat Absalonis rebellione & nece, tum antea illatis innumerabilibus calamitatibus multavit. Idem exemplo populi Israëlitiçi claret, etsi enim Dominus Moysis precibus exoratus populo idolatriæ nefandum scelus pepercisset, minatus est tamen se tanti flagitii graves pœnas repetiturum esse: ipseque Moyses testatus est fore, ut illud Dominus severissimè in tertiam & quartam usque generationem ulcisceretur, ut legere est Exodi 32. Accedit quod hujusmodi dolorosæ satisfactionis perpeffione consequimur, ut capitis nostri Jesu Christi tantoperè pro nobis in carne passi similitudinem & imaginem geramus: ut enim à S. Bernardo veridicè scriptum est, nihil tam deforme videri potest, quàm sub spinoso capite delicatum membrum vegetari. Nam teste Apostolo, cohæredes sumus Christi, si tamen compatimur: & si commortui sumus, & convivemus: si sustinebimus, & conregnabimus. Ergo quemadmodum sanato vulnere, emissoque pure, cicatrices quædam remanent, quæ & ipsæ curandæ sunt, ita in anima, culpâ condonatâ, purgandæ peccatorum reliquiæ supersunt: & ut ait Chrysostomus, non satis est sagittam è corpore extrahi, sed plaga quoque à sagitta inflicta sananda est; sic per contritionem extracto è corde peccati telo lethifero, pœnitentiæ satisfactione, quæ superest plaga sanatur. Hinc ab Augustino in Psal. 80. dictum est, misericordiam & justitiam



justitiam in pœnitentiæ tribunali obviare sibi, pacem & æquitatem se invicem osculari; misericordiam, quæ peccatorum maculas & illis debitas æternas pœnas condonat; justitiam, quæ pœnis tempore definitis hominem punit.

Dices: Nequit homo pro pœna peccatis debita condignè satisfacere: tum quia homo peccando meretur pœnam æternam, quam nulla hujus vitæ pœna compensare potest; nam pretium ordinis inferioris, debitum superioris ordinis digna solutione sarcire non potest. Tum quia Christus passionibus suis pro nobis satisfecit: unde ne Christus gratis passus, gratis mortuus esse dicatur, nullum pro peccatis suis hominem satisfacere posse dicendum est. Ergo inter partes pœnitentiæ falsò enumeramus hominum pœnitentiam satisfactionem, quâ virtus crucis Christi evacuatur, & immensum satisfactionum Christi meritum obscuratur, & prorsus elevatur.

Respondeo quod licet non possit homo peccatis de condigno satisfacere, ut in tomo superiori operosè demonstratum est, nec subinde pœnam æternam peccato mortali debitam compensare; posse tamen pro pœna temporali, quæ etiam post culpæ & pœnæ æternæ condonationem danda est, de condigno satisfacere. Non enim sine causa opera satisfactoria *dignos* pœnitentiæ *fructus* Scriptura appellat. Indicare nimirum voluit, pœnam temporalem peccatis debitam pœnitentiæ fructibus compensari, ut sicut illis gloriam de condigno mereamur, ita & impedimenta gloriæ, pœnas scilicet Purgatorii gloriæ introitum remorantes, de condigno



condigno possumus semovere. Dignum ergo est, ut misericors Deus pœnis voluntariè assumptis Christi passionibus unitis, & à Christi gratia proficiscentibus moveatur, ut pœnas Purgatorii non infligat. Unde nequaquam Christus frustra pro nobis satisfecit, nequaquam gratis pro nobis mortuus est, quia passionibus suis gratiam nobis promeruit salutarem, quâ & meritoria & satisfactoria opera possumus elicere. Satisfactio Christi, ut tomo superiori diximus, quàmlibet infinita, nostras etiam satisfactiones exigit; nam sicut prima causa ex abundantia bonitatis causas secundas sibi cooperari facit; ita satisfactionis Christi plenitudo postulat, ut cum ipso compatiantur qui voluerint cum ipso regnare. Utilis ergo & planè necessaria fuit satisfactio Redemptoris, quæ nostras qualescumque pœnas sibi unitas perficeret, ad eas sanctè suscipiendas permoveret, & omnes justitias nostras, quæ sunt sicut pannus menstruatæ, in quibusque reperit pravitatem, veluti illiris meritorum suorum ornamentis condecoraret. Sed certè si eas non invenit, eas utique non sanctificat, nec sibi copulat, nec Patri reddit acceptas. *Poculum quippe immortalitatis, uti ex Prospero alibi diximus, quod confectum est de infirmitate humana & virtute divina, habet quidem in se ut omnibus prosit, sed si non bibitur, non medetur.*

Perperam ergo inferunt moderni hæretici hac nostrâ de satisfactionis necessitate doctrinâ evacuari crucem Christi, & immensa satisfactionum ejus merita ad nihilum redigî. Nam ut præclare à Tridentino sess. 14. cap. 8. dictum est: *Neque ita nostra est satisfactio hæc, quam*

quam pro peccatis nostris exsolvimus, ut non sit per Christum Jesum: nam qui ex nobis tanquam ex nobis nihil possumus, eo cooperante qui nos confortat, omnia possumus. Ita non habet homo unde gloriatur, sed omnis gloriatio nostra in Christo est, in quo vivimus, in quo meremur, in quo satisfacimus, facientes dignos fructus pœnitentiæ, qui ex illo vim habent, ab illo offeruntur Patri, & per illum acceptantur à Patre. Quamobrem, ut rectè Catechismus jussu ejusdem Concilii editus egregiè prosequitur, totum nostrum meritum, tota nostra satisfactio à Christi cruce proficiscitur, neque perfectissimam & cumulatissimam Christi Domini satisfaciendi virtutem obscurat, sed illam potius multò clariorem & illustriorem reddit. Eo namque copiosior & longè efficacior Christi gratia censenda est, quo vim nobis satisfaciendi profundit, & à se redemptos sui efficit adjutores. Si quid ergo ponderis, si quid dignitatis operibus pietatis inest, quantum quantum est, totum ab illo salutis fonte derivatur. Quid ergo derogari à nobis meritis Salvatoris hæretici pœnitentiæ hostes querantur; à nobis, inquam, ultro aperteque prædicantibus, Christum Jesum tanquam caput in membra, tanquam vitem in palmites, vitam, gratiam & omnem pietatis motum in eos qui sibi charitate conjuncti sunt, continenter effundere? Illi ne gratiæ Servatoris detrahunt, qui nulla bona opera agnoscunt, nisi quæ gratia è vulneribus Christi effluxa antecedar, comitetur, & consequatur, sine qua proinde nec mereri prorsus, nec satisfacere ullatenus possumus?

Instabis: Si posset homo susceptis laboriosæ

riosa pœnitentiæ operibus pro pœnis peccatis suis debitis satisfacere, posset etiam satisfacere pro pœnis quæ peccatis alienis debentur, cùm sit par utriusque ratio, nec magis repugnet aliquem opera illa pro se quàm pro alio offerre, & à Deo pro utroque peræque acceptari: atqui non potest homo pœnitens pro alio satisfacere, sicut nec unus infirmus pro alio medicinam accipere: Ergo nequit homo pro pœnis peccatis suis debitis satisfacere.

Respondeo satisfactionem, ut est pars Sacramenti, ab illo solùm posse & debere peragi, qui recipit Sacramentum, ut convincunt rationes omnes quas pro stabilienda satisfactionis necessitate protulimus. Et cùm satisfactio pœnitentis sit pars, sin essentialis, certè integralis Sacramenti, mancum erit mutilumque Sacramentum, nisi pœnitens ipse injunctam sibi à Sacerdote pœnitentiam exequatur. Cum his tamen stat, unum posse pro pœnis alteri debitis, & in Purgatorio luendis satisfacere, & alterius nomine quod Deo debetur persolvere, ut sic quodam pacto alter alterius onera portet. Neque de hac veritate cuiquam Fidelium dubitandi locus ullus relictus est, qui in Apostolorum Symbolo Sanctorum communionem confitetur. Id enim exigit membrorum ejusdem corporis communio, ut bona Fidelium opera ad omnes quandantenus pertineant. Quemadmodum enim neque pro suæ tantùm, sed etiam oculorum utilitatis causâ munere suo fungitur; neque rursus quod oculi videant, ad illorum propriam, sed ad communem omnium membrorum utilitatem referendum est: ita communia inter Fideles satisfactionis officia censenda

conservanda sunt. Qua spe fretus aiebat Psalmo-  
graphus Psal. 118. *Particeps ego sum omnium  
timementium te, & custodientium mandata tua.*  
Favet etiam Apostolus Coloss. 1. *Adimpleo ea  
qua desunt passionum Christi in carne mea, pro  
corpore ejus quod est Ecclesia.* Vide infra co-  
rollarium 3. circa secundum effectum pœni-  
tentia.

## REFLEXIO.

Si usqueadeò necessaria est pœnitentia, ut  
& materiam essentialiter constituent actus pœ-  
nitentis, formam verò compleat impositio pœ-  
nitentiæ, profectò post peccatum vita hominis  
perpetua pœnitentia, spiritus perpetuæ com-  
punctionis est. *Ingemisce igitur*, ait Chrysosto-  
mus hom. 4. in 2. epist. ad Cor. *Negue unquam  
id facere intermitte.* Etenim hoc demùm est  
confessio. Non tunc latum, cras autem mœ-  
stum, ac rursus latum te prabe. Verùm perpe-  
tuo in luctu ac tui contritione mane. Beati  
enim, inquit, qui lugent, hoc est qui assiduè hoc  
faciunt. Itaque sic te compara, ut semper hoc  
facias, tibi que ipsi animum intendas, ac pectus  
tuum conteras, non secus ac si quis amisso filio  
unicè charo in luctu versetur. Scindite enim,  
inquit, corda vestra, & non vestimenta vestra.  
Porro quod fractum est, haudquaquam se in  
altum extulerit; quod contritum est, haudqua-  
quam exsurrexerit. Ob eamque causam alter  
ait, scindite: alter autem, cor contritum &  
humiliatum Deus non despiciet. Quantumvis  
sapiens sis, quantumvis dives, quantumvis  
Princeps,

Princeps, pectus tamen scinde, nec ipsum aliè de se sentire, atque inflari sine. Si magnus Apostolus, ut argumentatur idem Chrysost. homil. 22. in eandem epistolam, peccata ante baptismum admissa, etsi prorsus extincta recogitavit, si se peccatorem, blasphemum, contumeliosum appellavit, prioremque vitam in vectivâ oratione proscidit: *Quam nos veniam consequi possimus, qui ea etiam quæ post baptismum perpetravimus, oblivione deleamus? Quid ais homo? Deum offendisti, & oblivisceris? Altera jura est hac offensio, altera inimicitia. Quibusnam ergo peccatis solvi petis? An iis quæ ne tibi quidem nota sunt? Ita sanè: non enim laboras, anxioque animo es, quo pacto eorum rationem redditurus sis, qui ne memoriâ quidem ea tenere cures, sed ludas in minimè ludicris. Verùm aderit illud tempus, cùm non jam ultra nobis ludus hic procedet.*

*Nisi pœnitentiam egeritis, omnes similiter peribitis.* Terreant nos hæc verba, ne res conturbent. Præveniamus judicii districtissimi æquitatem. Peccata pœnitentiâ deleamus, ne in finem reservemus. Audiamus Eucherium: Dominus, inquit, delet peccatum, sed sine ultione non deserit: aut enim ipse homo in se punit, aut Deus percutit. Audiamus & Augustinum tract. 124. in Joan. *Productior est pœna quàm culpa; ne parva putaretur culpa, si cum illa finiretur & pœna.* Ergo si sapimus, si nobiscum est lumen oculorum nostrorum, si eum timeamus qui corpus & animam in gehennam mittere potest, si peccati mortalis granditatem, injuriæ gravitatem, Dei læsi majestatem apprehendimus, spiritu pœnitentiæ ea opera suscipiamus,

cipiamus, quæ naturâ suâ dolorem & molestiam  
 afferunt; iis actionibus incumbamus, quæ præ-  
 teritorum scelerum compensationes sunt, & ut  
 S. Cyprianus loquitur, *peccatorum redemptrices*:  
 orationibus, jejunijs, eleemosynis insistamus,  
 quibus Deum placemus, proximo satisfaciamus,  
 nosmetipsos castigemus: multas varias-  
 que ærumnas & calamitates, quibus dum in  
 hac vita sumus undique premimur, patienti  
 animo perferamus, ut laboribus illis & incom-  
 modis à divina providentia immixtis amplam,  
 minusve suspectam satisfaciendi & merendi  
 materiam nanciscamur. Denique tanta sit, tam-  
 que connaturalis evadat pœnitentiæ consuetu-  
 do, ut in illis molestis operibus, quæ naturâ  
 suâ aliquid acerbitalis habent, omnem volu-  
 ptatem nostram ponamus, omne situm esse ve-  
 rum gaudium existimemus, quin & felicitatem  
 inchoatam inveniamus, juxta id quod à Veri-  
 tate Matth. 5. & Luc. 6. dictum est: *Beati qui*  
*lugent, quoniam ipsi consolabuntur. Beati qui*  
*nunc fletis, quia ridebitis.* Id tibi, Lector, id  
 mihi victrix divinæ gratiæ delectatio præstet,  
 ut charitate divina, & sacro in præterita pecca-  
 ta zelo accensi, quæ perpeſſu gravissima sunt  
 ne sentiamus quidem: ita divino amore in-  
 flammemur, ut in acerbis operibus & pœniten-  
 tiæ fructibus nos exercentes, aut nihil ferme  
 incommodi sentiamus, aut omnia lætissimo  
 animo filiorum Dei more perferamus. Unde  
 illud Augustini, vel alterius authoris lib. de ve-  
 ra & falsa pœnit. *Semper doleat pœnitens, &*  
*de dolore gaudeat.* Et verus Augustinus, lib. 5.  
 Confess. cap. 2. *Ecce ibi es in corde confitean-*  
*tium tibi, & plorantium in sinu tuo post vias*  
*suas*

*suas difficiles, & tu facili terges lacrymas eorum, ut magis plorent, & gaudeant in fle-  
tibus.*

Ad hanc continentem perpetuæ compun-  
ctionis praxim facilè permovebimur, si sum-  
mum & maximum dolorem ex commissis pec-  
catis suscipiendum esse; ita ut nullus major  
excogitari possit, suadeamur: suadebimur au-  
tem, si cum Catechismo Romano attendamus,  
quod cum perfecta contritio sit charitatis fru-  
ctus, ab eoque casto timore, qui filiorum  
est, proficiscatur, liquidum est eundem cha-  
ritatis & contritionis modum statuendum esse.  
Cum enim charitas quâ Deum diligimus, per-  
fectissimus amor sit, hinc fit ut contritio ve-  
hementissimum animi dolorem conjuncturâ  
habeat; quia sicut Deus maximè diligendus  
est, ita quæ nos à Deo alienant maximè de-  
testari debemus. Hinc sacræ litteræ eodem  
loquendi genere charitatis & contritionis mag-  
nitudinem significant; ut sicut de charitate  
dictum est, *Diliges Dominum Deum tuum ex  
toto corde tuo*; ita quoad contritionem hor-  
tarur Dominus per Prophetam: *Convertimini  
ad me in toto corde vestro*. Ergo Deum sum-  
mum bonum super omnia non diligimus, si  
peccatum summum malum super omnia odio  
maximo non prosequimur. Unde illud etiam  
sequitur, ut sicut vita Christiani perpetuus est  
ad Deum summè dilectum motus, ita & per-  
petua de patris peccatis pœnitentia. Ergo de  
propitiato peccato noli esse sine metu, ut dicitur  
Eccles. 5. Quia ut optimè D. Thomas quæst. 4.  
Supplem. art. 1. *Quandiu aliquis est in statu  
vitiæ, detestatur incommoda, quibus à perven-*



tione ad terminum via retardatur, vel impedi-  
 tur: unde cum per peccatum præteritum vita  
 nostra cursus in Deum retardetur, quia tempus  
 illud quod erat deputatum ad currendum recu-  
 perari non potest; ideo oportet quod semper in  
 vita hujus tempore status contritionis maneat,  
 quantum ad peccati detestationem, similiter  
 etiam quantum ad sensibilem dolorem; quia  
 enim homo peccando pœnam aternam meruit,  
 & contra aeternum Deum peccavit, debet pœnâ  
 aternâ in temporalem mutatâ, saltem dolor in  
 toto hominis aeterno, id est in statu hujus vita ma-  
 nere. Et propter hoc dicit Hugo de sancto Victo-  
 re, quod Deus absolvens hominem à culpa &  
 pœna aeterna, ligat eum vinculo perpetua dete-  
 stationis. Hinc Bern. lib. de triplici custodia:  
*Volat tempus irremeabile, nec advertit insipiens*  
*quid amittat; tempus quo divinam repropitiare*  
*tibi debueras pietatem, suspirare ad amissam hæ-*  
*reditatem, aspirare ad premissam felicitatem,*  
*excitare remissam voluntatem, flere commissam*  
*iniquitatem.*



## SPECVLATIO III.

*Legitima Sacramenti pœnitentia forma est hæc : Ego te absolvo à peccatis tuis in nomine Patris, & Filii, & Spiritus sancti ; quæ proinde non præcatoria duntaxat , sed judicialis est : ac ejus minister est solus Sacerdos , ad secretum omni jure astrictus.*

**S**Uppponit hæc Speculatio , ad formam hujus Sacramenti verba omninò desiderari , nec solos sufficere Sacerdotis nutus ; illud enim discrimen formam matrimonii inter & formam pœnitentiæ & aliorum Sacramentorum Florentinum & Tridentinum Concilium statuunt, quod ad illam sufficiunt nutus , cum matrimonium à mutis legitimè contrahi possit ; ac in aliis Sacramentorum formis verba prorsus & indispensabiliter requiruntur , ut ex dictis de Sacramentis in genere satis superque liquet. Hoc præmissio.

Probatur prima pars non solum perperuo Ecclesiæ Catholicæ usu , sed hoc etiam discursu : Illa est legitima pœnitentiæ Sacramenti forma , quæ effectum pœnitentiæ Sacramenti optimè & aptissimè significat ; ad hoc enim

formæ Sacramentorum sunt institutæ : & certè cum Sacramentum sit signum gratiæ , illa germana habenda est Sacramenti forma , quæ collatam à Sacramento gratiam apertâ significatione declarat. Atqui verba ista , *Ego te absolvo* , &c. effectum Sacramenti pœnitentiæ perspicuè significant , remissionem nimirum culparum , & solutionem peccatorum , quæ vincula sacris in litteris appellantur : Proverb. 5. *Funibus suorum peccatorum quisque constringitur.* Psalm. 115. *Dirupisti vincula mea.* Psalm. 118. *Funes peccatorum circumplexi sunt me.* Ergo quam retulimus convenientissima est hujus Sacramenti forma. An autem omnia illa verba sint essentialia , videtur D. Thomas exigere solum priora , nimirum *Ego te absolvo* , quibus effectus Sacramenti significatur. Et quanvis S. Doctor quæst. 84. art. 3. eodem modo dicat verba ista , *Ego te absolvo* , in Sacramento pœnitentiæ , ac ista , *Ego te baptizo* , in Sacramento baptismi desiderari , ut patet legenti textum , quibus non excluduntur à forma baptismi verba sequentia , in nomine Patris , & Filii , & Spiritus sancti : veruntamen hanc ipsemet difficultatem in responsione ad 3. occupavit his verbis : *Sacerdos potius dicit , Ego te absolvo , quam ego tibi peccata remitto ; quia hoc magis congruit verbis quæ Dominus dicit , virtutem clavium ostendens , per quas Sacerdotes absolvent.* Quia tamen Sacerdos sicut minister absolvit , convenienter apponitur aliquid quod pertineat ad primam auctoritatem Dei , scilicet ut dicatur : *Ego te absolvo in nomine Patris , & Filii , & Spiritus sancti , vel per veritatem passionis Christi , vel auctoritate Dei.* Quia ta-

men

men hoc non est determinatum ex verbis Christi, sicut in baptismo, talis appositio relinquitur arbitrio Sacerdotis. Vides ergo ex D. Thoma verba illa omnia non esse formæ Sacramenti pœnitentiæ essentialia. Quod verò addit, eorum appositionem relinqui arbitrio Sacerdotis, verum erat tempore D. Thomæ, sed cùm Florentinum & Tridentinum Concilium ea omnia verba proferre saltem implicite præcipiant, hoc ipso quod dicunt, formam hujus Sacramenti esse hæc verba, *Ego te absolvo, &c.* quæ particula, &c. alia saltem tacite requirit, non est modò relictum arbitrio Sacerdotis verba illa, à peccatis tuis in nomine Patris, & Filii, & Spiritus sancti, silentio præterire. Maxime quia usu Ecclesiæ ubique recepto, qui optimus est legum interpres, patet ut tamen aliquando orationes precatoriæ absolutionem præcedentes vel sequentes, in magno præsertim populi concursu prætermittantur, nunquam tamen verba præfata missa facere quispiam præsumat: quamvis in rei veritate sola potiora vocabula proprium hujus Sacramenti effectum, solutionem nimirum à peccati vinculis sicut significant, ita & efficiant, satisque ex intentione proferentis, & prævia pœnitentis confessione determinentur.

Secunda speculationis pars, quæ ait formam Sacramenti pœnitentiæ non esse precatoriæ, sed judiciale, id est autoritate judicis, Deo tamen subordinatâ, à Sacerdote proficiscentem, ex nuda formæ propositione per se verba penetrantibus conspicua est. Cùm enim forma illis verbis exprimitur, *Ego te absolvo, &c.* ut Concilia œcumenica ultimùm celebrata defi-

nierunt, quibus ut pater, non deprecatio vel oratio ulla funditur, sed autoritas delegata executioni mandatur, manifestum est formam Sacramenti pœnitentie non deprecatoriam illam quidem, sed iudicalem esse dicendam. Id ipsum confirmat S. Thomas opusc. 22. tum ex verbis Salvatoris, ex quibus constat Christum Sacerdotibus absolvendorum suo nomine peccatorum potestatem contulisse: *Presumptuosum ergo est, inquit, ne dicam erroneum, ut Sacerdos dicere non possit, Ego absolvo te, quem Dominus absolvere consuevit.* Tum ex Apostolo 2. Cor. 2. scribente, se donasse peccatum in persona Christi. *Quasi dicat secundum glossam, se absolvisse à peccato.* Tum testimonio Sanctæ Ecclesiæ: *Quia, inquit, non est parva auctoritas ejus quod in Ecclesia canitur, iam bone Pastor sancte clemens accipe vota precantium, & peccati vincula resolve tibi potestate traditâ. Potestas autem tradita Petro est potestas clavium: potest ergo habens claves dicere, Ego te absolvo.* Tu, quia verba Scripturæ, quæ maximè spectanda sunt, non faciunt mentionem de aliqua deprecatione, sed magis ipsa verbo indicativo utitur. Non enim dicit, quicumque petieris esse solvenda, erunt soluta; sed quicumque solveris, &c. Si ergo illa tantum dicuntur esse soluta, quæ habens claves solverit; qui autem petit aliquid esse solvendum, non solvit: miror quâ temeritate aliquis asserat, esse solutum, quem habens claves non significat se solvere, sed solum rogat esse solvendum. Tum quia id nedum conveniens, sed planè necessarium esse videtur, quia Sacramenta novæ legis efficiunt id quod significant: ver-

ba autem à Sacerdote prolata pertinent ad Sacramentum pœnitentiæ, cùm sint forma illius: ergo gratiam absolutivam à peccato efficiunt, nec illam solùm deprecationibus obtinent. Denique quia id ex perpetua traditione constat: nam neque Magister sententiarum, nec ullus Sanctus aliâ verborum formâ legitur usus: legitur autem quod Legislator noster & Sacramentorum institutor Christus Dominus dixit: *Quodcumque solveris*, quod est majus omni authoritate. Ergo forma pœnitentiæ Sacramenti non precatória est, sed judicialis. Hæc omnia ferè D. Thomas, quæ Sancta Synodus Tridentina consecrassè videtur; dum sess. 14. can. 9. sic pronuntiat: *Si quis dixerit absolutionem sacramentalem Sacerdotis non esse actum judicial. m, sed nudum ministerium pronuntiandi & declarandi remissa esse peccata, anathema sit.* Certè non tam magnifica Christus verba protulisset, nisi effectivam remittendorum peccatorum potestatem Sacerdotibus contulisset.

Sed dices: Sæpè contingit pœnitentem esse verè à peccatis absolutum, cùm profertur Sacerdotis sententia his verbis expressa, *Ego te absolvo*, putà cùm pœnitens est perfectè contritus, vel peccata aliàs confessa & soluta Sacerdoti exponit, ut beneficium absolutionis iteratò recipiat: Ergo tunc saltem forma à Sacerdote prolata non est judicialis, sed merè precatória, alioquin forma tunc verificari minimè posset.

Respondeo hoc argumento etiam adversam sententiam peti, ut vel inde pateat quantum à soliditate destituta sit: si enim pœnitens ante-

quam ad Sacramentum pœnitentiæ accedat, & peccatis solutus quacumque tandem ratione sit, profectò absolutionem Sacerdos pro illo deprecari non potest, sicut eam juxta adversarios efficere nequit. Quamobrem ad communem omnibus sententiis difficultatem dicendum, verba illa, ut optimè docet S. Thomas quæst. 84. art. 3. ad 5. hunc sensum facere, *Ego Sacramentum absolutionis tibi impendo*, id est gratiam per se peccati remissivam autoritate mihi divinius concessa tibi impertio. Potest autem in hoc Sacramento conferri gratia solutiva & remissiva peccati, tametsi peccatum, quia non est, non remittat: sicut baptismi forma catechumeno per votum baptismatis & amorem Dei regenerato gratiam regenerativam confert, tametsi regeneratum præcedentium operum approbatu supponat. Unde in utroque casu non sunt inania, sed efficacissima Sacramenta, quia gratiam non perfectè contritis conferunt; in iis verò qui sunt perfectè contriti, novis eam cumulant incrementis. Atque huic proposito ea omnia peropportuna sunt, quæ speculatione prima disputantes contra Lutheranos & Calvinistas operosè ex Scripturis & Patribus protulimus.

Instabis: Forma Ecclesiæ Orientalis, in qua verum peragitur pœnitentiæ Sacramentum, est tantum precatoria, nec veteres Patres aliud ad formam hujus Sacramenti requirunt, quam preces Sacerdotum. Unde Magnus Leo epist. 99. ait, *indulgentiam Dei nisi supplicationibus Sacerdotum obtineri non posse*. Quæ verba referuntur de pœnitent. dist. 1. canone *Multiplex*. Quibus consentanèe Guillelmus Parisiensis de Sacrament.

Sacrament. pœnit. cap. 19. sic habet : *Non more  
judicum forinsecorum pronuntiat Confessor, Ab-  
solvimus te, sed magis orationem facit super  
eum, ut ei Deus absolutionem, remissionem, &  
gratiam tribuat.* Ergo forma hujus Sacramenti  
non est absolute judicialis, sed potest esse pre-  
catoria.

Respondeo falsum esse, formam Sacramenti  
pœnitentiæ per modum meræ precationis, non  
ad modum judicii in Ecclesia Græca proferri.  
Quia ut refert Arcudius lib. 4. de pœnit. Ru-  
theni Sacerdotes in fine suarum orationum sic  
concludunt : *Ego quoque Pater tuus spiritualis  
potestate mihi à Deo & à superioribus meis  
concessa absolvo te ab omnibus peccatis tuis.* Et  
in libello de Sacramentis à Gabriele Antistite  
Philadelphix edito, assignatur hæc forma :  
*Gratia Sanctissimi Spiritus per meam humili-  
tatem habet te veniâ donatum & absolutum.*  
Et in formula Patriarchæ Antiocheni sic habe-  
tur : *Mediocritas nostra habet veniâ condona-  
tum spiritualem filium suum. :: : Omnipot-  
entis potestate, gratiæque Sancti & adorandi  
Spiritus eum solvimus, & habemus liberum  
& veniâ donatum.* Et Ecclesiastici Græci pas-  
sim eâ formâ utuntur : *Habeo te solutum, ve-  
niâ donatum.* Quod idem est ac, Absoluto te,  
& condono tibi peccata : sicut à simili quan-  
do ligant & excommunicant, dum aiunt, *Ha-  
beo te segregatum*, idem planè est ac, Segre-  
go te. Et quanvis Arcudius dicat non extare  
ejusmodi formam in Euchologio Græcorum,  
nihilominus P. Goar in Oriente diu versatus,  
& linguæ Græcæ peritiâ nulli secundus in illo  
præclaro suo Euchologio, seu Rituali Græco-

rum, pag. 678. profert Eucharologium apud eos jam passim receptum, in quo hæc verba habentur : *Dominus noster Iesus Christus & Deus, qui mandatum ligandi & solvendi peccata discipulis tradidit, pratereat omnia peccata tua : Ego vero indignus ejus servus absolvo te ab omnibus peccatis tuis. Item : Dominus justus, qui propter nos carnem assumpsit & universi orbis peccatum tollit, delicta tua deleat. Ego vero condono tibi omnia peccata tua.* Quod si in aliis Græcorum Ritualibus verba tantum in speciem deprecatoria leguntur, putà ista quæ apud Græcos familiariora sunt, *Domine Iesu Christe, qui dedisti nobis potestatem, absolve hunc à peccatis suis : vel ista, Dominus noster Iesus Christus, qui dedit Apostolis suis potestatem, qua per illos transit ad nos, absolvat te, sive condonet tibi peccata tua :* dicendum, vel verba illa pertinere ad orationes Sacerdotis, quæ etiam in Ecclesia Latina solent absolutioni sacramentali præmitti : vel ut aliqui ingeniosè explicant, formam eo verborum tenore expressam non omninò deprecant, sed applicant esse. Cùm enim his verbis agnoscant Græci Sacerdotes se potestatem habere, eo dicendi modo intendunt virtutem & actionem principalis agentis applicare : unde practicè, & ut ita dicam, in actu exercitò verba illa istis æquivalent, *Ego te absolvo :* cùm se personam Dei in terris gerere, atque adeo se Deum virtute operari fateantur. Et certè cùm nulla unquam extiterit Græcos inter & Latinos hæc de re controversia, non est verisimile Sacramenti poenitentiae essentiali formam ullibù esse mutari, ac proinde consequens est, ut



ea quam Latini usurpant, æquivalenter continueatur in illa quâ Græci utuntur.

Ad id quod dicitur, Sanctos Patres, & in his Magnum Leonem orationes duntaxat desiderasse, ex suprâ adductis speculatione prima Patrum testimoniis patet quàm sit falsum. Ideo enim Patres Novatianos tanquam hæreticos ea potissimum de causa exploserunt, quòd remittendi potestatem Sacerdotibus concessam pertinaciter negarent, & ut aiebat Acesius Novatianus Episcopus à Socrate Scholastico in 1. lib. Ecclesiast. histor. relatus, *remissionis spem non à Sacerdotibus, sed à Deo expectandam.* Cui Magnum Constantinum, ut alibi retulimus, respondisse ferunt: *Ergito tibi salam Acesi, & ad cælum solus ascendito.* Quamobrem cum Patres orationes Sacerdotum desiderant, non propterea auctoritatem absolventi iis tanquam instrumentis delegatam excludunt, sed ad eas orationes alludunt, quas solent Sacerdotes prolationi formæ præmittere, & cœleste Numen ante vel post absolutionem suis precibus invocare; eò spectantes, ut Deum principalem gratiæ causam, & Sacramentorum authorem esse significant. Sanè quemadmodum formam Eucharistiæ invocationem Sancti Numinis & gratiarum actionem, ob preces consecrationem circumstantes dicere solent, ita eandem ob causam supplicationibus Sacerdotum remittendorum peccatorum tribuunt potestatem.

Hanc esse Magni Leonis mentem ex homilia de Transfiguratione clare patet, ubi sic fatetur: *Nec in solvendis & ligandis quorumcunque crassis aliud ratum esset in cœlis, quàm quod*

*Petri sedisset arbitrio.* Quibus affinia sunt quæ habet Chrysostomus hom. 5. de verbis Isaïæ: *A terra judicandi principalem auctoritatem sumit cælum. Nam judex sedet in terra, Dominus sequitur servum, & quidquid hîc in inferioribus judicavit, hoc ille in supernis comprobavit.*

Eodem modo exponi debet Ambrosius libro 3. de Spiritu sancto, cap. 19. *Ecce, inquit, quia per Spiritum sanctum peccata donantur, homines autem in remissionem peccatorum ministerium suum exhibent, non jus alicujus potestatis exercent. Neque enim in suo, sed in Patris, & Filii, & Spiritus sancti nomine peccata dimittuntur; isti rogant, divinitas donat. Hominum enim obsequium, sed munificentia: superna est potestatis.* Quibus verbis precum earum meminit, quas Ecclesiæ jussu Sacerdotes absolutionem impertientes frequentant; vel principalem absolvendi potestatem soli Deo eximiam Sacerdotibus negare duntaxat intendit. Eam fuisse Ambrosii mentem ex iis perspicuum est, quæ lib. de Abel & Caïn, cap. 4. his verbis scripsit: *Remittuntur peccata per officium Sacerdotis, sacrumque ministerium.*

In eundem scopum collimavit Augustinus lib. 3. de baptis. cont. Donatistas, cap. 3: dum dixit: *Quid est aliud manus impositio* ( idest administratio Sacramenti pœnitentiæ, in qua manus imponi pœnitentibus solenne erat; loquitur namque ibi Augustinus de manuum impositione quæ iterari potest, quæ utique solius Sacramenti pœnitentiæ est propria, ) *quæ oratio super homine? Nam si Augustinus:*

in fonte legatur , perspicuum erit , eam duntaxat remittendorum peccatorum potestatem S. Doctorem reprobasse , quam hæretici propriis Sacerdotis meritis ascribebant , ait enim : *Daturus erat Dominus hominibus Spiritum sanctum, & ab ipso Spiritu sancto fidelibus suis dimitti peccata, non meritis hominum volebat intelligi dimitti peccata.*

Denique ne nobis opponatur cum M. Joanne Launoio , viro alioquin erudito & antiquitatis Ecclesiasticæ scrutatore acerrimo , D. Thomæ sententiam à Patrum vetustate recedere , quædam placet selectiora Patrum testimonia in medium producere , quibus nostræ doctrinæ antiquitas ab omnibus objectionibus vindicetur. *Non solum Sacerdotes cum regenerant, inquit Chrysostomus lib. 3. de Sacerdotio, sed etiam postea condonandorum peccatorum obtinent potestatem.* Ergo non solum deprecandi , sed etiam absolvendi facultas & auctoritas Sacerdotibus nostris concessa est : Ergo sicut in Baptismo forma absoluta , non deprecatoria est , ita & in administratione Sacramenti pœnitentiæ eadem utuntur , cum ex Chrysostomo non minorem ad absolvendum condonandumque peccata , quam ad regenerandum potestatem acceperint. *Duobus modis, inquit Cyrillus Alexandrinus lib. 12. in Joan. cap. 56: vel cap. 22. & 23: modernæ editionis, Dei spiritu pleni vel afflati homines peccata remittunt, ac retinent ; vel cum dignos admittunt ad baptismum, ac indignos excludunt; vel cum filios Ecclesiæ peccantes corripiunt, ac pœnitentibus ignoscunt.* Ubi non secus ac Chrysostomus eandem Sacerdotibus ad peccata

cata pœnitentibus remittenda , ac ad baptismum conferendum potestatem concessam agnoscit. *Non interest*, inquit eodem planè sensu Ambrosius lib. 1. de pœnit. cap. 7. *utrum per pœnitentiam, an per lavacrum hoc jus ( remittendi peccata ) sibi datum vindicent Sacerdotes: idem in utroque mysterio est.* Quam doctrinam à veteribus esse depromptam declarat Magnus Basilius in regulis fusiùs disputatis , interrogat. 288. his verbis : *Necessariò eis aperiri peccata debent , quibus est credita dispensatio mysteriorum Dei : hanc enim rationem & in pœnitentia sequuti sunt veteres.*

Ad auctoritatem Guillelmi Parisiensis dicendum, verum esse, non eadem tamque principali auctoritate Sacerdotem pœnitentem absolvere , quantâ absolvit iudex forinsecus accusatum ; quia ista potest esse absoluta, ut in Principe vel supremo Senatu , qui nullas preces præmittere , uti nostri Sacerdotes , solent. Quavis præfati Guillelmi testimonium non sit cogens, vel tanta sit ejus auctoritas, ut à viri alioquin illustris sententia non recedere sit necessarium Theologo , qui solis Patribus, vel Ecclesiæ Doctoribus illud reverentiæ obsequium debet , ut eorum verba vel simpliciter recipiat , vel consentaneâ expositione interpretetur.

Instabis iterum : Formam Sacramenti pœnitentiæ esse absolutam , & ad modum judicii & non solius precat'ionis , potissimum colligitur ex illis magnificis Salvatoris verbis , *Quaecumque solveritis super terram , erunt soluta & in cœlis :* ex hoc enim quod Christus non dixit, quodcumque solutum ostenderitis, vel pro quibus

bus solvendis oraveritis, inferimus quod sententiam Sacerdotum non præcedit, sed subsequitur sententia cœli: quia si nihil aliud facerent Sacerdotes, parùm esset de hujusmodi declaratione curandum, vel saltem non plus facerent Sacerdotes quàm laici, qui utique pro fratribus peccatoribus orationes ad Deum fundere possunt. Atqui hic discursus nihil efficit; nam eisdem verbis à Christo prolatis promissa etiam & data est ab excommunicatione absolvendi facultas; & tamen concors Theologorum sententia fert, aliquem posse ab excommunicationis vinculo formâ precatoriâ, putà *absolvat te Deus à censuris*, eisdem irretitum absolvere. Ergo forma hujus Sacramenti non est necessariò judicialis, sed potest etiam esse precatoria, ruitque totum nostrum fundamentum ex verbis & promissis Christi à nobis cum D. Thoma firmatum.

Respondeo quod licèt illis verbis, *quæcumque alligaveritis*, data sit superioribus Ecclesiasticis sententiam excommunicationis ferendi, & ab eadem absolvendi facultas, potestatem tamen remittendi peccata, & consequenter Sacramentum pœnitentiæ, potissimùm colligunt Patres & Theologi ex illis Joan. 20. verbis: *Quorum remiseritis peccata, remittuntur eis; & quorum non retinueritis, retenta sunt.* Quibus Veritas non solum orandi pro peccatoribus, vel eos absolutos declarandi, sed ipsa peccata remittendi facultatem largitus est, quæ proinde formâ judiciali auctoritatem à Deo datam præferente necessariò exprimitur, ut potestas illa executioni mandetur. Sed utut sit & quibus tandem verbis Christus potestatem ferendi

censuras,

cenſuras , ab eiſque ſolvendi largitus fuerit, fateor abſolutionem à cenſuris poſſe eſſe pre-  
catoriam, non tamen abſolutionem à peccatis. Et ratio diſcriminis non ſolùm ex uſu Eccle-  
ſiæ petitur , quæ ut benè ait Arcudius , vocem ſponſi audit & intelligit , ejuſque verba legiti-  
mè interpretatur ; ſed etiam quia cùm abſolu-  
tio à cenſuris non ſit ſacramentalis , ejus for-  
ma arbitratui ſuperioris Eccleſiaſtici permiſſa  
eſt, modò tandem intentionem ſuam expri-  
mat ; exprimit autem eam non ſolùm verbis  
abſolutis , ſed etiam deprecatoriis, quin & ſi-  
gnis & nutibus, immò & familiari cum excom-  
municato conſortio , quod à ſuperiore qua-  
cumque tandem ratione liberè toleratur. At  
verò abſolutio peccatorum eſt ſacramentalis,  
ac proinde non hominum quorumcunque per-  
miſſa optioni, ſed juxta institutionem Chriſti  
perenni traditione ab Apoſtoliſ ad Patres , à  
Patribus ad poſteros tranſmiſſa inviolabili-  
ter obſervanda. Ut enim de Sacramentis in  
genere oſenſum eſt , formæ Sacramentorum  
nulli ſunt mutationi obnoxia , quia non juxta  
ſolam Sacerdotum intentionem ( quæ tamen  
alioquin in miniſtro neceſſaria eſt ) ſed juxta  
Chriſti voluntatem gratiam producant , quam  
ſignificant.

Urgebis : In Sacramento Extremæ Unctionis  
Sacerdotes orationibus ſuis formulique pre-  
catoriis non ſolùm remiſſionem peccatorum  
ægrotiſ à Deo petunt , ſed etiam illam imper-  
tiant : ergo ſimiliter in Sacramento pœniten-  
tiæ formâ precatoriâ gratiam remiſſivam pec-  
cati ritè contritiſ & confeſſiſ Sacerdos impen-  
det. Maximè quia ideo nos poſt D. Thomam  
formam

formam indicativam & auctoritatem exprimentem desideravimus, ut minister Sacramenti instrumentaliter concurrat, efficiatque quod significat. At illa ratio infirma est; nam minister Extremæ-Uñctionis verbis suis verè concurrit ad gratiam Sacramenti Extremæ-Uñctionis producendam, eamque efficit quam significat; & tamen forma illa verbis deprecatoriis exprimitur: Ergo etiam precatoriâ formâ peræquè potest gratia Sacramenti pœnitentiæ peccatoribus dispositis impendi.

Respondeo non rectè iniri comparisonem inter Sacramentum pœnitentiæ & Sacramentum Extremæ Uñctionis: disparitas enim toto cœlo intercedit. Etenim Sacramentum Extremæ Uñctionis non exercetur per modum iudicii, sed per modum solatii, quod maximè præstant orationes divinam misericordiam interpellantes, & cœlestis suavitatis lenimenta sacris orationibus aptissimè significata, à Patre misericordiarum & Deo totius consolationis impetrantes, ne infirmus morbi gravitate, vel tentationum mole oppressus fatiscat. At verò Sacramentum pœnitentiæ per modum iudicii ministratur, in quo reus accusator sui corrigitur, punitur, absolvitur; vel ligatur. Pater autem nullam iudicis ullius sententiâ verbis precatoriis ferri; sed unis verbis indicativis, vel imperativis, quibus iudicantis auctoritas exprimitur, pronuntiatur. Alia ratio ex ipsa Sacramentorum institutione petita satis superque sufficeret, etiam si mox allatâ ex intimis utriusque Sacramenti, ut ita dicam, visceribus desumptâ careremus. Cùm enim ex sacris litteris constet, formam Sacramenti pœnitentiæ his verbis indicari, *qua-*  
*cunque*

*cumque solveritis, &c. & quorum remiseritis, &c.* Ecclesia divina institutione formata optime judicavit, quod sicut ex verbis Christi baptismum instituentis rectè dicimus in baptismo conferendo, *ego te baptizo*; ita ex eisdem non minùs perspicuis Veritatis verbis rectè colligi, in Sacramento pœnitentiæ hanc esse formam, *Ego te abòlvo*. At verò ex eisdem sacris litteris, Jacobi cap. 5. tam luculenter expressis habemus, quod *oratio fidei salvabit infirmum, & alleviabit eum Dominus*; ideo consequens est ut forma Sacramenti Extremæ Unctionis precatoriâ formulâ exprimat, & ita Ecclesia Catholica à Spiritu sancto continenter gubernata perpetuò existimavit.

### *De Ministro pœnitentiæ.*

Tertia speculationis pars, quæ tradit solum Sacerdotem esse ministrum Sacramenti pœnitentiæ, ferè patet ex dictis de institutione & forma huius Sacramenti, & definita fuit in Concilio Tridentino sess. 14. cap. 6. his verbis: *Circa ministrum autem huius Sacramenti declarat Sancta Synodus, falsas esse, & à veritate Evangelii penitus alienas doctrinas omnes, quæ ad alios quosvis homines, præter Episcopos & Sacerdotes, Clavium ministerium perniciosè extendunt; putantes verba illa Domini, Quicumque alligaveritis super terram, erunt alligata & in cælo; & quicumque solveritis super terram, erunt soluta & in cælo; & Quorum remiseritis peccata, remittuntur eis; & quorum retinueritis, retenta sunt, ad omnes Christi fi-*  
deles



*deles indifferenter & promiscuè contra institutionem hujus Sacramenti ita fuisse dicta, ut quivis potestatem habeat remittendi peccata; publica quidem per correptionem, si correptus acquieverit; secreta vero per spontaneam confessionem cuiusque factam. Quod & canone 10. a. iuncto anathemate repetit. Itque fuerat antea in Concilio Florentino definitum, & in omnibus antiquioribus tanquam indubium præsupponitur.*

Convenientiam adducit S. Thomas quæst. 8. Supplementi, art. 1. Quia cum solus Sacerdos ministerium habeat super corpus Christi naturale, illi soli etiam competit potestas in corpus Christi mysticum seu Fideles, qui sunt membra Christi & corpus Ecclesiæ integrant. Et potest confirmari, tum quia solis Sacerdotibus in persona Apostolorum concessa est peccatorum remittendorum potestas, atque autoritas judicialis, quæ in republica benè ordinata non omnibus communis, sed quibusdam debet esse eximia; & hi sanè in Republica Christiana Sacerdotes sunt, qui cum ratione officii mediatores inter Deum & homines constituti sint, ad illos pro peccatis orare, pro peccatoribus sacrificium Deo offerre, eosque à peccatis mundare pertinet. Præsertim cum Fideles hoc pœnitentiæ Sacramento ad sacram Eucharistiam sumendam apti idoneique reddantur, ad illos remissionem peccatorum Dei autoritate impendere spectat, quibus competit verum Christi corpus conficiendi ministrandique potestas. Tum quia summa semper religione in antiquissima Ecclesia jus ordinarii Sacerdotis conservatum fuit, ut ex veteribus illis Patrum decretis perspicuum est,

est, quibus cautum est, ne quis Episcopus aut Sacerdos in alterius Parochia aliquid gerere audeat sine ejus autoritate qui illi præset, aut nisi magna necessitas cogere videretur. Quod & ab Apostolo ad Titum 5. sancitum est, cum illi præcepit, ut in singulis civitatibus Sacerdotes constitueret, qui scilicet verbi & Sacramentorum cœlesti pabulo fidelem populum alerent atque educarent.

Denique hujus veritatis signum juxta Patres dedit Dominus, cum Apostolis id negotii demandavit, ut Lazarum à mortuis excitatum à vinculis solverent, quibus constrictus erat: confessio enim in mortui Lazari resurrectione præfigurata est, ut docet Magnus Gregorius lib. 22. Moral. cap. 9. *Mortuo Lazaro*, inquit, *qui magna mole premebatur, nequaquam dicitur, revivisce, sed veni foras: ex qua scilicet resurrectione qua gesta est in illius corpore, signatur qualiter nos resuscitemur in corde; ut homo in peccato suo mortuus, & per molem mala consuetudinis jam sepultus, quia intra conscientiam suam absconditus jacet per nequitiam, à se ipso foras exeat per confessionem.* Sicut autem per resurrectionem Lazari confessio, ita per vinculorum solutionem Apostolis commissam absolutio à peccatis significatur. Unde Augustinus vel author libri de vera & falsa pœnitentia, ait ipsos Sacerdotes plus jam posse proficere, plus confitentibus parcere, quibus crimen remittunt. Quam ob causam Dominus Lazarum, quem jam suscitaverat, obtulit discipulis solvendum, per hoc ostendens potestatem solvendi Sacerdotibus esse concessam. Quod idem notat verus Augustinus sermone 8. de verbis

verbis Domini. Quò etiam pertinet, quod iis qui à lepra in itinere curati sunt, præceperat ut Sacerdotibus se ostenderent, illorumque iudicium subirent; ad quod factum alludens Venerabilis Beda relatus à Magistro Sentent. in 4. dist. 17. ait: *Porro gravioris lepræ immunditiam Sacerdoti pandamus, atque ad ejus arbitrium qualiter & quanto tempore jusserit, purificari curemus.*

Nec obest si opponas illud Jacobi 5. *Confitemini peccata vestra*; quæ verba Augustinus lib. 50. homil. hom. 12. de confessione sacramentali interpretatur. Illo autem Jacobi loco cuicumque peccata confitendi videtur libertas permissa. Unde author libri de vera & falsa pœnitentia, inter opera Augustini: *Tanta vis est confessionis*, inquit, *ut si deest Sacerdos, confiteatur laïco.* Et extra de furtis, cap. *Fures*, dicitur: *Fures si furando comprehensi vel vulnerati Presbytero vel Diacono confessi fuerint, communionem eis non negamus.* Quod ex Triburiensi Concilio, atque ex Cypriano lib. 3. epist. 17. desumptum esse videtur.

Respondetur enim cum D. Thoma art. 8. ad 1. quod Jacobus loquitur ex præsuppositione divina institutionis. Et quia divinitus institutio præceperat de confessione Sacerdotibus facienda, per hoc quod eis potestatem remittendi peccata in Apostolis dedit, ut patet Joan. 20. ideo intelligendum est, quod Jacobus Sacerdotibus confessionem esse faciendam monuit. Quare his verbis solùm B. Jacobus intendebat ipsos Sacerdotes non esse à sacramentalis confessionis lege immunes, & ideo confiteri alterutrum præcipit, non ut omnibus excipiendarum confessionum.

fessionum conferat facultatem , sed ut omnes sive Sacerdotes , sive Episcopos , sive ipsum Ecclesiæ Hierarcham confessionis declaret lege teneri. Unde quod Jacobus ait *alterutrum*, idem est, ut exponit Hugo, ac alter alteri, id est homo homini, supple potestatem habenti, ad significandum quod non sufficit hominem Deo confiteri. Cui interpretationi favet Origenes hom. 2. in Leviticum.

Id verò quod ex authore libri de vera & falsa pœnitentia subjungitur , solum significat posse quempiam interdum laïco vel Clerico non Sacerdoti peccata per modum commutationis & humilitatis exercendæ gratiâ , in articulo præsertim necessitatis , absente Sacerdote confiteri. Qui usus erat in primitiva Ecclesia familiaris , & nunc etiam in quibusdam sacrarum Virginum monasteriis viget , in quibus inferiores superioribus vel aliis spiritalioribus internum animi statum , passionum prædominantium impetus, imperfectionum quotidianarum radices , tentationum conflictus humiliter detegunt, ut citius sanentur , & tutius in via Dei sub aliorum regimine procedant. Sed tunc non est confessio sacramentalis , sed humiliatio salutaris , in qua eximiâ prudentiâ opus est , quæ sæpe deest mulieribus naturâ suâ plus justo curiosis, & imperii amantibus. Quare superiorissæ iis in locis , ubi mos ille servatur, nec peccata graviora inquirere , nec libertatem ulla prorsus ratione adigere , nec aliud quidpiam exigere quàm generalem interioris domûs notitiam debent , ut infirmas suscipiant, consolentur pusillanimes, excitent tepidas, ferventiores moderentur. Cætera Sacerdotibus

& Confessariis omninò relinquant. Quia scriptum est : *Altiora te ne quasieris.* Et juxta tritum adagium : *Ne sutor ultra crepidam.* Nec Mulier fortis in Proverbiis Salomonis cap. 31. commendatur, quòd conscientias direxerit, vel quòd sibi hoc ultro sumpserit, ut internis morbis medeatur ; sed quia *quasivit lanam & linum, & operata est consilio manuum suarum. Et de nocte surrexit, deditque prædam domesticis suis, & cibaria ancillis suis. Manum suam misit ad fortia, & digiti ejus apprehenderunt fusum.* Apostolus etiam mulieribus in Ecclesia, idest de rebus Ecclesiasticis & in Ecclesia celebrandis silentium arctissimum imposuit.

Ad caput *Fures*, dicendum, optimè observasse P. Nicolai locum esse mendosum, atque ita legendum esse, *si comprehensi & vulnerati, Deoque & Sacerdoti confessi, &c.* ut ex tomo 3. Conciliorum, parte 1. perspicuum est. Et quamvis ita legeretur ut objectum est, exponi deberet locus ille non de confessione sacramentali apud solos Sacerdotes habenda, sed de confessione publica & reconciliativa, in primitiva Ecclesia frequentari solita, ut sensus sit, posse Diaconum absente Sacerdote ei peccatori publico, putà furi comprehenso, communionem Eucharisticam ministrare, qui peccatum suum publicum publica detestatione confessus fuisset. Et ita interpretandus venit S. Cyprianus, qui revera loquitur de infirmis in pœnitentia publica constitutis, animamque fermè agentibus, quorum publicè reconciliandorum provinciam Sacerdotibus, & ob penuriam ministrorum absentibus

tibus, vel non existentibus Sacerdotibus, Diaconis Episcopus demandabat.

Oppones rursus: Si Sacerdotes ex vi potestatis in ordinatione per impressionem characteris susceptæ essent ministri Sacramenti pœnitentiæ, & possent à peccatis absolvere, non indigerent ad eam exercendam nec Parochi licentia, nec Episcopi approbatione. Atqui utrumque sacris Canonibus & Conciliis repugnat: primum quidem, tum quia in celebri decretali Innocentii III. in magno Concilio Lateranensi edita, cap. 21. expressè præcipitur: *Omnis utriusque sexus fidelis postquam ad annos discretionis pervenerit, omnia sua solus peccata confiteatur fideliter, saltem semel in anno proprio Sacerdoti. :: Si quis autem alieno Sacerdoti voluerit iusta de causa sua confiteri peccata, licentiam prius postulet & obtineat à proprio Sacerdote, cum aliter ille ipsum non possit solvere vel ligare.* Tum quia sicut Episcopus se habet ad diœcesim suam, ita Sacerdos ad suam parochiam: non licet autem uni Episcopo sine licentia alterius Episcopale officium exercere in ejus diœcesi, secundum sacra canonum statuta, ut legere est in decretis, causa 26. ubi ex Arausicano Concilio 1. dicitur: *Si quis Episcoporum in aliena civitatis territorio Ecclesiam adificare disponit, non presumat dedicationem facere, qua illius est in cujus territorio Ecclesia assurgit.* Et causa 9. quæst. 2. can. 3. *Nullus Episcoporum alterius adeat civitatem super cujusquam dispositione, nisi vocatus ab eo cujus juris esse dignoscitur; aut quidquam ibi disponat, vel ordinet, si sui gradus honore potius*

potiri voluerit. Et cap. Nullum, ex Concilio Antiocheno cap. 13. sic legitur: Quod si nullo invitante inordinatè superveniat, & quolibet actus illi Ecclesia competentes, qui ad se minimè pertinent, usurpare tentaverit, vacua quidem & inania erunt omnia qua gesserit: ipse verò hujus indisciplinati ausus & irrationabilis cœpti dignas causas excipiat, tanquam depositus à Sancta Synodo, & propter hujusmodi præsumptionem jam pradamnatus. Secundum verò, quia ad validè absolvendum requiri jurisdictionem ab Episcopo approbante concessam, nemo Catholicus inficiatur.

Respondeo ad ritè validèque absolvendum præter potestatem Ordinis è manibus Episcopi in ordinatione receptam, desiderari etiam potestatem jurisdictionis, quam ordinariam habet Parochus in sua Parochia, Episcopus in sua Diœcesi, summus Pontifex in universo orbe Christiano. Unde Tridentinum scilicet 14. cap. 7. sic habet: Quoniam natura & ratio judicii illud exposcit, ut sententia in subditos tantum feratur, persuasum semper in Ecclesia Dei fuit, & verissimum esse hac Synodus confirmat, nullius momenti absolutionem eam esse, quam Sacerdos in eum profert in quem non habet ordinariam aut subdelegatam potestatem. Quam rationem priùs tradiderat S. Thomas quæst. 3. art. 4. Supplementi: Oportet, inquit, quod ille qui dispensator hujus Sacramenti constituitur sit talis qui possit impetrare aliquid agendum: imperium autem non competit alicui in alium, nisi qui habet super eum jurisdictionem. Ex quo infert ad 3. Quod electio discreti Sacerdotis non est nobis commissa ut ex nostro arbitrio fa-

*cienda, sed de licentia superioris, si forte proprius Sacerdos esset minus idoneus ad apponendum peccatis salutare remedium. Et ad 5. Quod in illis casibus, in quibus probabiliter timet poenitens periculum sibi vel Sacerdoti ex confessione quam ei faceret, debet recurrere ad superiorem, vel ab eodem petere licentiam alteri confitendi. Quod si licentiam habere non possit, idem est iudicium quod de illo, qui non habet copiam Sacerdotis. Observat etiam S. Doctor ad 6. debere esse Parochum admodum facilem in ejusmodi licentiis alteri confitendi concedendis: Peccaret Sacerdotes, inquit, si non esset facilis ad praebandam licentiam alteri confitendi; quia multi sunt adeo infirmi, quod potius sine confessione morerentur, quam tali Sacerdoti confiterentur. Unde illi qui sunt nimis solliciti, ut conscientias subditorum per confessionem sciant, multis laqueum damnationis injiciunt, & per consequens sibi ipsis.*

*Sed ad pleniorum eorum intellectum advertendum est, quod licet ante sacrum Concilium Tridentinum de jure vel consuetudine probata Sacerdotes Parochiarum rectores possent alios Sacerdotes suorum inferiorum confessionibus audiendis sufficere, & in propria Parochia approbare; facultatem tamen illam cuicumque & quavis ratione olim assertam sancta Synodus abrogavit sess. 23. de reformatione, cap. 15. Quanvis Presbyteri in sua ordinatione à peccatis absolvendi potestatem accipiant; decernit tamen S. Synodus nullum (etiam Regularem) posse confessiones secularium (etiam Sacerdotum) audire, nec ad id idoneum reputari, nisi aut Parochiale beneficium, aut ab Episcopis per  
examen*



examen, si illis videbitur necessarium, aut aliàs idoneus judicetur, approbationem, qua gratis detur, obtineat: privilegiis & consuetudine quacumque, etiam immemoriali, non obstantibus. Supposita ergo Episcopi approbatione potest Sacerdos sive secularis, sive Regularis pœnitentem invito Parocho absolvere, quia tunc à principali Reſtore animarum jurisdictionem obtinet: unde sicut Episcopus potest confessionem ejus, qui est de aliqua suæ diœcesis Parochia, invito Parocho audire, ita & alteri Sacerdoti ejusdem audiendæ facultatem impertiri valet: tum quia ut arguit D. Thomas art. 5. quidquid potest inferior, potest superior, ut vulgare axioma fert, dicente Boëtio lib. 5. de consol. prosa 4. *Superior vis amplectitur inferiorem; inferior verò ad superiorem nullo modo assurgit.* Si ergo Sacerdos Parochus potest suo Parochiano dare licentiam ut alteri confiteatur, multò fortius superior Prælatus id potest. Tum quia potestatem quam habet Sacerdos in populum, eam totam ab Episcopo habet: Ergo si ex illa potestate valet confessiones audire & confessos absolvere, eadem id ratione alius poterit, cui Episcopus facultatem concesserit. Nec propterea Parocho damnum vel detrimentum creatur, quia ut sapienter ait S. Thomas art. 5. ad 1. *Præjudicium non fit alicui, nisi ei subtrahatur quod est in favorem ejus indultum: jurisdictionis autem potestas non est commissæ alicui homini in favorem suum, sed in utilitatem plebis & honorem Dei.* Et ideo si superioribus Prælati expedire videatur ad salutem plebis & honorem Dei promovendum, quod aliis qua sunt jurisdictionis committant, in nullo fit

praedictum inferioribus Prelatis, nisi illis qui  
 quarunt qua sua sunt, non qua Iesu Christi; &  
 qui gregi praesunt, non ut eum pascant, sed ut  
 ab eo pascantur. Quam doctrinam gloriae Dei  
 casti sectatores praeter oculos habere debent.

Nec obest quod divino mandato Rectoribus  
 animarum praecipitur est Proverb. 27. *ut dili-*  
*genter vultum pecoris sui agnoscant*; hoc est, ut  
 ibi Beda interpretatur, ut diligentem adhibeant  
 illis curam, quibus ipsos praesse contigerit,  
 agnoscendo animos actusque singulorum, &  
 quidquid in eis vitii sordidantis invenerint ca-  
 stigando. Quod impediri videtur, si alius quis-  
 piam ad audiendas confessiones admittatur.  
 Non obest, inquam, quia ut recte ait S. Do-  
 ctor ad 2. *Rector Ecclesiae debet vultum pecoris*  
*sui*, id est statum animarum sibi subditarum,  
 agnoscere dupliciter: uno modo per sollicitam ex-  
 terioris conversationis considerationem, quia in-  
 vigilare debet super gregem sibi commissum; &  
 in hac cognitione non oportet quod credat sub-  
 dito, sed certitudinem facti in quantum potest in-  
 quirat: alio modo per confessionis manifestatio-  
 nem; & quantum ad hanc cognitionem non po-  
 test maiorem certitudinem accipere, quam ut  
 subdito credat, quia hoc est ad subveniendum  
 conscientiae ipsius; unde in foro confessionis cre-  
 ditur homini & pro se, & contra se, non au-  
 tem in foro exterioris iudicii. Et ideo ad hanc  
 cognitionem sufficit quod credat subdito dicenti  
 se alteri absolvi valenti fuisse confessum. Et  
 sic patet quod talis cognitio pecoris per privile-  
 gium alteri indultum de confessione audienda,  
 non impeditur.

Instabis: Illud non debent ab Episcopis Sa-  
 cerdotes

cerdotes de novo accipere, quod in ordinatione sua per manuum impositionem receperunt. Atqui jurisdictionem audiendi confessiones Episcopi Sacerdotibus contulerunt, cum eis manus imponentes dixerunt: *Accipite Spiritum sanctum, quorum remisistis peccata, remittuntur eis; & quorum retinueritis retenta sunt.* Ergo non indigent nova Episcopi approbantis & jurisdictionem impertientis facultate.

Respondeo propter hoc argumentum graves Theologos, Armacanum, Cajetanum, Navarrum, Petrum Ledesnam, & Vasquem existinare, Sacerdotem ex vi suæ ordinationis totam jurisdictionem, & completam à peccatis absolventi facultatem ab Episcopo manus imponente recepisse; illam tamen ab Ecclesia ligari & arctari, ut priorum Sacerdotum jura salva consistent: unde nequit sive licitè, sive validè facultas illa in actum exire, propter Ecclesiæ id non permittentis & subditos denegantis prohibitionem. Verùm cum sacrum Concilium declaret, illam absolutionem esse nullius momenti, id est nedum illicitam, sed etiam invalidam, quam Sacerdos in eum profert in quem ordinariam vel subdelegatam non habet jurisdictionem, argumento satis manifestum est, Sacerdotes jurisdictionem ex vi ordinationis minimè recepisse. Quanvis ad eorum Doctorum, quos aliqui in ferendis censuris liberales variè & plus justo notant, defensionem dici posset, ideo absolutionem illam esse nullius momenti, quia fit transgressione præcepti sacrilega, subindèque nulla: quia hæc est summè observanda differentia inter Sacramenta imprimèntia characterem, & illa quæ gratiam

forum Sacramentalem producant, quod priora, modò adsit forma, materia, & intentio facien- di quod facit Ecclesia, semper valida sunt, nec ullo possunt ministrantium, vel suscipientium quàmlibet sacrilego obice impediri. Sic Episcopus titularis, vel alterius Diocesis validè confirmat, validè ordinat sibi etiam non sub- jectos, & proprio etiam Episcopo reclamante, quanvis hoc nefario ausu in grande incidat scelus, & variis pœnis juxta Sacros Canones obnoxius maneat. At verò Sacramenta unan- gretiam sanctificantem & Sacramentalem effi- ciantia eo ipso nullius momenti sunt, quo sunt illicita, quia cum illicitè ministrantur vel reci- piuntur, gratiam non efficiunt; unde nullum sortiuntur effectum, sed potius ob recipien- tium vel conferentium malitiam scelera augent, & mortem inferunt. Quanvis, inquam, ad eo- rum Doctorum apologiam id satis probabiliter dici possit, veritas tamen est, jurisdictionem à potestate ordinis esse distinctam. Unde quando Episcopus Sacerdoti in Sacra ordinatione dat potestatem remittendi peccata, non propterea dat illi jurisdictionem, quia subditos non de- signat, in quos talem auctoritatem exerceat: est autem jurisdictio subditorum designatio in quos Sacerdos spiritale imperium exerceat, unde se habet sicut approximatio causæ ad effe- ctum: potest ignis, v.g. lignum comburere, il- lud tamen non comburet, nisi fiat indistans: ita potest Sacerdos peccata remittere, sed exigitur subditorum designatio, & deputatio, quibus potestas illa applicetur.

Urgebis: Summus Pontifex potest quem- cumque orbis Sacerdotem in Confessarium eligere,

eligere , & quivis Episcopus quemlibet suæ  
Dœceseos Sacerdotem : atqui illi Sacerdotes  
non habent jurisdictionem distinctam à pote-  
state in sua ordinatione recepta ; neque enim  
jurisdictionem in se Papa vel Episcopi dare  
possunt , qui in se nullam habent , & nemo dat  
quod non habet : Ergo potestas jurisdictionis  
non est à potestate Ordinis sejuncta. Cujus  
etiam signum est , quod quilibet Sacerdos,  
etiam hæreticus , præcursus , degradatus , & no-  
minatim excommunicatus , potest quemcunque  
in articulo mortis constitutum confitentem au-  
dire , & confessum absolvere.

Respondeo confessorem Summi Pontificis  
& aliorum Episcoporum habere jurisdictionem  
super ipsos , quidquid subdubitans dicat do-  
ctissimus Cajetanus quæst. unica de ministro  
Pœnitentiæ. Cum enim Sacramentum pœni-  
tentiæ sit judiciale , necesse omninò est mini-  
strum illius judicem esse : judex autem sine ju-  
risdictione nec quidem intelligi potest. Quare  
sicut Summus Pontifex saltem in casu hæresis  
notoriæ subditur Ecclesiæ in foro exteriori , sic  
per quodlibet peccatum mortale eidem in foro  
interiori subjicitur ; unde coram Sacerdote  
comparere , se apud illum humiliter accusare,  
illiusque judicium & impositam pœnitentiam  
subire iure divino , quod sub dispensationem  
Ecclesiæ non cadit , obligatur. A quo autem  
Confessarius tunc jurisdictionem accipiat , va-  
riant Authores : alii à tota Ecclesia variis in  
Conciliis congregata , & Pontificum oraculis  
in jure loquuta ; unde ait D. Thomas in Sup-  
plem. quæst. 9. art. 4. ad 4. *Pralatis concessum  
est à jure , quod possint sibi eligere proprios Sa-*

*cerdotes Confessores, qui quantum ad hoc sunt eis superiores: sicut etiam unus medicus ab alio curatur, non in quantum medicus, sed in quantum infirmus.* D. Bonaventura & Cardinalis Turrecremata docent, Summum Pontificem eligendo Confessorem eidem conferre sui absolvendi facultatem, quam tamen ipse exercere non potest; sicut Diaconus in Episcopum electus & confirmatus absolutionem à peccatis aliis demandare potest, cum tamen ipse peccatores absolvere non queat. Et quanvis Episcopus directè in se jurisdictionem non habeat, potest tamen eam alteri impertire: sicut licet nullus possit suus esse superior, suum tamen superiorem legitimè & canonicè eligere potest; quia ad hoc sufficit quod possit seipsum alteri supponere, quod nemo non potest. Paludanus, Capreolus, & Melchior Canus sentiunt, jurisdictionem quâ Sacerdos à Summo Pontifice electus eum ipsum absolvit, à Christo summo & æterno Sacerdote proficisci; quia cum ex una parte Deus Ecclesiæ Pastori in necessariis non defuerit, ex alia verò Papa nec sui pastor, nec iudex sit, providit Christus ut Sacerdos ab eo electus totam jurisdictionem necessariam jure divino habeat, sicut & eodem jure in articulo mortis constitutos ab omnibus sceleribus quilibet Sacerdos absolvit, & venialia justorum peccata remittit, & semel ritè confessa iterum exposita condonat.

Ad id quod de articulo mortis dicitur, respondeo certum esse, in articulo mortis posse quemvis Sacerdotem quemcunque peccatorem à quovis peccato quâmlibet gravi & reservato absolvere, ut sacrum Tridentinum Concilium

Concilium sess. 14. cap. 7. his verbis declarat: *Veruntamen piè admodum, ne hac ipsa occasione aliquis pereat, in eadem Ecclesia Dei custoditum semper fuit, ut nulla sit reservatio in articulo mortis: atque ideo omnes Sacerdotes quoslibet pœnitentes à quibuscvis peccatis & censuris absolvere possunt.* A quo autem hanc Sacerdos jurisdictionem obtineat, existimant Durandus, Paludanus, Capreolus, quorum doctrinam probabilissimam censet Canus, quemlibet Sacerdotem in mortis articulo habere auctoritatem absolvendi jure divino; quia cùm Dei provida gubernatio in necessariis non deficiat, quemadmodum providit ut in articulo mortis quicumque posset licitè baptizare, non obstante quacumque Ecclesiastica censura & prohibitione: ita statuit ut in eodem articulo pœnitentiæ Sacramentum non minùs lapsis, quàm nondum regeneratis baptisma, necessarium quilibet Sacerdos ministraret. Et sanè quod universa tenet semperque tenuit Ecclesia, nec à Pontificibus aut Conciliis tempore aliquo post Apostolos definitum invenitur, traditione Christi & Discipulorum ejus, teste Augustino lib. 4. de bapt. cont. Donastitas, cap. 24. rectissimè creditur constitutum: Atqui quod quilibet Sacerdos in extremo mortis impendentis articulo quemlibet possit à quovis sive peccati, sive excommunicationis vinculo absolvere, semper in Ecclesia retentum est, semper creditum, semper observatum, nec invenitur nova aliqua Prælatorum constitutione sancitum: Ergo à Christo & Apostolis mos ille profectus est & inviolabiliter institutus.

Alii volunt, Sacerdotem quemcunque in illo

articulo tantæ necessitatis ab Ecclesia auctoritatem & jurisdictionem habere; quia nulli filiorum in tanto periculo deesse pia Mater vult: & cum necessitas non habeat legem, non est existimanda amantissima Mater legem quâ præcisos amoveret à Sacramentorum ministerio, ad extremum necessitatis articulum extendere voluisse. Maxime quia odia restringi, favores convenit ampliari; tum præsertim cum id Dei honos populique fidelis spiritalia cummoda postulant. At quod Sacerdos in urgenti mortis imminenti necessitate quemcunque possit absolvere, gratia est & favor populi Christiani. Ergo ad omnem omnino Sacerdotem favor ille ampliandus & sine restrictione ulla est dilatandus. Quod autem excommunicati, penitusque præcisi à Sacramentorum ministerio arceantur, in odium scelerum ipsorum est; & peccatorum eorum pœna; unde in aliorum fidelium emolumentum, non in præcisorum favorem pœnam illam legum interpretatione mollire, non verò exasperare decentissimum est.

Ex omnibus hætenus dictis patet, posse sibi Prælatos Ecclesiasticos quosdam casus reservare. Nam cum jurisdictio ab eis tota pendeat, tota proficiscatur, eam possunt, prout in Domino expedire judicaverint, limitare. Hinc Tridentinum sessione 14. sæpè laudatâ, cap. 7. ait: *Magnopere ad Christiani populi disciplinam pertinere Sanctissimis Patribus nostris visum est, ut atrociora quædam & graviora crimina non à quibusvis, sed à summis duntaxat Sacerdotibus absolverentur. Unde merito Pontifices pro suprema potestate sibi in Ecclesia universa tradita causas aliquas criminum graviores suo potuerunt pecu-*

liant



liari iudicio reservare. Neque dubitandum est, quando omnia quæ à Deo sunt, ordinata sunt, quin Episcopis omnibus in sua cuique diocesi, in adificationem tamen, non in destructionem, id liceat pro illis in subditos traditâ super reliquos inferiores Sacerdotes autoritate, præsertim quoad illa, quibus excommunicationis censura annexa est. Hanc autem delictorum reservationem consonum est divina authoritati, non tantum in externa politia, sed etiam coram Deo vim habere. Et can. II. Si quis dixerit Episcopos non habere ius reservandi sibi casus, nisi quoad externam politiam, atque ideo casuum reservationem non prohibere quominus Sacerdos à reservatis verè absolvat, anathema sit.

### De Sigillo Confessionis.

Tertia pars speculationis, quæ asserit ministrum confessionis ad sigillum seu secretum omni jure teneri, facilis est probatu. In primis ad secretum tenetur Sacerdos jure naturæ, quidquid dicat P. Vasques: tum quia jure naturali secretum non prodere tenemur; si enim commissum nobis violare depositum sacrilegii damnant omnia gentium jura, quando magis secretum peccatorum sibi creditum violare nefarium & proditorium censendum est? Tum quia jure naturali alienæ famæ consulere jubemur, & multò magis alium infamare prohibemur; revelari autem aliena peccata in confessione audita sine famæ violatione non possunt. Tum quia mentiri est contra jus naturæ: qui autem revelat confessionem, mentitur; revelans enim significat se scire ut hominem, quod non

nisi ut Deus, id est vices Dei agens cognovit. Tum quia qui revelat confessionem, alteri facit quod sibi fieri nolle; unde principium & præceptum jure naturali omnibus obvium transgreditur.

Jure etiam humano id vetitum est, ut patet ex canone *Sacerdos*, dist. 5. de pœnit. & in capite *Omnis utriusque sexus*, ubi dicitur: *Caveat autem omnino Sacerdos, ne verbo aut signo aliquatenus prodatur peccatorem.* Sed si prudentiori consilio indiget, illud absque expressione persona cautè requirat; quoniam qui peccatum in pœnitentiali judicio sibi detectum præsumpserit revelare, non solum à Sacerdotali officio deponendum decernimus, verum etiam ad agendam perpetuam pœnitentiam, in arctum Monasterium detrudendum. Unde Catechismus Romanus part. 2. num. 75. explicans quantum confessa revelare peccata strictissimè cautum sit, sic ait: *Sed quoniam nemo est, qui non vehementer cupiat, scelera & turpitudinem suam occultari, monendi sunt fideles, nihil esse quod timeant, ne ea quæ ipsi confessione patefecerint, à Sacerdote ulli unquam indicentur, neve aliud ex ea periculi genus sibi ullo tempore creari possit.* Sacra enim sanctiones gravissimè in eos Sacerdotes animadverti voluerunt, qui peccata omnia quæ aliquis eis confessus fuerit, perpetuo & religioso silentio compressa non tenuerint. Quare in Concilio Lateranensi magno ita legimus: *Caveat omnino Sacerdos, ne verbo, vel signo, vel alio quovis modo prodatur aliquatenus peccatorem.*

Denique jure divino sigillum illud constat. Tum quia Sacramentum istud divinitus institutum significat deleta esse peccata, & oblivioni

à Deo tradita, secundum illud Ezechielis 18: *Si impius egerit poenitentiam, omnium iniquitatum ejus non recordabor.* Unde cum is qui revelat, ita se gerat ac si peccata confessa non essent deleta, nec oblivioni tradita, manifestè divinæ institutioni contradicit, ac proinde præceptum divinum violat. Tum quia præcipiens finem, præcipit etiam media quibus finis ille fortiter & suaviter obtinetur: Ergo ex præcepto divino imperante confessionem, imperata intelligitur sigilli confessionis inviolabilis observantia, sine qua præceptum de confessione executioni mandari minimè posset, sed potius ab eo observando homines deterrerentur, ac proinde sigillum Christus præcepit, ut esset quoddam levamen oneris confessionis. Unde præceptum illud est negativum, semper & pro semper obligans, in quo nulla dispensatio quovis imaginabili prætextu locum habere potest.

Unde nec specie boni communis servandi vel augendi, vel hæresis impediendæ, vel propriæ vitæ defendendæ unquam vel usquam, directè vel indirectè peccata in confessione audita revelare licet. Quia nullum est bonum commune non solum anteponendum, sed nequidem cum observatione sigilli comparandum: nullum etiam bono communi detrimentum majus creabitur, quàm si confessio exosa, invisibilis, & intolerabilis reddatur, illique odium & invidia secretorum revelatione confletur. Non vetat tamen religiosa sigilli custodia actiones de se indifferentes, & ex aliis motivis communiter fieri solitas, ob grave periculum præcavendum prætermittere. V. g. licitè potest Sa-

cerdos à sacro faciendo abstinere, ne vinum quod ex confessione toxico imbutum novit, exsorbeat: potest hominem colloquiis, vel aliis honestis artibus secum retinere, ne in hostes, quorum ex confessione paratas insidias perno- vit, incidat. Tunc enim nulla fit secreto, vel pœnitenti confessio injuria.

Hinc etiam inferunt Doctores, non licere uti scientia in confessione accepta, vel ad regi- men, vel ad aliquem ab officio arcendum, vel ad indignum non promovendum; quia magna inde Sacramento pœnitentiæ crearetur invidia, & onus confessionis grave nimis redderetur: licet tamen officia externi regiminis, ad quæ alioquin tenetur Prælati, accuratiùs & cautiùs obire, putà licet Rectori horis indebitis fores Ecclesiæ occludere, ne turpibus colloquiis, quæ fieri ex confessione novit, pateat: potest etiam vitia illa exaggerare, quæ ex confessionibus per- viderit esse communiora; tunc enim nec one- rosa efficitur confessio, nec ullius privatum sce- lus indigitatur. Qua etiam ratione D. Thomas quæst. 11. art. 1. ad 4. docet, posse aliquem ei denegare suffragium, quem ex confessione no- vit prælacione indignum; quia ex multis aliis causis redditur quis indignus prælacionis offi- cio, putà ex defectu scientiæ, ætatis; & aliorum hujusmodi. Unde potest Confessarius ex con- fessione in regimine cautior, prudentior, & di- ligentior esse; si tamen hoc non sit pœnitenti- ullatenus incommodum, nec habeat vim oc- cultæ reprehensionis culparum. Sed in his ma- gna prudentia opus est, semperque habendum præ oculis, illa omnia cavenda esse, quibus con- fessio invisâ vel gravis efficitur, debetque om-  
niss

nis omninò occasio funditus tolli, unde possit pœnitens vel conqueri, vel diffidere, vel suspicari, vel ab integritate & candore in confessione tantopere necessario alienari. Unde nec defectus naturales, nec imperfectiones personales, nec facinoris conscios aut consortes, nec aliud quidpiam sine expressa & liberrima pœnitentis licentia ullatenus sive directè, sive indirectè, sive durante vita, sive post mortem, sive mortale, sive veniale, uno verbo nunquam & nunquam retegere citra grandem injustitiam, tetram infidelitatem, & nefarium sacrilegium, neque Sacerdoti, nec alteri cuivis confessionem ex industria, vel casu auscultanti licet. Sed ad quæcumque interrogata à quovis facta respondere debet, imò & jurare potest Confessarius se nescire, seque officio suo, prout Dominus dedit, perfunctum esse. Nec debet patris vel impendentibus malis aliter quàm hortamentis, imperiis, absolutionis denegatione, vel pœnitentis habitâ licentiâ subvenire.

Observent ergo diligenter Confessarii, ne in dubiis suis proponendis aliquid dicant, unde personæ aliquæ per discursum tandem dignosci possint. Unde cum magna cautela hi sermones sunt frequentandi, Tale peccatum viget in tali Ecclesia; si omnibus pensatis ad notitiam vel rationabilem suspicionem alicujus personæ viri ingeniosi devenire possint. Porro quàm sit imprudens & temerarius eorum jocus, qui de peccatis in confessione auditis etiam citra periculum infamiæ vel pœnitentium verecundiæ, nugandi vel ridicula jactandi occasionem nanciscuntur, nemo pius non videt. Caveant etiam pœnitentes ne dicta à Sacerdotibus propagentur.

propalent, quando id Sacramenti reverentia, Confessarii honor, aut alia id genus vetant, quæ secreto naturali celare tenentur. Possunt tamen & debent confessarium vel ad hæresim inducentem, vel sollicitantem ad turpia Superioribus revelare, ut ex Pontificiis diplomatis liquet. Monet etiam S. Carolus part. 2. Instruct. cap. 20. ne Sacerdos quavis necessitate coactus cum ipso pœnitente de peccatis in confessione auditis extra confessionem loquatur, nisi præhabita ipsius venia, quæ liberè & sponte concedatur. Unde si peccatum usqueadeò esset occultum, ut non nisi ex prævia confessione constaret, nihil extra confessionem præstare tenetur, quàm ferventi oratione peccatorem Deo commendare; & si ad sacram communionem se præsentem sistat, nullo eam pacto ei negare potest. Hac de causa secretum confessionis appellatur sigillum, per metaphoram à similitudine litterarum, quæ obsignari sigillo solent; ut quod in illis continetur, sacrum & inviolatum remaneat, nec aperiri à quopiam possit.

*Varia quæ observentur dignissima  
corollaria derivantur.*

*Vbi etiam de virtute & effectibus pœnitentia differitur.*

Ex dictis in decursu hujus capituli quædam sponte sua fluunt consecutaria ad hujus materiei claritatem & complementum penitus necessaria.

COROLLARIUM I.

*Actus pœnitentis à virtute specialiter  
proficiscuntur.*

SEquitur enim primò, actus interiores pœnitentis, quæ materiæ hujus Sacramenti rationem habent, à virtute pœnitentis procedere, imò nisi ab ea proficiscantur, parùm admodum prodesse. Ad cujus evidentiam sciendum, pœnitentiam esse virtutem. Tum quia de actibus pœnitentiæ est præceptum legislatoris, eisquo respondet promissum præmiùm. Matth. 4. *Pœnitentiam agite.* Lucæ 6. *Beati qui fletis, quoniam ridebitis.* Lex autem de iis tantùm actionibus præcipit, quæ cum virtute suscipiuntur, ut enim 2. Ethic. Philosophus dixit: *Legislator cives intendit facere virtuosos. Legumlatores.*

cores, inquit, assuefaciendo cives faciunt bonos; & hac porro est uniuscujusque Legumlatoris voluntas. Tum quia facilitas de peccato dolendi est habitus electivus, secundum rectam rationem in mediocritate consistens; recta namque ratio dicat ut dolor de peccatis eo sine modoque fiat, quo debet: dolere ergo de peccato quando, quomodo, & quatenus oportet, virtutis est. Interdum enim evenit, ut ex admittis sceleribus minorem quam par est dolorem capiamus; & rursus alii ita se animi mœrori & ægritudini dedunt, ut de salute etiam prorsus desperent: qualis sine dubio Cōin fuit, dum Genes. 4. dixit: *Major est iniquitas, quam ut veniam merear*; & qualis etiam Judas fuit, qui nimiam & desperatam pœnitentiā ductus suspendio vitam & salutem amisit. Ut igitur modum in dolore teneamus, ea virtute egemus, quam pœnitentiam dicimus. Et quanvis sit contra rationem virtutis quod aliquis presenti turpi facto sordeat, de quo eum verecundari oporteat; non est tamen contra perfectionem virtutis, ut ait S. Thomas 3. p. q. 85. art. 1. ad 2. quod aliquis turpia prius facta admisit, de quibus eum pœnitere oporteat, cum ex vitioso fiat aliquis virtuosus. Fateor tamen pœnitentiam non esse virtutem absolutè, sed ex suppositione peccati necessariam; unde non nisi eo modo quo medicina appetitur, desiderabilis est, quanvis etiam dici possit pœnitentiam ante peccatum elicere posse actum ex parte subiecti absolutum, ex parte tamen objecti conditionatum, eligendo nimirum de peccato, si committatur, moderatè affligi. Et licet in hoc patiatnr voluntas dolorem & tristitiam,



stitionem, delectationem tamen virtutis experitur, ab habitu facilitatem, & promptitudinem invahente proficiscentem: unde & beatitudo lugentibus promittitur, Matth. 5. & Author libri de vera & falsa pœnit. apud Augustinum ait: *Semper doleat pœnitens, & de dolore gaudeat.*

Dices, ideo verecundia secundum S. Thomam 2. 2. quæst. 144. art. 1. non est virtus, quia est passio habens immutationem corpoream, quæ ex turpi facto apprehenso proficiscitur. Sed pœnitentia est dolor de turpi facto, qui sensibus etiam percipitur, & in lacrymas funditur: Ergo pœnitentia non est virtus.

Respondeo pœnitentiam non esse virtutem ut est passio & dolor sensibilis, sed prout est electio voluntatis, unde etiam dolor sensibilis promanat. Adde quod verecundia non est tam de turpi facto, quam de ignominia ex illo sequuta; unde est tristitia proveniens ex fantasia & imaginatione confusionis: pœnitentia autem est voluntarius de peccato dolor, quod pœnitens de crimine ut est offensa Dei torquetur, & ita eum errati piget, ut animum voluntariâ castigatione maceret, confirmetque subinde ad rectius vivendum.

Sciendum rursus, pœnitentiam esse specialem virtutem, quia cum secundum species actuum distinguantur species habituum, ubi occurrit specialis actus laudabilis. ibi necesse est ponere specialem habitum virtutis. Manifestum est autem, inquit D. Thomas 3. p. quæst. 85. art. 3. quod in pœnitentia invenitur specialis ratio actus laudabilis, scilicet operari ad destructionem actus præteriti, in quantum est offensa Dei; quod non pertinet ad rationem alterius

alterius virtutis : ergo pœnitentia est virtus specialis. Quare licet quælibet virtus sicut amat proprii objecti honestatem , ita odium peccati suo objecto oppositi elicere nata sit ; nulla tamen rationem injuriæ Deo per quodvis peccatum intentatæ ex propria ratione facit ; unde hæc ratio à virtute speciali , quam pœnitentiam nominamus , attingitur. Cui etiam speciales difficultates , quod specialis virtutis signum est , evincere incumbit , dum ea nimirum fugit quæ carni & sanguini pergrata , ea assumit quæ ipsi molesta sunt.

Quod ut clariùs percipiatur & unà profundius penetretur , considerandum est , varias esse in peccato lethali rationes diligenti accurate distinctione distinguendas. Primum enim peccatum mortiferum est quoddam malum morale honesto ut sic repugnans ; & quia ab eodem principio amor boni & oppositi mali odium proficiscuntur , ideo dolor & odium peccati sub ratione mali moralis spectati à sola voluntate procedit ; suppositâ tamen eâ D. Thomæ sententiâ , quam in materia de virtutibus stabilivimus , voluntatem ad prosecutionem boni ut sic satis esse naturâ comparatam , satis vi sua instructam , nec habitus ullius additamento egere. Secundò peccatum est malum divinum divinæ bonitati adversum , divinam amicitiam dissolvens , rationem ultimi finis affectivè à Deo submovens , illamque in vilissimam creaturam nefandâ perversitate transferens ; & sub hac ratione peccatum odit charitas , illudque quantum Deum diligit , tantum detestatur. Tertiò peccatum est malum ipsius hominis , quem bono rationis nudat , jure ad beatitudinem

nem spoliat, omni que virtutum infusarum & cœlestium donorum suppellectile privat, & sic peccatum odio habet vel voluntas in amorem sui satis sua sponte propensa, vel charitas proximi, quæ benè ordinata incipit à seipsa, vel certè spes bonum divinum & æternam beatitudinem amore concupiscentiæ amans, æternam proinde miseriam & peccatum hujusmodi miseriæ causam germanam detestata. Quartò peccatum est aliquod speciale malum alicujus virtutis honestati repugnans; putà ebrietas honestatem temperantiæ, adulterium honestatem castitatis, furtum honestatem justitiæ extinguit: sub hac ergo ratione singulari spectatum peccatum quælibet virtus odit, & fugit, sive præsens, sive præteritum, sive futurum. Denique peccatum est injuria Deo non solum quà summo bono, sed etiam quà supremo Domino & Legislatore illata, quæ ab homine pro virili sarcienda est & reparanda: & sub hac ratione peccatum immediatè respicit pœnitentia, quæ tamen ab aliis virtutibus, ab omnium maximè regina charitate imperari potest: sed illos actus elicere quibus Deo satisfacit, seseque opposcentes difficultates vincere ad specialem pœnitentiæ virtutem pertinet, quæ proinde singularis virtus censenda est, tametsi ad objecta omnium virtutum se extendat, quatenus omne peccatum, sed motivo tamen proprio detestatur.

Dices: Virtus Theologica non consistit in medio, id est non versatur inter duo excessus & defectus extrema: Atqui pœnitentia nullum pati potest in peccati dolore excessum; etenim quo magis Deum diligimus, eo amplius

plius Dei offensam detestamur , quo fit ut quemadmodum S. Bernardo teste modus diligendi Deum est ipsum sine modo diligere , ita detestationi peccati nullus modus definiatur ; subindeque contritio , qui est præcipuus pœnitentiæ actus , vehementissimum animi dolorem conjunctum habet , ut superius dictum fuit : ut enim maximè diligendus est Deus , ita quæ nos à Deo alienant , maximè detestari debemus ; quia sicut ille summum bonum est inter omnia quæ diligenda sunt , ita peccatum summum est malum inter omnia quæ odisse homines debent. Ergo pœnitentia non specialis virtus est , sed ad Theologicas reducitur , & ad charitatem præcipuè spectat : unde eodem loquendi modo charitatis & contritionis modus , & magnitudo sacris in litteris significantur : nam sicut Deum ex toto corde diligere præcipimur , ita ad eum toto corde converti mandamur.

Respondeo , quod licet non possit esse vitiosus de peccato ut opponitur amicitiae divinæ dolor , de peccato tamen ut est offensa Dei satisfactione pœnitentis resarcienda dolor nimius contingere potest ; talis enim potest esse tristitia quæ inducat in desperationem , ut Cæi & apostatæ Judæ exemplis supra relatis claret : potest etiam esse in remissione & molliore dolore defectus.

Nec valet si replices , hunc excessum se tenere ex parte subjecti , non ex parte objecti ; qui excessus in theologica virtute contingere potest , ut cum quis amore Dei illectus plus iusto contemplationis ardoribus incumbit ; vel divinis promissis fretus , beatitudinem sine meritis

eis & labore obtinere præsumit. Verumtamen sicut nimia esse non potest dilectio, attentâ infinitâ Dei amabilitate; nec nimia spes, considerato bonitatis Dei hominem beaturæ auxilio: ita nec nimius de peccato voluntatis dolor concipi potest, si offensa Dei majestatis ex talis & tanti objecti dignitate appendatur. Non valet, inquam, hæc replica: hoc enim discriminis virtutes theologicas inter & morales interest, quod istarum actiones prudentia humana saltem infusa meretur & definit: illæ verò ex se nullis prudentiæ humanæ regulis subjacent, sed omnes transiliunt, nullasque in objecti infiniti prosecutione sibi præscribi metas patiuntur. At pœnitentia ex meritis objecti, peccati scilicet ut reparandi, pensata humanis supponitur normis, quibus & locus, & tempus, & modus satisfaciendi pro numero & gravitate criminum præstituantur. Vnde pater quod pœnitentia non sit virtus theologica, cùm ejus materia & objectum formale non sit Deus, sed actus humani, quibus Deus offensus placatur.

Iustabis: Pœnitentia non habet quod sit virtus specialis ex hoc solo quod dolet de malo & offensa Dei perpetrata, ad hoc enim sufficeret charitas; sed ex eo quod pœnitens dolet de peccato commisso, in quantum est offensa Dei per satisfactionem emendanda, quæ emendatio offensæ, ut ait S. Thomas art. 3. non fit per solam cessationem offensæ, sed *exigitur ulterius quadam recompensatio, quæ habet locum in offensis in alterum commissis, sicut & retributio.* Et ut scitè dixit Augustinus lib. 50. homiliarum, hom. 50. *Non sufficit mores in melius commutare,*

*commutare, & à factis malis recedere, nisi etiam de his quæ facta sunt satisfiat Deo per pœnitentia dolorem, per humilitatis gemitum, per contriti cordis sacrificium, cooperantibus eleemosynis, &c. Atqui hoc totum pertinet ad justitiam, ut patet. Ergo pœnitentia non est virtus specialis, sed à virtute justitiæ proficiscuntur actus pœnitentiæ: justum enim est ut qui offendit alterum, ipsi emendatione, retributione, & punitione satisfaciatur. Unde idem Augustinus ad justitiam sic pœnitentiam revocat epist. 54. Nihil aliud agit quem veraciter pœnitet, nisi ut id quod mali fecerit, impunitum esse non sinat: eo quippe modo sibi non parcenti ille parcat, cujus altum justumque judicium nullius contemtor evadit.*

Respondeo certum esse, pœnitentiam esse partem justitiæ; nec tamen propterea sequitur pœnitentiam esse ipsam justitiam; licet enim omnis virtus quæ est ad alterum, & debitum ei reddit, justitiæ pars sit, & ideo justitia virtus generalis dicatur; quia tamen in materia justitiæ diversa sunt objecta formalia partialia, diversa etiam distinguuntur partes justitiæ, sive integrales, sive ut loquitur S. Thomas, potentiales, id est quæ à perfecta ratione justitiæ deficiunt: quæ quidem in hoc sita est, quod alteri reddatur quod ei debetur secundum æqualitatem. Dupliciter autem aliqua virtus ad alterum existens, ut eruditè ostendit S. Thomas 2.2. quæst. 80. art. 1. à ratione justitiæ deficit: uno quidem modo inquantum deficit à ratione æqualis: alio modo, inquantum deficit à ratione debiti. Sunt enim quædam virtutes quæ debitum quidem alteri reddunt, sed non possunt reddere

reddere æquale. Et primò quidquid ab homine Deo redditur, debitum est, æquale tamen esse non potest, ut scilicet tantum homo Deo reddat, quantum debet, secundum illud Psalmi: *Quid retribuam Domino pro omnibus quæ retribuit mihi?* Et ideo adjungitur justitiæ religio, quæ divinæ naturæ cultui studet. Secundò parentibus non potest secundum æqualitatem compensari quod eis debetur, ut patet per Philosophum 8. Ethic. cap. ultimo, & sic adjungitur justitiæ pietas, per quam, ut Tullius ait, sanguine junctis patriæque benevolis officium & diligens tribuitur cultus. Tertiò non potest secundum æquale præmium recompensari ab homine virtus, ut patet per Philosophum in 4. Ethic. & ideo adjungitur justitiæ observantia, per quam homines virtute præcellentes & aliquâ nos dignitate antecedentes quodam specialiori cultu & honore dignamur. A ratione verò debiti deficit homo, cum id quod necessarium est non persolvit: porrò dupliciter aliquid est necessarium, vel quia sine eo honestas morum conservari non potest, vel quia ad majorem honestatis abundantiam confert. Primum debitum exigit ut homo talem se exhibeat alteri in verbis & factis, qualis est. Et ideo adjungitur justitiæ veritas, per quam ea quæ sunt, aut fuerunt, aut futura sunt, immutata dicuntur. Exigit etiam hujusmodi debitum ut bona in nos collata gratitudine muneremus, mala verò propulsemus: prius præstat gratia seu gratitudo, quâ amicitiarum & officiorum alterius memoria, & illius remunerandi voluntas continetur: posterius præstat justa vindictio, per quam vis aut injuria, & omnino quid-

quid obfuturum est, defendendo aut ulciscendo cum moderamine inculpatæ tutelæ propulsatur, non animo nocendi, sed unius nocumenti duntaxat præcavendi gratiâ.

Quia ergo inter hominem pœnitentem & Deum offensum non invenitur æqualitas, & aliunde bonum quod homo pœnitendo reddit Deo est particulare, & infinitis titulis Deo debitum; bonum verò divinum quod auferre nissus est, universalissimum & infinitum est, subindeque diversi immensum ordinis: manifestum est pœnitentiam à perfectæ justitiæ ratione deficere. Nec valet si respondeas, ad justitiam commutativam & perfectam non esse necesse quod peccator de facto satisfaciat, vel possit satisfacere ad æqualitatem, sed quod eligat satisfacere, si fieri potest; quemadmodum liberalitas in paupere invenitur, qui sincerè bona & pecunias honestâ largitate profunderet, si per facultates liceret. Non valet, inquam, hæc responsio; quia ad rationem virtutis requiritur electio efficax alicujus possibilis, tum ex natura objecti, tum ex conditione subjecti secundum se considerati. Cum enim virtus sit habitus electivus, & electio non nisi ad possibilia fecatur, manifestum est virtutem non circa impossibilia nugari, sed possibilia appetere, & consona, sibi que proportionata eligere: satisfacere autem Deo ad æqualitatem est quid cuivis puræ creaturæ impossibile, & pœnitentis statui repugnans: unde qui eligeret Deo ad æqualitatem satisfacere, non tam virtutis actum eliceret quàm superbæ præsumptionis conatum suæ paupertatis nescius pertentaret. Non ergo sibi persuadeat peccator, se æquale posse Deo reddere,



dere, sed gratia & meritis Christi Redemptoris adjutus si non reddit quod debet, reddat certe quod potest. Unde D. Thomas sic eruditè discurret art. 3. laudato, 3. p. quæst. 85. *Sciendum est quod secundum Philosophum in 5. Ethic. dupliciter dicitur justum, scilicet simpliciter & secundum quid: simpliciter quidem justum est inter aequales, eo quod justitia est aequalitas quædam; quod ipse vocat justum politicum vel civile, eo quod omnes cives aequales sunt quantum ad hoc quod immediate sunt sub Principe, sicut liberi existentes. Iustum autem secundum quid dicitur, quod est inter illos, quorum unus est sub potestate alterius; sicut servus sub domino, filius sub patre, uxor sub viro. Et tale justum consideratur in pœnitentia. Unde pœnitens recurrit ad Deum cum emendationis proposito, sicut servus ad dominum, secundum illud Psalm. 122. Sicut oculi servorum in manibus dominorum suorum, ita oculi nostri ad Dominum Deum nostrum, donec misereatur nostri. Et sicut filius ad patrem, secundum illud Luc. 15. Pater peccavi in cœlum, & coram te. Et sicut uxor ad virum, secundum illud Ieremia 3. Fornicata es cum amatoribus multis, tamen reverte ad me, dicit Dominus.*

Urgebis cum Cajetano existimante pœnitentiam non distingui à virtute religionis: Eiusdem virtutis est respicere bonum & malum ipsi oppositum: at pœnitentia respicit malum virtuti religionis adversum; religio quippe circa cultum & honorem Dei occupatur, pœnitentia verò injuriam honori divino intentatam sarcire conatur: Ego si pœnitentia ad aliquam speciem justitiæ pertinet, profectò ad

religionem reducenda est, cum tota quanta est ad honorem divinum reparandum connitatur, & ejusdem virtutis sit jus & honorem illæsum servare, & læsum reparare.

Respondeo pœnitentiam respicere peccatum non præcisè prout divino cultui opponitur, sed quatenus est satisfactione compensandum; unde licet possit à religione, quæ est quædam virtus generalis, imperari; ab ea tamen actus pœnitentiæ non eliciuntur, sed intra proprium objectum religio sistit, quod est cultus Deo ut supremo Domino, omniumque creatori & gubernatori ratione infinitæ excellentiæ debitus, à qua ratione & aliæ virtutes, & ipsa pœnitentia abstrahunt. Quia nimirum objectum pœnitentiæ est jus divinum læsum per satisfactionem & compensationem quandam reparabile, quod Religio per se non attendit. Hanc rationem tradit S. Thomas in 4. dist. 14. quæst. 1. art. 1. quæstiunc. 5. dicens: *Aliquis efficitur Deo debitor per hoc quod ab eo aliquid recipit, & hac ratione Deo reddit debitum honorem latria sive religio: alio modo ex hoc quod contra Deum peccavit, & sic reddit Deo debitum pœnitentia.* Quibus in verbis rationem fundamentalem à nobis traditam insinuat, quia nimirum religio & pœnitentia objectum suum sub diversa formali ratione respiciunt; religio enim respicit cultum Deo ut supremo Domino tribuendum, qui utique tribuendus est ab innocentè, tametsi nullis sit peccatorum maculis sordidatus, nec Deum peccando offenderit; pœnitentia verò peccatum ut expiandum, jusque divinum læsum ut resarciendum attendit. In quo sanè specialem difficultatem patitur, quam religio non emollit,

emollit; proclive enim est supremi Domini excellentiam omnibus venerationis obsequiis prosequi; at in satisfactionem juris divini læsi animum corpusque macerare, & voluntario se dedere mœrori, ex quo digni pœnitentiæ fructus proficiantur, hoc opus, hic labor est. Quod verò dicitur, ejusdem virtutis esse jus & honorem illæsum servare, & læsum refarcire, verum est sistendo intra præcisam materiam & veluti lineam honoris; eadem religio v. g. & Deum honorat, & inhonorantes detestatur: si tamen ad restituendum jus læsum præter cultum Deo exhibendum desideratur punitio & vindictio rei, ratione novæ illius difficultatis specialis exigitur virtus, quæ ad Deum vindicandum arma capeßat.

Instites: Eadem virtute justitiæ commutativæ in humanis constituitur æqualitas in emptionibus & venditionibus, in offensis & injuriis: Ergo similiter eadem virtute religionis exhibere Deo cultum pro beneficiis, & satisfacere pro offensis absque novæ virtutis adjumento possumus.

Respondeo esse disparitatem, quia in humanis invenitur æqualitas, secus inter Deum & creaturas: unde eadem virtute possunt sibi homines invicem tam pro rebus acceptis in commutationibus, quàm pro injuriis illatis satisfacere. At verò nequit pura creatura nec pro beneficiis acceptis, nec pro injuriis importatis Deo æquale reddere: unde non datur una virtus illam perfectam æqualitatem intendens & præstans. Si replices, eandem id præstare virtutem, tamen si sub ratione inæqualitatis; unde deficiet quidem à perfecta ratione ju-

fuit, sed non ab ejusdem virtutis, puta religionis unitate: Respondebo inæqualitatem illam diversimodis à distinctis virtutibus servari; aliâ enim ratione religio reddit, etsi inæqualiter, Deo cultum, aliâ ratione pœnitentia satisfactionis debitum inæquale persolvit: prior uni Dei reverentiæ studet, posterior ejusdem offensi placationi operam dat.

Persistes: Eadem pietate filius patri reddit debitum, & injuriis patri illatis satisfacit, jus paternum ubique respiciens, ubique servans: Ergo eadem religione & cultum Deo exhibemus, & irrogatas ei injurias compensamus.

Respondeo discrimen multiplex à variis assignari. Primò, quia pietas, sive dum patrem honorat, sive dum patrem placat, semper idem debitum, jus nimirum paternum respicit: at verò virtus reddens debitum Deo cultum pro beneficiis, jus divini domini respicit; virtus autem satisfaciens pro injuriis, jus proprietatis, ratione cujus omnia in Deum referri debent, attendit. Sed hæc disparitas non multum satisfacit: nam etiam pater habet non solum jus domini, sed etiam proprietatis in filios, tanquam in rem suam, quam potest etiam in necessitate vendere, locare, & commodare: Maximè quia filius etiam innocens patrem venerari tenetur, filius verò ingratus insuper tenetur injurias patri illatas sarcire: ergo si eadem pietas utrumque præstat, quidni utrumque erga Deum eadem præstabit religio? Secundam rationem discriminis ex eo petunt alii, quod offensa filiorum in parentes non alia labe fordescit, quam impietatis & ingratitude, quam proinde opposita

sita pietatis aut gratitudinis virtus sufficienter compensat. At verò peccatum mortale præter turpitudinem oppositam cuilibet virtuti cui adversatur, importat insuper specialis injustitiæ labem, virtute proinde speciali à religione & alia quavis distincta reparandam. Sed hæc etiam differentia vim argumenti non evacuat; nam peccatum & injuria filii in patrem, nedum impietatis, sed etiam specialis injustitiæ rationem habet; gravius enim est non reddere parentibus quæ debentur à filiis, quàm aliis debita sua non persolvere: hanc ergo specialem injustitiam si una pietas sarcit, cur injustitiam peccati in Deum commissi non compensabit illa virtus, cujus est divino honori consulere & cultu antequam lædatur, & pœnitentiâ ac sacrificio spiritus contribulati, postquam læsus est, & per peccatum ablati?

Verum ergo discrimen non est aliud præter id quod à D. Thoma paulò antè memorato positum est, in hoc consistens, quod religio & pœnitentia jus quidem Dei, sed diversa tamen ratione respiciant: nam religio jus divinum attendit ut omni obsequiorum & cultûs genere promovendum; pœnitentia verò jus illud, sed ut læsum & debitâ satisfactione compensandum considerat: unde utraque virtus circa peccatum diverso etiam motivo versatur; religio namque peccatum quâ divinum dominium coarctat & quadantenus usurpat, detestatur; pœnitentia verò peccatum ut destruendum & debita castigatione puniendum insectatur: At verò pietas filii idem jus paternum, sive dum cultum exhibet, sive dum injuriis patri illatis satisfacit, intuetur; nec peccatum in patrem

admissum detestatur, nisi quia infanda impietatis labe conspurcatur.

Pro solutione aliarum objectionum præ oculis habenda est præclara D. Thomæ doctrina quam habet art. 3. ad 4. ubi tradit quod licet pœnitentia sit directè species justitiæ, comprehendit tamen quodammodo ea quæ pertinent ad omnes virtutes. In quantum enim est justitia quædam hominis ad Deum, oportet quod participet ea quæ sunt virtutum Theologicarum, quæ habent Deum pro objecto; unde pœnitentia est cum fide Passionis Christi, per quam justificamur à peccatis; & cum spe veniæ, & cum odio vitiorum, quod pertinet ad charitatem. In quantum verò est virtus moralis, participat aliquid prudentiæ, quæ est directiva omnium moralium virtutum. Sed ex ipsa ratione justitiæ non solum habet id quod ex justitia est, sed etiam ea quæ sunt temperantiæ & fortitudinis, in quantum scilicet ea quæ delectationem causant, ad temperantiâ pertinent, vel quæ terrorem incuriunt, quem fortitudo moderatur, in communionem justitiæ veniunt. Et secundùm hoc ad justitiâ pertinet & abstinere à delectabilibus, quod pertinet ad temperantiâ; & sustinere dura, quod pertinet ad fortitudinem.

Observe rursus, quod quia pœnitentia punit peccatorem reum ad vindicandam Dei injuriam quam hominis afflictione & satisfactione resarcire intendit, ideo pœnitentia quemdam justitiæ vindicativæ modum præ se fert: deficit tamen à perfecta ratione justitiæ vindicativæ, quia hæc non est in reo, sed in iudice, in quo habet rationem justitiæ commutativæ, quatenus

quatenus respicit æqualitatem inter reum satisfaci-  
cientem & personam offensam incundam : &  
vocatur vindicativa , quia satisfactionem per  
modum pœnæ imponit. Ergo quia pœniten-  
tia est in ipso reo , magisque intendit Deo sa-  
tisfacere quàm peccantem plectere , ideo enim  
eum punit , quia Deo læso satisfacere concu-  
piscit ; ideo pœnitentia non est justitia vindi-  
cativa propriè dicta , uti Scotus arbitratus est,  
sed pars potentialis commutativæ , ut sæpe  
dixit D. Thomas. Quia nimirum Deo nun-  
quam satisfacit ad æqualitatem : quanvis enim  
actus perfectæ contritionis ad Deum perfectè  
convertat , sicut peccatum mortale à Deo aver-  
tit , proindeque Deo restituat quod peccatum  
abstulerat : non tamen propterea tantum sa-  
tisfacit contritio , quantum peccatum fuit in-  
juriæ ; tum quia contritio id Deo reddit  
quod debet homo , etiamsi non peccet : plus er-  
go ab eo exigitur postquam peccavit ; nec ex  
æquo satisfacit offensæ per id quod deberet ,  
etsi nulla offensa præcessisset. Tum quia etsi  
contritio non minus habeat bonitatis moralis  
quàm peccatum turpitudinis & malitiæ mora-  
lis , quia utraque ex objecto consono vel disso-  
no regulis morum respectivè derivatur : attra-  
men valor satisfaciendi in contritione minor  
est , quàm sit injuria peccati ; quia valor &  
dignitas satisfactionis ex conditione perso-  
æ satisfaciæntis æstimatur , gravitas verò injuriæ  
ex personæ læsæ gradu & dignitate expenditur.  
Quia ergo pura creatura quàmlibet virtutibus  
opima & gratiis ornata , finita est , dignitas  
verò majestatis divinæ infinita est , nulla crea-  
turæ satisfactio injuriam Deo illatam æquare

ullatenus potest, ut libro de Deo homine operosius demonstravimus. Unde confutatum manet Durandi & Suaris placitum, pœnitentiam ad perfectam justitiam commutativam revocantium.

Observe tertio, quod licet pœnitentia justitiam distributivam quadanteus imiteretur, quatenus pro qualitate, gravitate, numero & modo criminum pœnas præscribit & distribuit; à ratione tamen perfectæ justitiæ distributiæ recedit, quidquid in contrarium dicat Gabriel: tum quia perfectam proportionem inter satisfaciendem & læsum servare non potest, cum pœna quæcumque imponatur finita sit; injuria verò Deo illata infinita, & finiti ad infinitum nulla sit proportio. Tum quia justitia distributiva nullum distribuenti debitum imponit, & ideo in Deo puniente & præmiante formaliter inveniri alibi ostendimus: in pœnitente tamen Deo læso satisfaciendi debitum inest, à quo nulla potest ratione eximi, donec Deo fecerit satis. Denique justitia distributiva in superiore præmia vel supplicia pro meritorum vel demeritorum modo disponente, dividente, & ex proportionis legibus meriente duntaxat invenitur: pœnitentia verò non nisi in inferiore superiorem offensum placare pro virili satagente reperitur. Ergo pœnitentia, tametsi modum justitiæ distributiæ æmuletur, perfectè tamen virtutis illius naturam non induit, nec ejusdem habet essentiæ consortium.

Observe demùm, quod licet Theològos omnes recentiores pervaserit hæc opinio; in eamque mentem cuncti veniant, pœnitentiam esse ab omnibus aliis distinctam & specialem virtutem;



si tamen, Lector, meam rogare aves sententiam, fateor à pervulgata illa sententia, qua omnes moderni imbuti sunt, recessisse nonnihil D. Thomam, me quoque tanti Magistri vestigia prementem nonnihil recedere, qui sancto Doctori, ubi apertè suam mentem aperit, indivulsè adhæreo. Quavis enim Angelicus Præceptor docuerit & probaverit, pœnitentiam esse virtutem specialem, id est non consistere eam in aggregatione multarum virtutum, nec esse conditionem generalem virtutes ceteras vel comitantem vel transcendentem, ut olim Altifiodorensem, Majorem, & Alensem arbitratos fuisse ferunt, quorum placitum rectè refellit S. Thomas ex specialibus actibus speciale objectum speciali motivo inspicientibus pœnitentiæ eximiis: attamen S. Thomam non intellexisse specialem virtutem, prout distinguitur contra aliquam peculiarem virtutem, sed prout uni omnium virtutum aceruo & aggregationi opponitur, manifestum videtur ex articulo 5. q. 85. tertiæ partis, ubi inquit de principio pœnitentiæ. Ibi enim postquam dixit habitum pœnitentiæ immediatè à Deo infundi sine nobis principaliter operantibus, non tamen sine nobis dispositivè cooperantibus per aliquos actus, enumerat deinde actus quibus Deo operanti in pœnitentia cooperamur, aitque in conversione pœnitentis intervenire tum motum fidei, qua remissionem peccatorum in Ecclesia fieri certissimè credit; tum motum timoris servilis, quo quis timore suppliciorum à peccatis retrahitur; deinde motum spei, quo quis sub spe veniæ consequendæ, emendandæ se, & ad meliorem frugem recipiendi propo-

fitum assumit ; postea motum charitatis vel perfectæ , vel certè inchoatæ , quæ propter Deum summè dilectum , vel certè quem ut omnis justitiæ fontem diligere incipit , omnem ejus offensam detestatur ; quòve , inquit , *peccatum displicet secundùm seipsum , & non jam propter supplicia.* Quibus omnibus succedit motus timoris filialis , quo propter reverentiam Dei aliquis emendam Deo voluntarius offert. Ex quibus sic concludit : Sic igitur patet quod *actus pœnitentiæ à timore servili procedit sicut primo motu affectûs ad hoc ordinato ; à timore autem filiali sicut ab immediato & proximo principio.* Ergo virtus pœnitentiæ ex D. Thoma non distinguitur à timore filiali ; cùm exerte doceat timorem filialem nedum imperare pœnitentiæ actus , sed esse eorum *immediatum & proximum principium.* Quia ergo timor filialis est specialis virtus , ut in tractatu de virtutibus , dissert. 3. cap. 2. ostensum est , pœnitentia etiam erit virtus specialis. Et certè hanc sententiam tum exemplum pietatis supra memoratum , tum ratio supra facta , ex eo petita quod ad eandem virtutem pertinet Deum revereri , ejusque jus illæsum servare , & læsum resarcire , validè confirmant. Et certè hoc testimonium D. Thomæ ita luculentum & expressum est , ut mirum sit recentiores Thomistas tam splendentem & oculis se ingerentem locum non advertisse. .

## COROLLARIUM II.

*Subiectum immediatum pœnitentia est voluntas ; remotum est quivis peccati reus , vel capax.*

**S**Equitur secundò, quod licet pœnitentia; prout est passio & dolor sensibilis à merore non disjuncta, sit in appetitu concupiscibili, quod est sedes tristitiæ, vel in irascibili prout vindictam de peccato sumere intendit; ira verò est appetitus vindictæ: tamen pœnitentiæ virtus cum sit justitiæ species, voluntati ut subiecto, sicut ipsa justitiâ inest, ex quo deindè dolor in appetitum, & lacrymæ in oculos derivantur. Hinc Propheta pœnitentiam Psalm. 50. *Sacrificium spiritus contribulati*, idest appetitûs spiritalis, quî voluntas est, appellat; unde & à voluntate proficisci ait Psalm. 53. *Voluntariè*, inquit, *sacrificabo tibi*. In quo sacrificio, ut Cassiodorus ibi observat, spiritus superbiæ confessionis humilitate mactatur; unde non sanguis egreditur, sed lacrymarum fluenta decurrunt, quas Augustinus *sanguinem cordis* nominavit. Hoc lacrymarum rore holocaustum voluntatis pingue sit. *Holocaustum siccum*, inquit Magnus Gregorius homil. 5. in Ezechielem, *est bonum opus, quod orationis lacrymæ non infundunt: pingue est, quando hoc quod benè agitur, corde humili etiam per lacrymas irrigatur*. Hoc lacrymarum sacrificio dirigitur oratio nostra sicut incensum in conspectu Dei, & cælum ipsum lacrymis irrigatur,

rigatur, ut S. Chrysologus serm. 13. expendens illud Magdalene, *lacrymis rigabat pedes ejus*, observat: *En mutatur ordo rerum*, inquit, *pluviam terra cœlum dat semper; ecce nunc rigat terra cœlum, imò super cœlos & usque ad ipsum Dominum imber humanarum profilit lacrymarum: ut juxta Psalmistam & de aquis fletuum cantetur illud, Et aqua quæ super cœlos sunt laudent nomen Domini. O quanta vis in lacrymis peccatorum! Rigant cœlum, terram diluunt, extinguunt gehennam, dolent in omne facinus latam divinâ promulgatione sententiam. Hinc tantam vim lacrymis voluntariè susceptis sancti Patres asserunt, ut iis Deum cogi, invincibilem vinci, omnipotentem ligari, inclinari Dei majestatem, extinguere iram contestentur. Nemo ad Deum aliquando flens accessit, inquit os Chrysostomi aureum, qui non quod postulavit acceperit; nullus ab eo beneficia dolenter optavit, qui non impetravit. Ipse enim est qui consolatur flentes, dolentes curat, pœnitentes informat. Et quanvis in illis nonnihil mœroris & tristitiæ permixtum sit, solent tamen illæ animum pascere, mentem allevare: & sicut post vehementes imbres mundus aër, sudus ac purus efficitur, ita & post lacrymarum pluvias serenitas mentis atque tranquillitas instauratur. Hinc lacrymas fuisse sibi panes die ac nocte Regius Propheta testatur, quia nimirum aquæ illæ in vinum optimum commutantur, dum in fervorem prodeunt charitatis. Quid ergo dulcius pane animarum, cibo mentium, corroboracione sensuum, absolucione criminum, lavacro culparum, in quibus odor vitæ, refectio spiritûs, sa-*

por gratiæ, gustus indulgentiæ, sanitas redeuntis innocentæ, reconciliationis jucunditas; serenatæ conscientæ jure convivium sensibilibus percipiuntur?

Dices? Ibi virtus ponenda est, ubi difficultatem experimur: Sed difficultatem operum pœnitentiæ appetitus sensitivus experitur, utpote in delectabilia à quibus pœnitens abstinere, nimis propensus; in ardua, quæ pœnitens vindicandorum scelerum causa aggreditur, nimis mollis & remissus: Ergo in appetitu sensitivo residet virtus pœnitentiæ.

Respondeo quod cum objectum virtutis pœnitentiæ sit quid spiritale, nimirum jus divinum læsum justitiâ imperfectâ compeniandum, in subjecto spiritali, in quo justitia residet, pœnitentiam subjectari tenendum est. Porro difficultatem appetitus tam in deferendis delectabilibus, quam in tentandis suscipiendisque difficilibus, satis superque evincit virtutum moralium passiones moderantium instructissimum satellitium. Fateor tamen ex virtute pœnitentiæ in voluntate residente redundare in appetitum sacrum illum mœroris motum, & cordis compunctionem salutarem, sicut ex voluntatis plenitudine in passiones effluunt passionum illarum motus, qui voluntatis affectibus consentanei sunt; nam stante spiritu fluunt aquæ compunctionis & devotionis. Fit autem illa inundatio vel motus alicujus impressione, vel certè ex naturali facultatum sympathia & colligatione, qua vires animæ in eadem essentia radicatæ sibi mutua consensione respondent. Et quanvis voluntas non eliciat actus aliarum potentiarum, eos tamen imperat, & saepe ex sui affectus.

affectûs abundantia inundat: unde cor resolutum in lamentis liquefit, tuncque percipitur ille sacer fluminis impetus qui civitatem Dei domum interiorem lætificat. Et quanvis S. Thomas duplicem liberalitatem admittat, unam in voluntate, alteram in appetitu; idem tamen de pœnitentia objici non debet, quia ad appetitum non spectat Deo satisfacere, jusque divinum læsum sarcire; pertinet tamen ad liberalitatem inordinatum pecuniarum amorem à nulla alia virtute frenatum moderari, sicut ipsius est res & pecunias cum lætitia, & facili parataque celeritate erogare; quæ prompti animi exequutio passione appetitûs, cupiditate nimirum temporalium frequenter retardatur.

Secunda pars corollarii, quæ ait, subjectum remotum pœnitentiæ esse quemcunque peccati vel conscium, vel certè capacem, docetur à S. Thoma art. 6. quæst. 85. his verbis: *Aliæ virtutes per se videntur esse necessaria ad bonum hominis: pœnitentia autem supposito quodam, scilicet peccato præexistenti, vel saltem possibili: ergo subjectum incapax peccati, pœnitentiæ virtute nec eget, nec instruitur. Unde infertur in Christo non fuisse habitum pœnitentiæ; non enim datur virtus cujus actus sit impossibilis: Christus autem essentialiter impeccabilis, sicut peccare, ita pœnitere prorsus non potest: ac proinde non per actum pœnitentiæ, sed per actum justitiæ pro peccatis hominum condignè & de toto rigore satisfecit. Infertur etiam pœnitentiam in Angelis esse non posse, quia Angeli immobili & inflexibili libertatis arbitrio post deliberatam electionem gaudent, ut in tractatu de Angelis ostensum est:*

unde

unde pœnitere non possunt, qui priorem voluntatem revocare non possunt. Infertur quoque, pœnitentiæ habitum fuisse Adamo ante peccatum cum gratia & virtutibus infusum. Cùm enim in illo statu Adamus peccati capax esset, ut funestâ experienciâ compertum est; pœnitentiæ etiam habitualis dono perfusus est. Infertur rursus, pœnitentiæ habitum cum cæterorum comitatu parvulis in baptismo infundi, quia ratione libertatis in utramque partem flexibilis, & peccare, & de peccatis dolere possunt. Infertur pariter, manere pœnitentiam in Beatis non solum quoad ornatum, sed etiam quoad actus secundarios, sive gratitudinis pro peccatis condonatis, sive gaudii de satisfactione aliàs Dei honoris reparandi gratiâ exhibitâ & peractâ. Nec est simile de fide, aut spe, quia illam extinguit visio, istam ad nihilum redigit sperati boni æterna possessio.

An autem fuerit in B. Virgine pœnitentia, affirmant multi; quia etsi ex privilegio nunquam ne quidem venialiter peccaverit, potuit tamen ratione statûs viatoris, & conditione libertatis creatæ peccare. Negat Nugno cum aliis, quia non datur virtus ad impossibile, si præsertim ejus actus, sive primarius, sive secundarius nunquam proditurus est. In Beata autem Virgine peccatum erat impossibile, quia fomes peccati ab instanti primæ infusionis gratiæ vel extinctus omninò fuit, vel certè ligatus, & in conceptione tandem Divini Verbi penitus evulsus: unde sicut peccare non potuit, ita nec pœnitere. Et quanvis Beatis insit pœnitentia, quibus tamen repugnat peccatum, non continuo idem de Deipara subinferre licet; quia  
licet

licet peccare non possint, alias tamen in statu iræ peccaverunt; unde potest in illis manere & exerceri actus voluntariæ displicentiæ peccatorum, & gratiarum actionis pro liberatione à peccato, & gaudii pro satisfactione idonea Deo læso persoluta. Sanè cum habitus dentur propter actus aliquos exercendos, quando actus omnis est impossibilis, undecumque impossibilitas illa proficiscatur, habitus etiam vel non est possibilis, vel certè non est consentaneus, sed potiùs inanis & supervacaneus censendus. Huic secundæ sententiæ, nisi meus me fallit animus, probabiliori, & Matrem honorificatam magis decenti libens subscribo. Nec eam aliquo virtutis ornamento spoliamus, cum eo careat Christus citra honoris vel decoris illius immutationem; quia ut benè dixit D. Thomas, pœnitentia non per se, sed supposito peccato appetibilis est, similis medicinæ quæ morbum vel præteritum sanat, vel futurum præcavet. Sicut ergo in Maria nec fuit, nec potuit de potentia ordinaria esse peccatum, ita frustra & otiosè in ea poneretur pœnitentia; quæ, ut aiunt Patres, est medicamentum vulnerum, spes salutis, peccatorum remedium; quâ spiritus contribulatus cruciatur, & caro sacro timore configitur: quâ ligata solvuntur, clausa referantur, contrita sanantur, confusa lucidantur; quâ peccatorum causæ exciduntur, & peccandi suggestionibus aditus præcluditur; quâ à malefactis recedimus, mores in melius commutamus, Deoque satisfacimus per pœnitentiæ dolorem, per humilitatis gemitum, per contriti cordis sacrificium; quâ peccata diluuntur, languores sanantur, leprosi curantur, mortui suscitantur.



fuscitantur , sanitas augetur , gratia reparatur , claudis gressus , aridis copia , cæcis restituitur visus : quâ denique , ut Magnus Gregorius scitè dixit , *anima lacrymis baptizata renovatur.*

### COROLLARIUM III.

*Varii pœnitentia effectus ordine recensentur.*

SEquitur 3. varios esse pœnitentiæ tam virtutis , quàm Sacramenti effectus , ut patebit accuratâ inductione.

*Primus effectus , remissio peccati mortalis.*

Primus pœnitentiæ effectus est remissio peccati mortalis, unde nullum est peccatum lechale tam grave vel immane , nullus tantus peccatorum numerus , qui verâ pœnitentiâ non deleatur. Hanc veritatem docent sacræ litteræ. Ezechiel. 18. *Si impius egerit pœnitentiam ab omnibus peccatis suis , quæ operatus est , & custodierit omnia præcepta mea , & fecerit iudicium & iustitiam , vitâ vivet , & non morietur : omnium iniquitatum ejus , quas operatus est , non recordabor : in iustitia sua quam operatus est , vivet. Nunquid voluntatis mea est mors impii , dicit Dominus Deus , & non ut convertatur à viis suis & vivat ? Et infrâ: Convertimini & agite pœnitentiam ab omnibus iniquitatibus vestris , & non erit vobis in*  
*ruinam*

manæ immensum præstat : adeo ut, sicut exponit Hieronymus, si nos egerimus pœnitentiam super peccatis, ipsum quoque comminationis pœniteat, & mala quæ comminatus est, non inferat, nostræque mutatione sententiæ ipse mutetur. Denique Zachariæ 1. *Hac dicit Dominus exercituum : Convertimini ad me, & ego convertar ad vos. :: Revertar ad Jerusalem in misericordiis.*

Astipulantur SS. Patres : Cyprianus lib. ad Demetrianum : *Quando istinc excessum fuerit, nullus jam pœnitentia locus ; in isto adhuc mundo manenti pœnitentia nulla sera est, patet ad indulgentiam Dei aditus.* Chrysostomus epistol. 5. *Tanta est Dei benignitas & erga nos amor ; nunquam avertatur pœnitentiam sincerè factam : si quis ad malitia fines olim penetrarit, illinc eum ad virtutis viam reducere conatur, & recipit redeuntem.* Denique pleni sunt hac veritate omnes Patrum libri, eorum præcipuè qui adversus crudele Novatianorum dogma pugnarunt. Unde Concilium Lateranense cap. *Firmiter*, sic definit : *Si post susceptionem baptismi quisquam prolapsus fuerit in peccatum, per veram pœnitentiam semper reparari potest.*

Ratio verò sequitur ex dictis : Sacramenta enim id efficiunt quod significant. Cum ergo Sacramentum pœnitentiæ significet peccata saltem mortalia remitti, ut patet ex verbis formæ, *Ego te absolvo*, manifestum est per pœnitentiam peccata lethalia remitti : alioquin sine causa dixisset Christus Joan. 20. *Quorum remiseritis peccata, remittuntur eis.* Unde Tridentinum sess. 14. cap. 1. & can. 1. & 3. definit

Sacra :

Sacramentum pœnitentiæ esse ad remittenda peccata post baptismum commissâ institutum. Et Catechismus Romanus part. 2. num. 23. optimè dixit, nullum esse tam grave & nefarium scelus, quod pœnitentiæ Sacramento non quidem semel, sed iterum, & sæpius non deleatur. Unde S. Joannes cap. 1. suæ primæ epistolæ: *Si confiteamur, inquit, peccata nostra, fidelis est, & justus, ut remittat nobis peccata nostra.* Et paulò post: *Si quis peccaverit, inquit, advocatum habemus apud Patrem Jesum Christum justum, & ipse est propitiatio pro peccatis nostris; non pro nostris autem tantum, sed etiam pro totius mundi.* Hinc etiam num. 42. rectè observat, quod licèt, pleraque alia pietatis studia, veluti beneficentia in pauperes, jejunia, orationes, & alia id genus sancta & honesta opera, hominum culpâ, à quibus profiscuntur, à Deo interdum repudientur; ipsa tamen contritio nunquam illi grata & accepta esse non potest, juxta illud Prophetæ Psal. 50. *Cor contritum & humiliatum Deus non despicies.* Quin etiam statim ut eam mentibus nostris concepimus, peccatorum remissionem nobis à Deo tribui declarat idem Psalmographus Psal. 31. *Dixi confitebor adversum me iniquitatem meam Domino, & tu remisisti impietatem peccati mei.* Unde patet veræ pœnitentiæ eam vim esse, ut illius beneficio omnium delictorum veniam statim à Domino impetremus.

Id ipsum optimè confirmat ratio S. Thomæ 3. p. quæst. 86. art. 1. ex libertate humani arbitrii & divinæ gratiæ efficacitate petita. Si enim peccatum pœnitentiâ deleri non posset, ideo

ideo esset, quia vel homo de peccato pœnitere nequiret, vel quia Deus hominis pœnitentis peccatum delere non vellet: utrumque autem est erroneum; primum quidem, tum quia libertatem voluntatis enecat, tum quia gratiæ divinæ per se efficacem virtutem eliminat, per quam moveri potest cor cujuscumque peccatoris ad pœnitendum, juxta illud Proverb. 21. *Cor Regis in manu Domini, quôcumque voluerit vertet illud.* Secundum etiam divinæ misericordiæ injurium est. *Vinceretur enim quodammodo Deus ab homine*, inquit D. Thomas, *si homo peccatum vellet deleri, quod Deus delere non vellet.*

Argumenta Novatianorum divinæ clementiæ hostium suprâ diluimus: supersunt quædam Scripturarum & Patrum sententiæ, quibus videntur affirmare aliqua peccata remitti non posse, nec eorum veniam peccantes impetrare ullatenus potuisse; nam de Esau ait Apostolus Hebr. 12. *quod non invenit pœnitentiæ locum, quanquam cum lacrymis inquisisset eam.* Et de Antiocho 2. Machabæor. 9. dicitur: *Gravæ sceleris Deum, à quo non erat misericordiam consequuturus.* De peccato etiam in Spiritum sanctum dicitur Matth. 12. *Qui dixerit contra Spiritum sanctum verbum, non remittetur ei, neque in hoc seculo, neque in futuro.* Et clariùs Marci 3. *Omnia dimittentur filiis hominum peccata, & blasphemia, quibus blasphemaverint. Qui autem blasphemaverit in Spiritum sanctum, non habebit remissionem in æternum, sed reus erit æterni delicti.* Idem docet Augustinus lib. 3. de serm. Domini in mont. cap. 22. de peccato illo quo quis post acceptam

ptam agnitionem Dei oppugnat fraternitatem, & adversus ipsam gratiam invidiæ facibus agitur.

Verùm hæc omnia ita cum Ecclesia Catholica interpretari oportet, ut difficilem admodum esse hujusmodi peccatorum veniam intelligamus; quia sicut quidam sunt morbi quibus non solum gravatur infirmus, sed etiam quibus affectus ægrotus salutaris medicinæ vim oderit: sic quoddam est peccati genus, quod non solum gratiæ adversatur (id enim omni sceleri lethifero commune est) sed etiam gratiam ipsam repellit & odio habet, rebelle lumini, scientiam viarum Dei nolens, & gratiam veluti importunam & infensam cupiditatibus, quas adorat, detestans. Veruntamen quia misericordiæ divinæ nec modus est ullus, nec numerus, possunt illa quâmlibet immania scelera, accedente sincericordis pœnitentiâ remitti omnipotentissimâ gratiæ potestate, quæ etiam interdum *in profundum maris convertit*, ut dicitur Psal. 76. ubi Augustinus: *Convertit eos qui in profundo hujus sæculi jacent demersi pondere peccatorum. Intelligitur hoc dixisse Dominum nostrum, quod sua misericordia converteretur etiam in profundum maris, ad eos liberandos qui sunt desperatissimi peccatores.* Nihil autem mirum, si Esaii vel Antiochus peccatorum veniam non impetrarint, quia vera utrique defuit pœnitentia; Esaii quidem, ut patet ex hoc quod dixit Genes. 27. *Venient dies luctus patris mei, & occidam Jacob fratrem meum.* Unde internam peccati voluntatem nefarius retinebat. Antiochus verò, quia ut ait D. Thomas ad 1. *Dolebat de culpa præterita, non propter offensam*

*offensam Dei, sed propter infirmitatem corporalem quam patiebatur. Unde non erat in illo nisi simulachrum & larva pœnitentiæ, quam sanè, vereor equidem, ne Christianorum perpetuò relabentium Paschalis pœnitentiæ, vel in horam mortis dilata imitetur. Et idem dicendum est de peccato in Spiritum sanctum, quod utique nunquam remittitur, si de finali impœnitentiâ intelligatur, cum post hujus vitæ finem nulla contingat remissio peccatorum. Vel si intelligatur de peccato malitiæ, vel de blasphemia in ipsam Sancti Spiritûs personam prolata, significare Salvator voluit, non nisi difficillimè peccatum illud condonari; tum quia excusatione caret malitia, proditque velut ex adipe iniquitas transiens in affectum cordis; tum quia peccatum illud gratiam & pietatem, totiusque gratiæ & pietatis fontem Spiritum sanctum fastidit, floccifacit, & temerario ausu repellit: ægrè autem sanari potest ille morbus & fermè desperatus censendus est, quo ægrotus medicinam odit, & medicum ipsum execratur.*

Porro usqueadeo verum existimat S. Thomas pœnitentiâ verâ, adjuncto præsertim Sacramento, omnia deleri peccata lethifera, ut articulo 3. quæst. 86. concludat, fieri ullâ potentiâ non posse, ut per virtutem pœnitentiæ unum peccatum sine alio remittatur. Quod breviter contra Scotum & Suarem existimantes Deum per extrinsecam condonationem posse unum sine alio peccato remittere, demonstratur. Impossibile est peccatum, quod est privatio gratiæ, sine ejusdem gratiæ infusione deleri; sicut impossibile est aërem tenebrosum sine

perfusionem illuminari. Atqui gratia sanctificans nullum peccatum mortale compatitur, nec cum illo sociari unquam potest, ut in tractatu de gratia fusè ostensum est: quia per gratiam sanctificantem fit homo sanctus, mundus, Deo acceptus; quæ omnia ne vel unum peccatum mortale compatitur, cum repugnet eundem hominem esse simul amicum & hostem Dei. Igitur per pœnitentiam non potest unum mortale sine alio remitti.

Id confirmat S. Thomas, quia peccatum mortale non potest sine vera pœnitentia remitti, *ad quam pertinet deferere peccatum, in quantum est contra Deum; quod quidem est commune omnibus mortalibus: ubi autem est eadem ratio, est & idem effectus. Unde non potest esse verè pœnitens, qui de uno peccato pœnitet, & non de alio: si enim ei displiceret illud peccatum, quia est contra Deum super omnia dilectum (quod requiritur ad rationem vera pœnitentia) sequeretur quod de omnibus peccatis pœniteret. Unde sequitur quod impossibile sit unum peccatum per pœnitentiam remitti sine alio.* Denique id esse contra perfectionem misericordiæ Dei, ait Angelicus Doctor; cùm enim ejus perfecta sint opera, cujus miseretur, totaliter miseretur. Unde author libri de vera & falsa pœnitentia, c. 9. *Quadam impietas infidelitatis est, ab illo qui justus & justitia est dimidiam sperare veniam.* Quin in humanis ridiculum videtur, verba sunt D. Thomæ ad 4. quod etiam ab homine aliquis veniam peteret de una offensa, & non de alia. Potest quidem homo, qui plura peccata committere consuevit, cessare ab uno, & in alio patrando perdurare,

perdurare; sed culpa & macula relicta deleri nequit, nisi omnis prorsus abstergetur. Nec obest quod peccata non sint connexa, quia ut optimè ait S. Thomas ad 3. peccata quanvis non sint connexa quantum ad conversionem ab bonum commutabile, sunt tamen connexa quantum ad aversionem à bono incommutabili, in qua conveniunt omnia peccata mortalia: & ex hac parte habent rationem offensæ, quæ gratia sanctificante remittitur, & verâ pœnitentiâ deletur. Unde is cui peccatum in justificatione remittitur, est in Christo Jesu: nihil autem, teste Apostolo Rom. 8. *damnationis est iis, qui sunt in Christo Jesu; & in renatis nihil odit Deus*, ut ait Tridentinum sess. 5. can. 5. quod ad justificados Sacramento pœnitentiæ reconciliatos extendendum est.

*Secundus pœnitentiæ effectus: Remissio  
pœnæ æternæ, ac etiam temporalis  
pro ratione pœnitentiæ.*

Secundus pœnitentiæ effectus est remissio reatûs pœnæ æternæ, atque etiam temporalis pro ratione pœnitentiæ susceptæ. Remissio quidem pœnæ æternæ, reatus enim pœnæ æternæ consequitur peccatum inquantum est aversio à bono incommutabili; justum quippe est, ut qui contra æternum bonum peccavit, æternum puniatur: atqui per gratiam tollitur hujusmodi aversio, quæ est de essentia peccati, & se habet sicut formale in illa, ut docet D. Thomas, & nos in tractatu de actibus moralibus ostendimus, ubi malitiam moralem in privatione



esse sitam cum S. Præceptore monstravimus. Ergo per gratiam pœnitenti collatam pœna æterna tota remittitur.

Et obiter observari velim verba D. Thomæ art. 4. ad 2. ubi sic habet : *Culpa mortalis utrumque habet , & aversionem à Deo , & conversionem ad bonum creatum : sed sicut in 2. parte habitum est , aversio à Deo est ibi sicut formale ; conversio autem ad bonum creatum est ibi sicut materiale : remoto autem formali cujuscunque rei tollitur species , sicut remoto rationali tollitur species humana. Et ideo ex hoc ipso dicitur culpa mortalis remitti , quod per gratiam tollitur aversio mentis à Deo simul cum reatu pœna æterna.* Quibus in verbis non solum habes rationem , cur remissâ homini culpâ , pœna quoque æterna remittatur : sed etiam quàm sibi constans sit S. Doctor in illa assertionem , quâ ubique docet malum morale in aliquo privativo essentialiter esse situm. Et quanvis impræsentiarum loquatur de peccato habituali , idem tamen manifestè censet de peccato actuali , cum ex his quæ de peccato actuali in secunda parte , id est 1. 2. quæst. 71. art. 6. dixit , infert hîc quid de culpa habituali dicendum sit. Unde quod in illa quæstione 71. quod pertinet ad substantiam actûs humani *quasi materiale* , illud verò quod ad rationem mali pertinet *quasi formale* appellavit , non officit , quia illud *quasi* diminutive accipiendum non est , ut accipiunt positivæ malitiæ assertores : nam illud subterfugium vel offendiculum sui interpretes removeret S. Præceptor in præsentem , declarans eodem sensu se ibi dixisse *quasi* , quo hîc dicit *sicut*. Utrumque verò ideo dixit S. Doctor ( ut benè notat

notat P. Nicolai positivæ deformitatis acerri-  
mus passim impugnator, quam etiam absur-  
dum & indignum figmentum appellat, à non-  
nullis velut ipsa D. Thomæ doctrina vendita-  
tum, cui tam evidenter adversatur tamen: )  
ideo, Inquam, dixit S. Doctor, quia in mora-  
libus non potest esse verum materiale, nec ve-  
rum formale, sicut est in physicis. Maximè  
quia si præter illud *quasi formale*, agnovit D.  
Thomas aliam positivam iniquitatem, quæ sit  
verè, & si dicere licet, *formaliter formale*, ali-  
cubi, vel aliquando rerum Doctor accuratissi-  
mus quæstionem illam millies versans illud  
verum formale expressisset, & proprio nomi-  
ne designasset: at illud hætenus invenire  
adversarii non potuerunt. Sed de his satis  
alibi.

Secunda pars corollarii, affirmans per pœ-  
nitentiam remitti etiam pœnam temporalem  
pro ratione & fervore pœnitentis, supponit  
pœnæ temporariæ reatum etiam remissâ pœnâ  
æternâ remanere posse, & sæpe, imò ordinariè  
solere: quia ut rectè argumentatur S. Doctor,  
in peccato præter aversionem à bono incom-  
mutabile est etiam conversio ad bonum com-  
mutabile, cui pœna debetur; justum est enim,  
ut qui voluntati suæ plus indulsit quàm debuit,  
contra voluntatem suam aliquid patiatur. Un-  
de Apocalypsis 18. dicitur: *Quantum glorifi-  
cavit se, & in deliciis fuit, tantum date illi  
tormentorum & luctuum.* Quia tamen conver-  
sio illa ad bonum commutabile finita est, non  
habet ex hac parte peccatum cui debeatur  
pœna æterna, sed tantum temporalis. Hoc  
supposito facilè probatur secunda hujus conse-

Etarii pars : Sacramentum pœnitentiæ , quan-  
 vis remittat peccata virtute passionis Christi,  
 non tamen ea delet nisi secundum modum pro-  
 priorum actuum , qui sunt hujus Sacramenti  
 materia ; & ideo non statim post primum  
 actum pœnitentiæ, quo remittitur culpa, solvi-  
 tur reatus totius pœnæ, sed completis omnibus  
 pœnitentiæ actibus, id est non tantum con-  
 tritione , vel etiam confessione, sed etiam sa-  
 tisfactione actuali, sive in hoc sæculo, sive in  
 purgatorio exsolvenda. In quo à Sacramento  
 baptismi differt pœnitentia ; in illo enim, ut ait  
 S. Thomas ad 3. homo participat totaliter vir-  
 tutem passionis Christi, utpote per aquam &  
 spiritum commortuus peccato, & in eo regene-  
 ratus ad novam vitam ; & ideo in baptismo  
 homo consequitur remissionem reatûs totius  
 pœnæ : at verò in Sacramento pœnitentiæ  
 passio Christi non nisi mediis pœnitentis  
 actibus applicatur. Quanvis autem passio Chri-  
 sti suo pretio sit reconciliandis omnibus ho-  
 minibus totique pœnæ statim remittendæ suf-  
 ficientissima, suum tamen non sortitur effe-  
 ctum, nisi in illis quibus applicatur, & pro mo-  
 do applicationis pœnitentium. Nec est con-  
 tra legem amicitiae, si ab amicis suis, condo-  
 natâ ipsis pœnâ æternâ, satisfactionem tempo-  
 rariam exigit supremus Judex & publicus Le-  
 gislator, ut publicæ juris læsi justitiæ fiat satis.  
 Unde Machabæorum lib. 2. c. 12. pro illis etiam  
 qui cum pietate dormierunt, & optimam ha-  
 buerunt repositam gratiam, sacrificium ad eo-  
 rum reatum expiandum offertur ; & pro eis  
 exorare ut à peccatis solvantur, id est à pœna  
 quæ temporaliter luenda remanet, liberentur,

sancta

sancta & salubris cogitatio nominatur. Hinc Tridentinum sacrum Concilium sess. 14. cap. 8. sic habet : *Sancta Synodus declarat falsum omnino esse & à verbo Dei alienum , culpam à Domino nunquam remitti , quin universa etiam pœna condonetur. Perspicua enim & illustra in sacris litteris exempla reperiuntur , quibus præter divinam traditionem hic error quàm manifestissimè revincitur.* Sed de his satis egimus supra tum cùm de satisfactione sermonem habuimus. Ergo quo satisfactio fuerit perfectior , & pœnitentia major , eo minuetur reatus , seu luendarum pœnarum temporalium peccato debitarum obligatio : unde si ea satisfactio imponatur , vel sponte suscipiatur , quæ gravitati criminum respondeat , ac prout oportet impleatur , tolli per eam poterit pœnæ omnis temporalis reatus.

Idem dicendum est de reliquiis peccatorum , pravis nimirum dispositionibus ex præcedentibus peccatorum actibus relictis , eas nimirum pro ratione fervoris pœnitentis evelli. Ad cuius evidentiam sciendum , vires animæ eò fieri debiliores & in peccatum propensiores , quo plus , vel diutiùs , vel frequentius homo peccavit ; unde & in intellectu cæcitas , & in voluntate infirmitas , quibus animi ad bonum operandum robur magis magisque frangitur , consequuntur : pravas has ex peccato ortas , & in peccatum inclinantes reliquias non solet statim à principio pœnitentia curare , vel penitus extirpare , quia ut benè dixit Origenes hom. 8. in Levit. *Intuere quomodo anima , quæ peccati vulnus accepit , etsi curetur , tamen habet peccati cicatricem in loco vulneris residentem.* Ni-

hilominus tamen cū pœnitens vehementissīma animi contentione, singulari studio, & inu-  
 sitatō sacri caloris æstu, atque Spiritūs Sancti  
 fervore concepto sit, ut ait alicubi in officio  
 Ecclesia, in fide stabilis, in opere efficax, tunc  
 vel omnes, vel certē plures peccatorum reliquiæ  
 persanantur. Nam sicut socrui Petri statim per-  
 fecta sanitas restituta est, ita ut surgens mini-  
 straret illis, ut dicitur Luc. 4. ita etiam quan-  
 doque tanta commotione convertitur cor pœ-  
 nitentis, ut subitō perfectam consequatur sani-  
 tatem spiritualem, non solū remissā culpā,  
 sed etiam sublatis omnibus peccati reliquiis, ut  
 patet, inquit D. Thomas, de Magdalena Luc. 7.  
 Non quòd inde colligatur evidenter, sed at-  
 tentis Magdalena doloribus, fletibus, atque  
 modo pœnitendi toto vitæ decursu retento, id  
 omninò consentaneum videtur. Et quanvis  
 Lucas pœnitentem illam, non Magdalenam,  
 sed mulierem, quæ erat in civitate peccatrix,  
 appellet, eam tamen fuisse Magdalenam con-  
 stantissimū est, & benè ostendit P. Nicolai  
 ad art. 5. Nam Maria illa quæ dicitur Lazari  
 soror, quasi speciali quadam nota significatur,  
 quod unguento Dominum unxit, Joan. 11. *Ma-  
 ria autem erat, qua unxit Dominum unguen-  
 to, & extersit pedes ejus capillis suis.* In Græ-  
 co autem habetur, quæ unxerat & exterserat;  
 ut indigitaret Evangelista se non loqui de un-  
 ctione futura, quam deinde cap. 12. recenset,  
 sed de præterita, de qua Luc. 7. mentio fit. Hinc  
 B. Gregorius hom. 33. in Evangelia: *Hanc ve-  
 rò, inquit, quam Lucas peccatricem, Ioannes  
 Mariam nominat, illam esse Mariam credimus,  
 de qua Marcus septem demonia ejecta fuisse  
 testatur.*

testatur. Illam autem à septem Dæmonibus liberatam, esse Magdalenam peccatricem ostendit S. Doctor subjungens : *Et quid per septem demonia, nisi universa vitia designantur? Quia enim septem diebus omne tempus comprehenditur, rectè septenario numero universitas figuratur. Septem ergo demonia Maria habuit, quæ universis vitiis plena fuit. Nec mirum, nomen Magdalene à Luca premi, quia ut optimè ex Beda notat D. Thomas, in catena aurea: Pulchrè Evangelista, ubi eam cum Domino iter facere commemorat, noto hanc vocabulo manifestat; ubi verò peccatricem, sed pœnitentem describit, mulierem generaliter dicit, ne nomen tanta fama prius erroris nota fuscaret. Gloriosum ergo Mariæ Magdalene nomen tunc solum debuit exprimi, quando potuit in ejus gloriam redundare.*

Dices : S. Thomas ad probandum remissis culpâ & æternæ pœnæ reatu remanere reatum pœnæ temporalis, atque etiam peccati reliquias, fundamento innititur quod infirmum vel caducum videtur, dum ait remissâ culpâ, remanere tamen illud quod est materiale, scilicet inordinatam conversionem ad bonum creatum, pro qua debetur reatus pœnæ temporalis. Quod art. 4. in corpore, & ad 1. & art. 5. inculcat. Id autem videtur difficile, tum quia per pœnitentiam & gratiam justificantem tollitur omne id quod habet rationem peccati, sive aversio à Deo sit, sive ad creaturam conversio. Tum quia pœna satisfactoria & temporalis non solum debetur peccato ratione conversionis ad bonum, sed potissimè ratione aversionis à Deo: cujus signum est, quod longè gravior pœna

peccati mortalis consciis quàm solâ in venialia prolapsis, non tantùm in futuri peccati remedium, sed etiam in injuriæ Deo illatæ compensationem injungitur. Tum quia conversio illa inordinata in uno duntaxat peccato actuali amplectente stercora, & in objectum dissonum regulis morum tendente invenitur, non autem in peccato habituali, quod transacto actu manet, cùm non semper habitus per actum producat. Ergo nutat doctrinæ hætenus traditæ fundamentum.

Respondeo variè à variis S. Thomæ Interpretibus verba illa per se satis nitida & aperta obscurari magis quàm illustrari. In primis aliqui, quos sequitur Baptista Gonet, dicunt S. Thomam loqui per quandam analogiam & accommodationem; nam quia conversio est quædam inordinata adhesio voluntatis plus æquo temporalibus addictæ, ideo illi attribuitur pœna sensûs mediis creaturis inflicta; aversioni verò respondere dicitur pœna damni, quâ homo divino bono æternum privatur, à quo sponte recessit; revera tamen utrique illi malitiæ in peccato repertæ utraque pœna respondet, licet una uni, alteri altera per appropriationem assignetur. Verùm hæc responsio difficultati succumbit, dùm S. Thomam accuratè semper & formaliter loquentem ad sensus metaphoricos & analogicos sine necessitate detorquet. Alii, quibus idem Gonet astipulatur, per conversionem illam intelligunt delectationem, quam quis ex objecto illicito sibi nimium indulgens percipit. Sed hæc expositio videtur à sensu D. Thomæ aliena; tum quia delectatio illa non nisi in actu peccati percipitur, qui trans-

actus

actus est & præterit; cum quia in pœnitente, in quo tamen remanere conversionem illam ait S. Thomas, delectatio illa non permanet, sed potius ob illam dolor contritione sentitur.

Alii cum Sylvio intelligunt, conversionem inordinatam manere quoad aliquem effectum, qui est inter Deum & hominem inæqualitas tandiu manens, donec fuerit justâ pœnæ temporalis solutione satisfactum; rectus namque ordo postulat, ut per satisfactionem ea inæqualitas ab homine pro virili parte compensetur. Unde inferunt pœnam gehennæ, cui homo peccato mortali obnoxius fit, complecti pœnam damni, pœnam sensûs, & æternitatem utriusque: pœna damni aversioni, pœna sensus conversioni, æternitas utriusque pœnæ injuriæ & inimicitiae adversus Deum respondet: primum & tertium verâ pœnitentiâ tolluntur, sed secundum justo Dei judicio permanet; non enim divina justitia pari cum Christianis lapsis atque cum recens baptizatis liberalitate, sed paulò strictiore agendum censuit, statuens ut non nisi adjunctâ satisfactione pœna tota remittatur. Nam & justitiæ divinæ ratio exigere videtur, inquit Tridentinum sess. 14. cap. 8. *ut aliter ab eo in gratiam recipiantur, qui ante baptismum per ignorantiam deliquerint; aliter vero qui semel à peccati & dæmonis servitute liberati, & accepto Spiritûs sancti dono, scientes templum Dei violare, & Spiritum sanctum contristare non formidaverint.* Unde eandem plenariam indulgentiam non consequitur pœnitens, quam consequutus fuerat in baptisinate, de quo ait S. Chrysostomus



hom. 24. in Joan. quod in aqua baptismi tanquam in sepulchro caput immergentibus vetus homo sepelitur, emergentibus inde novus resurgit. Verùm hæc doctrina, licet multa commoda & vera contineat, difficultatis tamen punctum fugere videtur: nam illa inæqualitas, quam dimissâ culpâ remanere ait, non minùs conversionem quàm aversionem consequitur; unde pœnæ satisfactoriæ pro utraque sustinentur, imò pro injuria Deo aversione illa intentatâ pœna potissimum imponitur.

Vera ergo, & plana D. Thomæ intelligentia ex ipso Sancto Doctore eruenda est: Mentem autem suam dilucidè aperit S. Præceptor art. si his verbis: *Dicendum quod peccatum mortale ex parte conversionis inordinata ad bonum commutabile quandam dispositionem causat in anima, vel etiam habitum, si actus frequenter iteretur.* Ad quorum evidentiam sciendum, actus sive virtutum, sive vitiorum, vel procedere ab habitu, vel habitum aut certè dispositionem in principio generare; cùm enim actus tendat in objectum, sitque actualis illius prosequutio, subjectum in quo est ad tale objectum inclinatur, vel impressione habitûs cùm est vehemens, vel frequenter iteratus; vel saltem institutione dispositionis, quando actus non est ita plenus & efficax, uti non solet esse in principio: igitur ex actu peccati, quo homo in bonum commutabile conversus est, si habitus pravus, certè inordinatio perversa inferitur, quâ voluntas in malum & aliàs dilectum objectum veluti pondere fertur. Et hanc conversionem vel in habitum, vel in dispositione sitam appellat S. Doctor *reliquias iniquitatis*, quia à peccato relicta est,

est, & in peccatum à quo manavit, sponte sua proclivis est. Illi ergo conversioni responderet poena sensûs, non quòd illa mala & peccatum sit in justificato, sed quia ratione peccati actualis unde profecta est, justa ei debetur afflictio; æquum est enim ut qui voluntati suæ plus indulsit quàm debet, unde & voluntatem suam ad bona sensibilia nimium deflexit, contra voluntatem suam aliquid patiatur, quo ut ait Tridentinum sessione citata, medeatur peccatorum reliquiis, & vitiosos habitus pravaque dispositiones, quas malè vivendo comparavit, contrariis actibus tollat. Conversio ergo in bonum commutabile, D. ipso Thoma interprete, nihil aliud est, quàm remanentes dispositiones ex præcedentibus actibus causatæ, quibus ratione actus quem connotant, debetur poena temporalis. Quæ quidem dispositiones in justificatione non statim à principio funditus, sed sensim & pedetentim evelluntur: unde ut alibi dixit D. Thomas, sunt *in via corruptionis*; & hîc remanere eas ait *debilitatas & diminutas*, ita quod homini non domineantur, sicut etiam remanet fomes post baptismum.

*Tertius pœnitentia effectus, Remissio peccatorum venialium.*

Tertius pœnitentiæ effectus est remissio peccatorum venialium. Ratio sequitur ex dictis: nam per pœnitentiam homo convertitur ad Deum, vel imperfectè cum eum diligere incipit, vel perfectè, cum illum ex toto corde unâ  
Dei

Dei bonitate inescatus amat : sed tunc remittitur peccatum veniale ; ( cū enim per peccatum veniale retardetur affectus hominis , ne promptè feratur in Deum , ubi primū voluntas Spiritūs sancti fervore concepto sincera conversione ab amore indivulsa in Deum fertur , corrigitur & remittitur inordinatio illa ē peccatis venialibus orta. Ergo per pœnitentiam remittuntur peccata venialia. Accedit , quod per veram pœnitentiam gratia infunditur : in habentibus autem usum liberi arbitrii , in quibus solis possunt esse venialia peccata , non contingit esse infusionem gratiæ sine actuali motu liberi arbitrii in Deum & in peccatum , quo sacro motu peccata venialia remitti necesse est , cū eo expellatur & veluti excutiat animi creaturis plus æquo , etsi non contra Deum adhærentis torpor , rumpanturque funiculi affectionum , quæ sunt veluti vulpeculæ demolientes perfectionis spiritalis vineam. Ergo per pœnitentiam remittuntur peccatorum venialium maculæ. Quod ita eruditè de more explicat S. Thomas 3. p. quæst. 87. art. 2. ad 3. *Dicendum quod sicut in corpore contingit esse maculam dupliciter , uno modo per privationem ejus quod requiritur ad decorem , putà debiti caloris , aut debita proportionis membrorum ; alio modo per superinductionem alicujus impediens decorem , putà luti , aut pulveris : Ita etiam anima inducitur macula ; uno modo per privationem decoris gratia per peccatum mortale ; alio modo per inclinationem affectus inordinatam ad aliquid temporale ; & hoc fit per peccatum veniale. Et ideo ad tollendam maculam peccati mortalis requiritur infusio gratiæ :*

*sed ad tollendam maculam venialis peccati requiritur aliquis actus precedens ex gratia, per quam removetur inordinata adhesio ad rem temporalem.*

Observat etiam idem S. Doctor art. 1. in corpore, & ad 1. illud discriminis mortale inter & veniale interesse, quod ad remissionem peccati mortalis requiritur perfectior pœnitentia; ut scilicet homo actualiter detestetur peccatum mortale quantum in ipso est, diligentiam adhibendo ad memorandum singula peccata mortalia, ut singula detestetur. Sed hoc non requiritur ad peccatorum venialium remissionem, sed requiritur & sufficit quædam virtualis displicentia, putà cum aliquis hoc modo fertur secundum affectum in Deum & res divinas, ut quidquid sibi occurreret quod eum ab hoc affectu retardaret, displiceret ei, & doleret se hoc commisisse, etiamsi actu de illo non cogitet. Quod tamen non sufficit ad remissionem peccati mortalis, nisi quantum ad peccata oblita post diligentem inquisitionem. Unde infert ad primum, quod quia potest iustus vitare singula peccata venialia, sed non omnia, ad pœnitentiam peccatorum venialium requiritur quod homo proponat abstinere à singulis, non tamen ab omnibus, quia hoc infirmitas humana non patitur. *Debet tamen (verba sunt S. Doctoris quæ à viris spiritualibus obaserventur dignissima) habere propositum se preparandi ad peccata venialia minuenda; alioquin esset ei periculum deficiendi, cum desereret appetitum proficiendi, seu tollendi impedimenta spiritualis profectus, quæ sunt peccata venialia.*

Patet igitur ex Angelico Doctore, ad remissionem peccatorum venialium sufficere pœnitentiæ vel actualis, vel virtualis motum, & illum etiam omninò requiri. Sufficit quidem; quia per actualem vel virtualem pœnitentiam homo coniungitur Deo: inordinatio autem voluntatis, vel potius impedimentum prompti & expediti in Deum motûs per veniale peccatum positum, actuali ordinatione, seu contrariò animi in Deum contendentis impetu tollitur, animique flexus in terram incurvatus ad Deum sacrâ contentione recurrit, & veluti retrograditur. Quod verò huiusmodi actus requiratur, ex eo patet, quod ad remissionem venialis tolli debet macula ex inordinati animi plus nimio creaturarum diverticulis distenti conversione proficiscens: tandiu autem manet illa macula, quandiu remotâ illâ captus animus in via salutis suspensus hæret & subsidet. Quod explicat S. Thomas quæst. 7. de malo, art. 2. ex eo quod mortale & veniale finis consequutionem impediunt; mortale quidem per destructionem ponderis quo homo fertur in Deum, iacturam nimirum charitatis; veniale verò per positionem obicis impediens quominus pondus illud concitato cursu feratur in Deum: sicut igitur primum lapidis impedimentum non nisi novâ gravitatis productione tolleretur; nec secundum, nisi vehementi impetu medium interpositum expellente, removeretur: ita nec mortale nisi novæ charitatis infusione, nec veniale nisi fervido pœnitentiæ actualis vel virtualis motu remittitur. Quorum omnium radix est, quia non tollitur privatio nisi accessu formæ quâ privat: peccatum autem veniale in ratione maculæ.

maculae nihil est aliud quam privatio fervoris charitatis & virtutum; in ratione verò offensæ est divini domini ad omnia Justi opera actu non se extendentis contractio & coarctatio: ergo sine fervore charitatis vel aliarum virtutum à charitate imperatarum moras illas rumpente non deletur. Unde ad remissionem venialium sacros illos motus exigit Bernardus serm. 40. in Cantica, his verbis: *Intendere in aliud quam in Deum; non Maria otium, sed Martha negotium est. Absit autem ut qua hujusmodi est, quidquam illam dixerim habere deforme, nec tamen ad perfectum affirmaverim pervenisse decoris: quippe qua adhuc sollicita est, & turbatur erga plurima, & non potest terrenorum actuum vel tenui pulvere non respergi; quem tamen citò facileque deterges vel in hora sancta dormitionis casta intentio, & bona conscientia interrogatio in Deum. Idem docet Augustinus libro 50. homiliarum, hom. 50. dicens: Quavis singula non lethali vulnere ferire sentiantur, tamen omnia simul congregata velut scabies nostrum decus ita exterminant, ut ab illius sponsi speciosi pra filiis hominum castissimis amplexibus separent, nisi medicamento quotidiana pœnitentia desecentur. Quod si falsum est, unde quotidie tundimus pectora? quod nos quoque Antislites ad altare assistentes cum omnibus facimus. Unde etiam orantes dicimus, Dimitte nobis debita nostra? Non enim ea dimitti precamur qua in baptismo dimissa sunt; & nisi dimissa credimus, de ipsa fide dubitamus: sed utique de quotidianis peccatis hoc dicimus, pro quibus etiam sacrificia eleemosynarum, jejuniorum,*

*Et ipsarum orationum, ac supplicationum quisque pro suis viribus offerre non cessat.*

Ex quibus inferes, tria ad remissionem peccatorum venialium omninò requiri. Primum est status gratiæ, sine qua nullum opus quàmlibet ex objecto insigne, Deo acceptum esse potest, nec proinde meritorium vel satisfactorium: nam *donum iniquorum non probat Altissimus*, ut dicitur Ecclesiastici 4. Secundum est auxilium divinæ gratiæ. Nam ut ait S. Thomas art. 4. ad 2. *Licet ad remissionem peccati venialis non requiratur nova infusio habitualis gratia, requiritur tamen aliquis gratia actus.* Unde improbatur opinio Scoti existimantis ad remissionem venialium sufficere actum virtutis naturalis. Cum enim peccato veniali retardetur motus ad Deum ut authorem supernaturalem, ad quem in hoc statu profecti sumus, non potest hæc mora nisi motibus in Deum supernaturalem, id est fide supernaturali cognitum & dilectione supernaturali diligendum rumpi: motus porro supernaturales sine gratiæ supernaturalis adjutorio non posse ab infirmo voluntatis arbitrio prodire manifestissimum est. Unde Concilium Arausicanum can. 7. & 14. definit: *Nos sine gratia Christi nihil vera sanctæque pietatis habere, cogitare, dicere, agere posse. Nullus miser de quantacumque miseria liberatur, nisi qui Dei misericordiam praveniatur.* Tercium est motus virtutis supernaturalis virtualement peccati venialis offensionem displicentiam importans; quia nec sine sacro motu excitatur dormitantis voluntatis torpor, nec sine illa saltem virtuali & generali displicentia tollitur affectus in objectum peccati venialis, tandiu perseverans, quandiu

quandiu non retractatur. Ut enim veridicè scripsit S. Thomas 3. p. quæst. 87. art. 1. *Sicut peccatum mortale remitti non potest quandiu voluntas peccato adhæret, ita etiam nec peccatum veniale; quia manente causa manet effectus.* Unde patet non sufficere motum attritionis seu doloris peccati ex metu pœnæ concepti ad remissionem peccati venialis, ut Suarez, Coninchus, & Cardinalis de Lugo censuerunt. Tum quia motus ille attritionis invenitur in peccatore, in quo nondum inhabitat Spiritus sanctus, ut Sacrum Concilium Tridentinum declaravit: veniale autem nunquam remittitur nisi in statu gratiæ existentibus, ut dictum est. Tum quia peccati venialis macula non tollitur, nisi accedente forma quâ privat: privat autem non metu pœnæ, sed fervore charitatis & virtutum infusarum, quæ gratiam sanctificantem indivisim comitantur. Tum quia attritio est dolor de peccato, non propter offensam Dei, sed ob unam pœnam infligendam: hic autem dolor non destruit offensam sub ratione offensæ: ergo illam non remittit; tandiu namque non remittitur, quandiu manet, quia ut mox dicebat S. Thomas, manente causâ manet effectus. Imò nec ad remittenda venialia sufficeret actus fervidæ charitatis, nisi formalem vel virtualem peccati venialis detestationem includeret, cum non possit remitti peccatum, donec retractetur affectus in illud.

Dices: Multis in casibus remittuntur peccata venialia absque ullo pœnitentiæ formalis vel virtualis motu. Nam primò Sacramenta ex opere operato per infusionem gratiæ peccata venialia



venialia remittunt, ut docet D. Thomas art. 3.<sup>a</sup> quæstionis mox citatæ. *Per Eucharistiam*, inquit, & *extremam unctionem*, & *universaliter per omnia Sacramenta novæ Legis*, in quibus confertur gratia, peccata venialia remittuntur. Secundò eandem remittendorum peccatorum potestatem asserunt multi Theologi quibusdam actionibus sacris, quas sacramentales vocant, putà benedictioni Episcopi, aspersioni aquæ benedictæ, confessioni generali quæ fit in choro vel in principio Missæ, tunctioni peccatoris, inclinationibus, genuflexionibus, & aliis id genus actibus religiosis. Tertiò baptisma & martyrium omnia mortalia & venialia remittunt, nisi, ut ait D. Thomas art. 1. citato ad 2. *actualiter voluntatem invenerint peccato inhaerentem*. Quartò peccata venialia Justis in eis decedentibus in alia vita sine actibus pœnitentiæ vel satisfactionis remittuntur, cum extra viæ statum nulli sint actus meritorii, vel satisfactorii. Quintò peccata venialia in inferno remittuntur, ne pœnâ æternâ ipsis indebitâ puniantur: in inferno autem nullus exercetur pœnitentiæ vel pietatis motus. Ergo varii sunt casus, in quibus peccata venialia sine pœnitentiæ formalis vel virtualis actibus remittuntur.

Respondeo nunquam, & nusquam peccata venialia sine actibus pœnitentis condonari, juxta illud Augustini epist. 43. *Nec quemquam putes ab errore ad veritatem, vel à quocumque seu magno, seu parvo peccato ad correctionem sine pœnitentia posse transire*. Ad primum in contrarium dicendum, fatendum esse quidem Sacramenta novæ Legis remittere peccata venialia

nialia ex opere operato, cùm absolutio Sacerdotis ex opere operato quem significat effectum producat; significat verò remissionem peccatorum venialium tum maxinè cùm pœnitentes nullius mortalis conscii sola venialia (quæ materia sunt sufficiens hujus Sacramenti, ut superiùs ostensum est, in confessione aperiunt, de quibus fertur judicialis sententia & absolutio confertur. Sed tunc sine actibus pœnitentis venialia non remittuntur, sine contritione nimirum, quæ & affectum ac complacentiam ipsorum excludit, & eorundem detestationem conjunctam habet. Sine qua contritione qui sola peccata venialia nullum eorum detestatus aperiret, non solùm gratiam ex opere operato non reciperet, sed in grande sacrilegium incurreret, utpote Sacramentum pœnitentiæ mutilans, eique materiam debitam non ministrans.

Sed instabis: Hinc quidem sequitur, peccatum veniale actibus pœnitentis in confessione deleri, sed quomodo à Sacerdote ex opere operato remittatur, non explicatur: non enim potest tolli privatio nisi per formam quâ privat: atqui peccatum veniale est privatio fervoris charitatis & virtutum: ergo non nisi actibus charitatis vel virtutum, adjunctâ eorundem detestatione, peccata venialia delentur: sed Sacerdos non infundit actus illos: ergo Sacerdos ex opere operato peccata venialia non remittit.

Respondeo huic instantiæ sanè difficili solvendæ multa à variis subtiliter esse excogitata. Probabilioribus selectis, quæ magis ad veritatem accedunt referemus. Dici ergo debet, explicari

plicari id posse per ea quæ alibi de gratia Sacramentali diximus : sicut ergo per Sacramenta infunditur novus non solum gratiæ gradus gratiam habentibus , sed etiam novus modus gratiæ , novumque jus habendi auxilia opportuna ad certos virtutum actus eliciendos : ita in remissione peccatorum venialium & gratia augetur , & novus modus illi adjungitur , quo peccatorum venialium pulvis abstergitur , quo languor ille ex venialibus relictus vel persanatur planè , vel certè roboratur , & unà jus datur ad auxilia quibus permotus animus antea tepidus , in motus prorumpit salutare , quibus mentis acedia excutitur , & expedita ad bonumabilitas ,cujus peccatum veniale habitualis privatio est , restituitur. Experientur enim viri spirituales se ex peccatis venialibus & quotidianis in illam incidere cordis dejectionem , quâ nec legere licet , nec orare delectat , nec in meditatione exardescit ignis. Quid ergo tunc præstat à Sacramento devotè suscepto auxilium proficiscens ? Præstat ut tædio illo affectus nec deficiat , nec à studio sanctitatis desistat , sed potius inchoatum bonum fortiter , tamen non fortassis suaviter consummet ; ac tandem in ipsis piis fletibus jubilus in pavore tentationis , & admissis peccatis venialibus amissus , & quasi evacuatus erumpit ; & mens , quæ prius cæca torpensque jacuerat , ad inspectionem interni fulgoris , ad sensum cœlestis saporis suspiriis vegetata convalescit. Hinc ineffabile gaudium mente concipitur , quod nec abscondi potest , nec sermonibus aperiri : & tamen , ut Gregorius alicubi dicit , quibusdam proditur moribus , quanvis nullis proprietatibus

bus exprimat. Tunc cum mentis serenitate redit animæ nitor peccatis venialibus non extinctus, sed obnubilatus; non obtenebratus, sed obscuratus; cùm verùm ac summum gaudium non de creatura, sed de Creatore, non de iis quæ videmus, sed de iis quæ expectamus sentitur. Quod solidum gaudium nemo tollit à nobis, si nos ipsi iterum peccando non tollamus: gaudium, inquam, cui omnis humana jucunditas comparata mœror est; omnis suavitas dolor est, omne dulce amarum est, omne decorum fœdum; omne denique quod delectare solebat, molestum evadit. Novo ergo illo modo gratiæ & charitati impressio tollitur peccati venialis fœditas, & novis auxiliis à Sacramento manantibus torpor concitatur, tepor inflammatur, animique languentis & tædio contabescentis spiritus instaurantur. Si autem quæras quænam & quot peccata venialia per Sacramenta remittantur, cùm non videatur esse potior ratio de uno quàm de alio: Respondebo pro ratione dispositionis voluntatis Sacramenta venialia remittere; unde ea potissimùm delent, quæ voluntas magis detestatur, ad eaque destruenda efficacius operatur. Unde rarissimè omnia peccata venialia remittuntur; quia rarò contingit homines hanc mortalem vitam agentes ab omnibus affectibus liberos esse. Illa ergo peccata venialia Sacramentum ex opere operato delet, quæ pœnitens cum dolore & vero emendationis proposito clavibus Ecclesiæ subjicit.

Ad secundum casum de sacramentalibus, volunt aliqui, in quibus noster Gonectus, nonnulla sacramentalia remittere peccata venialia ex opere operato, quia eis mentem purgari & sanctifi

sanctificari, à quibusdam Patribus dictum est; & id ad magnificentiam Christi & Ecclesiæ decorem & majestatem conferre videtur. Sed hæc doctrina & S. Thomæ repugnare, & à veritate, meo quidem & gravium Theologorum judicio, videtur aliena. Sanctus namque Doctor 3. p. quæst. 87. art. 3. ubi hanc materiam accurato examine expendit, apertissimè declarat, sacramentalia non nisi ratione actûs detestationis peccati vel motûs reverentiæ in Deum peccata venialia remittere. Angelica verba sunt hæc : *Triplici ratione aliqua causant remissionem peccatorum venialium. Uno modo, inquantum in eis infunditur gratia, quia per infusionem gratia tolluntur venialia peccata, ut supra dictum est (scilicet art. 2. superiori, ejusque ibi rationem assignavit : Quia in habentibus usum liberi arbitrii, in quibus solis possunt esse venialia peccata, non contingit esse infusionem gratia sine actuali motu liberi arbitrii in Deum & in peccatum; ideo quandocumque gratia de nouo infunditur, peccata venialia remittuntur.)* Secundo inquantum sunt cum aliquo motu detestationis peccatorum; & hoc modo confessio generalis, cunsio peccatis, & oratio Dominica operantur ad remissionem venialium peccatorum. Tertio modo, inquantum sunt cum aliquo motu reverentiæ in Deum, & ad res divinas; & hoc modo benedictio Episcopalis, aspersio aqua benedicta, qualibet sacramentalis unctio, oratio in Ecclesia dedicata, & si qua alia sunt hujusmodi, operantur ad remissionem venialium peccatorum. Vides ex D. Thoma, sacramentalia non nisi ex opere operantis, ratione nimirum detestationis & reverentiæ in Deum

Deum peccata venialia dimittere. Idem docet ad 1. & ad 3. *Reatus poenæ*, inquit, *remittitur per prædicta secundum motum fervoris in Deum, qui per prædicta excitatur, quandoque magis, quandoque autem minus.*

Ratio etiam idem persuadet. Tum quia sacramentalia sunt ex institutione Ecclesiæ, valentis ea pro voluntate, necessitate, vel utilitate mutare, augere, minuere: Ecclesia autem non habet potestatem talem virtutem sacris ceremoniis impertiendi, ut peccata venialia deleant, ut interiores maculas abstergant, & intra animam illapsa operentur, sed unis à Christo institutis Sacramentis ad gratiam producendam uti potest. Tum quia si sacramentalia peccata venialia ex opere operato deleant, essent revera Sacramenta: peccatorum enim venialium remissionem ex opere operato nequeunt efficere, nisi vel productione gratiæ habitualis, vel novi modi additamento, quo gratia sacramentalis maculas veniales abstergit; vel saltem inspiciendo gratiam internam actualem, quibus pii poenitentiae & charitatis motus delendis peccatis venialibus idonei excitentur: atqui hoc est esse Sacramentum, scilicet signum visibile gratiæ invisibilis: ergo ne sacramentalia cum Sacramentis confundantur, sicque utraque pariter extinguantur, ne humana instituta ab Ecclesiæ nutu pendentia immutabilibus Christi mysteriis conferantur, omniaque sus deque misceantur; ne Ecclesiam hæreticorum sannis exponamus, si tot ceremoniis virtutem interiùs in animas ex opere operato agendi, solis Christi Sacramentis eximiam, asseramus, dicendum omninò est, sacramentalia

non nisi ex opere operantis veniales culpas delere. Unde Petrus Aurelius in vindictis censuræ Sorbonicæ : *Illæ verò opinio*, inquit, *quam parvuli aliqui Scholastici nuper excogitarunt, non solum præter Scripturam, SS. Patrum & Ecclesiæ auctoritatem, sed etiam contra sensum eorum omnium, tum omnis propemodum ipsius Scholæ Theologorum, sacramentalia effectus ad quos instituta sunt operari ex opere operato, explodenda & longè amandanda est ex animis Catholicorum, eorum præcipuè qui solam Scripturæ, & traditionis Ecclesiasticæ normam, non humani sensus arbitrium ad res Theologicas dijudicandas adhibent. Est enim opinio merè voluntaria, nuper inventa, nullo fundamento theologico nixa, omnis auctoritatis ac testimonii experta, sine quo tamen res facti & voluntatis divina, qualis ista est, sine temeritate proferri non potuit. Attamen ut benè dixit Paludanus in 4. dist. 2. quæst. 1. art. 2. Non sunt hæc contemnenda, licèt non sint Sacramenta, nec per modum Sacramenti habeant effectum ex opere operato : quia effectum habent per modum meriti & fidei ex opere operantis ; & non ex solo fervore & devotione utentium, sed totius Ecclesiæ. Videsis Sylvestrum verbo *Aqua benedicta*, quæst. 1.*

Porro generales illæ loquutiones, quibus significatur hoc pio sacramentalium usu mentes purificari, & mundari, facillè intelliguntur de opere operantis ; quia nimirum pii illi ritus vel ad pœnitentiam, vel ad profundam erga divina reverentiam animas concitare nati sunt ; & etiam crediderim eorum intuitu propter Ecclesiæ sponsæ suæ preces, quas exaudiri decet, solere

lere Dum piè illa & sine superstitione frequen-  
 tantibus gratiam aliquam actualis devotionis,  
 vel protectionis adversùs Cacodæmonis insi-  
 dias impertire. Unde domus aqua benedicta as-  
 pergi salubre est : benedictiones etiam Ecclesiæ  
 pro diversis rebus institutæ non sine fructu fieri  
 variis experientiis comprobatum est. Si enim  
 per umbram Petri ingentia Deus miracula pa-  
 travit, ut refertur Actorum 5. *Ita ut, inquit*  
*Textus sacer, in plateas ejicerent infirmos, &*  
*ponerent in lectulis ac grabatis, ut veniente Petro*  
*saltem umbra illius obumbraret quemquam il-*  
*lorum, & liberarentur ab infirmitatibus suis...*  
*Qui curabantur omnes.* Si Pauli sudaria totius  
 sanitatis distillabant medicinam, ut eodem  
 libro, cap. 19. refert Lucas his verbis : *Virtu-*  
*tesque vel quolibet faciebatur Deus per manus*  
*Pauli : ita ut super languidos deferrentur à cor-*  
*pore ejus sudaria & semicinctia ; & recedebant*  
*ab eis languores, & spiritus nequam egrediebantur.* Si, inquam, tot mira Deus operatus est  
 vilissimis illis servorum suorum rebus, ut eo-  
 rum amplius gloria clareret ; quidni sacris Ec-  
 clesiæ ritibus pietatem undique spiritantibus,  
 & rebus Ecclesiæ Sacerdotum & Pontificum  
 ministerio benedictis gratias cum internas, tum  
 externas edet ?

Ad tertium baptismatis & martyrii casum  
 respondeo grandem esse disparitatem, quia in  
 baptismo, & similiter in martyrio pro Christo  
 tolerato ( quod vim baptismi obtinet ) produ-  
 citur nova in Christo creatura, unde tota re-  
 mittitur pœna, si nullus peccati obex plenæ in-  
 dulgentiæ ponatur. At in Sacramento pœni-  
 tentiæ materia sunt actus pœnitentis, qui nisi



adsint, Sacramenti effectum non confert forma, eoque perfectiorem producit, quo pœnitentis motus vehementior fuerit & purior.

Ad quartum casum de peccatis venialibus in hac vita nullâ pœnitentiâ deletis, & in futura duntaxat remittendis, dicendum peccata venialia justorum remitti in alia vita, tam quoad culpam, quàm quoad pœnam. Id enim significavit Veritas Matth. 12. cùm de peccato in Spiritum sanctum dixit: *Non remitteretur neque in hoc seculo, neque in futuro.* Quæ verba ponderans Augustinus lib. 21. de Civit. cap. 24. *Neque de quibusdam veraciter dicetur, inquit, quod non eis remittatur, neque in hoc seculo, neque in futuro, nisi essent, quibus etsi non in isto, tamen remittatur in futuro.* Succinit Gregorius Magnus lib. 4. dialogorum, cap. 39. *In qua sententia datur intelligi, quasdam culpas in hoc seculo, quasdam verò in futuro posse laxari.* Quod enim de uno negatur, consequens intellectus patet, quia de quibusdam conceditur. Et Bernardus serm. 66. in Cantica: *Cur hoc dixit, si nulla manet in futuro remissio purgatione peccati.* Hunc etiam esse Ecclesiæ Catholicæ sensum patet ex eo, quod pia mater non solum pro defunctis filiis orat, ut à cunctis reatibus absolvantur, sed etiam ut sacrificiis purgati, & à peccatis expediti indulgentiam pariter & requiem capiant sempiternam: atque qua per fragilitatem carnis humanâ conversatione commiserunt, Deus veniâ misericordissima pietatis absterget. Et ratio est clara: multi enim iusti cum affectu ad peccata venialia mortem obeunt, cum quibus maculis non ingrediuntur regnum cœlorum, in quod nihil

coinqu

coinquinatum intrat, ut dicitur Apocal. 21. Ergo in alia vita maculæ illæ remittuntur. Et ad hoc institutum est Purgatorium, in quo purgantur sordes, & non solum pœnæ luuntur; non enim pœna, quæ non facit hominem sordidum ac miserum, sed una culpa purgatur. Porro remittuntur, delenturque illæ sordes fervidis charitatis, humilitatis, patientiæ. cæterarumque virtutum actibus, quas animæ patientes eliciunt, ut docet D. Thomas quæst. 7. de malo, art. 11. quia licet post statum viæ non sit in termino meritum nec satisfactio, potest tamen esse remotio impedimentorum, quibus sublati anima in igne sicut aurum probata & examinata, sicut examinatum argentum nitescit.

Ad quintum dicendum, in inferno, ubi nulla est redemptio, nulla etiam peccata venialia remitti, quæ ibi propterea per accidens æternum puniuntur; tandiu enim pœna producit, quandiu culpa perdurat: in inferno autem culpa æterna est, cum nullâ detestatione, nullâ Deo gratâ satisfactione deleatur. Nec propterea ulla fit damnatis injuria, qui in illum calamitosum statum, in quo nulla est venia, sponte sua prolapsi sunt. Nec etiam Deus ultra condignum punit, quia licet per se peccato veniali pœna non debeat æterna, per accidens tamen ex conditione subjecti peccatum semper amantis sempiterna pœna infligitur. Justum est enim ut quos culpa semper inquinat, par etiam pœna semper astringat. Unde æternum punitur culpa in tempore perpetrata, quia quod breve fuit tempore vel opere, longum esse constat in pertinaci inflexibilis & obsti-

natae mentis voluntate, quæ etsi ad nihilum redigi vellet, ne pateretur; vivere semper vellet tamen, ut semper peccare posset. Ad magnam igitur judicantis justitiam pertinet, ut nunquam careant supplicio, qui nunquam volunt carere peccato.

*Alii pœnitentia effectus breviter enumerantur.*

Quartus sinceræ pœnitentiæ effectus est restitutio gratiæ & virtutum, & quintus reviviscentia meritorum; sed quia hi effectus graviores patiuntur difficultates in hujus tractatus partem sequentem utrumque rejicimus, ut pro argumenti dignitate operosius exponantur.

Varios alios pœnitentiæ effectus recenset S. Doctor quæst. 10. Supplementi, qui ex dictis fermè expositi manent. Placet tamen singulos articulos emetiri.

Articulo 1. docet confessionem ritè peractam liberare à morte peccati; tum quia contritio à culpa con liberat, nisi quatenus votum confessionis annexum habet; tum quia contritio gratiam remissivam peccati auget; tum quia contritio interdum non est ita perfecta, ut sola ad remittenda peccata sufficiat, cum nimirum ex perfecto Dei amore non procedit, ut magis in sequentibus exponemus.

Articulo 2. docet confessionem liberare aliquo modo à pœna non solum æterna, quia hæc remissio est ab infusione gratiæ indivulsa, sed etiam temporalis in Purgatorio luenda.

da. Tum quia per vim clavium in tantum minuitur, quod proportionata viribus poenitentis remanet, ita quod satisfaciendo se in hac vita purgare potest, inquit D. Thomas. Quæ verba pie Sacramentum frequentantes diligenter audire & libenter retinere debent. Tum quia peccatorum confessio verecundiam annexam habet: Et ideo quanto aliquis pluries de eisdem peccatis confitetur, tanto magis poena minuitur. Hinc illud Augustini, seu Authoris libri de verâ & falsa poenitentia, cap. 9. *Laborat mens patiando erubescentiam: & quoniam verecundia magna est poena, qui erubescit pro Christo, dignus est misericordiâ.*

Articulo 3. infert confessionem aperire paradysum, à cujus introitu peccator culpâ & reatu poenæ æternæ in confessione dimissis arcebat. Hinc Gregorius explicans vestibulum interius mysticæ civitatis, sic habet: *Quid per interius vestibulum, nisi æterna vita latitudo signatur? Qua modò inter angustias vite præsentis jam spermente concipitur. De qua per Psalmistam dicitur, intrate portas ejus in confessione, atria ejus in hymnis confessionum. Cum enim peccata nostra per lacrymas confitemur, angusta via portam ingredimur: Sed cum post hac ad æternam vitam perducimur, porta nostra atria in confessionum laudibus intramus; quia ibi jam angustia non erit, cum nos latitia perpetua festivitatis exceperit.*

Articulo 4. docet confessionem sacramentalem spem salutis tribuere, quatenus per eam homo clavibus Ecclesiæ ex passione Christi salutis nostræ causâ præcipuâ virtutem habentibus se subicit. Hinc illud Ambrosii serm. 34.

*Confessio paradysum aperit , tribuit vim salvandi. Hinc etiam illud ex Augustino tritum: Confessio est salus animarum , dissipatrix vitiorum , restauratrix virtutum , expugnatrice Daemonum. Quid plura ? Obstruit os inferni , aperit portas paradysi. Hinc Bernardus lib. de interiori domo , cap. 1. Homo per veritatem stimulatus peccata sua confitetur ; Deus autem per misericordiam flexus confitentis miseretur. Felix conscientia , in qua misericordia & veritas obvii verunt sibi ; veritas confitentis , & misericordia miserentis : quia non potest illi misericordia deesse , qui se agnoscit in veritate.*

Articulo 5. docet Angelicus Doctor, per confessionem generalem deleri mortalia peccata oblita , quia Sacramentum gratiam infundens omnia peccata delet, cum sit impium diuini a Deo sperare veniam.

## R E F L E X I O.

*A. fructibus eorum cognoscetis eos. Si hos in te effectus experiare , Christiane Lector , in Domino confide , verâ te pœnitentiâ esse donatum. Quod si contrâ , confessionem licet identidem adhibens , vitiorum impetus non comprimi ac sedari , sed in animo tuo etiamnum insidere malarum cupiditatum æstum , & in corde tuo libidinum æstuarie flammam sentis , quæ primo quoque tempore erumpit , atque acrius quàm antea , ac vehementius exardescit ; magna tibi est causa timendi. Suspectæ sunt illæ lacrymule doctæ mentiri , suspecta ea pœnitentia*

nitentia est, quæ vitia non urit, quæve ita ægro parcit, ut ægritudinem foveat. Unde si percurrens omnes infirmæ conscientiæ tuæ angulos, spiritu compunctionis in animam illapso non solum te flecti & emolliri videris, sed in dies sensim consanescere, & converti funditus cor tuum, in timore quidem & tremore salutem tuam operari ne cessâ, sed te in Domino reconciliatum confide, atque ad sanctum altare communionemque, Rectoris animæ tuæ consiliis frequentandam accede, ut non gratiam modò, sed omnium gratiarum fontem, nec medicinam duntaxat, sed medicum ipsum accipias, animam tuam gratiarum & virtutum beatissimâ copiâ cumulaturum.

Sed quia non sufficit novæ vitæ inita ratio, nisi quæque etiam studeat præteritorum peccatorum injurias pœnâ diluere & satisfactione pensare, frequentandâ illa opera sunt, quæ fructus pœnitentiæ repræsentent. Neque enim hodie minus potens, minus justus, minusve tremendus Deus quàm in primitiva Ecclesia rigorosissimæ pœnitentiæ tenace: non minor hodie Christianismi gratia, non minor peccati immanitas, sed potius tot Sacramentorum violatione auctior: ergo non minor debet esse pristinæ pravitatis horror, non minus expiandorum criminum studium, non minus sincera ad Deum sese referendi voluntas. Sed diu, dura remedia non patitur humana imbecillitas benigniùs renissiùsque tractanda. Scio quidem quod delicatus es, sed si majorem illam pœnitentiam quam tot ætates Ecclesia filiis suis imperavit reformides, cur partem saltem non æmularis? Cur quotidianas ab infinita Dei

misericordia ministratas occasiones, quibus  
 scelera expiare tua possis, non nancisceris? Cur  
 pœnitentiæ austeritatem eleemosynis, piis re-  
 ligionis officiis, in muneribus officiisque fun-  
 gendis fide & æquitate, animi demissione,  
 mansuetudine, animi tranquillitate, & patientiâ  
 omnem irruentium contumeliarum acerbita-  
 tem exauriente ac velut concoquente non  
 supples? Nam in omnibus humanæ vitæ offi-  
 ciis & singulis ferè temporis momentis multa  
 occurrunt, quæ si pœnitentibus animis acci-  
 piantur, pœnitentiæ loco esse possint, & copio-  
 sam perfectæ satisfactionis segetem præbere. Si  
 te antiquæ pœnitentiæ labor deterret, facilio-  
 res saltem Dei offensi propitiandi rationes ne-  
 negligas, & pro tempore natam mortificationis,  
 humilitatis, cæterarumque virtutum praxim  
 ne prætermittas. Causam Dei, Ecclesiæ, & pro-  
 borum gravioribus quibusque temporibus tue-  
 re, veritatem oppugnatum testimonio subleva,  
 innocentie oppressæ patrocinare, ab infirmis &  
 contemptis potentiorum impetum propulsa, ni-  
 hil tua professione & Christiano nomine indi-  
 gnum gere, occurrentes quotidie tribulationes  
 patienti animo sustine in purgationem vicio-  
 rum, in probationem virtutum, in consumma-  
 tionem meritorum. Intuere quæ viri sanctissi-  
 mi vel nullis, vel certè levissimis peccatis ma-  
 culati, ut Deo satisfacerent pertulerunt, &  
 quod tam parum pro criminibus tuis patiari  
 præbesce, ingemisce, contremisce. Intuere splen-  
 didissima illa Religiosorum Ordinum lumina,  
 Brunonem, Bernardum, Norbertum, Domini-  
 cum, Franciscum, quomodo & pœnitentiam  
 asseperant ipsi fecerunt, quomodo & aliis fa-  
 ciendam

ciendam erecto ubique terrarum pœnitentiæ vexillo præceperunt. Intuere quomodo à Christo pœnitentiæ Principe , ut loquitur Hieronymus in cap. 3. Isaïæ , eorumque capite qui salvantur per pœnitentiam , missi veluti senescen-  
tis Christianismi secundarii Apostoli fideles innumerabiles violatæ baptismalis innocentiae reos posteriore lacrymarum ac gemituum baptismate in integrum restituerunt. Intuere non solum virorum , sed delicatarum virginum turmas , quæ in media Ecclesiæ pace novum martyrii genus inducentes , castigationibus , aliisque pœnitentiæ christianæ laboribus vitam suam conterunt , & usque ad mortem se contrituras publico & solenni voto professæ sunt. Intuere quomodo isto & superiori sæculo enatis non tam hominibus quàm belluis , Luthero & Calvino , unius voluptatis prædicatoribus , & Turcicam obscœnitatem in Christianismum impurissimè obtrudentibus , unoque ore adversus pœnitentiæ labores, peccatorum confessionem , cœlibatum , jejunia , abstinentias carnaliter blaterantibus Deus & antiquos Ordines iustauravit & novos produxit , ut Capucino-  
rum , utriusque sexus Carmelitarum Exalceatorum , aliorumque , quorum tam austera ac pœnitens vitæ ratio & hæreticorum petulcam lasciviam , & Catholicorum molliciem confundit. Et cum Ecclesia Catholica fatere pœnitentiam unicum esse peccatoris post ruinam perfugium , unicam Dei post offensiones placandi viam , denique cœli gaudium & terræ levamen. Sed proh dolor ! Communem Ecclesiæ sensum & hæretici blasphemis , & mali Catholici factis delere conantur ; illi nimirum,



qui ut ait Hilarius in Matth. vitâ gentium vivunt, qui arctissimis sæculo vinculis astringuntur, qui in voluptatibus ac deliciis confectandis toti hærent, denique qui in peccata mortifera prolabuntur, quæ autore Augustino serm. 29. de verbis Apostoli, *non facit bona fidei & bona sp̃s Christianus: sed illa sola, quæ quotidiana orationis penicillo tergantur.*

Ergo si vulneribus tuis salutare adhibere satagis medicinam, si ad teipsum rediens te primorum parentum instar turpiter nudum esse perspicias, ex quo Christum exuisti, si tibi grave est peccatorum tuorum pondus, si sordium tuarum sordes persentis, si in intimo cordis recessu sententiam adversum te feras, si corruptis ac putrescentibus animæ tuæ cicatricibus mederi aves, si denique pœnitentiæ effectus experiri exoptas, age dignos pœnitentiæ fructus, noli comprimere lacrymas, præcludere gemitus, secundam post naufragium tabulam repudiare: iudicium Dēi anteverte, & voluntariâ sententiâ in teipsum vindictam exerce. Pœnitentiæ ingratiitudinis memor in fletibus ac lamentis jaceat, antequam ad sacrorum mysteriorum gaudia aspirare sustineat. Deploranda anteactæ vitæ detrimenta accuratis seriæ pœnitentiæ, quæ pars justitiæ est, operibus resarcias, & terribimas scelèrum maculas fluentibus compunctionis aquis abstergat. Ob oculos suos austeras illas primitivæ Ecclesiæ peccatoribus impositas pœnitentias ponat, ut sua laxamenta deplorat. Attendat eisdem criminibus, quæ tam molliiter modo expiantur, eundem nunc atque olim violari. Quam eundem violari Christiani bonis;

hominis personam, nec minùs acerbâ opus esse medicinâ, quando eadem animarum vulnera curanda sunt. Ergo quidquid ad peccatorum expiationem facere quit, toto pectore amplectere, ea fletibus merge, ea orationum ardore absolve, eleemosynis redime, charitate obrue; ut ubi abundavit delictum superabundet & gratia.

Si peccati mortalis infinitam granditatem, & talem cui suppliciorum æternitas jure debetur; corde recogites; si illud Veritatis oraculum Christiano spiritu excipias, *Regnum cælorum vim patitur, & violenti rapiunt illud*, veritate coactus fatebere in eluendis criminibus, extirpandisque vitiis vim atque violentiam adhibendam esse; fatebere suaves & delicatas satisfactiones esse non oportere; fatebere æquitatem postulare, asperioribus pœnitentiæ remediis eos esse sanandos, quos corruperant male suadæ voluptatum nefandarum blanditiæ; fatebere ad amovendam imminentem à Deo pœnam nullam securiorem esse viam, non sufficere Orationis Dominicæ aliquoties recitandæ laborem, sed diuturna pœnitentiæ opera ad Deum placandum quammaximè desiderari. Recogita quid fecerit Ahab, ut intentatas sibi à Deo per Eliam Prophetam minas averteret; nam testante sacro eloquio, 3. Reg. 21. discidit vestimenta regia, operuit cilicio carnem suam, jejunavit; dormivit in sacco, & demisso capite ambulans, ne ad cælum quidem oculos attollere ausus est. Recogita quomodo Rex Assyriorum latam in Ninivem sententiam abjecto solio, deposito regali ornatu, sacco induto, cineribus incubans, jejunio cum populo armatus, &c.

ad Dominum in fortitudine clamans, ut habetur Jonæ 3: iram Dei placaverit. Si pœnitere est pœnam tenere: ergo non sunt tenendæ mundi deliciæ, non appetendæ sæculi voluptates, non optandæ hominum pompæ, non conquirenda carnis oblectamenta, non ambitiosæ colligendæ opes, potentia, & gloria, non reformidanda corporis incommoda, sed unusquisque pœnitens cum Tertull. lib. de pœnit. cap. 11. usurpare debet: *Deliqui in Deum, & periclitor aternum perire. Itaque nunc pendeo & maceror & excrucior, ut Deum reconciliem mihi, quem delinquendo laesi.* Sed pro dolor! his temporibus ob mollem & degenerem Sacerdotum cum peccatoribus agendi rationem pœnitentia ludus est, pœnitentiæ Sacramentum nudæ confessionis factum est; ad peccatorum expiationem toto pectore non incumbunt peccatores, sed versantur in enumeratione scelerum, non in castigatione vitiorum.

Cogitent ergo peccatores pœnitentes peccata sua Ecclesiam offendere, pœnitentiam non offendere; pœnitentiam, inquam, quæ ab Angelis de peccatorum conversione exultantibus in cœlo celebratur, quæ à Sanctis præsentissimum vulnere remedium, pietatis incentivum, virtutis firmamentum, divinorum munerum fons uberrimus agnoscitur; quæ ab ipsis Ecclesiæ hostibus cum quodam admirationis & reverentiæ sensu suspicatur, quia ut veridice scripsit Tertullianus lib. de velandis Virgin. cap. 3: *Bona res naminem scandalizant, nisi malam mentem. Agnoscant malum suum qui de tali bono scandalizantur.*

## APPENDIX.

*Præcipua animarum Rectoris  
& Moderatoris dotes  
expenduntur.*

**N**ihil est ad viam salutis utilius quàm probum moderatorem uberiori luce cumulatum eligere, cujus consiliis pareamus. Hæc viâ à Deo ipso constitutâ, nulla tutior, nulla exploratior. Hoc consilium *admonitionem admonitionum* vocat S. Franciscus Salesius in sua Philothea, part. I. cap. 6. Certè sicut in natura imperfectiora perfectioribus subjacent, sicut in mundi universitate ex mutua & continenti causarum inferiorum & superiorum colligatione stupenda illa mundi harmonia consurgit, sicut corporis humani species ac decor partium continuatione ac membrorum à capite dependentiâ & ordine continetur: ita in via Dei Moderatore opus est, cujus nutum homines sequantur, ne in itinere longè difficillimo divinos calles & anfractus ignorantes viam latam quæ ducit ad perditionem ingrediântur. Magna cura, inquit Magnus Basil. serm. 1. de abdicat. sæculi, & sollicitudine operam dato, ut aliquem tibi virum invenias, quem in istam quam amplexus es vitam institutionem certissimum ducem sequaris, qui probè sciat Deum requirentibus viam monstrare, qui virtutibus omnibus ornatus sit, cui facta sua idoneum charitatis sua erga Deum dederint testimo-

nium, qui sacrarum litterarum scientiam habeat, firmum præterea ac constantem, neque iis rebus quæ hominum mentes labefactare solent, loco suo dimovendum, ab avaritia abhorrentem, à negotiis secularibus liberum, atque omninò alienum, quietis cupidum, Dei amantem, pauperum & paupertatis studiosum, non iracundum, injuriarum immemorem, qui lubens incumbat in instituendis atque informandis iis qui ad ipsum accedunt, quem inanis gloria non inflat, nec superbia extollat, qui adulationem & blanditias oderit, qui denique cæteris omnibus rebus Deum longè anteponat.

Sed ubi inveniemus virum talem? Quis putas, fidelis servus, & prudens? Ex mille unum quærebat bonæ memoriæ Presbyter Aula, ex decem millibus unum ad id muneris seligendum censebat S. Antistes Salesius, quia pauciores sunt quàm dici possint, qui tanto sint oneri munerique pares; quia ut addebat Cardinalis Berullius, animam unam quàm mundum universum regere difficilior & juxtà momentosior est; quia ut ante illos dixerant utriusque Ecclesiæ lumina Magnus & Theologus Gregorius, ars artium est regimen animarum. Moderatoris & idonei ductoris reperiendi quanta sit difficultas, ex dotibus & partibus à Basilio memoratis satis colligitur. Tres tantùm perstringam à S. Salesio Introductionis 1. part. cap. 6. recensitas: *Rector animarum*, inquit, scientia, prudentia, & charitatis plenus sit; periculosus namque ac metuendus est, quem trium istorum aliquid deficiat. De singulis summatim dicendum est, & ni fallor clarebit, regimen animarum artem esse paucorum.

In primis eximia desideratur scientia ; ut enim in bello nemo dux perficitur, nisi qui rei militaris gnarus atque intelligens fuerit, ut in corporibus sanandis medicus ille exploditur, nisi qui artis medicæ scientiâ instructus sit : ita animas nemo Confessarius vel Rector sanabit infirmas, diriget sanas, nisi scientiam Sanctorum non mediocriter teneat. *Vos estis lux mundi*, aiebat Veritas discipulis suis & eorum successoribus : quomodo autem ignorantix tenebræ lucem effundent ? Certè quanvis multum utilis, multumve necessarius ductor sit, multò satius est tamen nullum habere prorsus quàm eum qui regere nesciat : quia si cæcus cæco ducatum præstet, ambo in foveam cadent.

Oportet ergo eum, cui regendarum animarum provincia demandatur, sacræ doctrinæ copiâ esse refertum, & priusquam alios erudire aggrediatur, diu ac multum in seipso instituendo erudiendoque laborasse. Unde illi scientiæ navasse operam debet, & quæ ex schola petitur, & quæ è Patrum traditione hauritur, & quæ studio & meditatione orationibus accensâ generatur : ut non solum sit Scholæ alumnus, & Patrum discipulus, sed etiam auditor Christi & docibilis Dei. Omnis enim qui audit, dicit, Veni ; id est qui Christum in oratione & meditatione Scripturarum intus loquentem, intus sine strepitu sonantem, intus coruscantem audit, alios ad Christum ut veniant vocat, vocatos dirigit, directos custodit.

Secunda animarum rectoris virtus prudentia est ab interno Dei lumine profecta, usu etiam atque experienciâ parva. Pervidenda enim sunt

&

& curationum tempora, & morborum remedia. Ne autem medicus spiritualis artis suæ tyrocinium in aliis curandis non sine eorum periculo & damno ponat, cœlesti prius debet lumine perfandi, & operis rudimentum in propriæ animæ curatione constituere, & veluti periculum facere, quàm se aliorum medicum exhibeat. Prius in abdito solitudinis recessu Deum gemitibus & orationibus consulere debet, num ab ipso vocetur qui nullo indiget, ne sumens sibi honorem, in tremenda ministeria per vim inolet, & in munera Angelicis humeris formidanda sese ingerat, vel quod pejus est, spe pinguioris Sacerdotii vel auctioris honoris se obtrudat, immisceat, atque implicet, & se & alios in præcipitia æternæ mortis agat.

Hæc prudentiæ luce & laude caret, qui spiritualis non est, ut judicet omnia. Porro si absit hæc cœlestis spiritalisque prudentia, scientia fit sapientia carnis, inimica Deo, & omnis sapientia insania falsa evadit, convertitur lumen in tenebras, nec nisi ignis quidam fatuus superest, quo in barathrum ruinus, aliosque deducimus. Hinc Christus discipulos suos non solum mundi lucem doctrinæ splendore, sed sal terræ incorruptæ prudentiæ discretionem esse voluit, ut animabus & lucem affunderent, & eas à putredine liberarent.

Hæc prudentia spiritualis non ad opinionum humanarum regulam lesbiā & versatilem dirigit, sed ad normas à sacris Litteris & Traditione præmonstratas exigit. Non enim alios probè reget qui privatarum opinionum præjudiciis occupatus salutares morum doctrinas à Spiritu Dei per Sanctos Patres quasi per divi-  
niora

niora quædam organa promulgatas repudiare non veretur. Proprias dubio procul tenebras pro luce obtrudet, nisi animum cum Patribus consentientissimum gerens, novas privatasque sententias à Sanctorum placitis moribusque abhorrentes fugiat. Hæc enim est vera Catholici spiritualisque Doctoris ac ductoris tessera, quod in Ecclesia invenit, tenere; quod didicit, docere; hoc filiis tradere, quod à Patribus accepit. Hac sacre Traditionis serie & præsidio corruptelas omnes opprimeret, quibus hominum vel improbitas, vel infirmitas, vel incertitia immaculatam Ecclesie Catholicæ & Romanæ doctrinam depravare conata est: & tum limpidissimas aquas sitientibus propinabit, cum è sacris Patrum aquæductibus, per quos è cœlesti Christi scaturigine fluentia salutis in nos derivantur, ipse hauserit quod effundat. Hinc præclare Tertullianus contra Praxeam cap. 2. *Adversus universas hæreses jam hinc præjudicatum est, id esse verum quodcumque prius, id esse adulterum quodcumque posterius.* Hinc Chrysostomus hom. 33. in Matth. *Non nostra loquimur; neque enim nobis Magister ullus est super terram, sed quæ à Christo per Apostolos accepimus, ea tradimus.* Hinc Augustinus tract. 37. in Joan. contestatur, non aliam se fidem sequi, quàm Catholicam fidem, venientem de doctrina Apostolorum, plantatam in nobis, per seriem traditionis acceptam, sanam ad posteros transmittendam. Hinc denique Vincentius Lirinensis in aureo commonitorio suo profiteretur, nullam se aliam amplecti doctrinam, nisi Catholicam & universalem, & unam eandemque per singulas ætatum successio-

nes



*nos incorruptâ veritatis traditione manentem, & usque in sæcula sine fine mansuram.*

Hac prudentiâ spiritali instructus Confessorius omnia judicet: *spiritualia*, juxta præceptum Apostoli 1. Cor. 2. *spiritualibus comparet*; casus conscientiæ non in humanis fallacium opinionum prolubiis, sed in Evangelii decretis penset, & ut ait Augustinus lib. 3. contra Parmenianum, cap. 2. *non in statera dolosa consuetudinum humanarum, sed in statera æqua divinarum Scripturarum.* Studeat pro virili ut remedium inflicto vulneri respondeat, sitque crimini pœnitentia suppar. Pœnitentis arborem non ex solis verborum foliis, sed maximè ex actionum dignis fructibus æstimet & expendat. Scriptum est enim, à fructibus eorum cognoscetis eos; nec melius interni affectus habitusque sinceritas quàm operibus innotescit.

Eadem spiritalis prudentia intrepidam animi libertatem & magnitudinem parit, quia teste Apostolo 2. Cor. 17. *Ubi Spiritus Domini, ibi libertas.* Cum enim homo spiritalis nullâ cupiditate, nullo præsentium desiderio teneatur, sed supra terrena & caduca omnia elatus solis cœlestibus atque æternis inhiet, creaturarum servitio expeditus est, uni omnium subjectus Creatori. Hinc peccatores non palpat, sed peccata generosè arguit; non accipit personas, sed causas; rigidas arctæ vitæ maximas inspirat & inculcat, prorsus cogitat Christianorum alios à baptismatis innocentia semel vel rarò tantùm lapsos, alios pluribus peccatis mortalibus eâ excidisse, alios in peccatorum sordibus hæsisse diutiùs; varia denique absolutionis &

Cominu

Communione impedimenta spectat, quæ pro peccatorum ratione, vel temporis quo quis in eis hæsit, graviora leviorave ducenda sunt. Absolutionis beneficium non satis paratis vel denegat prorsus, vel certè differt; arcet ab altaribus non se arcetes à criminibus, criminumque occasionebus, sibi que illud Chrysostomi homil. 13. in Matth. ante oculos proponit: *Diabolo peculiare est, blandiri ut noceat; Dei verò maxime proprium, corripere ut prosit.* Illud etiam ejusdem Patris hom. 15. in memoriam revocabit: *Christum Dominum in Evangelio singularem pseudoprophetarum notam assignasse, si ab omnibus hominibus benedicantur.* Meminerit cum eodem Sancto, se tanquam sal terra à Christo datum, cujus ea virtus est, ut laxa quaque ac mollia urendo ac constringendo diffuere non permittat. Forti igitur atque acri animo opus esse, qui probris atque maledictis lacerari non refugiat, cum multò magis timendum sit, ne si adulari ac dissimulare velit, ut hominibus placeat, ipse corrumpatur salis instar insatiati, quod ad nihilum valet ultra, nisi ut mittatur foras, & concalcetur.

Denique plenitudo charitatis in animarum ductore inesse debet, ut sit servus bonus & fidelis; in nemine autem bonitas excellit, nisi in quo excellit charitas. Et sanè quæ aliis poterit instillare sanctimoniam à sanctitate desertus, & spiritum dilectionis inspirare supereminenti charitatis scientiâ vacuus. *Quod tuum est spargis & perdis*, inquit Bernardus serm. 18. in Cantica, *si priusquam infundaris tu totus, semiplenus festines effundere.* Quamobrem si sapias, *concham te exhibebis, non canalem.* Hic siquidem

*siquidem penè simul & recipit & refundit : illa verò donec expleatur expectat , & sic quod superabundat sine suo damno communicat. Verùm canales multos hodie habemus in Ecclesia, conchas verò perpaucas. Tanta charitatis sunt per quos nobis fluentia cœlestia emanant , ut antè effundere quàm infundi velint , loqui quàm audire paratiores , & prompti docere quod non didicerunt , & aliis praeesse gestientes, qui seipsos regere nesciunt. Ego nullum ad salutem gradum pietatis illius gradui anteponendum existimo, quem Sapiens posuit dicens : Miserere anima tua placens Deo. Quod si non habeo nisi parumper olei quo ungar , putas tibi debeo dare , & remanere inanis ? Servo illud mihi , & omninò nisi ad Propheta jussionem non profero. Si instituerint rogantes aliqui ex his qui fortè existimant de me supra id quod vident in me , aut audiunt aliquid ex me , responditur eis : Ne fortè non sufficiat nobis & vobis , ite potiùs ad vendentes & emite vobis. Et nihilominus castè imitans illum de cujus plenitudine omnes accepimus , discite & tu non nisi de pleno effundere : nec manat ille in rivum, nec in lacum extenditur , donec suis satiatur aquis. Non pudeat concham non esse suo fonte profusorem.*

*Sine hac dilectionis plenitudine rectoris animarum cæcutit animus : sicut enim omnia ingrata videntur obscura , sic generaliter dilecta præclara sunt : à fortiori ergo asperæ viæ arctæque salutis semitæ non difficiles modò , sed impossibiles & falsæ à non amante vel amoris creaturarum præjudiciis occupato judicabuntur. Pulchrè observavit Chrysologus serm. 78.*

*Joannem*

Joannem primum vidisse Salvatorem, juxta illud Joan. 21. Dixit ergo Petro discipulus ille quem diligebat Jesus, Dominus est; quia nimirum amor ad divina oculos aperit mentis: *Primus qui diligitur videt, inquit, quia semper amoris oculus acutiùs intuetur: & semper vivaciùs qui diligitur sentit.*

Porrò illa dilectio & dilectionis Sacerdotalis plenitudo quantam in veros pœnitentes indulgentiæ benignitatem, tantam adversùs eos qui pœnitentiam detrectant, constantiam & firmitudinem exhibere debet, ne blanda mollique facilitate abrepti Rectores animarum ea foveant quæ non nisi ferro & cauterii unctione possunt cohiberi, ne præproperâ facilitate eos occidant, quos nisi salutari cunctatione & impositâ consentaneâ peccatorum gravitati pœnitentiâ in pristinam sanctitatem restituere non valebunt; & confitentibus in detrimentum & damnationem cedat, quod pro omnium est salute institutum. Hanc benignitatis & fortitudinis temperaturam in Cypriano videre est epist. 55. ubi Episcopi paternus amor & unâ heroïci animi invicta magnitudo ita certatim splendet, ut nescias utra utram vincat. *Si judicium nostrum ( inquit de lapsis ) voluerint experiri, veniant. Denique si qua illis excusatio & defensio potest esse, videamus quem habeant satisfactionis suæ sensum, quem afferant pœnitentiæ fructum. Nec Ecclesia istic alicui clauditur, nec Episcopus alicui denegatur: patientia & facilitas & humanitas nostra venientibus præsto est. Opto omnes in Ecclesiam regredi: opto universos commilitones nostros intra Christi castra & Dei Patris domicilia concludi.*

cludi. Remitto omnia, multa dissimulo studio  
 & voto colligenda fraternitatis. Etiam qua in  
 Deum commissa sunt, non pleno iudicio religio-  
 nis examino, delictis plus quàm oportet remit-  
 tendis penè ipse delinquo. Amplector promptâ  
 & plenâ devotione cum pœnitentia revertentes,  
 peccatum suum satisfactione humili & simplici  
 contentes. ( En ubera misericordiæ lacte ma-  
 nantia, & amantissimi Patris studia: cerne jam  
 Iudicis firmitatem aheneâ fronte immotam  
 animi constantiam exhibentem. ) Si qui autem  
 sunt, qui putant se ad Ecclesiam non precibus,  
 sed minis regredi posse, aut existimant aditum  
 sibi non lamentationibus & satisfactionibus,  
 sed terroribus facere; pro certo habeant contra  
 tales clausam stare Ecclesiam Domini, nec ca-  
 stra Christi invicta & fortia, & Domino tuente  
 munita minis cedere. Sacerdos Dei Evangelium  
 tenens, & Christi præcepta custodiens occidi  
 potest, non potest vinci. Quod confirmat au-  
 thoritate Concilii: Concilio, inquit, frequenter  
 actò, non consensione tantùm Episcoporum, sed  
 & comminatione decretum est, ut pœniten-  
 tiam fratres agerent, ut pœnitentiam non agen-  
 tibus nemo temerè pacem daret. Eiusdem tem-  
 peramenti Sacri Concilii autoritate probati  
 meminit epist. 52. ad Antonianum, his ver-  
 bis: Persecutione sopitâ, cum data esset facul-  
 tas in unum conveniendi, copiosus Episcoporum  
 numerus, quos integros & incoluine fides sua  
 & Domini tutela protexit, in unum conveni-  
 mus, & Scripturis diu ex utraque parte prolatis  
 temperamentum salubri moderatione libra-  
 vimus, ut nec in totum spes communionis &  
 pacis lapsis denegaretur, ne plus desperatione  
 deficerent,

*deficerent, & eo quòd sibi Ecclesia clauderetur, sequenti sæculum gentiliter viverent. Nec tamen rursus censura Ecclesiastica solveretur, ut ad communicationem temerè proflirent; s. d. trahe-  
retur diu pœnitentia, & rogaretur dolenter pa-  
terna clementia.*

Hac ergo animi firmitate à charitate profi-  
ciscente munitus Sacerdos ratum fixumque ha-  
beat, peccatori qui à baptismi gratia eodem  
peccato mortali sæpe per summam negligenti-  
am iterato excidit, antè reconciliationis ob-  
tinendæ jus esse posse, quàm laboriosâ satis-  
factione defunctus legitimis se ac dignis pœni-  
tentiaë exercitationibus expurgarit: ne recon-  
ciliationem & Communionem invadat ante-  
quam pœnitentiaë iter emensus sit, antequam  
ad veniam delicti sui Dominum justis & con-  
tinuis legitimæ pœnitentiaë operibus inflexerit,  
antequam acrioribus remediis, & ad sanan-  
da vulnera accommodatis salutis suæ consule-  
re conatus sit: ne Sacerdotes contra Evangelii  
rigorem & Ecclesiæ leges falsam & periculo-  
sam pacem relabentibus impertiant, nihil acci-  
pientibus profuturam, solis impertientibus &  
potestate sua abutentibus nocituram: ne ope-  
riant morientium vulnera, & plaga lethalis al-  
tis & profundis visceribus infixæ dissimulato  
dolore contegatur: ne prava & præpropera ab-  
solvendi facilitas crudelis sit persecutio &  
nova tentatio, per quam subtilis inimicus, ut  
ait tract. de lapsis S. Cyprianus, impugnandis  
adhuc lapsis occultâ populatione grassatur, ut  
lamentatio conquiescat, ut dolor sileat, ut de-  
lictæ memoria vaneſcat, comprimatur pecto-  
rum gemitus, sistatur fletus oculorum, nec

Dominum graviter offensum longâ & plenâ patientiâ reus deprecetur : ne Dei ministri pestiferâ assentatione iis conniventes qui momentaneam desiderant medicinam, Domini præcepta rescindant, Evangelicam veritatem infringant, fidei majestatem evertant, & palpationibus perniciosis mentes in fraudem impellant, si eis peccata non retineant, qui longâ & austerâ pœnitentiâ crimina quibus infernum meriti sunt, minimè diluerunt. Imitetur ergo Sacerdos præclaram Cleri Romani fortitudinem, quam epist. 31. ad Cyprianum sic expressit : *Absit ab Ecclesia Romana vigorem suum tam profanâ facilitate dimittere, & nervos severitatis eversâ fidei majestate dissolvere ; ut cùm adhuc non tantùm jaceant, sed & cadant everforum fratrum ruina, properata nimis remedia communionum utique non profutura præstentur, & nova per misericordiam falsam vulnera veteribus transgressionis vulneribus imprimantur, ut miseri ad conversionem majorem eripiatur & pœnitentia.*

Peccatori lapso, sauciato, & semivivo relicto oleum infundat Sacerdos & vinum ; oleum benignitatis, ne desperet ; vinum severitatis, ne plaga putrescens periculosior fiat. Præ paterni cordis compassione lacrymas suas cum pœnitentis lacrymis jungat, cum ejus gemitu suos gemitus copulet ; sed ne propterea illi præproperam absolutionem in ejus perniciem perversâ facilitate indulgeat. Misericordiâ abundabat S. Carolus, abundabant Sanctissimi Antistites, quorum vestigiis insistebat ; compassionis visceribus graviter & gravius quàm nos commovebantur, animarum sibi commissarum salutis zelo flagrant,

flagrabant, vel unius ovis infirmæ tuendæ causâ sanguinem effundere parati erant : & tamen viri illi divini nunquam miserationis specie reos ad reconciliationem vel altaria pœnitentiæ laboribus non perfunctos ut admitterent induci potuerunt. Sciebant sacri illi Doctores cœlesti lumine perfusi, se non esse Ecclesiæ Patres, ut filiorum infirmorum cupiditatibus morem gererent, sed ut eos in Christo formandos cruci Christi conformarent. Noverant paternum Episcopalis cordis amorem non in palpandis ungendisque vitiis, sed nullâ re magis quàm in emendandis eorum moribus vitiisque coërcendis enitescere : quia scriptum est psalm. 140. *Corripiet me justus in misericordia, & increpabit me : oleum autem peccatoris non impinguet caput meum.* Et iterum Proverb. 27. *Meliora sunt vulnera diligētis, quàm fraudulenta oscula odientis.*

Non ergo severitate utitur in peccatores, sed salutarî misericordiæ mansuetudine Sacerdos, qui sæpe relapsis absolutionem tantisper suspendit ac subducit, ut ad illam digniùs recipiendam dignis sinceræ pœnitentiæ exercitationibus se comparent : ut utili cunctatione cor interim recogitans annos suos in amaritudine animæ suæ flectatur, emolliatur, & funditus tandem lique scat & convertatur; ut in dies convalescens demùm persanescat, ut bonorum operum accessione & incremento quasi pederentim nova creatura conformetur, pareatur, instruat, mature scat.

Itaque fallacem lenitatis speciem sibi & peccantibus exitiosam deponat, & prorsus abji-



ciat, ut ab officio non discedat, improvidâ præcocis absolutionis facilitate innumerorum sacrilegiorum particeps factus. Timeat ne dum absolvit recidivantem in terris, ipse à Deo in cœlis reus condemnetur. Timeat ne fallacem hominibus sordibus immerfis pacem ingerat, quæ ipsos vitiorum somno & cœno altius remergat. Timeat ne se alienis criminibus irretiat, dum ea degeneri clementiâ fovet, nec peccatorem ad eluenda sordentis vitæ iterata flagitia compellit. Timeat ne margaritas projiciens ante porcos, sanctumque dans canibus ad vomitum redeuntibus, dum relapsos ad Dei mensam inconsultè adhibet, cum pane cœlesti unâ propinet & venenum. Timeat ne qui Pastor esse debet, lanius fiat. *Ea enim concedere qua in perniciem vertant, inquit Cyprianus epist. II. decipere est: nec erigitur sic lapsus, sed per Dei offensam magis impellitur ad ruinam.* Timeat ne si pravis ægrotantium cupiditatibus assentiens cœlestis medicinæ præcepta negligat, nec sanitatem infirmis restituat, & eorum exitiū culpam apud Deum sustineat. Nam ut præclare tract. de lapsis scripsit: *Qui peccantem blandimentis adulantibus palpat, peccandi fomite subministrat; nec comprimit delicta illa, sed nutrit. At qui consiliis fortioribus redarguit simul, atque instruit fratrem, promovet ad salutem. Imperitus est medicus qui tumentes vulnerum sinus manu parcente contrectat, & in altis recessibus viscerum mortale virus inclusum dum servat exaggerat. Aperendum vulnus est & secandum, & putredinibus amputatis medellâ fortiore curandum. Vocifere-*  
*tur*

*tur, & clamet licet, & conqueratur ager impatiens per dolorem, gratias aget postmodum cum senserit sanitatem.*

Remiuniscatur ergo Rector animarum, & seria secum cogitatione revolvat, se peccatorum quidem remittendorum à Christo concessam potestatem accepisse, sed ejusdem potestatis usus reddendam sibi rationem tamen. Perpendat se peccatorum esse judicem, sed superiori judici militare, sibi que divinitus traditam facultatem Dei voluntate, Ecclesiæque atque Sanctorum institutis dimetiendam & temperandam esse. Sit ergo in condonandis peccatis fidelis servus & prudens, id est in peccatis condonandis & dispositiones pœnitentium exploret, & fructus pœnitentiæ non præfocet. *Tunc namque*, inquit Magnus Gregorius lib. 6. in cap. 15. lib. 1. Reg. *verè conversum peccatorem cernimus, cum dignâ afflictionis austeritate delere nititur, quod loquendo confitetur.* Si secus se gerat, si vulnera operiat quæ secari & exuri debeant, si cum in medullis fervet morbus, per superficiem molle deducat unguentum; si levissima opera pro gravissimis delictis injungat, si pauculorum Psalmorum recitationem pro infinitis perjuriis, blasphemis; aliquod jejunium pro multorum annorum adulteriis & libidinum monstris, profectò alienorum in se peccatorum onera suscipiet, ut Tridentinum sess. 14. cap. 8. non tam verbis quàm fulminibus declaravit. Tum verò maximè arceat à sacro altari calentes adhuc recentibus flagitiis, donec juxta salubre Apostoli monitum sese probaverint, dignis pœnitentiæ fructibus sinceritatem conversionis experiendo, ne ore im-

puro sanctissimum cibum indignè sumentes iudicium sibi manducant & bibant. Nisi hanc arctiorem viam teneat Sacerdos, quomodo pœnitentia, uti Tridentinum definivit, laboriosum erit baptisma, quo puniatur qui templum Dei violavit, & Spiritum sanctum contristare non formidavit? Quomodo metu pœnarum revocabuntur peccatores, & infruita relabendi licentia, quâ homines non minùs ad scelera quàm ad ludum jocumque profiliunt, quasi freno coërcebitur? Quomodo vitiosi habitus, qui non nisi contrariis virtutum actionibus tolluntur, pœnitentiæ exercitationibus evellentur? An fortè inveteratos superbiæ, avaritiæ, impudiciæ, ebrietatis, & maledicentiæ habitus, Rosario semel aut iterum recitato, aut pauculis Psalmis evolutis extirpabuntur? Itane solis precatoris verbis peccandi proclivitas naturâ inolita, & consuetudine roborata, atque frequentatis peccatis robustissima & penè invictissima facta, in bonum, nisi accedat exercitatio pœnitentiæ ultricis vitiorum & altricis virtutum, sicut à Bernardo nominatur, inflectetur? Quomodo Christo Jesu qui pro peccatis nostris satisfecit, ex quo omnis nostra sufficientia est, conformes efficiemur, nisi asperissimos Capitis nostri labores & mortem acerbissimam exprimere pro virili connitamur, memores quod si in viridi ligno tot facta sunt, in arido quid fiet?

Non est ergo satis confiteri sæpiùs, ut toties beneficium absolutionis peccator promereatur: non sufficit flagitiosam vitam accusare semper, emendare nunquam, sicque perpetuâ vicissitudine labi, exurgere; relabi rursus, & divinæ  
hac

hac inconstantia levitate misericordia illudere. Summâ cautione ac diligentia opus est, ut ea vitet peccator, ex quibus certa pestis animæ imminet. Operibus & dignis pœnitentia fructibus probanda est voluntas, mores componendi, atque ad immutabilem Evangelicæ doctrinæ normam dirigendi. Ea vivendi via persequenda est, quam Christi Domini vestigia impressere; amovendæ procul omnium sæcularium cupiditatum sordes, eaque animi castimonia atque integritas custodienda, quæ interim de ruinis reparandis, de vulneribus diligenter curandis sedulò cogitet, & per aliquod tempus pœnitentia incumbat, priusquam reconciliatione, & sacrâ Communione pœnitens fruatur. Mortifera peccata, quæ uno ictu animam perimunt, quæve qui agunt regnum Dei non possidebunt, penitus extirpanda sunt & præcavenda; quia gratia semel voluntariè amissa recuperatu difficillima est. Nusquam crediderunt Patres tam facile homines è peccatorum profundissimo cœno emergere, ac è mancipiis diaboli evadere filios Dei; sicque perpetuis reciproca vicissitudinis alternationibus toto vitæ decursu contingentibus, nunc æternâ damnatione multandos, nunc extemplò, ac nullo negotio æternæ felicitatis dignos. Quis credat ejusmodi semi-Christianos toto & sincero cordè ad Deum converti, qui cor dividentes suum, partim Deo, partim sæculo inserviunt; quorum vitæ series peccatorum mortalium, inanis pœnitentiæ, & infructuosarum confessionum perpetua vicissitudine continetur, contra illud Veritatis immobile oraculum, *Nemo potest duobus dominis servire?* Sed de hac infructuosa & fucata pœ-

nitendi ratione , quantòve periculo illi præpo-  
peram absolutionem indulgeant animarum Re-  
ctores , iterum & fusè dicemus , nempe pro  
rei momento , capitis sequentis speculatione  
tertiâ , ubi de differenda absolutione disputa-  
bimus.

## REFLEXIO.

*Vos estis lux mundi, vos estis sal terra.* Matth.  
Si Pastores & animarum Rectores ad antiquæ  
virtutis normam semel restituerentur, facili ne-  
gotio communis Fidelium disciplina refloresce-  
ret, & plebs Christiana ad avitæ integritatis le-  
ges formamque rediret. Sicut enim Deus accen-  
so in mundo sole terrarum orbem luce complet  
& influxibus ditat; sicut mari refuso regiones  
omnes fluviis, fontibus, rivis, aquarumve co-  
piosissimis meatibus irrigat; sicut civitatibus &  
regnis ornato regiis virtutibus Principe felici-  
tas paratur: ita per Sacerdotes divino igne suc-  
censos in universum orbem charitatis incen-  
dium effunditur, & dissolutâ peccatorum glacie  
spargitur. Ipsi enim veri sunt mundi soles, quæ  
oculis cerni non possunt cernenda exhibentes:  
ipsi illius aquæ fontes sunt, quæ à cœlo exsi-  
liens salit in vitam æternam: ipsi Principes ani-  
marum negotiis æternitatis præfecti.

Pietatem salutarem propinare hominibus  
nequit qui, ut verbis Episcopi in ultima Tri-  
dentini sessione perorantis vehementiori voce  
utatur, *poculo salutis primum inebriatus non fue-  
rit*; quia nemo nisi sibi plenus & affluens in  
alios effluere exundareque potest. Quid ergo  
mirum

mirum, si (quod doleamus) plurimos in Ecclesia Dei Christianos esse videamus, qui ut ait Augustinus in Psalm. 30. *Paganis & Iudæis pejus vivunt*; si legem & Evangelium in tam multis ita deperisse, ut Saraceni (verba sunt Gregorii VII. epist. 9.) *& quilibet Pagani suos ritus firmitus teneant, quàm illi qui Christianum nomen acceperunt*: ut namque ait Petrus Damianus lib. 2. epist. 1. *Totus mundus pronus in malum per lubrica vitiorum in præceps ruit. Et, ô nefas, ab eis in veritate judaicè vivitur, qui superficie tenus Christiano vocabulo palliantur.* Quid, inquam, mirum si infinita mala redundent, cum illis regamur Sacerdotibus, in quibus disciplinam, ut cum Cypriano tract. de lapsis loquar, *pax longa corrumpit, in quibus non religio devota, non fides integra. & viva; non in operibus misericordia, non in moribus disciplina viget: cum sacrorum ministrorum navim undique intrent fluctus, & putrida navis fragium tabula sonent*, ut Magnus Gregor. lib. 1. epist. 4. loquitur: cum, ut plenius serm. 33. in Cant. lamentatur, *serpat hodie putida tabes per omne corpus Ecclesiæ, & quo latius eo desperatiùs, eoque periculosiùs quo interiùs. Ministri Christi sunt, inquit, & serviunt Anti-christo. :::: Olim prædictum est, & nunc tempus impletionis advenit: Ecce in pace amaritudo mea amarissima. Amara priùs in nece Martyrum: amariùs post in conflictu hæreticorum: amarissima nunc in moribus domesticorum.* Videbis illam ibi.


Sed absit, ut ponam in cælum os meum; absit ut quæ à Sacerdotibus patrantur eo animo observem, eaque voluntate recenseam, ut sta-

tum divinum, cujus observantia nihil mihi antiquius, infimulem. Privatorum corruptelas non dissensionis studio incesso, sed charitate deploro; ministrorum deliquia & defectiones animadverto, quia tam præcellæ conditionis pulchritudinem nulla temporum vicissitudine deteri, nec minùs hac quàm prima ætate nitere ac florere vellem. Ne igitur, Christiane Lector veritatem in invidiam, charitatem in crimen, voces, præclaræ memor illius à Gregorio Theologo orat. I. vocis fasæ: *Etsi probrorum ac peccatorum, quæ apud Christianos vigent, impetum comprimere majus sit, quàm pro virium nostrarum facultate; at certè odisse ac pudore affici, pietatis partem esse non minimam.* Illum animi habitum induere satagimus, qui in Conciliis, Summorumque Pontificum decretis elucet. Non erubescunt innumerabilia penè Concilia se ad reformationem Cleri & populi Christiani coacta fateri, ut in Concilio Viennensi sub Clemente V. in Lateranensi sub Innocentio III. & altero Lateranensi sub Alexandro III. & in ipsa Tridentini fronte legere est.

Rectores ergo ac Pastores animarum non increpando, sed quæ par est reverentia rogando monemus, ut in regendis populis suæ curæ commissis, non ad corruptam consuetudinem & putridam molliem disciplinæ corruptricem, sed ad illud incorruptum lumen sese applicent, quod à Christo Ecclesiæ collatum perpetua ejusdem Ecclesiæ traditione integrum ac purum continetur. Illud animo sæpè revolvant, quod Magnus Gregorius lib. 30. Moral. cap. 7. scriptum reliquit: *Episcopi, etsi subsequen-  
tium populo-  
rum Patres. sine præcedentium tamen Pa-*

*trum se filios meminisse oportet.* Hoc itaque Pastoris Evangelici officium, hæc Episcopalis regiminis administrationisque forma, hæc ruta ad salutem via, sacras pietatis ac disciplinæ leges Sanctorum monumentis factisque traditas executioni pro virili mandare: Nam, ut ait idem Gregorius Curæ Pastoral. part. 2. cap. 2. *tunc Sacerdos irreprehensibiliter graditur, cum exempla Patrum præcedentium indefinenter tuetur, cum Sanctorum vestigia sine cessatione considerat.* Sanè si ipse Dei Filius ad orbem sapientia & factis illuminandum missus, ea solum dixit & fecit quæ à Patre audivit; si Spiritus sanctus à Filio postmodum missus illa duntaxat quæ à Filio accepit inspiravit; si Apostoli in omnem terram à Spiritu Sancto missi id unum docuerunt atque fecerunt quod à Paracleta didicerunt: profectò Episcopi cæterique animarum Pastores & Rectores ab Apostolis missi nihil aliud sibi, aliisque agendum tradere debent, quàm quod ab Apostolis traditum accepere. Non novas quasdam vias priscis virtutis Magistris planè ignotas debent incedere, sed antiquum iter prosequi; uno verbo non mores temporum, sed Evangeliorum exquirere tenentur, qui eos ac populum Dei illis creditum ad ecclestem patriam felicitatemque perducturi sunt.





DISSERTATIONIS UNICÆ

*De Sacramento Pœnitentia :*

CAPVT II.

*Examinantur accuratiùs difficiliora  
quadam circa partes & effectus  
Pœnitentia.*

**C**irca partes & effectus Sacramenti Pœnitentia cum plures controversias excitent Theologi, quarum plures, utpote faciliores breviter resolvimus in capite præcedenti, insigniores quædam ac momentosiores sunt, quas visum est aut solum tantisper superiùs attingere, aut ex integro reservare in hoc proprio, & speciali capite diligentius excutiendas.

## SPECVLATIO I.

*Dolor de peccatis ex uno pœnarum  
infernî metu conceptus, bonus  
quidem ille est, & ad gratiam  
justificantem in Sacramento re-  
cipiendam disponit: non sufficit  
tamen, si ab omni amore Dei de-  
sertus sit.*

**S**I ad legendam ullam à nobis roto Theolo-  
giæ decursu disceptatam quæstionem purum  
te & integrum, Lector optime, desideravi, illam  
impræsentiarum maximè à te postulo  
æquitatem, ut sepositis cunctis affectibus, quos  
non illepidè quidam amoris proprii sophismata  
nominavit, ad illam te redigas præjudiciorum  
vacuitatem, quæ Christianum & Theologum  
debet, ne quam aggredimur rem tantam, & ad  
instituendam salutem dirigendamque tantope-  
rè necessariam expendas potius, ut Augustini  
verbis utar, præjudicio consuetudinis, quàm  
judicio veritatis, quæ vitâ ipsâ cuique debet  
esse antiquior. Si enim ita te compares, magna  
me spes subit fore, ut gravissimam sanctissi-  
mamque sententiam, quam tutari aggredimur,  
& pro tuo pietatis zelo suscipias, & pro nati-  
vo mentis acumine fide illustrato omnibus qui  
ad Deum sese referre ex animo student, nedum  
fructuosam, sed prorsus necessariam intelligas.

Minus

Minus ergo sodes apud te valeat privata vel præjudicata opinionis defendendæ cupiditas, quàm studium percipiendæ veritatis: ne illos, amabò imiteris, in quorum mentibus contraria hæret sententia, quia longo usu assueti sunt apertissima quæque respuere, si à præjudicatis eorum opinionibus abhorreant. Ita si te componas, nudam veritatem nudus assequere, puramque purus tenebis, quia ut Augustinus lib. 6. contra Julianum, cap. ultimo, veridice scripsit: *Quando animositatem, quâ teneris, viceris; tunc veritatem poteris tenere, quâ vinceris.*

Utigitur in hujus quæstionis indagine veritatem sincerius intelligamus, attentionem mentis à præjudicatis opinionibus removeamus atque subducamus, ipsamque Veritatem omnibus circumfusam supplices invocemus, quæ manens in se incommutabiliter, nullo modo cessat occultâ inspiratione vocationis loqui ei creaturæ cui principium est, ut docet August. lib. 1. de Genesi ad litt. cap. 50. Et præclare lib. 10. Confess. cap. 26. *Ubique veritas præstans omnibus consulentibus te, simulque respondens omnibus etiam diversa consulentibus. Liquidè tu respondes, sed non liquidè omnes audiunt. Omnes unde volunt consulunt, sed non semper quod volunt audiunt.* Non ita sum rudis & in cœlesti Augustini doctrina peregrinus, ut credam aut præsumam veritatem discere te posse à me: admonere te possum per strepitum vocis & scriptionis meæ lectionem, sed nisi sit intus qui doceat, inanis sit strepitus meus. Munus Dei est intelligentia veritatis. Deum ergo loquentem audi, ut cum ipsa Veri-

tate

tate, Joan. 5. dicere queas: *Sicut audio, sic iudico: & iudicium meum iustum est, quia non quero voluntatem meam.* Deus intelligibilis lux est, quæ illuminat omnem hominem venientem in hunc mundum, in qua, à qua, & per quam intelligibiliter lucent, quæ intelligibilia sunt omnia. Hanc lucem implora, quæ à te non occidet, nisi tu ab ipsa occideris. *Nam etiam sol iste, inquit Augustinus tract. 35. in Joan. & videntis faciem illustrat & cæci: amobus sol præsens est; sed præsente sole unus absens est. Sic & sapientia Dei Dominus Iesus Christus ubique præsens est, quia ubique veritas, ubique sapientia.*

Præjudicium autem in hac parte periculosissimum est, si quorundam recentiorum auctoritate persuasus sententiam de sufficientia attritionis ex solo metu, absque ullo Dei amore saltem comitante conceptæ, articulum fidei; nostram verò tanquam hæresim inconsideratè pronunties; quia ut sapienter à nonnullo dictum est, pessima res est falsarum sententiarum apotheosis, & pro peste intellectus habenda est, si vanis aut falsis accedat veneratio. Ex divinorum enim & humanorum malè sana admixtione non solum educitur philosophia phantastica, sed etiam religio vana. Itaque salutare admodum est, si mente sobria fidei tantum dentur, quæ fidei sunt. Ad sanandam autem huiusmodi præjudicatæ sententiæ, quæ nonnulli laborant, ægritudinem non solum conferret sincerus amor veritatis, quam qui videre non potest, pulsare debet non ad hominem disputatorem; sed ad Deum Salvatorem, ut quod non valet valeat, supplexque illi qui lumen  
mentis.

mentis accendit attendere, ut intelligat, quemadmodum Augustinus epist. 112. & contra epist. fundam. cap. 33. monuit; sed etiam Sanctissimi Papæ Alexandri VII. declaratio his verbis expressa in decreto Sanctæ Romanæ Inquisitionis, edito feria 5. die 5. Maii, anno 1667.

„ Sanctissimus Dominus noster Alexander Pa-  
 „ pa VII. cum acceperit non sine gravi animi  
 „ mœrore, Scholasticos quosdam acrius, nec  
 „ absque fidelium scandalo inter se contende-  
 „ re, an illa attritio quæ concipitur ex metu  
 „ gehennæ, excludens voluntatem peccandi  
 „ cum spe veniæ ad impetrandam gratiam in  
 „ Sacramento pœnitentiæ, requirat insuper ali-  
 „ quem actum dilectionis Dei, asserentibus  
 „ quibusdam, negantibus aliis, & invicem ad-  
 „ versam sententiam censurantibus: Sanctitas  
 „ sua enixè cupiens pacis vinculum inter fide-  
 „ les servari, omnemque scissuræ fomitem ex-  
 „ tingui, auditis votis Eminentissimorum &  
 „ Reverendissimorum Dominorum Cardina-  
 „ lium adversus hæreticam pravitatem gene-  
 „ raliū Inquisitorum, necnon Dominorum  
 „ Consultorum & Qualificatorum Sacræ Con-  
 „ gregationis ejusdem Generalis Inquisitionis,  
 „ hoc præsentī decreto in virtute sanctæ obe-  
 „ dientiæ & sub pœna excommunicationis la-  
 „ tæ sententiæ huic Sanctæ Sedi reservatæ,  
 „ aliisque pœnis ejusdem sanctæ Sedis arbitrio  
 „ taxandis, præcipit cunctis & singulis Fide-  
 „ libus quocumque gradu ac dignitate, etiam  
 „ Episcopali & majori, imò & Cardinalitiâ  
 „ fulgentibus, ut si deinceps de materiâ attri-  
 „ tionis præfatæ scribent, vel libros aut scri-  
 „ pturas edent, vel docebunt, vel prædicabunt,

„ vel alio quovis modo pœnitescentes aut scho-  
„ lares caterosve erudient, non audeant alicu-  
„ jus scholasticæ censuræ, alteriusve injuriæ,  
„ aut contumeliæ notâ taxare alterutram sen-  
„ tentiam, sive negantem necessitatem aliqua-  
„ lis dilectionis Dei in præfata attritione ex  
„ metu gehennæ concepra, quæ hodie inter  
„ Scholasticos communior videtur; sive asse-  
„ rentem dictæ dilectionis necessitatem, donec  
„ ab hac sancta Sede fuerit aliquid in hac re  
„ definitum: statuitque præterea decretum hoc  
„ sive illius exemplar affigi ad valvas Basilicæ  
„ Principis Apostolorum de Urbe, &c. Quod  
integrum decretum referre operæpretium du-  
ximus, ut eorum cohiberetur licentia, qui no-  
stram de alicujus amoris Dei ad veram pœni-  
tentiam necessitate sententiam sugillare præsu-  
munt. Sed agè ad rem veniamus, si tamen priùs  
sacri timoris honestatem ac utilitatem tantisper  
commendaverimus.

*Utilitas & honestas timoris ex metu ge-  
hennæ concepti.*

Prior ergo pars, quæ asserit timorem ex  
metu gehennæ conceptum, quo perculsus pec-  
cator incipit odisse peccatum, actum esse salu-  
tarem, ex his quæ alibi agentes de sacro timore  
diffusè satis disseruimus, manifesta est. Eam  
tum Concilii Tridentini definitionibus, tum  
Augustini testimoniis, tum ratione S. Thomæ,  
tum potissimùm apertis Scripturæ locis de-  
monstravimus, quæ ex integro repetere super-  
vacaneum foret. Fundamenta etiam Lutheri  
occupa-

occupavimus, distinguentes in timore illo substantiam actûs à servilitate ejusdem: & licet ista honesta non sit, illam tamen per se, & ex natura sua esse bonam pluribus ostendimus.

Ad eorum tamen quæ ibi diximus, lucem & confirmationem advertendum est ex Augustino in Psal. 127. triplicem esse timorem: primus mala temporalia formidat, cum timet quis ne ægritudo, damnum, orbitas, alicujus amissio chari, exilium, carcer, aut aliqua tribulatio accidant. Alter timor est gehennæ, seu pœnæ æternæ, quo quis non in hac terra pati timet, sed gehennas timet, quibus terret nos Dominus, quo timore mens à peccato se continet. Tertius timor castus est, quo quis amore justitiæ timet à Deo quem diligit separari. Porro de secundo timore nondum casto, qui pœnas timet, quo quis timore facit quidquid boni facit, non timore amittendi boni divini, sed timore patien- di malum, non timens ne perdat amplexus pulcherrimi Sponsi, sed timens ne mittatur in gehennam æternam, ait inibi Augustinus: *Bonus est iste timor, utilis est, etsi non perman- surum dicat in sæculum sæculi, quod solius casti proprium esse affirmat. Ejusdem distinctionis meminit S. Pater serm. 18. de verbis Apostoli, cap. 4. 5. & 7. ubi postquam redarguit homines timentes pœnas temporales, nec timen- tes æternas, quia vanum est timere amittere bona terrena peritura, quæ auferre non possumus; de timore ignis æterni subjungit tamen: *Quare non committis adulterium? Et respondebis: Quia timeo gehennam, timeo supplicium ignis æterni, timeo judicium Christi, timeo societatem* diabo. i,*

diaboli, ne puniar ab illo, cum illo ardeam. Quid dicturus sum? Male times, quomodo tibi dicebam de adversario, quia quarebat corpus tuum occidere? Ibi enim rectè dicebam, Male times; securum te fecit Dominus tuus dicens: Nolite timere eos qui occidunt corpus. Modò cum dicis, gehennam timeo, ardere timeo, in æternum puniri timeo: quid dicturus sum, Male times, vanè times? Non audeo, quandoquidem ipse Dominus ablato timore subiecit timorem, ubi dixit: Nolite timere eos qui corpus occidunt, postea non habent quid faciant: sed eum timete qui habet potestatem & corpus, & animam occidere in gehennam ignis: ita dico vobis, hunc timete. Cùm ergo Dominus timorem incusserit, & vehementer incusserit, & repetendo verbum comminationem geminaverit, dicturus ego sum, Male times? Ita non dicam. Planè time. Nihil melius times: nihil est quod magis timere debeas. Ergo ex mente Augustini timor ex metu gehennæ conceptus bonus, honestus, & labis purus est, utpote quem S. Doctor non audet dicere malum & vanum, quem potius discernit à timore mercenario unum malum temporale formidante; quem utilem esse affirmat & peccata cohibentem, denique quem initium sapientiæ esse, & præparare ad charitatem inculcat.

Unde observat Sanctus Pater, nunquam vel certè rarò peccatorem ad amorem justitiæ nisi sacro illo timore exstimulatum pervenire. Rarissimè accidit, inquit lib. de catechis. rudibus, cap. 5. imò verò nunquam, ut quisquam veniat volens fieri Christianus ( & idem dicito de malo Christiano, qui veniat volens fieri bonus.



bonus per Pœnitentiam Christianus ) qui non sit aliquo timore Dei perculsus, Et in Psal. 149. Nisi, inquit, timore incipiat homo Deum colere, non perveniet ad amorem : initium sapientia timor Domini. Incipit ergo à vinculis ferreis, & finitur ad torquem aureum. Hinc Doctor sanctissimus comparat timorem illum setæ, qua introducitur linum : Si nullus timor, inquit, non est quâ intret charitas : sicut videmus per setam introduci linum, quando aliquid suitur. Seta prius intrat, sed nisi exeat, non succedit linum : sic timor primò occupat mentem : non autem ibi remanet timor ; quia ideo intravit, ut introduceret charitatem. Quapropter nihil nobis opus est in demonstranda hujus timoris utilitate & honestate, tam manifestis non modò testimoniis, sed etiam argumentis, quæ in præfatis insinuantur, à Divo Augustino commendatâ. Major opera collocanda est in altera tituli parte, utpote inter Catholicos Doctores controversa.

*Timor ex metu gehennæ conceptus sine aliquo amore & inchoata dilectionis motu ad justificationis gratiam recipiendam nunquam sufficit, nequidem in Sacramento ullo, etiam Pœnitentia.*

Contendunt plures recentiores, attritionem peccatorum ex solo metu gehennæ conceptam, etiam ab omni Dei amore divulsam, sufficientem esse ad gratiam in Sacramentis saltem mortuo

mortuorum recipiendam : quod etiam nonnulli ad alia Sacramenta vivorum extendunt; cùm quis, inquit, putans se esse contritum & amore Dei permotum, reapse tamen charitate & dilectione caret, soloque gehennæ timore percellitur; quia tunc, inquit, Sacramenta gratiam infundunt homini, quem supponunt detestari peccata, subindeque nullo ad gratiam recipiendam obice præpediri. Nihilominus

Secunda speculationis pars; affirmans nunquam sufficienter hominem ad justificationem sine aliquali Dei amore præparari, ostenditur. Primùm iis omnibus testimoniis, quibus præceptum amoris Dei stabilitur. 1. Joan. 3. *Qui non diligit, manet in morte.* 1. Cor. ultimo: *Si quis non amat Dominum nostrum Jesum Christum, sit anathema.* At manens adhuc in morte & anathemate percussus, utique non est ad gratiam recipiendam satis paratus. Ergo timor quivis ab omni Dei dilectione sejunctus, tametsi bonus & ad conversionem permovens, nequit esse ultima & sufficiens ad gratiam recipiendam dispositio.

Quod si dicas, præceptum amoris Dei in usu Sacramentorum non urgere, sed alio posse tempore opportuno impleri: hæc, inquam, si dicis, nihil dicis, & veritati apertissimæ contradicis. Tum quia etsi sive præceptum charitatis tunc urgeat, sive non, de quo statim; attamen si Sacramentum ei confertur qui est à tali præcepto penitus aversus, gratiam utique non infundet, quam impertire nequit manentibus in morte, anathemati obnoxiiis, & ab amore Dei desertis, quales, sacro testante eloquio, homines sunt

sunt, qui nullo dilectionis affectu cidentur. Tum quia gratia sanctificans est effusio divinæ dilectionis; quos enim Deus ut filios diligit, muneribus suæ bonitatis adornat. At ex D. Thoma Deus in ordine supernaturali non diligit nisi diligentes se, juxta illud, *diligentes me diligo*: quin ipse amor Dei diligentes non facit. Ergo gratiam justificationis non nisi diligentibus se Deus impertit.

Sanè si vera est opposita sententia, evacuari præceptum dilectionis Dei, & ad nihilum redigi necesse est. Etenim si absque ullo amoris motu justificationis gratia quocumque tandem modo obtineri potest, poterit etiam homo absque dilectione Dei salutem consequi, cum justificato & gratia habituali perfuso denegari non possit vita æterna; gratia quippe sanctificans est germen gloriæ, constituens filios adoptivos. Filius porro hæres est, juxta illud Apostolicum: *Si filii, & hæredes; hæredes quidem Dei, cohæredes autem Christi*. Ergo sine illo dilectionis actu adultus & justificabitur, & salvabitur. Ergo in lege gratiæ & charitatis non tenebitur ad dilectionem Dei Christianus. Quod profectò pius & catholicus refugit sensus, & universæ S. Thomæ doctrinæ adversatur. Affirmat enim S. Doctör, gloriam uni charitati respondere; charitati, inquam, non habituali duntaxat, sed actuali in adultis: sic enim habet I. p. quæst. 12. art. 6. *Plus participabit de lumine gloria, qui plus habet de charitate; quia ubi major est charitas, ibi est majus desiderium*.

Res fiet exemplo planior & illustrior. Supponamus peccatorum post deperditam baptismatis

matris gratiam, multosque annos in flagitiis omne genus transactos, gehennæ timore concussus detestari peccata, & ad Sacramentum pœnitentiæ absque ullo amoris sensu accedere; mox post exomologesin sacro ritu peractam, & acceptum absolutionis beneficium, repentinâ morte correptum è vivis excedere. Quæro, vel ille salutem consequuturus est, vel non? Si salutem obtinet: ergo inane est dilectionis præceptum, siquidem adultus nullo elicitio dilectionis actu ad sortem pervenit Beatorum; & in lege gratiæ & amoris peccator sine amore salvabitur, qui nec in ipsa lege timoris sine dilectione salutem poterat obtinere: ac proinde legis amoris privilegium erit à diligendi Dei obligatione immunitas. Si dicas ipsum defectu amoris Dei minimè fore salvandum: ergo etiam defectu dilectionis non fuit iustificatus, cum supposito rerum cursu à divina providentia instituto, repugnet planè hominem justum, filium Dei, amicum Sponsi, hæredem gloriæ, à regno excidere & deturbari.

Quod autem dictum est, præceptum dilectionis Dei in usu Sacramentorum non urgere, idest posse peccatorem nullo elicitio dilectionis actu Sacramenta solo timore Dei periculum usurpare, à veritate prorsus alienum esse ostenditur, & simul secundò nostra resolutio suadet. Ille non accedit fructuosè ad Sacramentum Pœnitentiæ, qui non est ex toto ad Deum corde conversus; quam conversionem omnes ferè sacrarum litterarum pagina loquuntur & præcipiunt. At juxta Patres vera non est, & multò minùs totalis conversio, nisi cor Dei dilectio inspiret & immutet. *Tria*, inquit  
Magnus

Magnus Gregorius in cap. 15. lib. 1. Reg. in unoquoque consideranda sunt veraciter pœnitente, videlicet conversio mentis, confessio oris, & vindicta peccati: nam qui corde non convertitur, quid prodest ei si peccata confiteatur? Peccatum quod diligitur, confitendo minimè deletur. Nonnulli quidem sunt qui peccata confitendo aperiunt, sed non convertendo nequaquam detestantur: hi profectò confitendo nihil agunt; quia quod loquendo ejiciunt, amando introducunt. Unde & salubriter confiteri volentibus Scriptura intimat dicens: Corde creditur ad justitiam, confessio autem fit ad salutem. Quid est corde credere ad justitiam, nisi voluntatem dirigere ad fidem per dilectionem operantem? Cùm ergo quis cordis intentionem ad justitiam per amorem dirigit, per initium bonæ voluntatis fructum habet bonæ conversionis. Ergo sine amore justitiæ, qui à Dei qui summa justitia est, dilectione divelli nequaquam potest, bona nequit esse conversio. Amorem porrò justitiæ sine amore Dei inveniri non posse docet Augustinus epist. 144. his verbis: Tantùm porrò quisque peccatum odit, quantum justitiam diligit, quod non potest lege terrente per litteram, sed spiritu sonante per gratiam. Gratia autem quæ fons est aquæ salientis in vitam æternam, quatenus à lege terrente distinguitur, utique in Deum amandum permovet, dicente eodem Patre: Inspiratio dilectionis ipsa gratia est.

Id ipsum tradit S. Bernardus epist. 11. Puto, inquit, de illa charitate dictum: Lex Domini immaculata convertens animas, quod sola videlicet sit, quæ ab amore sui & mundi avertere possit

*possit animum, & in Deum dirigere. Nec timor quippe, nec amor privatus convertit animam: mutant interdum vultum vel actum, affectum nunquam. Ergo ut cordis verè in Deum convertatur affectus, Bernardo authore, dilectione Dei opus est in Deum dirigente, ab amoreque sui & mundi avergente.*

Probatur tertio: Impossibile est peccatum aulorum etiam in Sacramento remitti sine veræ Pœnitentiæ motu, quia cùm peccatum adulti sit macula ex actibus pravis impressa, planè repugnat, ut supra fusè monstratum est, voluntariam illam maculam abstergi, nisi sinceris pœnitentiæ actibus retrahetur: unde ad contritionem & juris divini læsi reparationem peccatores jure naturali obligari certum est, & docet S. Thomas 3. p. quæst. 84. art. 7. in corpore, & ad 1. à quo jure eximi homo nullâ ratione potest. Atqui sine casto Dei amore vera nequit esse peccatoris pœnitentia; pœnitentia enim, quæ est quædam justitiæ species, Deo læso satisfacere connititur, & revera illi satisfacit. At nemo qui Deum læsit, Deo satisfacit vel satisfacere unquam sine dilectione potest: ille namque non satisfacit, qui quod abstulit non restituit. Porro peccator peccando à Deo quantum in ipso fuit rationem ultimi finis auferre præsumpsit, eam in creatura perversissimè collocans, utendisque fruens: sicut ergo affectu à Deo rationem ultimi finis abstulit, ita affectu illi restituere tenetur: restituere autem affectu rationem ultimi finis, est finem ultimum in Deo amando quærere, cùm sola voluntas in finem amore feratur. Ergo impossibile est, veram esse sine amore Dei, summique

boni & ultimi finis nostri dilectione pœnitentiam. Unde Augustinus serm. 7. de Tempore: *Pœnitentiam*, inquit, *certain non facit, nisi odium peccati, & amor Dei.* Et S. Thomas 3. p. quæst. 83. art. 6. *Actus virtutis pœnitentia est contra peccatum ex amore Dei.* Et quæst. 86. art. 6. docet, *requiri ad rationem vera pœnitentia, ut displiceat peccatum, quia est contra Deum super omnia dilectum.* Et lib. 4. contra Gentes, cap. 72. *Primum*, inquit, *quod requiritur in pœnitentia, est ordinatio mentis, ut scilicet mens convertatur ad Deum, & avertatur à peccato, dolens de commisso, & proponens non committendum; quod est de ratione contritionis: hac verò mentis ordinatio sine gratia esse non potest.* Et præclare, & juxta apertè S. Chrysostomus hom. 4. in 2. epist. ad Cor. *Cùm peccaveris, ingemisce, non quòd pœnas daturus sis, nihil enim hoc est; sed quòd Dominum tuum offenderis, tam benignum, tam te amantem.*

Confirmatur utraque superior ratio ex Augustino: Ad veram conversionem & fructuosam pœnitentiam requiritur bona voluntas, ut per se notum est; sicut enim malâ voluntate peccamus, ita bonâ voluntate convertimur, & à commutabilibus bonis ad incommutabile revertimur. At ex Augustino sine amore Dei non est bona voluntas. *Quasi verò*, inquit lib. de grat. Christi, cap. 2. *aliud sit bona voluntas quàm charitas?* Et lib. 1. ad Bonif. c. 9. *Charitas sola vult bonum.* Et lib. 2. cap. 9. *Quid est enim bona cupiditas, nisi charitas?* Et Bernardus epistolâ laudatâ: *Charitas convertit animas, quas facit & voluntarias*, utique bonâ voluntate. Et ratio est, quia talis est voluntas, qualis

& amor ; sicut talis arbor , quales fructus : porro talis est amor , quale objectum quod diligitur ; ideo impii dicuntur abominabiles sicut ea quæ dilexerunt : & juxta Philosophos actus speciem ab objectis fortiuntur , & moralitas objecti in actus refunditur voluntatis. At Deus summum & solum bonum est , solusque voluntatis humanæ finis : Ergo quæ tale bonum non amat voluntas , quomodo bona dici potest , quæ verum & unum bonum , quæve suum finem nondum diligit , sed pœnas duntaxat amore sui reformidat ? Quomodo bona est , quæ summo hono nondum amore inhæret , quæ Deo frui non concupiscit , quæ quantum creaturas dilexerat peccando , tantum nunc diligit Deum pœnitendo ?

Confirmatur rursus utraque ratio paulò superiùs proposita : ut homo peccator quocumque tandem modo justificetur , necesse est ut ad peccatum motu detestationis , & ad Deum motu prosecutionis feratur , sicque juxta verbum S. Remigii ad Clodovæum , incendat quod adoraverat , adoret quod incenderat : alioquin non erit nova cordis vita , nova in Christo creatura , nec fiet juxta Ezechielis c. 18. præceptum *spiritus novus , & cor novum* : quod & Deuteronomii cap. 4. apertissimè injungitur his verbis : *Cum quaesieris Dominum Deum tuum , invenies eum ; si tamen toto corde quaesieris , & tota tribulatione anima tua.* Et Isaiæ 2. *Convertimini ad me in toto corde vestro.* Ad Deum autem motu prosecutionis fertur , & toto corde convertitur , qui ipsum diligit ; amor quippe pondus est voluntatis , quo fertur quocumque fertur. Ergo ad justificationem etiam



per Sacramentum recipiendam non sufficit timor pœnæ, nisi adsit amor justitiæ, quo Deum amore prosequamur. Et sanè si juxta veridicam Angelici Doctoris sententiam à nobis in tractatu de gratia propugnatam, tenetur puer in ipsa prima rationis aurora ad Deum sincero corde converti, ipsi ut ultimo fini se suaque subicere, ab ipsoque sumere vitæ rationalis primordia qui est alpha & omega, principium & finis: converti autem ad Deum, in illumque se & sua omnia referre sine amore non potest, quia sola voluntas circa finem negotiatur, nec negotiatur nisi amando: à fortiori peccator dum in novitate vitæ post patrata flagitia ambulare vult, ad Deum tenetur amore converti, qui unum sibi cor præberi petit. Nam si puer baptizatus, qui nec peccato originali inficitur, nec ullo adhuc crimine baptismalem innocentiam violavit, in Deum se amore referre astringitur, quanto magis qui à Deo propriam voluntate recessit, ab ultimo fine suo se submovit, & Creatorem creaturis postposuit? Puer non potest incipere vitam rationalem sine motu ad Deum; quomodo ergo peccator sine illo incipiet christianam? Puer non quia peccavit, sed ne peccet, ad Deum debet amore ferri: & homo post peccatum, ut peccatum proprium sanet, non debet ad Deum dilectione moveri? Expedire quidem se ab hoc argumento valent, qui S. Thomæ sententiam non amplectuntur, negando suppositionem: at Theologus Thomista nunquam isti argumento satisfaciet, vel verisimilem afferet unquam probabilis disparitatis rationem.

Confirmatur tertiò eadem ratio: Non potest

test esse vera cordis ad Deum conversio, nisi sit dolor de peccato, ut est offensa Dei, injuria Deo illata, & privatio amicitia ejus: si enim quis de peccato duntaxat doleat, quia nocet sibi, non in Deum, sed in se converteretur. Atqui nemo potest dolere de peccato, ut est offensa Dei, injuria ipsi intentata, & privatio bonæ gratiæ & amicitia ejus, nisi magis placeat Deus, magis placeat justitia, gratia, ac amicitia Dei; quia ut dictum est, omnis dolor, omneque odium in amore fundatur: & sicut nequit ullus dolere de aliquo, quod bonis temporalibus priveret, nisi quia ei bona temporalia placent: ita de peccato, ut injuria & privatio amicitia Dei est, nemo dolere potest, nisi quia justitia Deo reddenda, & amicitia Dei voluntati placet. At voluntati Deum non amanti non placet amicitia Dei; amor enim à complacentia in objecto amato divelli ne quidem ratione potest. Ergo sine casta Dei dilectione nulla potest esse vera cordis conversio.

Probaturn quartò: Dolor ad justificationem etiam in Sacramento habendam necessarius excludit omnem peccandi affectum; ex Tridentino enim sess. 14. c. 4. contritio imperfecta, quæ attritio dicitur, ad Dei gratiam in Sacramento pœnitentiæ impetrandam disponere valet, si voluntatem peccandi excludat; dolor verò qui sine amore Dei ad justificationem non disponit, profectò ad justificationem sufficere nequit. Atqui sine casto amore justitiæ, seu Dei justitiæ fontis, excludi nequit omnis peccandi voluntas. Ergo sine amore Dei & casto amore justitiæ dolor ex metu gehennæ conceptus non est ad gratiam in Sacramento reci-

piendam sufficiens. Major propositio est evidens, & apud Adversarios in confesso. Minor verò multipliciter demonstratur. Tum quia, ut docet Augustinus epist. 144. *Tantum quisque peccatum odit, quantum justitiam diligit. Inimicus ergo justitia est, qui pœna timore non peccat: amicus autem erit, si ejus amore non peccat.* Nam qui gehennas metuit, non peccare metuit, sed ardere: ille autem peccare metuit, qui peccatum ipsum sicut gehennas odit. Tunc enim verè timebit peccare. Ergo qui justitiam non diligit, peccatum non odit: ergo sine amore justitiæ non excluditur, nec stirpitis evellitur omnis peccandi voluntas; & ideo *inimicus justitia* ab Augustino dicitur, qui uno ~~pœna~~ timore non peccat, non quòd timor malus sit, sed quia voluntatem peccati non evellit. Tum quia peccatum est privatio justitiæ, cū n sit dictum, factum vel concupitum contra legem æternam: ergo non potest excludi omnis peccandi voluntas sine casto justitiæ amore; nam ut ait Augustinus lib. 2. contra adversar. legis, cap. 7. *Desiderium peccandi non extinguitur nisi contrario desiderio rectè facientis, ubi fides per dilectionem operatur.* Et ratio est, quia omne odium in amore fundatur: odium ergo peccati, prout est privatio justitiæ, ab uno justitiæ amore proficiscitur. Hinc D. Thomas quæst. 28. de veritate, art. 3. *In adultis, inquit, requiritur immutatio actus voluntatis ad justificationem; sunt enim per actum voluntatis ad aliquid inordinatè conversi: qua quidem conversio immutari non potest, nisi per actum contrarium voluntatis.* Ergo juxta D. Thomæ Principia conversio in peccatum, quod est privatio

ratio iustitiæ , immutari non potest , nisi per actum contrarium ; videlicet per amorem iustitiæ. Tum quia illud per se non excludit omnem peccandi voluntatem , quod potest annexam habere peccandi voluntatem ; dolor enim qui voluntatem peccandi excludit , ut benè observavit P. Suarez 3. p. disput. 10. sect. 4. is esse debet , cui voluntas peccandi ex se repugnet , alioquin voluntatem peccandi per se & ex propriis non excluderet , nec proinde ad iustificandum valere posset. Atqui *timor servilis potest habere annexam voluntatem peccandi* , inquit D. Thomas 2. 2. quæst. 59. art. 9. & ideo non est numerandus inter septem dona Spiritus sancti , licet sit à Spiritu sancto. Ergo timor ille qui est impulsus Spiritus sancti , est bonus ille quidem , ad iustificandum tamen nunquam & nusquam sine iustitiæ amore sufficit. Tum quia non excluditur voluntas peccandi nisi per bonam voluntatem ; bonam , inquam , eo sensu , quod non solum pœnas fugiat , sed quod bene afficiatur erga iustitiam. Atqui , ut sexentis locis docent Augustinus , Fulgentius , & alii gratiæ Christi defensores & expositores , tunc sine bonam inspirat gratia victrix voluntatem , quando facit ut Deus qui est ipsa iustitia , magis nos delectet , quàm bona terrena quibus irretitus appetitus antea fruebatur. Sufficiant hæc præclara verba ex expositione Augustini in epist. ad Galat. cap. 5. vers. 22. *Regnant ergo speciales isti fructus in homine , in quo peccata non regnant. Regnant autem ista bona , si tantum delectant , ut ipsa teneant animum , ne in peccati consensionem ruat. Quod enim amplius nos delectat , secundum id operemur necesse est.*

*Ut v. g. occurrat forma speciosa foemina, & mo-  
 vet ad delectationem fornicationis: sed si plus  
 delectat pulchritudo illa intima & sincera spe-  
 cies castitatis per gratiam, quae est ex fide Chri-  
 sti, secundum hanc vivimus, & secundum  
 hanc operamur, ut non regnante in nobis pec-  
 cato ad obediendum desideriis ejus, sed regnan-  
 te justitiâ per charitatem, cum magna delecta-  
 tione faciamus quidquid in ea Deo placere  
 cognoscimus. Tum demum, quia non excludi-  
 tur omnis peccandi voluntas, quandiu pecca-  
 tum secundum se & in se à circumstantiis præ-  
 cipiui placet; tunc enim amor peccati intus  
 latet, intusque rea est voluntas, ut saepe dixit  
 Augustinus, & nominatim epist. 144. Times  
 ardere, noli peccare: non agitur foris negotium  
 cupiditatis, ipsa tamen cupiditas intus est ho-  
 stis. Atqui peccatum tandiu secundum se pla-  
 cet, quandiu non amatur justitia, & Deus om-  
 nis justitiæ fons: nunquam enim, ut diximus,  
 voluntas odisse potest unum contrarium, nisi  
 ex amore contrarii ejus; subindeque peccator  
 peccati amans nunquam detestabitur peccatum  
 quâ peccatum est, nisi in justitiam & honestatem  
 in se & propter se feratur. Poterit quidem hic &  
 nunc illud odisse propter gehennam intentatam  
 & malè agentibus imminentem, amorem tamen  
 illius absolutè retinebit, nisi ex amore justitiæ  
 peccati turpitudinem in se spectatam abomine-  
 tur. Ergo sine Dei & justitiæ ejus amore non  
 extirpatur omnis peccandi voluntas. Qui sanè  
 amor, licet imperfectus, talis debet esse ut ex illo  
 quodcumque bonum dimittere, quodcumque  
 malum pati potius paratus sit qui convertitur,  
 quàm à justitiâ quam diligit recedat; nisi enim  
 ita*

ita sit comparatus, non excludet pœnitentia omnem peccandi voluntatem. Porro amor ille non est dilectio iustitiæ humanæ, sed divinæ, quæ prima diligenda occurrit, prima per fidem monstratur, & cui primùm à peccatore satisfaciendum est.

Probatur quintò, & magis confirmatur ratio præcedens: Quem ex miro timore gehennæ de peccato pœnitet, habet ille quidem voluntatem consequentem, ut ita dicam, non peccandi; idest, peccare in illis circumstantiis & periculis sibi imminentibus refugit: retinet tamen voluntatem quam vocare possumus antecedentem peccati secundùm se spectati, & præcisi à circumstantiis; quia nimirum peccatum non odit quia peccatum est, hoc ipso quod non amat iustitiam, sed illud ut causam damni hîc & nunc detestatur. Quod ex doctrina S. Thomæ 1. 2. quæst. 6. art. 7. omnium Theologorum & Philosophorum Moraliùm calculo probatâ manifestè convincitur; nempe operationes ex metu factas esse quidem voluntarias simpliciter & hîc & nunc, esse tamen secundùm quid & secundùm se involuntarias. Mercator v.g. ingruente tempestate vult merces pretiosas hîc & nunc in mare projicere; nollet tamen eas abjicere, sed retinere: unde timor mortis, ob quem illas projicit, mercium affectum non excludit: unde & illa mercium jactura voluntaria est simpliciter voluntate consequente, sed secundùm quid & voluntate antecedente involuntaria; unde non nisi ægro & repugnante animo eas projicit, quia earum secundùm se spectatarum affectum non deponit. *Qui per metum aliquid agit*, inquit S. Thomas loco

M. 5;

citato ad 2. manet repugnantia voluntatis ad id quod agitur secundum quod in se consideratur, & ideo quod per metum agitur quodammodo est involuntarium. : : : Timidus agit contra id quod etiam secundum se vult. Unde hoc timorem inter & concupiscentiam discrimen statuit, quod ille affectum non evellit, ista totum affectum immutat. Ergo qui meto timore pœnæ à peccato recedit, affectum peccandi non excludit, sed retinet: & tamen ad veram conversionem, ad conversionem ex toto corde ad gratiam recipiendam omninò necessariam, omnem prorsus excludi & extirpari voluntatem peccandi necesse est: ergo solus pœnarum timor ad gratiam justificationis recipiendam nunquam sufficit, quoad divina dilectio, excluso omni peccati affectu & voluntario gustu, cor totum in Deum commutaverit. Hinc præclare & appositè Augustinus epist. 144. *Inaniter putat victorem se esse peccati, qui pœna timore non peccat: quia etsi non impletur foris negotium mala cupiditatis, ipsa tamen mala cupiditas intus est hostis. Et quis coram Domino innocens invenitur, qui vult fieri quod vetatur, si subtrahas quod timetur? Ac per hoc in ipsa voluntate reus est, qui vult facere quod non licet fieri; sed ideo non facit, quia impune non facit. Et concione 29. in Psalmum 118. expendens illud: Confige timore tuo carnes meas, à judiciis enim tuis timui, sic habet: Timor iste quo non amatur justitia, sed timetur pœna, servilis est, quia carnalis est, & ideo non crucifigit carnem. Venit enim peccandi voluntas, qui tunc apparet in opere, quando operatur impunitus. Cùm verò pœna creditur*

*sequitur*



*sequutura, lætenter vivit, vivit tamen. Mallet enim licere, & dolet non licere quod lex vetat: quia non spiritualiter delectatur eius bono, sed carnaliter malum metuit quod minatur.*

Itaque timor pœnæ bonus quidem est; sed ad justificationem etiam in Sacramento recipiendam sufficere non potest; quia impossibile est quod tollatur voluntas antecedens, affectusque peccati secundum se, nisi in se displiceat ipsa ratio peccati & offensæ Dei: implicat verò in adjecto, ut aiunt, displicere peccatum: ut peccatum est & offensæ Dei, nisi ametur & Deus: cum enim peccatum sit privatio justitiæ, & offensæ Dei sit veluti malum Dei, nunquam displicebit malitia, nisi placeat justitia quâ privat; nunquam displicebit offensæ Dei, nisi placeat bonum divinum: sicut quia malum pœnæ est privatio bonè esse, in tantum displicet pœna, in quantum placet bonè esse quod exertit: & eatenus displicet triste, quatenus amatur delectabile; displicet turpe, quia amatur honestum; displicet amarum amanti dulce. Ergo ut displiceat malum ut privans justitiâ, ut offendens & displicens Deo, debet profectò justitia, debet Deus fons omnis justitiæ sincero corde amari. Ergo nondum omnis stirpis eradicatus est affectus peccati, quando sola pœna sine ullo Dei amore timetur. Hinc Augustinus sæpissimè docet, conservare illum interius peccandi voluntatem, ac proinde non in toto corde converti, nec de corde puro & optimo detestari peccatum, qui non amore justitiæ, sed timore pœnæ peccatum odit. *Quicumque faciebat, inquit lib. de spirit.*



& litt. cap. 8. quod lex jubebat, non adjuvante spiritu gratia, timore pœna faciebat, non amore justitia; ac per hoc coram Deo non erat in voluntate, quod coram hominibus apparebat in opere. Unde sic timentes epist. 120. & tract. 9. in 1. epist. Joan. comparat uxori, quæ timens virum abstinet ab adulterio, ne damnetur à viro: comparat leoni & lupo non rapientibus prædam, quia latratu canum, & clamore pastorum, & terrore circumdantium revocantur à præda. Ita serm. 15. & 19. de verbis Apostoli: *Leo venit, leo redit: prædam non rapuit, malitiam non posuit. Nunquid quia ovem non tulit, ideo lupus venit, & ovis rediit? Lupus venit fremens, lupus redit tremens: lupus tamen est fremens & tremens.*

Ex quibus S. Doctor concludit, quod hætenus stabilitum est, timore scilicet pœnæ sine amore justitiæ non converti voluntatem, nec sanari cupiditatem. Si talis est adhuc justitia tua, inquit serm. illo 15. cap. 6. *justitia non est, quâ tibi consulis ne torquearis. Quid magnum est pœnam timere? Quis enim non timet? Quis latro? Quis sceleratus? Quis nefarius?* Sed hoc interest inter timorem tuum timoremque latronis, quod latro timet leges hominum, & ideo facit latrocinium, quia sperat se fallere leges hominum: tu autem leges eius times, pœnam eius times, quem fallere non potes: nam si fallere posses, quid non fecisses? Ergo & concupiscentiam tuam malam non amor tollit, s. d. timor premit. Ex quibus patet Augustinum non loqui de timore merè naturali (ut occupetur tacita responsio) qualis est timor latronis, sed de timore etiam illo quem dirigit fides, quæ  
quis.

quis eum timet quem fide credit à se falli non posse; qui sanè timor, sicut & fides ipsum dirigens, supernaturalis est, à Spiritu sancto immisus. Quod & apertè declarat serm. 29. de verbis Apostoli, his verbis: *Audeo dicere, si timore gehenna non facis malum, est quidem in te fides, quia credis futurum Dei iudicium: gaudeo fidei tuae, sed timeo malitia tua.* Ergo timor ille qui à fide supernaturali dirigitur, quique proinde supernaturalis & ipse est, malitiam voluntatis sine amore Dei nondum evacuat: ac consequenter ad justificationem, nisi adsit amor Dei, sufficere nequaquam potest.

Probatur sextò, magisque firmantur rationes factæ: Non potest esse vera pœnitentia solidaque conversio, nisi peccator in se reversus verum habeat efficaxque divinorum servandorum præceptorum propositum, ut patet ex definitione contritionis, & per se liquet; cùm enim peccatum sit contra legem, non excluditur voluntas peccandi nisi verâ observandæ divinæ legis voluntate. Nec sufficit voluntas inefficax, quæ dicitur *velleitas*, quæ non vult, sed *wellet*: quia voluntate languidâ, semisauciâ, quæ ex toto non vult, & ideo non ex toto imperat, Deus nequaquam contentus est, qui toto sibi corde, totâ animâ, totis viribus, totâ contritione cordis sibi præcipit ancillari. Unde voluntatibus semivolentibus & seminolentibus referendum esse infernum S. Bernardus veridicè attestatur. Hinc suspectas esse lacrymulas doctas mentiri, & tam multas pœnitentias inanes, falsas, larvatas, Patres inculcant: quia ut i. p. Pastoral. cap. 9. ait Magnus Gregorius: *Sapientia sibi*

sibi de se mens ipsa mentitur, fitque ut aliud intimus intentio supprimat, & aliud tractantis animo superficies cogitationis ostendat. Atque adeo in peccatoribus legis Dei servandæ verum & in corde impressum consilium non habentibus impletur illud Psalmographi, Psal. 77. *Dilexerunt eum in corde suo: cor autem eorum non erat rectum cum eo.* Impletur & illud Propheticum Osee 10. *Divisum est cor eorum* (inter cælum & terram, legem & officium motibus imperfectis appetens, reapse tamen creaturis adhærens & infixum in limo profundi: conans, sed frustra; emitens, & non datur ultra; veniens ad partum, & vires non habens pariendi: ) *citò interibunt.* Quia conversio illa non liberat à morte peccati, quod ad æternam mortem citò obventuram viam sternit ac munit. Atqui sine amore Dei nequit esse efficax observandæ divinæ legis voluntas: talis namque voluntas propositum observandorum omnium & singulorum mandatorum Dei efficaciter importat, quia qui peccat in uno, factus est omnium reus. Ergo talis voluntas indivulsa est à proposito efficaci observandi divinæ dilectionis mandatum, quod est primum & magnum mandatum, ex quo universa lex pendet & Prophetæ: At nequit esse efficax consilium diligendi Dei sine amore Dei; velle enim sincerè & ex corde Deum diligere, est ipsum reverà amare, cùm voluntas nihil nisi amore velit. Unde Magnus Gregorius hom. 30. in Evangelia: *Quis mente integrâ, inquit, Deum desiderat, profectò jam habet quem amat: neque enim quisquam posset Deum diligere, si eum quem diligit, non haberet.* Verè ergo Deum di-

ligit.

ligit, qui Dei amandi verâ, integrâ, & sincerâ voluntate tenetur. Et S. Augustinus tract. 74. in Joan. *Quomodo Dominus dicit: Si diligitis me, mandata mea servate, & ego rogabo Patrem, & alium Paracletum dabit vobis: cum hoc dicat de Spiritu sancto, quem nisi habeamus, nec Deum diligere possumus, nec ejus mandata servare? Aut quomodo mandata servabimus, ut eum accipiamus, quem nisi habeamus, mandata servare non possumus?* Et paucis interpositis sic quæstioni illi satisfacit: *Restat ut intelligamus Spiritum sanctum habere qui diligit, & habendo mereri, ut plus habendo plus diligat.* Cum ergo quis sincerè vult Deum diligere, jam habet Spiritum sanctum auxiliantem, qui omnis est dilectionis fons: propositum namque diligendi, non potest à naturæ viribus, uti Pelagiani impiè affirmabant, proficisci: habet, inquam, Spiritum sanctum per auxilium ad dilectionem moventem, & in Sacramento diffusâ charitate habebit inhabitantem; & tunc anima Deo donante, & dilectione actibus crescente & plus diliget, & Spiritus sancti donis amplioribus abundabit.

*Solvuntur objectiones.*

Primum Adversariorum argumentum, in quo magnopere confidunt, desumitur ex Autoritate Concilii Tridentini sessione 14. ubi sic habetur: *Contritionem imperfectam, qua attritio dicitur, quoniam vel ex turpitudinis peccati consideratione, vel ex gehenna & pœnarum me-*

tu communiter concipitur, si voluntatem peccandi excludat, cum spe veniæ declarat ( Sancta Synodus ) non solum non facere hominem hypocritam & magis peccatorem ; verum etiam donum Dei esse, & Spiritus sancti impulsus, non adhuc quidem inhabitantis, sed tantum moventis, quo pœnitens adjutus viam sibi ad justitiam parat. Et quanvis sine Sacramento pœnitentia per se ad justificationem perducere peccatorem nequeat, tamen eum ad Dei gratiam in Sacramento pœnitentia impetrandam disponit.

**H**ac scribentem Authorem mors oppressit, ut minimè mireris plures & graves objectiones hîc tacitas, non inopiâ sanè solutionis, sed hac infelici necessitate.

Verum quàm minimè nos urgeat hoc argumentum, ex his intelligi potest, quæ accuratè superius docuimus, timorem pœnarum non excludere prorsus voluntatem peccandi, nisi quatenus aliquem initialem justitiæ amorem includit. Unde intelligenda est Concilii auctoritas de timore non destituito omni prorsus amore Dei & justitiæ, sed qui hujus amoris inchoati adjunctione adjutus voluntatem peccati radicitus extirpat. En aliam Concilii auctoritatem, ex qua liquidò intelligitur, quàm germana sit hæc nostra expositio. Disponuntur, inquit de peccatoribus sess. 6. cap. 6. ad ipsam justitiam, dum excitati divinâ gratiâ & adjuti, fidem ex auditu concipientes liberè moventur in Deum, credentes vera esse quæ divinitus revelata & promissa sunt. Atque illud in primis, justificari impium per gratiam eius, per redemptionem qua est in Christo Jesu : & duci peccatores

peccatores se esse intelligentes à divina iustitia timore , quo utiliter concutiuntur , ad considerandam Dei misericordiam se convertendo in spem eriguntur , fidentes Deum sibi propter Christum propitium fore , illumque TANQUAM OMNIS IUSTITIÆ FONTEM DILIGERE INCIPIUNT , AC PROPTEREA MOVENTUR ADVERSUS PECCATA , per odium aliquod & detestationem , hoc est per eam pœnitentiam , quam ante baptismum agi oportet. Et idem dicendum de Sacramento pœnitentiæ; utrumque enim similem dispositionem requirit in adultis , ut eos peccatis mortuos vivificet.

Sed ut hæc solutio magis illustretur , non abs re fuerit hic attexere quid senserint de partibus pœnitentiæ ipsi Tridentini Theologi , qui interfuere sessioni ex qua suum argumentum eruunt Adversarii , referente Cardinali Pallavicino lib. 12. histor. Concil. Trident. par. 2. cap. 10. pag. mihi 315. his verbis : [ Diego Laines ch'era il primo à ragionare fra minori Theologi , condannando la seconda parte del secondo articolo , dice : Che al Sacramento si richiedevan la penitenza , il timore , la dilezione , la contrizione , l'assoluzione. Fù parimente annoverata per necessaria la dilezione da Giacomo Ferrusio Spagnuolo Theologo del Vescovo di Segorbe : & con questo il reprovo il pre nominato articolo , adducendo che n'è soli terrori non è la dilezione , la quale assolutamente fa di mestiero , havendo affermato Christo : *Le si remettono molti peccati , perche molto amò.* E disse , amò in passato , pero chè la dilezione precedente la

„ la remissione. Et l'Apostolo : *La tristizia, la*  
 „ *quale è secondo Dio* ( cioè spiegava il Ferru-  
 „ sio, secondo Dio amato ) *opera la penitenza*  
 „ *in salute.* Et nel capo 2. à Romani : *La*  
 „ *benignità di Dio vi adduce à penitenza.* On-  
 „ de Sant' Agostino dice : Senza l'amor non si  
 „ dà la grazia. Richiedeva egli per tanto in-  
 „ nanzi à ogni cosa un primo moto verso  
 „ Dio, in significacion del quale si dicessero  
 „ quelle quelle parole d'ella Scrittura : *Con-*  
 „ *vertiti, Signor, à te.* E, *fo sto alla porta, e*  
 „ *picchio : voi sempre faceste resistenza allo*  
 „ *Spirito sancto :* E, *sporsi la mano, e non fù*  
 „ *chi rimirasse.* Appresso à cio un' atto di fede,  
 „ che però fù scritto : *Chi si accosta à Dio,*  
 „ *conviene che creda.* E, senza la fede è im-  
 „ possibile il piacere à Dio. Quindi nasce, dis-  
 „ correva egli, che l'huomo detesta i peccati,  
 „ surge in speranza, e comincia ad amare;  
 „ onde Iddio infonde la prima grazia. Il quale  
 „ amore però non è naturale, mà è fatto d'alla-  
 „ grazia di Dio, berche l'amor naturale à cio  
 „ anche adiuti. Così riputava il Ferrusio.  
 „ E Melchiorre Avosmediano, che all'ora era  
 „ Theologo del Vescovo di Baduioz, e che  
 „ ritorno poi al Concilio di Pio come Vescovo  
 „ di Guadix, dice che prima ci dogliamo per  
 „ la pena, indi per Dio, e dipoi ci confessia-  
 „ mo. E Bernardò Colloredo Domenicano  
 „ Theologo del Vescovo di Forlì, annomero  
 „ per necessario il timore, la detestatione, e la  
 „ fede; dalla qual nasca l'esperanza, e da que-  
 „ sta la dilezione. Lo stesso parere diè Fran-  
 „ cesco Contrera Minore Osservante. Et in ve-  
 „ rita, per quanto io scorgo da gli atti, l'inten-  
 zione

„ zione de Theologi fù di condannar l'errore  
„ de gli Eretici che riprovavano come cattivo  
„ il timor della pena ; e non di sentenziar la  
„ questione scholastica : se così fatto timore,  
„ non solo senza la contrizione perfetta ( del  
„ che appena fù lite , come vedrasi ) mà ezian-  
„ do senza ver un eccitamento d'amore im-  
„ perfetto basti alla remission de peccati nel  
„ Sacramento. E ciò si fa chiaro dalla prova  
„ ch' el Concilio apporta della sua dottrina in  
„ questo articolo nel capo quarto : la quale,  
„ ch' el pentimento de Niniviti mosso da re-  
„ ma, giovo loro : essendo certo che à quel  
„ tempo non vi havendo Sacramento di peni-  
„ tenza , quel timoroso pentimento non basto  
„ per se al perdono ; ma solo valse ad impetrar  
„ nuova grazia , col cui ayuto vi si aggiugneste  
„ l'affetto della carità , da tutti confessato per-  
„ necessario alla giustificazione avanti alla lege  
„ nuova.

„ Nella congregazione de Padri pocci trova-  
„ rono questo punto. Solo io trovo qualche  
„ cenno dell'opinione , che non sia necessario  
„ l'amore nel discorso dell'Arcivescovo di  
„ Granata. Là dove Giovanni Emiliano Spa-  
„ gnuolo Vescovo di Tuy sostiene l'altra estre-  
„ ma sentenza , che fosse di mestieri la contri-  
„ zione perfetta : ne per tutto ciò argui si ch'el  
„ Sacramento non rimetta i peccati da che li  
„ trova rimessi per l'efficacia della precedente  
„ contrizione ; imperochè questa medesima  
„ ciò faceva in virtù del Sacramento , il cui  
„ voto ella contiene.

„ Altro à questo è da sapere , che di poi nè  
„ decreti della dottrina s'erano messe tali paro-  
le:



„ le : Quella contrizione la quale i Theologi  
 „ chiamano attrizione, per esser' ella imper-  
 „ fecta, e sola conceptuta per la considerazione  
 „ della bruttezza del peccato, ò per timor del-  
 „ l'inferno, e delle pene, il qual timor è chia-  
 „ mato servile; quando escluda la volontà di  
 „ peccare, e esprima qualunque dolore de  
 „ commessi peccati: Statuisse e dichiara questo  
 „ Sancto Concilio, che non solo non fa l'hu-  
 „ omo ipocrita, e maggiormente peccatore  
 „ (come alcuni non dubitano di bestem-  
 „ miare) mà è bastevole alla contrizione di  
 „ questo Sacramento; & e dono di Dio al im-  
 „ pulso verissimo dello Spirito sancto, non  
 „ già ancora habitante, mà solo movente. Col  
 „ quale il penitente ajutato (concio sia cosa  
 „ che appena possa essere senza qualche movi-  
 „ mento d'amore verso Dio) si fa strada alla  
 „ giustizia, è per esso si dispone ad impetrar più  
 „ agevolmente la grazia di Dio. Ma il Vesc-  
 „ covo pre nominato averti qu'era falso, appe-  
 „ na potersi mai dare un tal dolore senza l'a-  
 „ more: E che intorno all'esser questa attri-  
 „ zione bastevole alla costituzione del Sa-  
 „ cramento, si che all'attrito si remettano i  
 „ peccati in virtù dell'assoluzione sopravve-  
 „ gnente, erano varie le sentenze de gli auto-  
 „ ri; e però doveva levarsi. Onde il decreto  
 „ fù riformato come stà ora. J Quæ Cardinalis  
 verba sic latinè reddimus.

Didacus Lainius, qui primo loco inter mi-  
 nores Theologos sermonem habebat, dan-  
 nans posterioris articuli partem dixit: Sacra-  
 mento esse necessariam poenitentiam, timorem,  
 dilectionem, contritionem, absolutionem. Di-  
 lectionem

lectionem pariter tanquam necessariam enumeravit Jacobus Tremisius Hispanus, Segobienſis Episcopi Theologus, & per hoc eundem articulum improbavit, causatus solis terroribus minimè contineri dilectionem, quæ absolutè necessaria est, cùm Christus pronuntiaverit: *Remittuntur ei peccata multa, quoniam dilexit multum: & dilexit*, inquit, per præteritum, quia dilectio remissionem antecessit. Et Apostolus: *Tristitia quæ est in Deum* (hoc est, interpretatur Ferrusius, *secundum Deum dilectum*) *operatur pœnitentiam in salutem*. Et cap. 2. ad Rom. *Benignitas Dei vos adducit ad pœnitentiam*. Unde S. Augustinus ait, *Absque amore gratia non datur*. Idcirco exigebat is ante omnia primùm quendam, ut vocant, motum in Deum, ad quem significandam ea Scripturæ verba dicerentur: *Converte nos Domine ad te*. Et, *Ego sto ad ostium, & pulso. Vos semper Spiritui sancto resististis. Extendi manum meam, & non fuit qui aspiceret*. Postea verò actum fidei; unde scriptum erat, *Accedentem ad Deum oportet credere. Sine fide impossibile est placere Deo*. Hinc oritur, aiebat ille, in homine peccatorum detestatio, assurgitque in spem animo, & amoris initium habetur. Inde verò primam gratiam Deus infundit. Qui tamen amor naturalis non est, sed à divina gratia efficitur, tametsi naturalis amor ad id etiam conferat. Ita Ferrusius.

At Melchior Avosmedianus, tunc Pacensis Episcopi Theologus, postea verò regressus ad Pii Concilium Guadicensis Episcopus, dixit: Prius nos propter pœnæ metum dolere; deinde propter Deum; postea verò, aiebat, peccata  
confi

confitemur. Et Bernardus Colloredus Dominicanus Forolivienſis Episcopi Theologus, tanquam necessaria numeravit timorem, detestationem ac fidem ex qua spes oriatur, & ab hac dilectio. Ejuſdem ſententiæ fuit Franciſcus Contreras ex ordine Minorum Obſervantium: & re verâ, quantum ex actis conjicio, Theologorum mens erat, ut error hæreticorum damnaretur, tanquam quid inhonestum, improbantium pœnæ timorem; non item ut ferrent ſententiam de ſcholastica quæſtione, An huiusmodi timor non ſolùm abſque contritione animi perfecta (de quo controverſia fuit, ſicuti patebit) ſed etiam abſque eo quod ullus excitetur amor imperfectus, ſufficiat ad peccatorum remiſſionem in Sacramento. Id verò clarè liquet ex ipſa probatione Concilii, quâ huius articuli doctrinam firmat cap. 4. nimirum, Ninivitarum pœnitentiam ex timore proſectam ipſis profuiſſe, cùm certum eſſet eo tempore quo Sacramentum pœnitentiæ adhuc non extabat, eam formidoloſam pœnitentiam minimè ſuffeciſſe per ſeipſam ad peccatum delendum, ſed vim tantummodò habuiſſe ad impetrandam novam gratiam, cujus ope adjiceretur charitatis effectus, quem omnes neceſſarium fuiſſe fatentur ante novam legem ad juſtitiam recipiendam.

In Patrum conventu id pauci attigerunt. Aliquod duntaxat veſtigium reperio opinionis negantis neceſſitatem amoris, in iis quæ Granatenſis Archiepiſcopus diſputavit. At verò Joannes Æmilianus, Hiſpanus, Episcopus Tudenſis extremum oppoſitæ ſententiæ tenuit, hoc eſt, opus eſſe contritione perfectâ, nec tamen  
hinc

hinc argui, per Sacramentum peccata non remitti, quippe quæ Sacramentum inveniret remissa præcedentis contritionis efficacitate; siquidem, aiebat, ipsa contritio id præstat virtute Sacramenti, cujus votum in ea continetur.

Præterea oportet scire, postea decretis doctrinam complexis hæc verba fuisse adjecta: *Illam contritionem, quam Theologi attritionem vocant, quod imperfecta sit, & solum vel à turpitudinis peccati consideratione, vel ex gehenna & poenarum metu, qui servilis timor dicitur, concipiatur, si voluntatem peccandi excludat & dolorem qualemcumque de commissis delictis exprimat, statuit hæc Sancta Synodus & declarat, non solum non facere hominem hypocritam, & magis peccatorem ( ut quidam blasphemare non verentur, ) sed etiam sufficere ad Sacramenti hujus constitutionem, ac donum Dei esse & Spiritus sancti impulsus verissimum, non adhuc quidem inhabitantis, sed tantum moventis, quo pœnitens adjutus, cum sine aliquo in Deum motu vix esse queat, viam sibi ad justitiam munit, & per eum ad Dei gratiam facilius impetrandam disponitur. Sed prænomi-  
natus Episcopus monuit, falsò dici hujusmodi dolorem sine amore vix unquam concipi posse. Quod autem hæc attritio satis esset Sacramento constituendo, ita ut homini attrito remittantur peccata vi absolutionis supervenientis, variare Authorum sententias, adeoque id esse tollendum; quamobrem decretum fuit prout nunc extat, reformatum, & prout à nobis refertur.*

Objiciunt secundo Adversarii : Pœnitentia in lege nova longè majorem habet efficaciam  
ad

ad justificandum hominem, quàm Sacramenta quæ in veteri lege ordinabantur ad delenda peccata; proindeque longè minorem in subiecto recipiente dispositionem requirit: Atqui eandem requireret, si non sola attritio ex metu gehennæ concepta sufficeret, sed præterea exigeretur amor Dei: Ergo in nova lege ad gratiam in Sacramento pœnitentiæ recipiendam sufficit sola attritio ex metu gehennæ concepta sine ullo prorsus amore Dei.

Respondeo hoc ipso argumento, cui tanto-pere confidunt Adversarii, ab eorum sententia magis me magisque alienari. Quis enim credat illam esse legis amoris seu Christianæ prærogativam, ab amore Dei homines eximi ut justificentur? Sine amore non justificabatur Judæus, & sine amore Dei justificabitur Christianus? In lege timoris non satis erat ad habendam gratiam timor, & satis erit timor in lege dilectionis? Itane illud est Christianismi privilegium, pro quo Christus venerit, passus & mortuus fuerit, Sacramenta instituerit, miserit Spiritum sanctum, ut necessitatem amoris à pœnitentia excluderet, faceret Christianos solo timore justificandos? Quis hoc Evangelicæ legis amantium credat? Nolite, quæso, nolite annuntiare in Geth, neque in compitis Ascalonis: ne fortè lætentur filix Philisthiim, ne exultent filix incircumcisorum. Quàm longè ab ea sententia distat Augustinus! tantùm enim abest ut privilegium novi Testamenti in immunitate pœnitentiæ à necessitate amoris, solo timore contentus constituat, ut potius hanc esse characteristicam utriusque Legis differentiam perpetuò asserat, quod nimirum timor pœnæ ad  
veteris

veteris Testamenti legem, amor verò justitiæ ad novi Testamenti gratiam pertineat. Neque enim fides in eis per dilectionem operabatur (ait Augustinus lib. 3. ad Bonifacium, cap. 4. loquens de his qui solo timore acti legem servabant,) sed terrena cupiditas metusque carnalis. Sic autem præcepta qui facit, proculdubio invitus facit, ac per hoc in animo non facit: mavult enim omnino non facere, si secundum ea qua cupit & metuit, permittatur impune. Ac per hoc in ipsa voluntate intus est reus, ubi ipse qui præcipi, inspicit Deus. Tales erant filii terrena Ierusalem, de qua dicit Apostolus, servit enim cum filiis suis, pertinens ad testamentum vetus, à monte Sina in servitutem generans, quod est Agar. Et infra: Hi ad vetus pertinent Testamentum, quod in servitutem generat, quia facit eos carnalis timor & cupiditas servos; non Evangelica fides, spes, & charitas liberos. Hinc perpetuò docet, eos qui timore supplicii, quod lex minatur, non amore justitiæ sentiunt se abstinere ab opere peccati, sub lege, non sub gratia esse, ut variis locis, & nominatim lib. de nat. & grat. cap. 57. videre est, quia nimirum nondum liberi sunt, nec alieni à voluntate peccandi. In ipsa enim voluntate rei sunt; qua mallent, si fieri posset, non esse quod timeant, ut liberè facerent quod occultè desiderant. Idem docet Angelicus Doctor vestigiis Augustini fidelissimè insistens 1. 2. quæst. 107. art. 1. ad 2. Illi qui habent virtutem, inclinantur ad virtutis opera agenda propter amorem virtutis, non propter aliquam pœnam aut remunerationem extrinsecam; & ideo lex nova, cuius principalitas consistit in

*ipsa spiritali gratia indita cordibus , dicitur lex amoris. : : Et propter hoc etiam lex vetus dicitur cohibere manum , non animum ; quia qui timore pœna ab aliquo peccato abstinere , non simpliciter ejus voluntas à peccato recedit , sicut recedit voluntas ejus , qui amore justitia abstinere à peccato ; & propter hoc lex nova , qua est lex amoris , dicitur animum cohibere. Quin usqueadè amorem esse novæ legis differentiam , docet doctus à Domino S. Thomas , ut viros sanctos veteris Testamenti , qui gratiæ & charitatis impulsu bona operabantur , ad novam legem in antecessum pertinuisse velit ; Christianos verò ad opera pietatis uno metu percitos , antiquæ legis vetustatem etiam post Evangelium retinere. Fuerunt , inquit loco citato , aliqui in statu veteris Testamenti habentes charitatem & gratiam Spiritus sancti , qui principaliter expectabant promissiones spirituales & æternas . & secundum hoc pertinebant ad legem novam. Similiter etiam in novo Testamento sunt aliqui carnales nondum pertingentes ad perfectionem novæ legis , quos oportuit etiam in novo Testamento induci ad virtutis opera per timorem pœnarum. Denique juxta Augustinum : Brevissima & aptissima differentia Legis & Evangelii , timor & amor. Ita contra Donatum cap. 17. Et in expositione quarundam propositionum ex epist. ad Roman. Evidentissimè , inquit , duorum Testamentorum distincta sunt tempora : illud enim ad timorem pertinet , novum ad charitatem. Et lib. 1. ad Simplician. quæst. 1. Cùm verè sit opus legis , charitate fit , non timore ; quia charitas est gratia novi Testamenti. Quis autem credat*

credat dispositiones ad gratium novi Testamenti in Sacramentis novæ legis recipiendam, statui illius legis non debere esse consentaneas, & conditiones illius testamenti non sapere oportere?

Dices: Ergo difficilior erit lex Christi, utpote ad magis ardua obligans, necessitati contritionis onus adjiciens confessionis: atque adeo immerito jugum Christi dicetur suave, & onus leve.

Respondeo hoc argumentum principio & conclusione inde derivatâ peccare. Principio quidem, dum supponitur legem novam esse antiquâ laxiorem & remissiolem, nihilque ardui aut difficilis imperare, cui principio totum Evangelium è diametro adversatur. Quid enim in eo inculcatius, quàm arctam & angustam esse viam quæ ducit ad vitam; sequentibus Christum proponendam esse crucem, sui abnegationem, corporis mortificationem; regnum denique Christi vim pati, & violentos rapere illud? Quid aliud indicant ingeminata non sumendæ vindictæ, hostes ex corde diligendi, bonum pro malo reddendi, ipsi malis cogitationibus resistendi, aliaque patientiæ, paupertatis spiritûs, humilitatis, orationis, castitatisque præcepta? Ad consilia quod attinet nihil necesse est recensere quàm sint naturæ corruptæ repugnantia, & tamen Evangelii pars magna sunt. Non sustulit de medio Christiana Religio difficilia, sed auxit, dum intellectum in obsequium fidei mysteria rationem immensum superantia & obscurissima proponentis, & voluntatem in perpetuum corporis proprii odium & mundi contemptum captivavit, atque



res præscripsit ad sperandum arduas , ad operandum laboriosas. Præceptum ergo contritionis , quod attestante sacro Tridentino fuit quovis tempore necessarium , non debet à pœnitentia in lege nova removeri. Hinc veri amoris divini eximiâ vi moti Sancti Patres adversus illum malè blandientem dicendi modum tam acriter insurrexerunt. *Tolle sententiam* , inquit Hieronymus libro Dialogorum adversus Pelagianos secundo , *& rade de libro tuo , facilia Dei esse mandata.* Et mox locum 1. Joan. 5. *Mandata eius gravia non sunt , & præfatum ex Matth. II. expositurus , subjicit: Levia certum est Evangelii dixisse mandata ad comparationem superstitionis Iudaica , in qua varia ceremoniarum genera quarebantur , quæ iuxta litteram , & Apostoli Petri sententiam nullus potuit explere.* Et iterum : *Vis audire facilitatem præceptorum Dei ? Ausculta quod dicitur , Quàm arcta est via & angusta quæ ducit ad vitam ! Et pauci sunt qui inveniunt eam.* Non dixit , qui gradiuntur per eam , hoc enim difficillimum est ; sed qui inveniunt eam : pauci enim inveniunt , & multò pauciores ingrediuntur per eam. Et Augustinus lib. de Pastor. cap. 3. *Absit ut dicamus vobis : Vivite ut vultis , securi estote , Deus neminem perdit.* Et si in spectaculis volueritis oblectare animos vestros , ite , quid mali est ? Et festa ista quæ celebrantur per universas civitates in latitia conviventium , & publicis mensis seipsos , ut putant , jucundantium , re vera magis perdentium , ite , celebrate : magna est enim Dei misericordia , quæ totum ignoscat. Hac si dixerimus , fortè congregabimus turbas ampliores : & si sint quidam

qui

qui nos sentiant hac dicentes non rectè sapere, paucos offendimus, sed multos conciliamus. Quod si fecerimus, non verba Dei, non verba Christi dicentes, sed nostra, erimus Pastores nosmetipsos pascentes, non oves. Quare mirandum est & planè dolendum eorum studium, qui legis Christi suavitatem à mollita vel ablata præceptorum difficultate petunt, cùm potiùs Patres & veri deinceps Theologi eo Religionem Christianam commendabiliorem & prorsus divinam affirmant, quod cùm multa & ad credendum obscura, & ad sperandum ardua, & ad operandum difficilia proponat, per totum tamen fuerit orbem, repugnantibus carne & mundo propagata.

Sed longè graviùs conclusione peccat hæc objectio, quasi amor Dei difficultatem legis prægravet, quo solo præceptorum omnium labor mollitur, & dilatatis spatiis charitatis, ut loquitur Augustinus, tota dulcescit legis amaritudo. Præclare idem Pater serm. 47. de diversis, cap. 1. *Durum videtur quod Dominus imperavit, ut si quis eum vult sequi, abneget semetipsum. Sed non est durum, nec grave quod ille imperat, qui adjuvat ut fiat quod imperat. Nam & illud verum est, quod ei dicitur in Psalmo: Propter verba labiorum tuorum ego custodi vias duras; & illud verum est quod ipse dixit, jugum meum suave est, & onus meum leve. Quidquid enim durum est in præceptis, ut sit lene, charitas facit. Et in Psalm. 118. Conc. 22. expendens illud Davidicum, Quomodo dilexi legem tuam Domine, sic habet: Sæpe admonuimus laudabilem latitudinem, in qua nullus, cùm mandata Dei faci-*

mus, patimur angustias, intelligendam esse charitatem: propter quod etiam in magno isto Psalmo, cum superius dixisset, *Latum mandatum tuum valde*, in hoc sequenti versu ostendit, unde sit latum, dicens: *Quomodo dilexi legem tuam Domine. Dilectio igitur est latitudo mandati.* Non ergo in mitigando, vel minuendo, vel eliminando officiorum nostrorum rigore Evangelii lenitas sita est, sed tota quantitas est, ab una dilectionis dulcedine proficitur.

Ab eodem dilectionis fonte Christianæ legis suavitatem sacrum Tridentinum Concilium hausit sess. 6. cap. 11. Deus, inquit, *impossibilia non jubet, sed jubendo monet & facere quod possis, & petere quod non possis, & adjuvat ut possis.* Cujus mandata gravia non sunt, *cujus jugum suave est, & onus leve.* Suavitatem autem illius Domini jugi, & oneris levitatem sic probat: *Qui enim sunt filii Dei, Christum diligunt: qui autem diligunt eum, ut ipsi met testatur, servat sermones ejus, quod utique cum divino auxilio prestare possunt.* Concilii mentem assequutus est Catechismus Romanus ejusdem Sanctæ Synodi jussu editus, & B. Pii V. operâ publici juris factus. *Quin etiam, inquit Part. 3. num. 12. legis jussa non habere difficultatem ostendat Parochus: quod vel unâ hac ratione ex S. Augustino docere poterit, cum dicit: Qui, quasi, dicitur impossibile homini amare? Amare, inquam, Creatorem beneficium, Patrem amantissimum, deinde etiam & carnem suam in fratribus suis. At verò qui diligit, legem implevit. Quare Ioannes Apostolus præcepta Dei gravia non esse aperte testatur; nihil enim*  
*justius.*

justius, nihil cum majore dignitate, nihil majore cum fructu ab homine, teste B. Bernardo, exigi potuisset. Et num. 13. Quod si quis eam afferat excusationem, impediri se quominus Deum amet, infirmitate natura: docendum est eum qui amorem requisivit, amoris vim inferre cordibus per Spiritum sanctum: hic autem spiritus bonus petentibus à Patre cœlesti datur, ut merito S. Augustinus precatus sit: Da quod jubes, & jube quod vis. Quia igitur Dei auxilium præsto nobis est, maximè post Christi Domini mortem, per quam Princeps hujus mundi ejectus est foras; non est quod quisquam rei difficultate deterreatur, nihil enim est amanti difficile.

Denique tantum abest, ut ex eo capite Christi lex difficilior & gravior censenda sit, quod amoris & contritionis necessitatem imponat, quin potius sine amore Dei durissima lex Christi, sine vera contritione intolerabilis esset pœnitentiæ & confessionis praxis. Unde enim vera facilitas, nisi à dilectione sacras infundente delicias, peccati illecebras victrice delectatione superante, in eo quod amatur non laborante, aut si laboratur laborem amante? Ergo pœnitentes ab amore eximere, non est facilitatem accersere, sed dolorem super dolorem addere, dare afflictionem afflicto, & filios adoptionis in miseram Judæorum redigere servitutem. Onus quippe Confessionis per se durum durius est timenti, amanti verò suavissimum: quos enim verecundia & cupiditas obruit, hos devotio sancta laxificat, ut quæ Deo non placent respuentes, divinorum potius, sicut Ecclesia canit, repleantur delectationibus

mandatorum. Omnis ergo facilitas laborantibus, omnis solida consolatio mœstis eripitur, dum præceptum contritionis de medio tollitur, & à lacrymis pœnitentis divinæ dilectionis unctio removetur. Crudelis ergo est illa misericordia, vel potiùs misericordiæ larva, quæ pondere peccatorum, sub quo fatiscunt, oppressis, unius timoris jugum superimponit, & sarcinam Christi, quæ non pondus, sed pennas habet, nempe charitatem, specie lenitatis excludit. *Hæc sarcina gravis est, fides, spes, charitas?* inquit Augustinus serm. 22. de verbis Apostoli; *ista enim humilem, ista mitem reldunt. Et vide, quia oneratus non eris; si ipsum audieris; jugum enim meum lene est, sarcina mea levis. Quid est, levis est? Quid si habet pondus? Sed minus: plus habet avaritia, minus justitia. Nolo sic intelligas.* Hæc sarcina non est pondus onerati, sed ala volaturi. Habent enim & aves pennarum suarum sarcinas. Et quid dicimus? Portant illas, & portantur: portant illas in terra, portantur ab illis in cœlo. *Avi misericordiam velis prabere, avi prafertim astate, & dicas, Miseram istam aviculam onerant penne, & detrahas onus hoc, in terra remanebit, cui subvenire voluisti.* Porta ergo pennas pacis, alas accipe charitatis: hæc est sarcina, sic implatur lex Christi. Frustra ergo in exonerandis à charitate hominibus laborat Probabilistarum dura compassio, dura planè; sicut enim est aliquando misericordia puniens, ita & crudelitas parcens; dura, inquam, quia pœnitentibus solatium vel unum eripit; quo laboriosi baptismi ærumnæ mitigantur; dura, inquam, quia jugum charitatis eripit, quod ut

divinè.

divinè Bernardus epist. 341. scripsit, *portat potius quàm portatur, & quo crescit amplius, eo portabilius fit.* Et ratio horum omnium est perspicua, quia præcepta Evangelica mortificationis, pœnitentiæ, dilectionis inimicorum, Confessionis, aliaque observatu facilia aut difficilia relativè ad vires esse meritò dicuntur; viribus enim valenti leve onus est, quod est invalido importabile. Ergo tunc durius & difficilius est confessionis aliorumque Christianismi officiorum præceptum, cùm vires immi- nuuntur & franguntur; planius verò & facilius est, si vires augentur. Hæc verò Christiani hominis fortitudo in amore Dei & æterni boni sincero affectu tota sita est, eoque crescen- te augentur vires, decrescen- te deficiunt, pereunte evanescunt: hæc enim est, ut supra dicebat Augustinus, quæ latum facit mandatum Dei, illi innixus Apostolus omnia in confortante se poterat, quia sicut sine Deo nihil potest humana infirmitas, ita diffusâ per Spiritum sanctum charitate nihil non potest, & ut insignis vir Magister Avila aiebat, *alter veluti Deus efficitur.*

## REFLEXIO.

*Sicut exhibuistis membra vestra deservire immunditiæ & iniquitati ad justitiam, sic nunc exhibete membra vestra deservire justitiæ in sanctificationem.* Rom. 6: Quæ verba sic Augustinus epist. 144. interpretatur: *Quid enim est sicut illud, ita & hoc? Nisi quemadmodum ad peccandum nullus vos cogebat, timor, sed ipsius*

libido voluptasque peccati; sic ad justè vivendum non vos supplicii metus urgeat, sed ducatur delectatio charitasque justitia. Et serm. 17. de verb. Apost. cap. 5. Quando peccabatis, delectabamini in peccatis vestris: timor vos adducebat ad peccandum, an suavitas peccati? Respondetis: Suavitas. Ad peccatum suavitas adducit, ad non peccandum timor impingit? Amate justitiam quantum amastis iniquitatem. Digna est justitia qua à vobis impetret, ut exhibeatis illi quod exhibuistis iniquitati. Sit ergo in nobis timor castus, quo amore desideremus non videre cælum & terram, sed Deum cæli, & terræ, Deum nostrum videre, amare Deum cordis nostri. Videamus quid nobis in cælo servetur, & cogitantes, & æstuentes in cogitatione boni ineffabilis, quod nec oculus vidit, nec auris audivit, nec in cor hominis ascendit, non quæramus hoc vel illud in cælo, sed cum Propheta de corde bono, & casto canamus: *Quid mihi est in cælo, & à te quid volui super terram? Deus cordis mei, & pars mea Deus in æternum.* Cum Deus sit merces mea magna nimis, aliudne quæram in cælo vel super terram? Cum Deus sit bonum meum, aliudne formidabo malum quàm eo carere? Cum mihi servet Deus immortales divitias seipsum, ipsene volam à Deo in terra quod habent & impii, quod habent & mali, quod habent & facinorosi, quod habent & viri scelerati & fœminæ turpes, aurum, argentum, gemmas, familias? Absit ut pro magno desiderem aliquid à Deo meo habere super terram, cum servet se mihi in cælo Deus meus. *Quid enim intendere potest qui amor est,* inquit Augustinus serm. 4. de verbis



verbis Domini, nisi amare & amari? Quod est amare, verè & plenè assequutus est: restat ergo ut impleamus quod est amari.

Si quis non amat Dominum nostrum Iesum Christum, anathema sit. 1. Cor. 16. Quomodo ergo justificabitur pœnitens si non amat, qui quoadiu non amat anathema est? Cor, inquit Tertullianus lib. de anima, est principale in anima, & thesaurus in corporis recessu consecratus, ad quem respicit Deus: quia ut alibi dicit, Creatori diligendo Deus hominem edificavit, ut illi se totum homo traderet, à quo se totum habet: ergo qui Deum non amant, qui cor suum, ut loquitur Zacharias cap. 7: posuerunt ut adamantem, quorum cor induratur, ut ait Job 46. & stringitur quasi malleatoris incus, vel non habent cor, vel certè inane habent. Ergo purgemus pœnitentiâ amorem nostrum, & aquam dilectionis antea fluentem in cloacam, convertamus in hortum; & quales impetus habebamus ad mundum, tales habeamus ad artificem mundi, & vero cordis centro amore uniamur, à quo perfectionem, immobilitatem, satietatemque hauriemus. In Christi dilectione modus amoris nullus sit: sine modo nos dilexit, sine modo eum diligere debemus: modum dilectionis expressit, nos diligendo, pro nobis moriendo: nos quantum diligere eum debemus, non possumus: diligamus ergo Deum ex tota mente, ex toto corde, ex omni anima, & ex omnibus viribus nostris: hoc tantum quærit Deus, ultra non quærit.

Si recte Bernardo tract. de diligendo Deo, inexcusabilis est etiam infidelis, si non diligat Dominum Deum suum, clamat namque intus



*ei innata & non ignota ratio justitia, quia ex toto se illum diligere debeat, cui se totum debere non ignorat: si, inquam, inexcusabilis est etiam infidelis Deum non diligens, excusabilturne fidelis Deum non amans? Nam ut ait Augustinus serm. 69. de tempore: Reliquis bonis operibus interdum potest aliquis aliquam excusationem pratendere; in habenda vero dilectione nullus se potest excusare. Potest mihi aliquis dicere, non possum jejunare: nunquid potest dicere, non possum amare? Potest dicere, propter infirmitatem corporis mei non possum à carnibus, & vino abstinere: nunquid potest dicere, non possum diligere?*

Itaque qui diligitis Dominum odite malum, & peccati detestandi ratio sit Dei casta dilectio, seu ut Tertullianus lib. de pœnit. cap. 7. ait: Pœniteat amasse qua Deus non amat, quando ne nos quidem ipsi servulis nostris ea quibus offendimur, non odisse permittimus: obsequii enim ratio in similitudine animorum constituta est. Tunc bonum est odium, ut ait Gregorius Magnus hom. 37. quod non de malevolentia, sed de charitate procedit. Quandiur non est amor Dei, perseverat amor mundi: Dua namque amoris sunt, ut ait S. Leo alibi laudatus, ex quibus omnes prodeunt voluntates; rationalis enim animus, qui sine amore esse non potest, aut Dei amator est, aut mundi. Porro si amor mundi habitat, non est quò intret amor Dei: non potest homo amare quod æternum est, nisi destiterit amare quod temporale est: qui amat sæculum, amare Deum non potest; occupatum habet cor, nec gratiam potest accipere quæ offertur, si non vult dimittere quod tenebat.

Hinc

Hinc præclare Augustinus lib. 50. homiliarum, hom. 37. Est amor utilis, & amor noxius, amor amore impeditur: amor noxius secedat, & amor utilis succedat. Ut non capiant, pleni sunt: fundant, ut capiant: pleni sunt amore voluptatum carnalium, pleni sunt amore vita presentis, pleni sunt amore auri & argenti. Qui ergo pleni sunt, sic sunt quomodo vasa: vis ut intret mel, unde acetum nondum fudisti? Funde quod habes, ut capias quod non habes.

Quomodo ergo ad Deum convertitur, qui Dei de dilectione principale præceptum (sic vocatur à Tertulliano lib. 1. adversus Marcionem, cap. 4.) non custodit? Quomodo bona illius pœnitentis conversio est, qui bonam nondum voluntatem habet? Nam quomodo bona voluntas dici potest, quæ Deum summum bonum non amat, quæ Deum tanquam Deum, id est super omnia non amat, sine quo amore nullus quisque benè utitur creaturis? Nam ut ait Augustinus lib. 4. de Civit. cap. 7. Recta voluntas est bonus amor, & perversa voluntas est malus amor. Et in Enchiridio, cap. 117. Cum queritur utrum quisque sit homo bonus, non queritur quid credat, aut quid speret, sed quid amet: nam qui rectè amat, proculdubio rectè credit & sperat: qui verò non amat, inaniter credit, etiamsi sint vera qua credit; inaniter sperat, etiamsi ad veram felicitatem doceantur pertinere qua sperat.

Sed elicui, inquires, actum contritionis in enchiridione precum mearum conscriptum, quique in piis passim libellis circumfertur: Ergo satis compositus, satis præstructus, satis

tis sum ad absolutionem recipiendam paratus. Benè est, de bono opere non lapidamus te, actuum illorum formulas non modò non reprehendimus, sed laudamus: sed si momento verbis illis prolatis veram te consequi dilectionem reris, erras certè, & vehementer erras. Non ad arbitrium nostrum illabitur vera contritio, veraque dilectio, statim atque Deum ore vel mente nos diligere contestamur. Multi namque sunt qui ejusmodi actuum formulas ore proferunt, menteque revolvunt, qui germani Dei amoris ne vestigium quidem vel umbram habent tamen. Piæ quidem sunt ac religiosæ hæ actuum formulæ, sed inanes sunt ac fallaces, nisi revera in voluntate verum insit pondus, quo reapse in Deum mens casta rapiatur, quo Christo inservire, ei morem gerere, ejus voluntatibus obsequi toto corde studeat; nisi divinæ gloriæ augmento moveatur, ejus gaudiis gaudeat, ejus injuriis tabescat, nihilque adeo vereatur, ac ne qua in re ei displiceat, cuius amore tenetur; nisi à rebus caducis & mortalibus abstractus pœnitens, omnia arbitretur tanquam stercora, ut Christum lucrifaciat; nisi peccatum mortale instar mortis & supra mortem pertimescat, peccandique occasiones plusquam loca pestifera fugiat; nisi ita comparatus sit, ut malit bona, res, parentes, & amicos conculcare, quàm à Christi amabili servitute, & ab arctis Evangelii semitis discedere. Hæc nisi sentias, nisi in te factis deprehendas, te ipsum ludificas; ac frustra prolatis quibusdam oculis, vel susceptis Dei amoris cogitationibus sterilibus, Dei te amoris, veræ contritionis, salutaris pœnitentiæ actus edidisse.

edidisse tibi gratulabere, qui nullam veræ charitatis scintillam possides. Hanc ergo à Deo continuis gemitibus dilectionem postula, quæ cordis glaciem solvat, & in splendidas sacri amoris flammæ commutet; à Deo, inquam, qui gratiæ suæ munera iis est pollicitus, qui in iis ardenti studio flagitandis perseveraverint: *Omnis enim qui petit, accipit; & qui querit, invenit; & pulsanti, testante Veritate Matth. 17: aperietur. Promissa tua sunt Domine, inquit Augustinus lib. 12. Confess. cap. 1. & quis falli timeat, cum promittit veritas?*

## SPECVLATIO II.

*Gratia per pœnitentiam restituitur,  
ac cum ea virtutes & merita  
pristina reviviscunt.*

**I**Nter alios pœnitentiæ effectus, insignis est restitutio virtutum, & reviviscentia meritorum. Virtutes quidem restituuntur, quia per pœnitentiam dimittuntur peccata, non dimittuntur autem nisi per gratiam, nec gratia sine virtutibus ex ea adinstar proprietatum fluentibus infunditur. Idque significatur Lucæ 15, ubi pius Pater filium prodigum revertentem non solum osculatur fugans crimina, expellens noxam, cunctam nequitiam propellens; non solum procidit super collum ejus, ut erigeret jacentem; ut amoris onere onus tolleret peccatorum; sed etiam ne filio cicatricem, na-

vamve:

vumve relinqueret, citò proferri stolam primam, & dari annulum in manu ejus præcipit: quia ut ait Chrysologus serm. 3. *Paterna pietas contenta non est innocentiam reparare solum, nisi pristinum restituat honorem.* Calceamenta etiam pedibus dari jubet, ut nihil nudum virtutibus appareat, sed totus homo interior munitus sit, ne rursus offendat ad lapidem pedem suum, & scandalizatus corruat. In qua Prodigii conversione, veræ pœnitentiæ archetypo, quatuor indicantur ad veram hominis cum Deo reconciliationem perficiendam necessaria, quæ etiam Psalmo 50. ordine exprimentur. Nam primò Prodigus peccatum dolendo fatetur, & remissionem postulat criminis. *Pater peccavi*, & ibi: *Averte faciem tuam à peccatis meis.* Pœnitentiam verò sequitur infusio gratiæ & virtutum: *Proferre stolam primam*; & David: *Cor mundum crea in me Deus.* Gratiam justificantem fovet præsentia suâ & auxiliis Spiritus sanctus: *Et date annulum in manu ejus*, qui annulus est pignus Spiritûs sancti. Et David: *Spiritum sanctum tuum ne auferas à me; & spiritu principali confirma me.* Denique exiguntur fructus & opera pœnitentiæ, & *calceamenta in pedes ejus*, quibus & benè incedat, & bonorum operum exemplo alios doceat, juxta illud Apostoli: *Calceati pedes in præparationem Evangelii pacis.* Quod etiam intendit David dicens: *Docebo iniquos vias tuas.*

Quin etiam contingit pœnitentem aliquando in majori gratiâ, subindeque intensioribus virtutibus ornatum resurgere, nempe cùm intensiori pœnitentiâ percitus ad Deum revertitur;

tur ; gratia enim & cæteræ virtutes , & universim omnes formæ quæ possunt recipere magis & minus , secundum diversam subjecti dispositionem intenduntur & remittuntur. Quia ergo pœnitentes lapsibus suis facti humiliores , & cautiores , & ferventiores majori interdum ad Deum conatu revertuntur ; ideo abundantior nonnunquam habitum gratiæ & virtutum consequuntur , illumque stabilius custodiunt , quia humiliores redeunt atque doctiores. *Discunt enim* , inquit Augustinus lib. de corrept. & grat. cap. 9. *in ipsa via iusta cum tremore se exultare debere , non sibi arrogando tanquam de sua virtute fiduciam permanendi , nec dicendo in abundantia sua , Non movebimur in æternum ; propter quod eis dicitur : Servite Domino in timore , & exultate eum tremore , nequando irascatur Dominus , & pereatis de via iusta. :: Non habebat hunc timorem & tremorem , qui dicebat in abundantia sua , non movebor in æternum : sed quia filius erat promissionis , non perditionis , expertus , Deo paululum deserente , quid esset ipse : Domine , inquit , in voluntate tua prastitisti decori meo virtutem ; avertisti faciem tuam à me , & factus sum conturbatus. Ecco doctior , & ob hoc etiam humilior tenuit viam , jam videns & confitens in voluntate sua , Deum decori ejus prastitisse virtutem.* Quia ergo pœnitens lapsibus suis humilior , & in vindictam de se sumendam ferventior quandoque evadit , ideo ratione majoris dispositionis majorem etiam consequitur gratiam. Hinc Gregorius Magnus hom. 34. in Evangelia : *Qui errasse à Deo se considerant* , inquit , *damna præcedentia lucris sequentibus*

*tibus recompensant. Majus ergo gaudium de eis fit in cœlo: quia & dux in prælio plus eum militem diligit, qui post fugam reversus hostem fortiter premit, quàm illum qui nunquam terga præbuit, & nunquam aliquid fortiter fecit. Quod & alia similitudine in eandem sententiam peridonea illustrat idem Sanctissimus Pontifex, inquit: Sic agricola illam ampliùs terram amat, qua post spinas uberes fruges profert, quàm eam qua nunquam spinas habuit, & nunquam fertilem messem producit. Hanc pœnitentiæ superabundantis gratiam postquam abundavit delictum, pœnitentium fervori correspondentem extollit etiam os Chrysostomi aureum serm. de pœnitentia: O pœnitentia, inquit, qua vitam de interitu revocas, statum restauras, gratiam abundantiorē refundis: quomodo ager frugifer, aut vinea fecunda, aut arbor fructifera pinguescit.*

Reviviscunt etiam merita per peccatum mortificata, ut docet D. Thomas art. 5. & probatur ejus discursu ampliùs expenso & explicato. Quadruplex est hominis Christiani operum genus; alia enim sunt opera viva, alia mortifera, alia mortua, alia mortificata: viva ea sunt quæ à gratia ex influxu vel imperio charitatis proficiscuntur, justus enim ex fide per dilectionem operante vivit; mortifera sunt peccata lethalia, quibus homo spiritualis moritur, Deo qui est vita animæ, gratiâ & virtutum beatissimâ copiâ privatus; mortua sunt opera ex officio & objecto honesta, sed à principio vitæ spiritualis, charitate nimirum minime enata; mortificata sunt opera sancta & olim viva, adveniente tamen peccato mortali vi perducendi

Lucendi ad vitam æternam orbata, sicut plantæ & arbores asperæ hyemis algore mortificatæ, seu compressæ & coërcitæ, nec fructus, nec viridantia folia edunt: vel sicut aqua frigore nimio congelata non currit. De operibus vivis, vel mortiferis, vel mortuis nulla est difficultas; opera enim viva non indigent vitâ, mortifera repugnant vitæ, mortua nunquam vixerunt, quia nunquam à principio vitæ spiritualis processerunt; unde quam nunquam habuerunt vitam recuperare non possunt: unde ea opera quâmlibet videantur eximia, comparat D. Thomas sono citharæ, quæ dicitur vox mortuæ: quam similitudinem desumpsit ex Apostolo 1. Cor. 14. *Quæ sine anima sunt*, inquit, *vocem dantia, sive tibia, sive cithara, nisi distinctionem sonituum dederint, quomodo sciatur id quod canitur, aut quod citharizatur?* Hinc fit illa opera nihil prodesse, ut ait Apostolus c. 13. *Si tradidero corpus meum, ita ut ardeam, nihil mihi prodest*, nimirum ad salutem, quanvis prodesse possint ad remunerationem temporalem, ut docet Magnus Gregorius hom. 46. in Evangelia, expendens illud Abrahami ad divitem epulonem: *Recepiſti bona in vita tua. Hæc sententia*, inquit, *pavore plus indiget quàm expositione.* Nam si qui estis, qui in hoc mundo exterioris boni aliquid accepistis, ipsum ut ita dicam donum exterius perimescere debetis, ne vobis pro quorundam actuum vestrorum recompensatione sit datum; ne iudex, qui hic bona exteriora restituit, à restitutione boni intimi vos repellat; ne honor hic vel divitia, non ad-jumentum virtutis vobis, sed remuneratio sint laboris. Ecce enim dum dicitur diviti: Rece-

pisti:



*pisti bona in vita tua, indicatur & iste boni aliquid habuisse, ex quo in hac vita quadam etiam bona reciperet. Profunt etiam hæc opera ad hoc quod tolerabilior fiat ipsa damnatio, juxta illud Augustini lib. de patientia, cap. 26. Non possumus dicere, Schismatico melius fuisset ut Christum negando, nihil eorum pateretur: sed existimandum est, tolerabilius ei futurum judicium, quam si Christum negando, nihil eorum pateretur. Quare de solis operibus olim in charitate & ex charitate factis, & per peccatum mortificatis restat difficultas, & de his quod reviviscant,*

Probatur: Merita per peccatum mortificata reviviscere, est ad pristinam vitam redire: sed merita per peccatum mortificata, sincerâ cordis pœnitentiâ pristinam vitam in Sacramento recipiunt: ergo reviviscunt. Declaratur minor: Pristina meritorum vita in hoc sita erat, ut possent ad vitam æternam perducere: id verò per pœnitentiam consequuntur; merita enim licet actu non existant, remanent tamen in acceptance divina, & ideo quantum est in se, vim perducendi ad vitam æternam habent, nisi peccati posito obice impendantur, quod utique impedimentum pœnitentiâ removetur: ergo sublato per pœnitentiam peccato, efficaciam recuperant perducendi illum qui bene operatus est in vitam æternam, quod est per pœnitentiam reviviscere. Ergo opera per peccatum mortificata reviviscunt; & sicut ventus auferens nubem, nobis solem restituit, ita pœnitentiæ motus, tanquam removens prohibens gratiam gratum facientem, & virtutum ornatum, & merita antiqua nobis restituit. Vel si-

cut

cut tota natura frigore vel aquilone coërcita & foliorum vestitu nudata, flante verno austro veluti ad vitam revocata in varia sese explicat folia, flores edit, fructus parit, undæ procedunt, prata revirescunt, & lata camporum planities nudata elegantius circumvestitur: ita perflatus compunctione & amore animus per peccatum captivus solvitur; intellectus liberatus, Deo inspirante quæ recta sunt cogitat; voluntas terrenis capta & veluti paralytica fundit pietatis affectus, assumit pennas, volat, & non deficit, manus exserit, & habilis facta evadit in operando tota sedula, tota strenua, tota actiuosa & gnavia: merita denique redeunt peccatis præpedita, quia factus est in nobis fons aquæ salientis in vitam æternam, flavit auster & fugavit aquilonem; emisit verbum suum Deus, & liquefecit dura; flavit spiritus ejus, & fluxerunt aquæ, & aromata operum illorum. *Quomodo frigus ligat aquam, ne currat, inquit Augustinus in Psalm. 125. & nos illigati frigore peccatorum gelavimus. Auster autem calidus ventus est. Quando flat auster, liquefcit glacies, & implentur torrentes. Gelaveramus autem in captivitate, constringebant nos peccata nostra: flavit auster Spiritus sanctus, dimissa sunt nobis peccata, soluti sumus à frigore iniquitatis; tanquam glacies in sereno, sic solvuntur peccata nostra. Curramus ad patriam, sicut torrens in austro. Hanc gratiam postulabat Regius Propheta Psalm. 125. Converte, inquit, Domine captivitatem nostram (à peccato animas nostras ligante & in captivitatem miserrimam redigente ortam) sicut torrens in austro. Postulabat & Sponsa Canticorum cap. 4. Veni, inquit, auster, perfla*

*perfla hortum meum, & fluant aromata illius.* id est præcedentium virtutum & meritorum suavissimus odor & beatissima copia. Unde Chrysostomus hom. 6. in Genesim: *Per misericordiam Dei, inquit, si modo condemnare facta nostra, & jam sistere ignaviam voluerimus, poterimus statim ad pristinam abundantiam redire.*

Eandem meritorum mortificatorum reviviscentiam non obscure indicant Scripturæ juxta traditum à Patribus sensum intellectæ. Ezechielis 33. *Impietas impiis non nocebit ei, in quacumque die conversus fuerit.* Noceret autem plurimum, si veterum meritorum fructum impediret. Joëlis 2. *Reddam vobis annos, quos comedit locusta, bruchus & rubigo, & eruca,* id est præteritarum actionum mercedem, & donorum largitatem restituam, & faciam vos novis virtutum frugibus abundare, quia præcedentia opera perire Deus non passus est, ut exponit Hieronymus, qui mox addit: *Si post pœnitentiam autem Deus tantam ubertatem pollicetur, quid respondebit Novatus negans pœnitentiam, & reformari posse peccatores in pristinum statum, si digna fecerint opera pœnitentia?* Idem colligunt Theologi ex illis Apostoli verbis Galat. 3. *Tanta passis estis sine causa? Si tamen sine causa.* Ubi Apostolus quorundam à fide defectionem & in Judaïsimum prolapsionem exaggerat, quia tot bona opera & passionibus pro Christo toleratas inania redderent, quæ propterea sine causa, id est sine utilitate pertulissent: id tamen veluti retractans ait, *Si tamen sine causa,* quia effectu suo non sunt illa, si resipiscant, caritura. Videatur Hieronymus

ronymus in hunc locum, ubi & ait: *Quicumque ob Christi fidem laboraverit, & postea lapsus fuerit in peccatum, sicut priora dicitur passus fuisse dum peccat; sic rursus non perdit ea, si ad pristinam fidem & ad antiquum studium revertatur.* Idem etiam ex illis Hebr. 6. inferunt, ubi Paulus sic habet: *Confidimus de vobis meliora & viciniora saluti; non enim injustus est Deus ut obliviscatur operis vestri boni, & dilectionis quam ostendistis in nomine ipsius.* Quibus verbis, interpretantibus Anselmo, Theophylacto, & D. Thoma, ad pœnitentiam lapsos Judæos hortatur, quia Deus pristinae eorum dilectionis gloriam, utique essentialem, promerita non obliviscetur. Unde hæc verba expendens Sacrum Tridentinum Concilium sess. 6. cap. 16. sic fatetur: *Iustificatis hominibus, siue acceptam gratiam perpetuò conservaverint, siue amissam recuperaverint, proponenda sunt Apostoli verba: Abundate in omni opere bono, scientes quod labor vester non est inanis in Domino: non enim injustus est Deus, ut obliviscatur operis vestri, & dilectionis quam ostendistis in nomine ipsius. Et, nolite amittere confidentiam vestram, qua magnam habet remunerationem. Atque ideo benè operantibus usque in finem, & in Deo sperantibus proponenda est vita aterna, & tanquam gratia filiis Dei per Christum Iesum misericorditer promissa, & tanquam merces ex ipsius Dei promissione bonis ipsorum operibus & meritis fideliter reddenda. :: Nihil ipsis iustificatis amplius deesse credendum est, quominus plenè illis quidem operibus, qua in Deo sunt facta, divina legi pro huius vita statu satisfecisse,*

*& vitam aternam suo etiam tempore , si tamen in gratia decesserint , consequendam verè promeruisse censeantur. Ubi sacra Synodus pœnitentes innocentibus æquiparat , ut sicut istis rectè illud Apostolicum dicitur , abundante in omni opere bono ; ita & pœnitentibus meritò dicatur , non injustus est Deus , ut obliviscatur operis vestri boni. Ergo bonis operibus in charitate factis etiam peccato interruptis gloria respondet , quæ proinde reviviscere censenda sunt. Hinc Augustinus epist. 54. Deus facit etiam super tales ( relapsos pœnitentes ) oriri solem suum , nec minùs tribuit quàm antè tribuebat , largissima munera vite & salutis.*

### *Solvuntur objectiones.*

Objicies primò : Sunt aliquæ virtutes , quæ per pœnitentiam non redeunt , putà virginitas , quæ semel amissa restaurari vel recuperari nequaquam potest , juxta illud Hieronymi epistola 22. ad Eustochium : *Audenter loquar , cum omnia possit Deus , virginem suscitare non potest post ruinam.* Et rationem assignat D. Thomas 1. p. quæst. 25. art. 4. ad 3. Quia omnem corruptionem mentis & corporis Deus auferre potest à muliere corrupta : hoc tamen ab ea removeri non poterit , quod corrupta non fuerit ; sicut etiam ab aliquo peccatore auferre non potest quod non peccaverit , & quod charitatem non amiserit. Similiter fides per pœnitentiam non restituitur , quæ peccato mortali , nisi infidelitatis fuerit , definiente Concilio

Triden

Trident. sess. 6. cap. 15. & can. 28. non deperditur. Ergo non omnes virtutes per pœnitentiam restituantur.

Respondco per pœnitentiam restitui formale virginitatis, quod in proposito abstinendi ab omni venerea delectatione situm est, quanvis materiale virginitatis, nimirum integritas corporalis, omnis voluntariæ carnalis delectationis sensu & experimento perceptæ impatiens, minime restituatur; neque enim fieri ullâ potentiâ potest, ut qui delectationem illicitam voluntariè expertus est, eam non persenserit. Non recuperatur ergo *flor* virginitatis, nunquam marcescens, nunquam decolor: sed recuperatur virginitatis fructus, servandæ nimirum propositum castimonix. Quoad fidem verò & spem attinet, in virtutum resolutione & communi naufragio permanentes, dicendum restitui illas non secundum entitatem quæ permanet, sed secundum perfectæ & christianæ virtutis statum qui periit; quia redeunte virtutum omnium formâ charitate, novo splendore nitent, & pristinam perfectæ virtutis conditionem pristinumque vigorem recuperant.

Objicies secundo: Per peccatum merita extinguuntur, ad nihilumque redigitur totum præcedentium operum pretium, tota dignitas, tota satisfaciendi vis: sed quod extinctum & destructum est, de via ordinaria non redit; à privatione enim ad habitum non datur regressus: ergo merita per peccatum mortificata, vel potius ad statum mortis redacta, per pœnitentiam de via ordinaria & juxta consuetum divinæ providentiæ agendi modum non reviviscunt.

Respondeo, mortua quidem de via ordinaria non resurgere, imò nec peccata virtute supernaturali redire, quia Deus peccati causa esse nequit: sed mortificata aliquo impedimento coërcita iterum redire & veluti pullulare possunt. Per peccatum autem merita non omnino ad nihilum rediguntur, sed manent in acceptatione divina: quod verò non perducant in vitam æternam, suumque proinde non sortiantur effectum, ex obice peccati oritur, quo sublato antiquam efficacitatem recuperant. Maximè quia ut merita illa penitus morerentur, necesse esset ut omne spiritualis vitæ principium, à quo profecta sunt, ad nihilum redigeretur; quod tamen non contingit. Et si enim proximum earum principium, gratia nempe & charitas, peccato ad nihilum redactum sit, primitiva tamen bonorum meritorum origo, nimirum Christus Dominus, qui tanquam caput in membra, & tanquam vitis in palmites in opera pietatis influxit, vivit in æternum.

Instabis: Peccata & demerita per gratiam dimissa, novâ iteratorum flagitiorum prolapsione non redeunt, quia nimirum per gratiam priora peccata verè remissa, penitusque deleta sunt: ergo similiter merita per peccatum mortificata, per gratiam pœnitentiæ non reviviscunt, cum non minùs merita peccatum, quàm demerita gratia destruat; nec minùs in destruendo efficax sit malitia peccati infinita, quàm in ædificando finita pœnitentiæ virtus; nec minùs jus ad æternam gloriam aboleat peccatum, quàm gratia pœnæ sempiternæ reatum.

Respondeo certum esse, peccata semel per gratiam dimissa sequenti peccato non redire,  
 quanyis



quavis Hugo Victorinus, & Guillelmus Parisiensis id opposuerint. Cùm enim teste Apostolo Rom. II. *sine pœnitentia sint dona Dei*, peccata dono Dei dimissa per pœnitentiam nequaquam redeunt. Unde D. Prosper ad 2. Gallorum objectionem: *Qui recedit à Christo*, inquit, *& alienus à gratia finit hanc vitam, quid nisi in perditionem vadit? Sed non in id quod remissum est recedit, nec pro originali peccato damnabitur.* Et Gelasius Papa, cap. Finali, de pœn. dist. 4. *Divina*, inquit, *clementia dimissa peccata in ultionem ulterius redire non patitur.* Et rationem affert S. Thomas quæst. 88. art. 2. Quia peccata præterita per subsequens peccatum non revertuntur, neque quoad conversionem, quia prius peccatum potuit esse infidelitas, posterius verò avaritia, quâ non fit infidelis, cùm fides permaneat; præcedens etiam peccatum potuit esse avaritia, & subsequens prodigalitas; impossibile verò est contrarium esse causam sui contrarii, cùm potius ipsum pro virili expellat & destruere molietur: neque quoad aversionem, quæ ex conversione tanquam ex materia vel occasione causatur, quia opus Dei per opus hominis irritari non potest: priorum autem peccatorum remissio fuit opus Divinæ misericordiæ; unde per subsequens hominis peccatum irritari nequaquam potest, secundum illud Rom. 3. *Nunquid incredulitas illorum fidem Dei evacuabit?* Nec defectu conditionis à Deo conditæ, quasi Deus eâ tantùm lege remiserit peccata, ut ea iterum admittantur, adeo ut licet secundum præsentem justitiam peccata condonata sint, secundum præscientiam Dei tamen prævidentis



futurum relapsum non sint absolutè remissa, proindeque desinente per peccatum gratiâ, redeat culpa, redeat & reatus æternæ pœnæ. Non, inquam, hoc etiam modo peccata semel deleta redeunt, quia causâ absolutè posita, effectus absolutè sequitur: per pœnitentiam verò & Ecclesiæ Sacramenta gratia absolutè infunditur: ergo & absolutè ac simpliciter peccata condonantur; res enim semel destructa semper manet destructa, nisi de novo producat: & eodem modo Deus solvit in cœlo, quo Sacerdotes in terra, qui absolutè absolvent. Unde in Tridentino sess. 6. can. 17. & 23. sic definitur: *Si quis justificationis gratiam non nisi predestinatis ad vitam contingere dixerit; reliquos verò omnes qui vocantur, vocari quidem, sed gratiam non accipere, utpotè divinâ potestate predestinatos ad malum; atque adeo eum qui labitur & peccat, nunquam fuisse verè justificatum, anathema sit.* Peccatum ergo in justificatione virtute passionis Christi per pœnitentiam applicatæ semel dimissum non redit, quia non vindicat Deus bis in idipsum, ut habetur Nahum 1. juxta lectionem Septuaginta.

Observat tamen S. Doctor, peccata semel abolita per subsequens quadantenus redire, ratione ingratitudinis peccatoris sequenti peccato clementiam Dei & præteritæ remissionis gratiam contemnentis, & secundum duritiam suam & impœnitens cor thesaurizantis sibi iram in die iræ. Et secundum hoc intelligitur illud Jacobi 3. *Qui offendit in uno factus est omnium reus.* Quia nimirum quisquis post acceptam remissionem peccatorum ad vomitum redierit,

redierit, tantò graviùs punitur, quantò magis benignitate Dei abusus, veterum culparum acceptæ remissionis ingratus existit. Unde Ezechiel. 18. Dominus comminatur: *Si averterit se justus à justitia sua, & fecerit iniquitatem, omnes justitia ejus quas fecerit non recordabuntur.* Quia ut exponit Hieronymus, sicut justum antea prævaricatorem non prægravant antiqua delicta; sic peccatorem qui priùs justus fuerat, non juvant veteres justitiæ. Hinc in Evangelio à servo nequam debitum Dominus repetit, qui conservo suo debitum noluit dimittere, unde & tortoribus traditus est, quoadusque redderet ultimum debitum, ut patet Matth. 18. Non quòd aliquando debitum in inferno persoluturus sit, ubi nullum est corrigendi spatium, nullus exeundi aditus, nulla demùm redemptio; sed quia pro peccatis non remissis, & pro ingratitude illa per modum conditionis generalis comitante, vel per modum specialis peccati aggravante, cùm in Dei & beneficii accepti contemptum peccata committuntur, sine ulla remissione ab impiis tortoribus immisericorditer per totam æternitatem solvet, & nunquam persolvet, sed semper pœnam luet, dicente Chrysostomo hom. 62. in Matth. *Ad perpetuitatem supplicii eum tradidit, nunquam enim persoluturus est.* Punientur ergo & propter peccata sequentia, & proportionaliter pro modo ingritudinis & gravitate ac intensione contemptûs, qui eo censetur major, quo magis gratia floccifit, & quo peccata priùs dimissa plura & atrociora fuerunt; ut enim dicitur Deuter. 25. *Pro mensura peccati erit & plagarum numerus.* Hoc sen-

su dixit Augustinus *serm. 15. de verbis Domini: Si non dimiseris, revocabo, & quidquid dimiseram replicabo tibi.*

Ex his ergo responderi potest ad argumentum, magnum esse discrimen merita inter & demerita: quia merita per peccatum mortificata manent in acceptatione divina, & quoad tenus in Christo, ex cujus influxu prodierunt. At ve. ò peccata & demerita per gratiam & misericordiam Dei irrevocabiliter remissa nullibi manent, unde nec physice, nec moraliter revertuntur, nec potest homo opus divinæ misericordiæ remittentis peccata irritare & annullare, quanvis quominus sibi illa remissio proficit, novis peccatis impedire possit. Et quanvis Deus veterum justitiarum non recordetur, sicut non recordatur veterum peccatorum, cum gratiam pœnitentibus largitur, ut patet Ezechielis 18. quatenus merita peccato impedita nihil ad salutem profunt, sicut demerita verè dimissa non obsunt; illud tamen differentiae inter utraque intercedit, quod merita impedita in Deo tamen ea acceptante manent, demerita verò dimissa in Deo indignante manere non possunt hoc ipso, quod deposita omni indignatione ea sincerè delevit. Maxime quia caput nostrum Christus Jesus, qui in opera pietatis à membris suis elicit influxit, quodam pacto jus habet ut merita illa remoto per pœnitentiam obice munerentur.

Urgebis: Si ille cui per pœnitentiam peccatum mortale remissum est, incidens in novum peccatum mortem obeat antequam pœnam temporalem veteribus flagitiis debitam luerit, in æternum non solum pro peccatis in quibus decessit,

decedit, sed etiam pro antiquis quæ non expiavit plectetur: ergo reatus præcedentium peccatorum novo peccato redit, sicut pristina merita per pœnitentiam revertuntur.

Respondeo nullam esse illationem, quia dato quod antiqua peccata debitâ in hoc mundo satisfactione non expiata æternum puniantur, non ideo est, quia eorum macula vel reatus redierit, sed quia peccator pro illis dum potuit satisfacere noluit, sed potius in illum se statum præcipitem egit, in quo pœna temporalis per accidens evadit æterna; quia nulla ibi redemptio, nullum levamen, nullum solatium adest; sicut etiam propter eandem rationem peccata venialia ibi æternâ pœnâ multari propter obfirmatam peccatoris malitiam superius diximus. Nulla ergo est consequentia facta. Sed nec etiam antecedens verum est: probabilius enim est quod docet S. Thomas in 4. dist. 22. quæst. 1. art. 1. ad 5. *Quod pœna cuius aliquis est debitor post culpam remissam, in inferno punietur temporaliter. Nec propter hoc sequitur, quod in inferno sit redemptio, quia pœna qua solvitur non redimitur: nec est inconveniens, quod quantum ad aliquid accidentale pœna inferni minuaturs usque ad diem iudicii, sicut etiam augetur.*

Objicies tertio: Si merita per peccatum mortificata reviviscerent, & vim eandem perducendi ad vitam æternam recuperarent, qui centum gradus meriti olim habuit, resurgens cum uno vel altero pœnitentiæ gradu, tot gradus gloriæ obtineret, totque gradus gratiæ recuperaret, quot olim habebat; quibus insuper adderentur novi gradus præsentis dispositioni & pœ-

nitentiæ correspondentes : nam merita reviviscere est ad pristinam vitam redire ; pristinam autem vitam centum gratiæ gradibus , quibus totidem gradus gloriæ debentur , constabat ; unde si merita reviviscant , totam gratiam antiquam recuperat , tot deinde gradus gloriæ consequuturus. Atqui consequens tam est alienum à doctrina D. Thomæ quàm quod maximè , cùm articulo secundo quæst. 89. ex professo probet resurgentem à peccato modò æqualem , modò majorem , modò minorem antiquâ recipere gratiam pro ratione dispositionis præsentis. Ergo merita per peccatum mortificata non reviviscunt.

Respondeo huic argumento solvendo multa adhibere Theologos modernos , præsertim Thomistas , qui à manifestissimâ sancti Thomæ sententiâ & avita Scholæ nostræ doctrina recedere volentes , nec exertè audentes , in tot figmenta prolapsi sunt , ut quam doctrinam Thomisticam de reviviscentia meritorum suis interpretamentis mollire sategerunt , ridendam potius communibus Angelici Doctoris adversariis effecerint. Ut ergo firmum fundamentum stet , agè inconcussam S. Thomæ doctrinam sine ullo prorsus errore scriptam , quam qui impugnaverit semper fuerit de veritate suspectus , ut toties decantata Pontificum oracula nos docuerunt , ab interritis S. Thomæ discipulis Capreolo , Ferrariensi , Cajetano , Paludano , Bañez , omnibus denique ad unum antiquis , quos etiam eximius Doctor Sylvius sequutus est , propugnatam , non tremuli , sed intrepidi defendamus.

*Declaratur in qua proportionē merita  
mortificata per pœnitentiā re-  
viviscant.*

Dicendum igitur omninò est, merita quidem per pœnitentiā reviviscere, sed duntaxat juxta quantitatem dispositionis in qua peccator resurgit; unde qui ante peccatum centum sibi gratiæ gradus & jus ad totidem gradus gloriæ compararat, si resurgat cum pœnitentiā à charitate duobus v. g. gradibus duntaxat intensa profecta, non nisi duos habitualis gratiæ gradus, jusque ad duos gloriæ gradus obtinebit, ita ut gratia & gloria in se & absolute sumptæ meritis præcedentibus respondeant; sed gradus gratiæ, gradusque gloriæ uni præsentī dispositioni in qua resurgit, in quavē decessurus est commensurentur.

Vbi nihil unquam perspicuè & distinctè docuit S. Thomas, vel sententiam hanc nostram, aut potius suam tradidit Doctor Sanctissimus. Etenim articulo 2. hujus quæst. 89. sic luculenter scripsit: *Motus liberi arbitrii, qui est in justificatione impii, est ultima dispositio ad gratiam: unde in eodem instanti est gratia infusio cum prædicto motu liberi arbitrii, in quo quidem motu comprehenditur actus pœnitentiæ. Manifestum est autem quod forma, quæ possunt recipere magis & minus, intenduntur & remittuntur secundum diversam dispositionem subiecti, ut in secunda parte habitum est. Et inde est, quod secundum quod motus liberi arbitrii in pœnitentiā est intensior vel remissior, secun-*

dum hoc pœnitens consequitur majorem vel minorem gratiam. Contingit autem intensiorem motus pœnitentis quandoque proportionatam esse majori gratia, quàm fuerat illa à qua ceciderat per peccatum; quandoque verò minori. Et ideo pœnitens quandoque resurgit in maiori gratia, quàm prius habuerat, quandoque autem in equali, quandoque etiam in minori. Et eadem est ratio de virtutibus, qua gratiam consequuntur. Ergo manifestum ex D. Thoma est, non semper intensiorem gratiæ in justificatione infusæ intensiori meritorum antiquorum, sed uni præsentis dispositionis quantitati respondere. Idem confirmat ad secundum: Dicendum, inquit, quod pœnitentia quantum est de se, habet virtutem reparandi omnes defectus ad perfectum, & etiam promovendi in ulteriorem statum; sed hoc quandoque impeditur ex parte hominis, qui remissiùs movetur in Deum & in detestationem peccati. Nihil planius, nihil luculentius his testimoniis.

Idem docet S. Doctor de gradibus gloriæ, respondere nimirum eos non toti præcedentium operum & meritorum quantitati, sed uni intensiori gratiæ, in qua pœnitens resurgit. Sic enim habet in 3. dist. 31. quæst. 1. art. 4. ad 4. Homo per priora merita mortificata merebatur sibi tantam gloriam, quantam charitatem habebat; sed ipse per peccatum factus est alter. & non plenariè ad pristinum gradum restitutus: ideo non plenariè recipiet effectum priorum meritorum, nisi quantum ad premium accidentale. Et in 3. dist. 18. quæst. 1. art. 2. ad 4. docet non posse charitatem moraliter in ratione meriti augeri, subindeque non illi plures gloriæ gradus.



gradus respondere, nisi eadem charitas physicè actibus ferventioribus augeatur, quia charitas physicè sumpta est principium meriti. Verba Angelici Præceptoris sunt hæc: *Non est necesse quod omnis qui meretur, proficiat quantum ad rationem merendi; hoc enim accidit ex eo quod radix meriti non est in suo termino; sed oportet quod omnis qui meretur, proficiat quantum ad mercedem, ut scilicet eam faciat sibi debitam vel simpliciter, vel quantum ad aliquem modum qui prius non debebatur.* Quod repetit articulo quinto, ubi docet meritum contingere tripliciter: Primò quando aliquis præmium de non debito facit sibi debitum. Secundò quando facit magis debitum quod erat minus debitum; quod contingit in eo, in quo charitas augetur. Tertiò quando facit sibi debitum uno modo, quod debebatur antea alio modo. Quibus verbis S. Thomas fundamentum adversariorum evertit, in hoc situm, non posse præmiū duobus meritis respondere; & tamen D. Thomas apertè docet, tunc verè contingere meritum, quando quis facit sibi debitum uno modo, quod debebatur antea alio modo; idque ibidem illustrat exemplis, tum pueri primo charitatis actu facientis sibi debitam vitam æternam, quæ sibi prius titulo hæreditatis debebatur: tum Christi Domini, qui gloriam corporis titulo sibi connaturalitatis asseram merito etiam passionis comparavit. Et in 4. dist. 49. quæst. 1. art. 4. necnon 1. p. quæst. 12. art. 6. & quæst. 95. art. 4. & in cap. 8. ad Roman. lect. 5. & in cap. 3. prioris ad Corinth. lect. 2. docet gloriam patriæ dari secundum quantitatem charitatis viæ: *Charitas viæ, in-*



quit, disponit mansiones per modum meriti. Nec potest dici S. Doctorem hanc sententiam olim in commentariis in libros Sententiarum evidenter traditam, in Summa Theologica revocasse. Non, inquam, id potest dici; tum quia in materia de charitate clarissimè docet, actum quemlibet charitatis gloriam & gloriæ augmentum promereri quidem, illud tamen augmentum non consequi actum remissum, sed tantum actum intensum in statu viæ eliciendum, ut tomo 4. dissert. 4. cap. 2. speculat. 2. & 3. latè, nec minùs evidenter demonstravimus: unde omninò consequens est, meritorum numero non respondere gradus gloriæ, sed undantaxat præsentis dispositionis fervori. Tum quia 3. parte; quæst. 89. art. 5. ubi ex professo de reviviscentia meritorum disputat, sic fatur ad 3. *Dicendum quod ille qui per pœnitentiam resurgit in minori charitate, consequetur quidem præmium essentiale secundum quantitatem charitatis in qua invenitur; habebit tamen gaudium majus de operibus in prima charitate factis, quàm de operibus que in secunda charitate fecit, quod pertinet ad præmium accidentale.* Ex quibus verbis, tametsi per se planissimis, sic formatur argumentum: Si gradus gratiæ & gloriæ redirent juxta totam præcedentium meritorum quantitatem, ut volunt aliqui cum Nominalibus; vel si aliquot gradus gratiæ vel gloriæ juxta proportionem præsentis dispositionis, dispositionem tamen præsentem eatenus excedentes, quatenus ex gratia restituta & de novo infusa major coalescit habitus, quàm sit intensa pœnitentia; si, inquam, hoc sensu aliquot præstigiæ gratiæ gradus pœnitens.

physicè

physicè recuperaret, uti Joannes à S. Thoma existimat; vel moraliter in esse gratiæ, ut credunt Nuño, & alii recentiores Thomistæ, quos sequitur Baptista Gonet, ita ut post hanc vitam gradus gloriæ excederent intensiorem charitatis, in qua pœnitens moritur, planè sequeretur, præmium essentialiale excedere quantitatem charitatis in qua pœnitens invenitur, sequeretur etiam pœnitentem non habiturum dumtaxat præmium accidentale intuitu operum in prima charitate factorum. Atqui id totum est contra luculentam D. Thomæ mentem asserentis, resurgentem per pœnitentiam, in minori charitate consequuturum præmium essentialiale *secundum quantitatem charitatis, in qua invenitur*; & operibus in prima charitate factis respondere tantum *gaudium majus, quod pertinet ad præmium accidentale*. Ergo dicere merita reviviscere ad omnes gratiæ & gloriæ gradus, vel ad aliquot gratiam præsentem excedentes, ei tamen per modum dispositionis physiciæ vel moralis respondentes, est manifestè S. Thomæ contradicere.

Ratio fundamentalis tradita est variis in locis à S. Doctore, & à nobis loco memorato de charitate operosè propugnata, sicque breviter instauratur: Gratia habitualis nunquam à Deo in animam adultorum infunditur, nisi juxta voluntatis cum auxilio Dei sese disponentis conatum: justitiam recipientes, ut ait Tridentinum sessi 6. cap: 7. *unusquisque suam, secundum mensuram quam spiritus sanctus partitur singulis prout vult, & secundum propriam cujusque dispositionem, & operationem*. Quod tam in prima gratiæ infusione, quam in ejusdem gratiæ augmento verum esse docet D.

Thomas 2. 2. quæst. 24. art. 6. ubi ait, quod non quolibet actu charitas augetur, sed tunc solum quando habilitate, quæ iteratis actibus etiam remississimis disponitur, crescente, homo prorumpit in actum ferventiorum dilectionis, quo conatur ad charitatis profectum. Cujus rationem ulteriorem assignat idem Doctor Sanctissimus in 2. dist. 27. quæst. 1. art. 5. quia licet quilibet actus charitatis habeat rationem meriti, non tamen rationem causæ augmenti, nisi à toto habitûs conatu proficiatur: Unde non oportet, inquit, quod quilibet actus meritorius augmentum gratiæ mereatur, quia non in quolibet actu meritorio invenitur illa conditio, per quam ex actu consequatur augmentum habitûs, sed solum in illo actu, quo quis utitur prædictâ gratiâ secundum proportionem suarum virium, ut in nullo gratiæ Dei desit per negligentiam. Atqui pœnitens qui ante peccatum gratiâ ut viginti ornatus erat, resurgit tamen cum actu pœnitentiæ intenso ut duo, non est dispositus nisi ad duos gratiæ, duosque subinde gloriæ gradus. Ergo per pœnitentiam gratia jusque ad gloriam nec secundum totam præcedentis gratiæ latitudinem, nec secundum aliquos gradus gratiæ præsentem dispositionem excedentes recuperantur. Maxime quia ut fatetur P. Gonet disp. 6. art. 2. §. 2. eodem modo loquendum est de meritis mortificatis & per contritionem reviviscentibus, quo de actibus remissis charitatis, augmentum habitûs promerentibus, cum sit par utriusque ratio; nam sicut operibus mortificatis suum debetur meritum, ita & proprium asseritur actibus remissis. Atqui gratia & charitas habitualis actibus habitu remissioribus statim non augetur, sed tunc

solum quando homo prorumpit in actum ferventiorum. Ergo similiter quando homo resurgit à peccato per actum pœnitentiæ remissum, non statim quam habebat ante peccatum gratiæ totam latitudinem recuperat, sed tum solum cum charitatem amissam actu fervido adæquabit: sed tot duntaxat gratiæ gradus acquirit, quot gradibus intensa est pœnitentia in qua resurgit. Unde Ambrosius lib. 1. de Cain & Abel: *Egressus malitia, inquit, virtutibus operatur ingressum: eodemque studio quo crimen excluditur, innocentia copulatur.*

Confirmatur id ipsum variis signis & indiciis: tum quia si præcedens gratia vel ex toto, vel ex parte redderetur, illique adjiceretur præterea ea gratiæ quantitas, quæ præsentis dispositioni responderet, pœnitentes magis sancti, magisque ad divina quam prius fuerant, affecti resurgerent; cum sanctitas, & in divina pronitas à gratia proficiscantur, ac proinde crescente pietatis causâ, nova etiam sacrarum affectionum incrementa pœnitentes experirentur. At quis nescit pœnitentium hominum variis præsertim flagitiis fractorum virtutem tenellam & mollem sæpe concuti, & infirmam cæspitare nedum, sed & declivitate sua corruere? Quod tamen non contingit cum pœnitens Spiritus sancti fervore concepto dum per indulti temporis spatium licet, magno animi æstu ad Deum revertitur, conflans in lacrymis duritiam cordis, & post fugam humilior factus ac cautior, hostes fortiùs premit, & post peccatorum spinas fruges uberiores è terra cordis educit. Tum quia pœnitens non est melioris conditionis quam innocens, nisi conditionem suam

suam majori fervore effecerit meliorem; cæteris enim paribus stantibus, dignior est & æstimabilior continuus vitæ innocentis famulatus & fidelitas perennis, quàm interruptum inconstantis servi, labentis & resurgentis obsequium. Et quanvis in Evangelio Luc. 15, affirmetur, quod gaudium erit in cælo super uno peccatore pœnitentiam agente, quàm super nonaginta novem justis, qui non indigent pœnitentiâ; & ibidem filio prodigo in se reverso & ad patrem clamanti, ex lætitiæ significationes exhibeantur, quas in gratiam filii senioris, qui patri tot annis servierat, & mandatum ejus non præterierat, nunquam pater ostenderat: id tamen non convincit pœnitentiam esse absolutè innocentiam meliorem, aliòquin quod melius est, Christo & Deiparæ defuisset; sed gaudii affluentem copiam in reditu peccatoris minimè expectato Beati magis experiuntur, quod humano more dictum putandum est, quo recentia & insperata magis delectare assolent quàm vetera vel possessa: sicut pastor recuperatâ ove perdita sensibilis quàm de toto servato grege gaudet; & mulier habens drachmas decem, si perdiderit unam, cum invenerit, convocat amicas, & vicinas dicens: Congratulamini mihi, quia inveni drachmam quam perdideram. Quanvis ergo pœnitentia sit donum innocentiam secundum quid majus, quatenus indigno, subindeque magis gratis tribuitur; innocentia tamen est bonum absolutè præstantius, utpote immobilius, firmitus, & nullâ instabilitate obscuratum. Igitur pœnitens non est innocente melioris conditionis, nisi, ut dixi, actuum fervidorum contentione  
suam

suam efficiat conditionem meliorem. Atqui innocenti gratiam habituales non largitur Deus, nisi juxta actuum & dispositionum præsentium proportionem: ergo peccatori pœnitenti juxta unum pœnitentiæ conatum habitualis gratia tribuitur. Tum quia gratiæ habitualis quantitas pœnitentiæ infusæ quantitati respondet; cum enim pœnitentia infusa sit gratiæ passio, eadem esse debet essentiæ, & proprietatis quantitas & mensura: sed pœnitentia habitualis infusa uni pœnitentis dolori respondet, cum secundum plures ex adversariis pœnitentia actualis ab infusa in genere causæ efficientis proficiscatur, licet in genere causæ dispositivæ antecedit; & secundum omnes gratia & virtutes in justificatione infusæ, gratiæ actualis & moventis intensiori corresponsdeant: ergo quantitas gratiæ restitutæ & reviviscentis, subindeque gloriæ futuræ intensio, præsentis dispositionis & contritionis quantitatem non excedit.

Respondent Adversarii, omnes illas argumentorum copias, duce D. Thoma in aciem productas, valere solum adversus Nominales & eorum sequaces Suarem & alios recentiores existimantes beneficio pœnitentiæ ita merita reviviscere, ut præter gratiam & gloriam dispositioni resurgentis respondentem, dentur insuper tot gradus gratiæ, totque restituendi sint post mortem gradus gloriæ, quot habebat vel habiturus esset pœnitens, si antiqua merita minimè mortificata fuissent. Verum adversum eos nihil efficiunt nostra rationum & auctoritatum momenta, qui dicunt gradus gratiæ, subindeque gloriæ, juxta præsentem pœnitentis dispositi-

dispositionem restaurari : quia, inquit Joannes à S. Thoma, contritio quâ aliquis lapsus convertitur, est dispositio ad duplicem gratiam, ad illam nimirum quæ de novo in vi præsentis intentionis confertur, & ad alteram tantam ex antiqua. V. g. qui ante lapsum centum meritorum gradus asciverat, si cum pœnitentia octo gradibus constante revertatur, sexdecim gratiæ gradus consequitur, octo quidem propter præsentis dispositionis efficaciam, & alia octo propter merita antiqua, ad quos per accidens, remotione nimirum impedimenti præsens contritio disponit. Multò minùs urgent nostra argumenta in sententia Nuñii & Gonetii, asserentium reviviscentiam meritorum in eo esse sitam, ut tot gradus gratiæ in esse gratiæ, & tot consequenter gradus gloriæ pœnitens assequatur, quot gradibus præsens contritio intensa est. Per gratiam autem *in esse gratia* intelligunt moralem ejus æstimationem, quia gratia desperdita in esse qualitatis recuperari non potest, donec voluntas in actum ferventiorum prorumpat; & quia actum illum ferventiorum in hac vita nemo elicit, quia quâlibet sit fervens actus, sua semper illi gratia respondet, ac proinde carebit homo semper dispositione necessaria, quâ se præparet ad augmentum gratiæ in esse physico meritis reviviscentibus, aut etiam remissis debitum, quousque in instanti separationis animæ, vel in primo glorificationis momento, ut cum quis Martyr vel perfectè purgatus occumbit, eliciatur actus intensior, qui non erit meritorius, cum sit extra statum viæ, sed duntaxat dispositivus ad augmentum gratiæ physicè producendum.

Verùm

Verùm utraque responsio & à D. Thoma, & à veritate remotissima est. Prior quidem, quia juxta D. Thomæ doctrinam à Sacro Concilio Tridentino consecratam, gratiæ habitualis infusæ quantitas uni pœnitentis dispositioni, dispositionisque intensiori respondet & adæquatur; ex quo infert S. Thomas, tunc solum ampliolem gratiam infundi, cum voluntas in actum ferventjorem prorumpet. Ergo actui intensiori ut quatuor non respondent octo gradus gratiæ, quatuor ratione dispositionis præsentis, & alii quatuor intuitu gratiæ antiquæ; quia non gratiæ antiquæ commensuratur gratia restituta, alioquin tota restitueretur, sed uni pœnitentis fervori: unde non habet majorem gratiam, neque subinde jus ad ampliolem gloriam, qui minorem elicit dilectionis & pœnitentiæ motum, cum distinctum præmium distinctum amoris fervorem exigat, nec possit esse intensior visio nisi intensius fuerit Dei videndi desiderium, quod utique defuit, si defuit amor ferventior, sed tantum remissior adfuit. Adde primò commentitium esse & nulla unquam auctoritate, nulla ratione probandum, contritionem resurgenti pœnitentis non solum ad gratiam habitualement quæ ordine naturæ sequitur, sed etiam ad gratiam præcedentem disponere, & non ad totam illius restitutionem præparare; si enim dicatur ideo esse, quia per contritionem removetur impedimentum peccati, quo merita antiqua in acceptatione divina semper manentia suo carebant effectu; cur, quæso, eo impedimento remoto non tota gratia restauratur? Cum enim ex natura sua actus contritionis ut quatuor solam gratiam ut quatuor obtineat,



tineat, si aliud quidpiam consequitur; ideo tantum esse potest, quia merita sublato obice reviviscunt; quidni ergo eo impedimento ablato, non tota redit gratia omnibus meritis præcedentibus longè majoribus comparata? Unde vel nihil de antiqua gratia eo depulso obice, vel tota redit, cum restitutio gratiæ unis præcedentibus meritis, non præsentis dispositioni debeat. Adde secundò, ex ea sententia sequi justificationis gratiam lapsis pœnitentibus concessam non esse merè gratuitam, ex ea nimirum parte quâ prior gratia habitualis propter merita præcedentia redderetur: & tamen gratia justificationis eo magis gratuita censenda est, quò magis indigno confertur. Qua de causa dixit S. Thomas 3. p. quæst. 88. art. 2. ad 3. quod licet innocentia ex quantitate beneficii absolute sit majus pœnitentiâ donum: attamen si beneficium pensetur ex parte recipientis, qui minus est dignus, quodque proinde sit magis ex gratia, *hoc modo, inquit, beneficium remissionis culpa est majus, inquantum præstatur totaliter indigno.*

Secunda verò responsio nihilo melior, vel S. Thomæ conformior, sed longè improbabilior apparet. Tum quia illa distinctio gratiæ *in esse qualitatis, & in esse gratiæ*, omnino commentitia esset in doctrina Angelici Doctoris, inaudita ac peregrina. Tum quia gratia non habet esse gratiæ, nisi quatenus qualitas realis est, alioquin prævalebit, vel certè ægrè hæreticorum error confutabitur gratiam in externo Dei favore, & in morali hominis justî dignitate constituentium. Tum quia si contritio sit dispositio moralis ad aliquos gradus gratiæ in esse

esse gratiæ restituendos, cur non erit dispositio moralis ad totam gratiam in esse gratiæ recuperandam? Cur sublato peccati obice totum suum non sortitur antiqua gratia per lapsum mortificata effectum? Cum enim actus contritionis ut quatuor, gratiæ habitualis quatuor gradibus ex integro & ex æquo compensetur, & veluti numerata pecunia cumulatè solvatur, non possunt præcedentis gratiæ gradus nec in esse physico, nec in esse gratiæ redire, nisi intuitu præcedentium meritorum; quæ non suo debent, ut tantopere Adversarii dicitant, præmio fraudari: at præcedentia merita non minùs aliquot graduum gratiæ in esse gratiæ, quàm omnium restitutionem exigunt. Ergo vel nihil de gratia in esse gratiæ, vel tota instauratur. Denique quod comminiscuntur divinantes adversarii, in instanti separationis vel in primo beatitudinis ingressu elici actum intensissimum præteritorum meritorum & remissorum etiam charitatis actuum gradus copulantes, figmentum est à D. Thoma ignoratum, nullibi revelatum, & à nobis differt. 4. de charitate, cap. 2. speculatione 3. validè, ni me mea fallat opinio, explosum; quia secundum veridicam S. Thomæ doctrinam nitentissimis ejusdem testimoniis expressam, eoque loci commemoratam, gloria patriæ ejusque intensio uni charitatis viæ quantitati respondet. Et cùm gloria, ejusque augmentum sub meritum cadant, uni charitati viæ, quæ sola libera, sola in statu merendi fuit, commensurari debet. Unde sicut amorì beato quàmlibet intenso nullum meritum responderet, quia tempus merendi elapsum est; ita nec per primam amoris illius,

lius, quantus quantus sit, productionem quidpiam anima separata meretur. Unde ut ibidem diximus, longè plausibilior foret Nominalium positio commento illo à Recentioribus excogitato: non enim tam absurdum est, augmentum illud intuitu præcedentium meritorum fieri in statu viæ & meriti, quàm si fiat in statu separationis; cum illud voluntas in via promerita sit.

Nec valet effugium adversariorum aientium actui illi in primo beatitudinis limine elicitō, non ut merito quidem, cum sit extra viam, sed ut physicæ dispositioni augmentum charitatis, subindeque gloriam respondere. Non valet, inquam, illud subterfugium, quod extremum est adversæ sententiæ vallum; tum quia actum illum intensum gradus omnes remissos & merita quævis mortificata complectentem fingunt, non probant Authores quos impugnamus. Tum quia si ideo volunt id adversarii (nec aliâ id causâ velle possunt) ut actus remissi, meritaque mortificata suo non frustrentur præmio, fateri vel inviti coguntur, actum illum intensissimum omnibus meritis in hac vita retroactis respondere, ne merita illa fraudentur, utque reviviscere dicantur; ac proinde jam merita non juxta pœnitentis dispositionem, ut ipsi contendunt, sed secundum totam suam latitudinem reviviscant. Tum quia charitas habitualis non augetur nisi per actum meritorium, alioquin fingam Beatos singulis æternitatis momentis novas meritorum divitias novis, vel continuatis æternæ dilectionis moribus accumulare. Ergo dato quod in ingressu paradisi intensior actus dilectionis eliciatur

( quod

( quod aliquo sensu propter amabilissimi objecti voluntatem rapientis præsentiam verum esse ibidem explicuimus ) propter illum tamen actum gratia & charitas habitualis non crescet, quia si augmentum habitûs actibus ut meritoriis non respondet, neque illis ut dispositionibus respondebit; cum juxta catholicam Theologorum omnium sententiam, una ad augmentum habitualis gratiæ dispositio meritum est ab amore Dei profectum. Videsis alias ejusdem responsionis confutationes, ubi de augmento charitatis disputavimus.

Sed dices: Meritorum reviviscentia debet cum proprietate salvari, ut tot argumentorum moliminibus in priori parte demonstravimus: sed nostra sententia reviviscentiam meritorum tantâ accuratione stabilitam non salvat, sed ad nihilum redigit; etenim si nihil antiquæ gratiæ, sive physicè, sive in esse gratiæ consideratæ adjiciatur gratiæ illi quæ contritionis conatui respondet; si nullum consequenter majoris gloriæ gradum antiquorum intuitu meritorum pœnitens obtineat, quid prodest illa reviviscentia, nisi ut gloria duplici titulo donetur? Quod est reviviscentiam evacuare, & in titulum sine re, vel rem de solo titulo, subindeque ad denominationem extrinsecam revocare. Quomodo in retributione gloriæ servabitur justitia distributiva, quæ exigit, ut habenti plura merita major quoque gloria, quæ propterea dicitur corona justitiæ, conferatur? Quomodo impietas impio converso, contra verbum propheticum non nocebit, si ille qui post assiduos vitæ longævæ labores in peccatum infirmitate lapsus, & in pœnitentia ut  
quatuor

quatuor resurgens, majus præmium non consequatur eo quod homini, qui transactâ in flagitiis vitâ per eandem ut quatuor pœnitentiam in hora mortis ad Dominum revertitur, conferetur? Quomodo revertentur anni antiqui, quos comedit locusta & bruchus, vel non obliviscetur operis boni Deus, vel non erunt sine causa tot labores exantlati? Ergo secunda assertionis nostræ pars priorem convellit, & reviviscentiam meritorum unâ manut tam operosè ædificatam, alterâ destruit & ab imis fundamentis subruit.

Respondeo posteriorem partem priori non officere, quia verum non est vero contrarium, sed illam duntaxat exponere & temperare. In primis illud diligenter observandum est, hoc argumento, si quid ei vis & roboris inest, peræquè peti recentiorum Thomistarum nobis adversantium sententiam. Enimverò si gratia non nisi juxta præsentis dispositionis conatum restituatur, si post merita ut centum mortificata resurgenti per pœnitentiam ut quatuor, octo duntaxat gratiæ gradus vel in esse physico, vel in esse gratiæ infundantur, quomodo antiqua merita reviviscunt? Quomodo ad pristinam vitam in hoc sitam, quod ad centum gradus gloriæ perducere nata erant, redibunt? Quomodo condignum antiquis meritis præmium essentialiale ex justitia distributiva Deus restituet? Quomodo exantlatorum operum & laborum Deus non obliviscetur, vel reparabuntur anni antiqui sine causa longo curriculo in sanctitate transacti? Ergo illo suo temperamento non effugiunt adversarii difficultatem, nec salvant perfectam meritorum reviviscentiam.

tiam , quam nobis opportunè importunè obijciunt. Unde, ut dixi, longè verosimilior est Nominalium sententia eo novo commento reviviscentiam meritorum partiente. Unde Præceptor olim meus R. P. Joannes Baptista Maderan , eruditione & subtilitate paucis secundus , & jam in Burdigalensi Academia Antecessor in non paucis celebris, merita mortificata ad totam gloriæ latitudinem prioribus meritis debitam independentem à præsentis dispositionis conatu , sed propter unam impedimenti remotionem pœnitentiâ partam , reviviscere me docuit , ratus id esse S. Thomæ conformius , tria duntaxat in corpore articuli quinti ad meritorum plenam reviviscentiam desideranti , quod nimirum habeant priorem vitam, seu perducendi ad vitam æternam efficacitatem; quod maneant in acceptatione divina , & quod obex peccati, quod unum erat consequutionis gloriæ antiquæ impedimentum , auferatur ; asseribatque se eâ potissimum causâ in eam opinionem venire , quod moderniorum Thomistarum temperatura nec perfectam reviviscentiam, nec S. Thomæ rigorem salvaret. Sed patietur vir ingeniosissimus & juxta modestissimus , ut sicut ipse à Præceptoris quondam sui Joannis Francisci Dufaur à nobis alibi cum laude memorati , & à communis Magistri S. Thomæ, uti videtur , sententia, suam interim propriam privatamque opinionem liberè tuiturus recesserat; ita nos ab ejus assertione, in oppositam sententiam vocante nos ratione & D. Thomæ auctoritate , transeamus. In unius enim D. Thomæ verba juravimus , nec apud nos opinio , quam olim docti sumus , præjudicata multum valet.

nisi solidâ ratione, & D. Thomæ suffragio nitatur. Illos enim, inquit eximius Theologus Melchior Canus in præmio libri duodecimi de locis, probare non soleo, qui veluti sacramento rogati, vel etiam superstitione constricti, ut Fabius loquitur, nefas ducunt à suscepta semel persuasione discedere. Theologo nihil est necesse in cujusquam privati jurare leges: majus enim est opus atque præstantius ad quod ipse tendit, quàm ut cujuscumque Theologi debeat vestigiis semper insistere, si quidem est futurus Theologiæ laude perfectus.

Directè ergo respondendo dicendum, non inficiari nos reviviscantiam meritum, sed eam tamen pœnitentis conatibus dimittere. Neque enim eatenus merita reviviscere dicuntur, quatenus hominem per pœnitentiam reparatum ad tantam gloriam perducant; sed quia rursus pœnitens fit intuitu meritum illorum dignus æternâ vitâ, pro illisque, si perseveret, eo majorem vel minorem gloriam est recepturus, quo in majori vel minori charitate decedet. Ut autem tanta gratia, tantumque jus ad gloriam redeant, quanta fuere perditâ, secundum D. Thomam & Concilium Tridentinum, non satis est tolli peccati impedimentum, sed æqualem adesse dispositionem oportet. Unde Deus nec meritum illorum, nec annorum antiquorum obliviscitur, quorum intuitu gratiam unâ & gloriam largitur: nec impietas impij pœnitenti nocet, cui tota culpa, totus æternæ pœnæ reatus condonatur; cui damnatio, & omnis gratiæ doni privatio debebatur. Unde Deus in nostra sententia perfectiùs justitiæ distributiæ leges servat, cum pro ratione



tione conversionis & dispositionis gratiam pœnitentibus impertitur. Porro delicatissimo adversariorum fastidio, gloriam duplici titulo conferri non ferenti consulimus dissertatione de charitate superius relata, ubi luculentis S. Thomæ testimoniis evicimus, gloriam actibus remissis duplici titulo concedi; unde etiam intulimus, quàm sit aliena à D. Thomæ mente ea sententia, quæ id contemnit quod S. Doctori, fuit indubitatum. Et rationem ibi assignavimus, quia licet omnibus & singulis meritis debeat præmium, non tamen distinctum vel majus, sed idem novo titulo confertur, quando distinctum præmium distinctam exigit in subjecto dispositionem: nam teste D. Thomæ ibi laudato, retributio gloriæ non est secundum numerum operationum, sed secundum diversos gradus charitatis; nec qui pluries meretur plus meretur, nisi ratio merendi sit major. Unde exemplum adductum de homine post centum gradus meriti lapso, & cum pœnitentia ut quatuor revertente, qui non majorem consequetur gloriam quàm flagitiosissimus qui post scelestam vitam transactam in articulo mortis cum pœnitentia ut quatuor convertitur, non urgere ibidem monstravimus. Quia sicut non est inconveniens Patremfamilias novissimos in vinea laborantes pares eis fecisse qui portaverant pondus diei & æstus, quia fervore & instantiâ laboris quod de tempore deerat suppleverant: ita non est mirum si flagitiosus ex omnium scelerum colluvie emerit eandem obtineat gratiam & gloriam, si eodem ad illam conatu se disponat. Nam ut bene dicit Hieronymus: *Apud Deum non*



*tam valet mensura temporis, quàm doloris. Et Chrysostomus in libro de reparatione lapsi: Non temporis longitudine, sed affectus sinceritate pœnitudo censetur. Quod ibidem exemplo boni Latronis illustrat: Latro ille, inquit, qui pendebat in cruce, non eguit prolixitate temporis, ut ingressum paradisi mereretur: sed tantùm ei spatii suffecit, donec unum posset proferre sermonem; ita ut intra unum momentum temporis totius vitæ sceleribus absolutus, pracedere ad Paradisum etiam Apostolos mereretur.*

Sed ne eadem cum Lectorum cruce repeta-  
mus, videantur quæ loco recensito latè præ-  
sequuti sumus. Quibus adde primò eandem pati  
difficultatem oppositam recentiorum Thomi-  
starum doctrinam: si enim pœnitens antiquo-  
rum meritorum intuitu illos solùm gradus re-  
cuperet, qui longè minori dispositioni re-  
spondent, profectò cæteris meritis non dabitur  
nisi duplici titulo gloria essentialis. Adde se-  
cundò, suam etiam antiqua merita manere  
mercedem, majus nimirum præmium acciden-  
tale, ut ait D. Thomas, amplius scilicet de  
operibus in priore charitate factis gaudium  
non contemnendum. Adde tertio, quod illa  
à duplici titulo petita responsio si tibi displicet,  
dicito gloriam absolutè, & quoad substantiam  
spectatam antiquis respondere meritis; gloriæ  
verò gradus inæquales præsentis contritionis  
dispositioni commensurari: igitur non frau-  
dantur præmio vetera merita, quia pro illis  
datur vita beata; beatitudinis verò differentia  
differenti dispositioni correspondet, sicut pue-  
ro debetur gloria in se considerata, eidem verò  
adulto

adulto & in primo rationis diluculo Deum diligenti datûr gloria pro modo & intensiõne dilectionis in quam prorumpit.

Instant adversarii : Gratia sacramentalis , seu ex vi Sacramenti collata , per peccatum mortale amissa , ita per pœnitentiam reparatur , ut præter gradum gratiæ , & gloriæ essentialis præsentis dispositioni respondentem detur insuper aliquis gradus gratiæ propter Sacramentum olim ritè susceptum : si enim Sacramentum fictè susceptum confert gratiam sibi correspondentem , recedente fictione , à fortiori Sacramentum ritè susceptum gratiam sacramentalem per peccatum deperditam renovat. Ergo idem de gratia meritis olim comparata dicendum est , cùm utraque sicut peccato mortificatur , ita per æquè per pœnitentiam reviviscat.

Respondeo multipliciter posse hoc argumentum confutari. Primò quia easdem in adversarios , si quas habet , vires obtinet : nam sicut gratia sacramentalis tota per pœnitentiam redit , ita redire debet tota gratia antiquis operibus comparata , cùm utraque per peccatum æquè mortificetur , æquè per pœnitentiam reviviscat. Quam disparitatem afferent novi Thomistæ , dabimus nos cum antiquis. Maximè verò urget hæc instantia adversus Nugnii & Gonetii sententiam : nam gratia sacramentalis nedum in esse gratiæ , sed etiam in esse physico per pœnitentiam instauratur : Ergo similiter antiqua gratia mortificatis bonis operibus respondens , nedum in esse gratiæ , sed etiam in esse physico restituitur. Ergo manifestè quod in nos intorquent telum , in ipsos efficacius retorquetur. Secundò antecedens valdè incertum

reputant Theologi sapientissimi ; et si enim Sacramenta fictè suscepta , ut communis opinio fert , gratiam suam recedente fictione conferant pœnitenti , non bene tamen idem de Sacramento ritè suscepto , & gratiæ Sacramentalis effectum jam sortito colligitur ; quia Sacramentum debet quidem producere aliquando suum effectum , sed postquam illum produxit , non debet eum reproducere , postquam effectus ille malitiâ peccatoris destructus est. At verò Sacramentum fictè susceptum nunquam effectum habuit suum , quo carere non debet ; unde tum illum efficit , cum obex , & veluti fictionis retinaculum aufertur. Tertiò admissio illo antecedente nulla est consequentia ; & disparitas est aperta ; quia Sacramenta novæ legis non solum ex opere operantis , id est iuxta suscipientis dispositione , sed etiam ex opere operato , id est propriâ suâ virtute à passione Salvatoris derivatâ gratiam producant , ut patet in pueris , quos baptismus sine ulla dispositione sanctificat , & in pœnitentibus contritione ab amore amicitiae perfectio proficiente cum voto Sacramenti pœnitentiæ justificatis , qui tamen actuali Sacramenti susceptione ampliori gratiâ donantur ; unde si gratia sacramentalis à Sacramento piè suscepto collata & per peccatum mortificata redit , non solum operi operantis , sed suscepti Sacramenti operi operato respondet. At verò alia quævis gratia , quæ non est sacramentalis , uni operantis dispositioni , & dispositionis intensiori respondet , quam proinde nunquam excedit. Pœnitentia enim merita mortificata subsequens , non solum se habet ut removens prohibens , sed etiam ut dispositio.

positio quantitatem gratiæ habitualis reparatæ dimetiens ; sicut calor non solum remouet frigus à ligno introductioni ignis oppositum , sed lignum etiam ad formam ignis disponit ; & studium nedum falsarum opinionum præiudicia scientiæ vehementer aduersa depellit , sed ad ipsam quoque scientiam , scientiæque maiorem perfectionem eo ampliùs disponit , quo accuratius fuerit & profundius. Alias objectiones loco sæpè citato de charitate occupauimus.

R E S P O N S I O .

Verè universæ viæ Domini , sed in opere potissimum justificationis , misericordia & veritas , seu iustitia. Resplendet quidem misericordia lapsum oblita , lapsum excitans , admissa dimittens , sanctitatis gratiam toties indignata , toties provocata restituens , peccataque tanquam glaciem solvens. Ite , inquit , proferre stolam primam , primitivum scilicet innocentiae amictum , deperditum gratiarum decus reparaturum. Non dixit : Unde venis ? Ubi sunt quæ tulisti ? Quare tantam gloriam in tantam turpitudinem commutasti ? Sed , Proferre stolam primam , & induite illum , ut ubi abundavit delictum , superabundet & gratia. Videtis , quia delicta non videt vis amoris , & tardam misericordiam nescit Pater misericordiarum , & Deus totius consolationis. Iis ergo misericordiae illicitis accensi , omnino propter mansuetudinem , quæ in te prædicatur , currimus post te , Domine Jesu , audientes quod non spernas pauperem , sed fuscitas à terra inopem , de stercore peccatores

erigis. Non horruit benignitas tua confitem-  
 tem latronem, non lacrymantem peccatricem,  
 non Chananaeam supplican-tem, non deprehen-  
 sam in adulterio, non sedentem in telonio, non  
 publicanum à longè stantem, nec oculos ad  
 cœlum levantem, sed percutientem pectus sum,  
 & dicentem, Deus propitius esto mihi pecca-  
 tori; non negantem discipulum, non persecu-  
 torem discipulorum, non ipsos crucifixores  
 tuos. Quis in odorem unguentorum illorum  
 non currat, quibus esurientes pane verbi &  
 corporis sui reficit, sitientes potu sapientiæ &  
 sanguinis sui refrigerat, cœcos in domum  
 Patris revocat, infirmos confirmat, tribulatione  
 oppressis subvenit, compatiendo & consolando  
 totius misericordiæ viscera effundit? Fateor,  
 Domine, & fatebor, ut verbis Mellissai Do-  
 ctoris utar, multitudinem miserationum tua-  
 rum, quibus in peccata prolapsus, & in majo-  
 ra peccatorum pondera lapsurus, nisi omnipo-  
 tens pietas tua declivem retinuisset, erigis; nisi  
 enim, quia Dominus adjuvit me, paulò minùs  
 cecidisset in omne peccatum anima mea. Quàm  
 benigna, quàm libera, quàm gratuita miseri-  
 cordia tua! Ego peccabam, & tu dissimulabas;  
 ego non continebam à sceleribus, & tu absti-  
 nebas à verberibus; prolongabam ego multo  
 tempore noctu & interdiu iniquitatem, & tu  
 Domine patientiam & longanimitatem. Quid  
 plura? Visitaſti cor meum, & flante spiritu tuo  
 fecisti, ut amara fierent quæ malè dulcia priùs  
 erant. Revertentem misericorditer suscepisti,  
 quin & cum adhuc longè essem, vidisti me, Pa-  
 ter mi, & misericordiâ motus qui loco moveri  
 non potes, accurrens cecidisti super collum  
 meum,

meum, non lapsu viscerum, sed compassionis, dedisti que oscula, non quæ promerebar flagella. Nec à malo solum liberare contentus fuisset paternus amor, nisi antiquam restitueret gratiam, veterum virtutum apparatus. Et post reparatam gratiam spes obtinendæ gloriæ succedit, qua donas homini indigno de tua toties experta bonitate usque ad cœlestia speranda præsumere.

Sed non minor splendori justitiæ locus in justificatione pœnitentium datur, quæ gratiam perditam non nisi pro ratione doloris, pro fervore charitatis, pro conatu pœnitentiæ largitur; nec per qualemcunque pœnitentiam etiam veram, sed per æqualem duntaxat præcedentibus meritis contentionem in pristinum conversos revocat gratiæ & gloriæ gradum. Ergo si sapias, Lector, ne arbitrare te comprehendisse; nunquam dicito, Satis est; sed semper esuri, siti que justitiam: ita ut si semper viveres, semper pœnitere magis & justior esse contenderes. Quàm bona vinea pœnitentis, imò quàm bona vinea pœnitens, continuâ pœnitentiæ putatione fecundior; cujus virtus, ut ait Bernardus, vitis; cujus actio, palines; cujus lacrymæ, piæ sunt contribulatorum amantium urvæ, cujus lingua & confessio, torcular expressoris; cujus denique vinum, testimonium conscientiæ suavissimum. Igitur in tribunal mentis tuæ ascende contra te, reum te constitue ante te, noli te ponere post te, sed peccatum tuum contra te sit semper, ne Deus te ponat ante te, sicut scriptum est, Statuam ante faciem tuam. Psalm. 49. Id divina justitiâ exigit, ut tibi amarum sapiat in anima, quod antè dulce.

fuit in vita; & quod te prius oblectabat in corpore, ipsum te cruciet in corde; eaque sit pœnitentia, quæ respondeat gravitati ac multitudini criminum. Præclare & opportunè Augustinus in Psalm. 84. *Iustitia de cœlo prospexit, tanquam Dei dicentis: Parcamus huic homini, quia ipse sibi non pepercit: ignoscamus, quia ipse agnoscit: conversus est ad puniendum peccatum suum, convertar & ego ad liberandum eum.*

Fugiamus ergo de medio Babylonis, salvemus animas nostras, illatarum Deo injuriarum pœnas exsolvamus, præteritas ruinas sarciamus, atque ad pœnitentiæ tribunal convolemus, ubi possimus & præteritis satisfacere damnis, & in præsentem obtinere gratiam, & futuram gloriam. fiducialiter præstolari. Non nos retardet conscientia delictorum; quia ubi peccata abundaverunt, superabundare consuevit & gratia: & teste Magno Gregorio, *sic plerumque gratior Deo amore ardens vita post culpam, quam in securitate torpens innocentia.* Nec etiam nos deterreat austeritas pœnitentiæ, quia qui perfectè senserit onus peccati, aut parùm, aut ex toto non sentiet onera pœnitentiæ: nec grave reputabit, quo peccata noverit deleri præterita, & caveri futura. Non poterit ille pœnitentiæ sanctos detrectare labores, qui attenderit non esse condignas passionem hujus temporis ad futuram gloriam quæ revelabitur in nobis, & præteritam culpam quæ remittitur nobis, & ad præsentis consolationis & pacis quæ exsuperat omnem sensum, gratiam, quæ infunditur nobis. Verbis non credimus, credamus exemplis. Cernamus tot jvenes, tot adolescentes naturâ pariter & consuetudine delicatos, puellas teneras



rimas ad pœnitentiam ingenti nostro probre  
currentes. Quid, sodes, respondebunt effræ-  
nati, delitiis diffuentes, & in omnem volupta-  
tem effusi, qui ut à jejuniis & abstinentiis ab  
Ecclesia divinitus inspirata indictis, & peccatis  
eorum immensum inferioribus immunes sint,  
quærunt excusationes excusantes in peccatis:  
quid, inquam, respondebunt non dico ad ve-  
terum Patrum vitæ asperitatem, apud quos, re-  
ferente Hieronymo, languentes Monachi aquâ  
frigida utebantur, & coctum aliquid accepisse  
luxuria erat; sed ad omnium oculis se ingeren-  
tem aspectabilem Carthusiensium, Cisterci-  
ensium Abbatia de l'Atrape, quam non tam ho-  
minum conventum, quàm Angelorum cœcum  
merito dixeris; Sanctimonialium sanctæ The-  
resia, & aliorum innumerorum, quibus velut  
respirare, ita jejunaire proprium est, quique so-  
lo Dei timore confixi in tanta afflictione perse-  
verant pœnitentiæ, virtutem humanam supra  
naturam, & contra consuetudinem? An nos  
peccatis referti nullo pretio ememus regnum  
cœlorum, quod illis tam carum est? Euge er-  
go, fervore pœnitentiæ totum quod perdid-  
imus restauremus, rati nihil esse credentibus  
impossibile, nihil amantibus difficile, nihil  
durum cogitantibus flammæ æternas, quibus  
insuper & gratia fit in auxilium, & fervens de-  
votio lenit rigorem.



## SPECVLATIO. III.

*Sacerdos ne potestate sibi cœlitus  
 commissâ abutatur, peccatoribus  
 in mortalia continuò relabenti-  
 bus, atque criminosa vita se-  
 riem post iteratas confessiones mi-  
 nimè emendantibus, donec dig-  
 nis pœnitentia fructibus suæ con-  
 versionis sinceritatem probaverint,  
 absolutionis beneficium impertiri  
 non debet.*

**E**T si superiùs, cùm de dotibus Rectoris  
 animarum agebamus, de differendæ abso-  
 lutionis salutari ac necessariâ disciplina quæ-  
 dam attigerimus, operæpretium tamen visum  
 est de re adeo momentosa diligentius fusiùsque  
 speciali titulo differere. Neque enim hîc agi-  
 tur de infructuosa quadam doctrina, quam si-  
 ve ignoraverimus, siue curiosius penetraveri-  
 mus, nihilo propterea meliores erimus, aut ad  
 salutem capeffendam expeditiores; sed de mo-  
 do & ratione dispensandi sanguinis Christi,  
 quem cùm in aliis Sacramentis, tum maximè  
 in Sacro Pœnitentiæ lavacro ad ablûenda cri-  
 mina ineffabili Dei benignitate instituto, con-  
 tentum ac nobis creditum, si præproperâ ac  
 promiscuâ

promiscua absolutionis concessione non modo inutiliter, sed etiam perniciosè profuderimus, non dijudicantes ejus inæstimabile pretium, illum in horrendo suo judicio de manu nostra requireret Deus, cujus severitas in ulciscenda uni-  
geniti sui morte, & sacratissimi sanguinis concalcatione, tantò terribilior expectanda est, quantò in concedendo infinito illo dono mirabilior ac profusior misericordia eluxit. Agè igitur, hanc salubrem ac necessariam dispensandæ absolutionis regulam, cujus ductu ab hac prodiga & indigna sanguinis Christi profusione immunes esse possimus, omni argumentorum genere pro viribus confirmemus.

Atque ut ab authoritate Patrum probatio-  
nem aggrediar, absolutionem his quos in ti-  
tulo descripsimus differendam esse, satis colligitur ex disciplina quam in administranda pec-  
catoribus reconciliatione & ipsi tenuerunt, & scriptis suis commendarunt, si, ut Tertulliani Apolog. cap. 10. verbis utar, *non presumptio-  
aut iniquitas judicet, altera qua desperat, al-  
tera qua recusat veritatem.* Neque enim ad salubriter impertiendam pœnitentibus recon-  
ciliationem, peccatorum confessionem sufficere existimarunt, nisi internus animi dolor Sacer-  
doti congruis innotesceret indiciis. Atque ob id laboriosæ pœnitentiæ fructus præexigere in  
usu sæpe habuerunt, non quòd satisfactionem  
absolutio præsupponere necessariò debeat, cum  
ad eam validè impendendam satis sit satisfaciendi votum in vero conversionis proposito  
inclusum, ut ex usu Ecclesiæ ac Doctorum  
consensu constare superiùs dictum est; sed ut  
pœnitentium animos, & emendandæ vitæ syn-

ceram voluntatem magis probarent, quæ factis longè certius se prodit quàm verbis; atque hoc pacto cœleste beneficium sibi conceditum non frustra & promiscuè prodigentes, sed antè probatis, ac pœnitentiæ dignis operibus, ut amarâ quadam medicinâ, pro temporum illorum severitate purgatis paratisque peccatoribus tutius atque utilius impertientes sanguinis Christi inæstimabile pretium, in animarum lucra, & utilitatem Domini sui, tanquam prudentes ac fideles servi dignè impenderent. Hujus disciplinæ tam multa, tamque frequentia testimonia sunt, ut minimè necessarium sit ea hic operosius attexere. Atqui peccatores, quos in titulo descripsimus, ejusmodi sunt, ut nulla congrua indicia sincerae conversionis exhibeant, quin potius indurati cordis, & in antea actæ vitæ turpitudinem continuò relapsuri notas omnes præ se ferant. Ergo nisi velimus antiquorum Patrum disciplinam funditus evertere, & sanguinem Christi Domini, quem illi tam cautè dispensandum nobis commendaverunt, sacrilegâ temeritate prodigere, tantisper differenda reconciliatio est indignis illis imparatisque conscientiis, donec suaviter simul & fortiter adhortante Patre spirituali verba tam sæpè fallacia dignis aliquibus pœnitentiæ fructibus probantes, illius salubriter accipiendæ capaces evaserint.

Probatur præterea secundò ratione: Sacerdotes jure clavium sibi divinitus tradito possunt peccatoribus in eadem flagitia continuò relabentibus absolutionem ad tempus denegare, & in aliud differre; illam etiam absolutionis moram adhibere expedit salutis animarum: Er-

ergo absolutio non est impertienda peccatoribus in eadem semper flagitia relabentibus, siue relapsus ex proxima peccandi occasione retenta, siue ex parva diuturnaue peccandi consuetudine proficiscatur. Consequentia patet: cum enim Sacerdotes sint mysteriorum Christi dispensatores, non domini, clarum est eos traditâ sibi divinitus potestate prout animarum salutis expedit uti oportere: unde si differendâ absolutionis potestatem habent, eaque tarditas & dilatio salutis animarum utilis sit, proculdubio absolutionem toties quoties impertiri hominibus eadem peccatorum catenâ semper irretitis, & in eadem crimina & quandoque graviora & numerosiora præ summâ morum emendandorum incuriâ relabentibus, & conceditâ sibi potestate abuti, & à fidelitate in Ministris sanguinis Christi ab Apostolo tantoperè desiderata desciscere.

Prima autem pars antecedentis, nimirum Sacerdotes posse iure sibi à Deo tradito peccatoribus iterata flagitia perpetrantibus absolutionem inficari, patet ex verbis Salvatoris, qui non solum remittendorum, sed etiam retinendorum peccatorum; non solum solvendi, sed & ligandi Sacerdotibus contulit potestatem: ergo manifestum est judiciaria potestate sibi Christi ore commissa posse Sacerdotes vinculis ligare criminosos, antequam eos reconciliando exsolvant. Dominus, inquit Ambrosius lib. 1. de pœnit. cap. 2. ligandi solvendique potestatem pari conditione permisit, ita ut alterum sine altero usurpari non debeat, & Ecclesia in utraque servet obedientiam, dum peccatum & alligat & relaxat. Et S. Pácianus epist. 3. si ve-

352: *Lib. XI. Pars III. Dissert. unica:*

*ad pœnitentiam cogimus ( ante absolutionem agenda & veniæ præviam ) seu veniam pœnitentibus relaxamus , Christo id authore tractamus.* Hinc Pères cùm criminum per confessionem editorum absolutionem protrahebant, ut peccatores à gratia lapsi, & æternæ damnationis rei, pœnitentiæ Deum propitiaturi incumberent antequam Ecclesiæ ministerio reconciliarentur, hanc præcipuè sui regiminis causam afferebant, quod existimarent potestatem sibi à Christo commissam non esse cæcum in pravas hominum cupiditates obsequium, sed retinendi peræquè ac remittendi peccata facultatem, ut patebit ex dicendis. Hinc Tridentinum sess. 14. cap. 8. *Habeant, inquit, præ oculis Sacerdotes, ut satisfactio quam imponunt non sit tantum ad nova vitæ custodiam, & infirmitatis medicamentum, sed etiam ad prætorum peccatorum vindictam & castigationem.* Nam claves Sacerdotum non ad solvendum duntaxat, sed & ad ligandum concessas, etiam antiqui Patres credunt & docent. Hanc retinendorum dilatione absolutionis peccatorum potestatem agnoscunt omnes ferè Theologi Morales, seu Casuistæ, inter quos constat jus esse Sacerdoti ut pœnitentem ubi illud expedire judicaverit, jubeat impositam satisfactionem implere priusquam absolvatur, ut videtur est apud Suarem de pœnit. disput. 38. sect. 7. num. 7. Bonacinam disp. 3. sect. 3. p. 2. Reginaldum & alios.

Secunda verò antecedentis supra positi pars illam absolutionis protractæ procrastinationem animarum expedire saluti, imò esse pernecessariam asserens, facile monstratur; tum quia

quia expedit ut peccatores ejusmodi congruenti pœnitentiâ pluribus diebus actâ Deo satisfaciant, atque à divina misericordia veræ solidæque conversionis gratiam impetrent. *Uel ligandi solvendiue potestas ritè exerceatur*, inquit Magnus Gregorius hom. 26. in Evangel. *videndum est qua culpa præcesserit, aut qua sit pœnitentia sequuta post culpam, ut quos omnipotens Deus per compunctionis gratiam visitat, illos Pastoris sententia absolvat.* Tunc enim vera est absolutio Presidentis, cum aterni arbitrium sequitur Judicis. Quod benè quatri-duani mortui resurrectio illa significat, qua videlicet demonstrat, quia mortuum Dominus prius vocavit & vivificavit dicens, Lazare veni foras; & postmodum is qui vivens egressus fuerat, à discipulis est solutus, sicut scriptum est: Cumque egressus esset qui ligatus fuerat institis, tunc dixit discipulis, solvite eum & sinite abire. Ecce illum discipuli jam viventem solvunt, quem Magister resuscitaverat mortuum. Si enim discipuli Lazarum mortuum solverent, factorem magis ostenderent quàm virtutem. Ex qua consideratione intuendum est, quod illos nos debemus per pastorem auctoritatem solvere, quos Authorem nostrum cognoscimus per suscitantem gratiam vivificare. Quæ verba & Concilium Aquigranense cap. 37. & S. Eligius Noviodunensis Episcopus hom. 11. tanquam excellentissima referunt. Igitur expedit prorsus, ut qui à Sacerdotibus veniam quâ toties abusi sunt, sperant, veræ antè solidæque pœnitentiæ fructibus misericordiam Dei emereri, justitiam flectere, iram mitigare, indignationem placare studeant,

deant, & se tandem solidè ac verè pœnitentes comprobent : *Quia pœnitentibus, rogantibus, operantibus, quique operam dant ut alto vulnèri* ( verba sunt Cypriani tract. de lapsis ) *diligens & longa medicina non desit, utque pœnitentia crimine minor non sit, nec sint minora remedia quàm vulnera ac funera, absolutio securè impenditur.* Hinc Clerus Romanus epist. 31. ad Cyprianum, eos Presbyteros ob-  
jurgans qui falsâ benignitatis specie peccatoribus facile reconciliationem impertiebant : *Ubi enim, inquit, indulgentia poterit medicina proficere, si etiam ipse medicus interceptâ pœnitentiâ indulget periculis? Si tantummodo quædam vulnus, non sunt necessaria temporis remedia obducere cicatricem? Hoc non est curare, sed si verum dicere volumus, occidere.* Itaque prius expurgare vetus fermentum repetitæ ac inveteratæ malitiæ peccatores debent, quàm ut beneficio absolutionis fiat nova conspersio; vulnerumque curationem supra id quod vulgo existimatur operosam, à Deo lacrymis & laboriosâ exercitatione prius impetrare, quàm à Sacerdotibus reconcilientur. *Multùm illis proficiet, inquit idem Clerus Romanus Apostolico primæ Sedis spiritu plenissimus, modesta petitio, postulatio verecunda, humilitas necessaria, patientia non otiosa* ( id est expectans absolutionis dilationem pœnitentiæ laboribus interim incumbens. ) *Mittant legatos pro suis doloribus lacrymas : ad vocatione fungantur ex intimo pectore prolati gemitus, dolorem probantes commissi criminis, & pudorem. Imò si dedecoris admissi magnitudinem, si pectoris & conscientia sua lethalem plagam, & sinuosi*  
vulneris



vulneris altos recessus verò medicâ manu tractant, erubescant & petere, nisi quia majoris est rursum & periculi & pudoris auxilium pacis non petiisse. Ex quibus vltimis verbis patet, quàm sit insolens, quàm impudorata eorum peccatorum audacia, qui absolutionem post iterata flagitia à Sacerdote extorquere nituntur, sibi que injuriam fieri dicunt si è cœno emergentibus non confestim reconciliatio impertiatur, vel alium faciliorem Sacerdotem se adituros minantur, nisi quod inverecundè petunt, sine mōra tribuatur. Quasi verò medicus ægroto, iudex reo, pastor ovi subijciendi sint, & rei in sacris tribunalibus, dejectis Sacerdotibus collocandi. Patet, inquam, hujusmodi reos nec dedecoris sui magnitudinem, nec conscientia lethalem plagam, nec altos sinuosi vulneris recessus medicâ manu tractare, cùm juxta Clerum illum sanctissimum tanto deberent esse pudore perfusi, ut præ verecundia veniam, qua se indignos rerum tenentur, petere erubescendum esset, nisi majoris esset periculi auxilium pacis non petiisse. Nullum absolutionis magis indignum Sancti existimant, nullum à cordis contriti & humiliati necessariâ dispositione remotiorem, quàm qui præproperam absolutionem quasi sibi debitam, nullâ peractâ pœnitentiâ, nullâ factis probata cordis mutatione audacter flagitat, nec se Sacerdotis arbitrio permittit. Nam ut ait S. Prosper in sent. *Quid tam dignum misericordiâ quàm miser? Et quid tam indignum misericordiâ quàm superbus miser?* Præterea prorsus expedit ut pœnitentis conversio solida, stabilis & constans sit, talisque spiritali judici appareat. At non pœniten-



pœnitentia, sed pœnitentiæ larva & merum ludibrium censenda est illa conversio, quæ perpetua confessionum & criminum sibi alternatim succedentium vicissitudine involvitur. Irrisor namque & non pœnitens habendus est, qui commissa plangit, & plangenda iterum committit; qui in Discipulorum gregem cooptari se ait, eum mox deserturus; quive statim post pœnitentiam agit quæ postea indigent pœnitentiâ. *Si citò rediret homo ad pristinam beatitudinem*, inquit Agustinus serm. 34. de diversis, *ludus illi esset peccando cadere in mortem.*

Tertiò expedit ut peccator ille vim acerbitateque morbi sui sentiat, ut in illum denuo incidere reformidet, ut ejus metu atque horrore perculsus, violentiæ pœnitendi cedat consuetudo peccandi, ut aliqua mora debitum flagitiis suis æternum supplicium sibi repræsentet, ut aliquo spatio miserabilis status sui horrores pendat & fœtores, ut in ea seipsum salutare cogitatione & sancto proposito confirmet, quidvis prius dimittendum, priusque patiendum, quàm ut in tantam peccati calamitatem se rursus præcipitem ferri sinat, ut in pia christianaque vita instituenda altiores radices agat & firmiores, ut solitudine & secessu plagas ex hominum consuetudine auræque pestifera susceptas curet, ut eleemosynis, precibus, & laboriosæ pœnitentiæ functionibus inertiam præteritorum vitiorum matrem & fomentum excutiat, ut abstinentiâ à licitis, multò magis ab illicitis abstinere discat, extinguatque nefandarum voluptatum sensum salubri acerbitate compunctionis; denique ut

*usus doloris*, inquit Ambrosius lib. 2. de pœnit. cap. 10. *ableget luxuriam criminis, erroris delicias, dolendo admissa excludantur admittenda, & fiat quadam, de condemnatione culpa disciplina innocentia.* Atqui hos omnes tam necessarios pœnitentiæ fructus præfocat & ad nihilum redigit inconsulta peccatorum absolverorum facilitas & lenitas omni inhumanitate crudelior, quæ dum reconciliationem prodigit, ex hominum animis memoriam peccatorum obliterat, lacrymas exsiccat, gemitus comprimit, & mortiferis ægritudinibus laborantes fallaci opinionis sanctitate illudit. Quid, inquam, illudit? Eos prava restitutæ innocentia, & quoties voluerint restituendæ confidentia deteriores efficit, & in turpiora flagitia procliviores. *Citò enim refricatur vulnus* (inquit appositè Ambrosius serm. 4. in Psal. 118.) *quod sanatum medicina lege non fuerit, imò etiam seriore medicina sentit profectum.* Ideoque si virus in interiora proserpit, medicamenta foris apposta non sentit. Exigit ergo medicina ratio, ut aut sectione, aut adustione curetur. Nisi enim putrefacta recidantur, aut humor inutilis decoquatur, frustra medicina manus adhibentur ad vulnera. Ideoque bonus medicus hujusmodi agrum legitime dicit esse curandum, ut possit medicinâ proficere. Lege ergo miseretur, qui cum justitia sapientiaque miseretur, ut ea dimittat qua scit jure posse dimitti, nec cum alterius miseretur, seipsum legi faciat obnoxium. :: Consideremus etiam, ne ipsum deteriorem faciamus, cujus miseremur injustè. Plurumque enim non coërcere delinquentes majoris austeritatis est quàm si ulciscari-

*vis. Traduntur enim in passiones ignominia, qui eum aliquid inhonestum commiserint, nullum culpa pretium ferunt. Ergo omninò expedit ut adhibitis moris & cautionibus peccator ille reconciliationi idoneus fiat.*

Quartò expedit planèque necessarium est, ut Sacerdos illis solùm absolutionem impendat, quos rationabiliter credit esse conversos, nec in pristina flagitia relapsuros. Cùm enim Sacerdos non sit nudus & simplex minister ad declaranda peccata remissa institutus, sed iudex positus, ut causâ cognitâ liget & solvat, remittat aut retineat, illos solùm debet absolvere, quos ex notitia in Confessione acceptâ judicat sincero emendationis futuræ desiderio teneri. Atqui talem sinceri cordis affectum in casu posito dignoscere & explorare non potest Sacerdos, nisi factis & pœnitentiæ solidis fructibus, verisque vitæ emendatæ argumentis: non enim abdita cordis scrutari potest, quæ sibi Deus reservavit; nec solis verbis aut sponsonibus peccatoris potest tutò fidere, cùm tam sæpè peccator emendationem promiserit, & semper promissa violarit. Ille namque in moralibus atque in omnibus vitæ humanæ officiis non sincerè velle censetur, qui sciens & prudens, quod potest & tenetur facere non facit; ubi enim nec scientia, nec potestas, nec obligatio desunt, ibi sola profectò voluntas deest. Si v. g. à divite peterem, ut mutuo daret centum nummos, quos mihi se daturum singulis septimanis promitteret, post annum promissis non stanti veraciter dicerem, Nunquam mihi dives ille centum nummos mutuari sincerè voluit, cùm enim nec necessitas mea latuerit, nec ipsi defuerit

defuerit largiendi facultas, sola dubio procul defuit voluntas: similiter qui eadem in singulis confessionibus peccata, & sæpe cum auctario recinit, emendationem nunquam non promittens, nunquam non fallens, certè nunquam peccata vitare voluisse iudicandus est; cùm enim illi nec potestas defuerit, nec officii scientia, sola defuit voluntas: quomodo igitur decepturum fidemque fracturum non meritò suspicabor qui semper hætenus decepit, semper fidem sponsonesque perfregit? Inconsultè ergo & imprudenter absolutionem illi impertiam, cujus mihi conversio falsa, promissio fallax, sponso delusoria factorum testimonio longè certissimo constat. Sanè in luto semper hærebit, in eadem semper scelera recurret, si unâ peccatorum confessione contentus illi nullâ pœnitentiâ purgato, nullâ morâ ac dilatione perculso reconciliationem impendam, atque eum ad altaria convolare sinam. Quàm veridicè Magnus Gregorius lib. 6. cap. 15. lib. 1. Reg. *Quid prodest confiteri flagitia, si confessionis vocem non sequitur afflictio pœnitentia?* Tria quippe in unoquoque considerata sunt veraciter pœnitente: videlicet conversio mentis, confessio oris, & vindicta peccati. :: Signum ergo vera conversionis non est in oris confessione, sed in afflictione pœnitentis. Tunc namque verè conversum peccatorem cernimus, cùm digna afflictionis austeritate delere nititur quod loquendo confitetur. Unde Joannes Baptista malè conversos Judæos ad se confluentes increpans ait: *Genimina viperarum, quis ostendit vobis fugere à ventura ira. Facite ergo dignos fructus pœnitentia.* In fructu ergo, non in foliis aut ramis

*ramis pœnitentia cognoscenda est. Quasi arbor quippe bona voluntas est. Confessionis ergo verba quid sunt aliud nisi folia? Non ergo nobis folia propter ipsa, sed propter fructum expetenda sunt: quia idcirco omnis confessio peccatorum recipitur, ut fructus pœnitentia subsequatur. Vnde & Dominus arborem foliis decoram, fructu sterilem maledixit, quia confessionis ornatum non recipit sine fructu afflictionis. Ergo non soli peccatorum ejusmodi confessioni, sed eorum operibus veram conversionem pronuntiantibus credendum est. Ergo utrum peccator ille qui in peccata relabitur, jure absolvendus sit, non ex confessionis & promissionum foliis aut ramis, sed ex pœnitentiæ fructibus statuendum est. Ergo ne judiciaria criminum absolvendorum Sacerdotibus ore Christi collata potestas in servilem transeat necessitatem, peccatoribus hujusmodi illud Præcursoris antequam absolvantur intorquendum est: *Facite fructus dignos pœnitentia*, ut cognitâ perspectâque causâ, cordis habitus non ex verbis, quæ tam sæpe mentita sunt, sed ex factis verba confirmantibus spectetur.*

Confirmatur hæc ratio: Verum quidem est homines etiam scelestissimos posse momento temporis ab improbitate ad pietatem victricis gratiæ, quæ tempore non eget, omnipotentiam traduci; & ad restituendam innocentiam efficaciorum esse quandoque velocem clementiam, uti Bernardus epist. 8. prosequitur, quàm diuturnam pœnitentiam. Nam & hoc salutis compendium sanctus ille *Latro consequenturus est, uno eodemque die simul confessus latrocinia, & introductus in gloriam: brevi quodam conten-*

*eius ponte crucis ad transeundum de regione  
 dissimilitudinis in terram viventium, & de  
 luto facis in paradysum voluptatis. Hoc etiam  
 subitum pietatis remedium percepit felix illa  
 peccatrix, cum repente ubi superabundaverant  
 delicta, abundare coepit & gratia. :: Hoc quo-  
 que (repentinæ gratiæ beneficio præventus)  
 paralyticus duplex atque celerrimum potentissi-  
 ma bonitatis persensit beneficium, prius men-  
 te quàm carne curatus. Hæc, inquam, ve-  
 ra sunt, sed rara, sed insolita, & ut lo-  
 quitur idem Bernardus, non tam exempla, quàm  
 miracula, mutationes dexteræ Excelsi, quæ etsi  
 in diebus his malis abbreviata non sit, atque  
 vim suam his prodigiis nonnunquam nobis  
 commendet, maxime in Sacramentis sanctè  
 susceptis & administratis; attamen secundum  
 communem cursum ita cœlestem conversionis  
 novi hominis diem pedetentim adducit, ut  
 quasi crepusculum quoddam præmittere soleat  
 rore lacrymarum madidum ac paulatim efful-  
 gens quibusdam operibus lucis, fastidio ante-  
 actæ vitæ, desiderio melioris, gemitibus, sus-  
 piriis, & seriâ ad promerendam, reconciliatio-  
 nis gratiam cordis præparatione, cujus ne ve-  
 stigium quidem suspicari prudenter possumus  
 in induratis & inveteratis illis relapsis, donec  
 per aliquod tempus salutaribus pœnitentiæ  
 exercitationibus probati, conversionis suæ ac  
 veracis efficacisque propositi fidem fecerint.  
 Non enim ita facilè, crede mihi Lector, for-  
 matur in corde vera contritio, sincera con-  
 versio, casta dilectio, atque ore quibusdam  
 actuum formulis, laudabilibus illis quidem, atque  
 ad excitandam pietatem perutilibus profertur,*

quasi illis mentis mutatio alligetur. Falleris, si credas verba prolata continuo animi metamorphosin sequi, eodemque momento vincula peccatorum frequentatis actibus obfirmata dirumpi, cor lapideum in carneum commutari, obtinerique conversionem, quæ non nisi petendo, quærendo, pulsando impetratur. Nam ut ait Augustinus epist. 144. & lib. 12. Confess. cap. 1. *Cum nos hujus charitatis, quæ lex verissime impletur, pauperes egentesque sentimus, non de inopia nostra divitias ejus exigere, sed orando petere, quarere, pulsare debemus. Longior porro est impetratione petitio, & operosior est manus pulsans quam sumens.* Confessarius ergo, cui non est datum scrutari renes & corda, peccatoribus in eadem semper flagitia recidentibus & perpetuo fallentibus non debet citò credere, quantumvis ore asserant se vitam commutatuos, & jam cordis resolvisse glaciem ob quasdam vocum piarum formulas à se prolatas, & gratiâ conversionis se affici, quam nec ardentè petiverunt, nec studiosè quæsierunt, nec instantibus pulsationibus, lacrymis & satisfactionibus postulaverunt. Maxime quia licet peccator ille momento esse possit per summum miraculum conversus, attamen ut id exploret, cordibus non illabitur judex spiritalis. Est igitur & officii & prudentiæ ejus per aliquod tempus differre absolutionem, ut veris pœnitentiæ fructibus conversionis sinceritatem exploret, ne præcipiti veniâ & fallat & fallatur. Nec reluctabitur si verè conversus sit, cum genuinus sinceræ conversionis character sit cor humiliatum se veniâ indignum arbitrans, & Sacerdotum judicio sine

repugnan



repugnantia vel exceptione ulla se permittens. Ergo ne concessâ imparato impœnitenti præproperâ reconciliatione vincula Confessarius implicet, quæ relaxare vult; ne abortiones filiorum spiritualium procuret, & exorientis vitæ scintillas obruat, usitatum gratiæ cursum teneat, paulatim sensimque procedat, quem prudenter reconciliationi immaturum judicat, impositis peccandi induciis per pœnitentis vitæ aliquos labores ac dolores ad parturiendam novam in Christo creaturam disponat, & sanctissimis Ambrosii in Psalm. 37. & lib. 3. epist. 19. monitis morigeretur: *Medicus medendi tempus expectat, ut digestis agritudinibus medicina subsidia deferantur, ne acerba adhuc & immatura, ut asserunt, agritudo curationis remediis reluctetur, & beneficium sentire non possit.* Nam etiam medendi periti, cum vident notas agritudines, ut ita appellat, medicinam quidem non adhibent, sed tamen medicina tempus expectans: nec deferunt invalidum, sed lenioribus verbis, aut quibus possunt, palpant declinantis; ne aut intermissa agritudo desperatione animi graveſcat, aut crudior medicinam respuat, eo quod ad maturitatem pervenire nequeat, si indigesta insolens rerum hujusmodi Medicus adhibeat manus.

Denique quantum id expediat, experientiæ rerum magistrâ compertum est. Plures enim cernere est peccatores, quos absolutionis habendæ confidentia in peccati cœno fixos detinuerat, hac unâ cunctationis & dilatæ absolutionis medicinâ fuisse sanatos. Qui licet initio odiosam sibi pro crastinationem illam, & diuturnæ pœnitentiæ molestias, quibus absolutio-



nis beneficium illis redimendum esset, agere ferrent, videntes tamen se hoc uno remedio convaluisse, & medicinam amant, & medico gratias agunt. Non secus ac infirmi in Medicum poriones amaras vel putridæ carnis sectiones imperantem indignantur, in cujus deinde oscula & amplexus adeptâ sanitate ruunt. *Certi sumus*, inquit egregiè Clerus Romanus epist. 30. ad Cyprianum, *quod spatio productionis temporis impetu isto consenescente, amabunt hoc ipsum, ad fidelem se dilatos esse medicinam; si tamen desint qui illos arment ad periculum proprium, & in perversum instruentes, pro salutaribus dilationis remediis exitiosa deposcant illis properata communicationis venena.* Eadem quoque experienciâ perspectum exploratumque est, innumeros absolutionum facilitate & prodigalitate ad prolapsionis contagium provocari. *Facilitas enim venia, ut præclare inquit Ambrosius in Psalm. 118. serm. 8. incentivum tribuit delinquendi. Hoc ideo dictum est, ut sciamus secundum verbum Dei, secundum rationem dispensandam esse misericordiam debitoribus.* Medicus ipse, si serpentis interiùs inveniat vulneris cicatricem, cum debeat rescicare ulceris vitium, ne latius serpat; tamen à secandi urendique proposito lacrymis inflexus agroti, medicamentis tegat quod ferro aperiendum fuit: nonne ista inutilis misericordia est, si propter brevem incisionis vel exustionis dolorem corpus omne tabescat, vita usus intereat? Rectè ergo & Sacerdos vulnus grave ne latius serpat, à toto corpore Ecclesia quasi bonus medicus debet abscindere, & prodere ulcus criminis quod latet, non fovere: ne dum unum excludendum

*excludendum non putat, plures faciat dignos quos excludat ab Ecclesia.*

Salvianus considerans olim hominum in humanis & sæcularibus curandis diligentiam, in iis quæ Dei sunt peragendis incuriam: *Solus Deus*, inquit, *in comparatione aliorum nobis vilis est.* Ad eundem modum de præproprio absolutionibus, idest sanguinis Christi dispensationibus dicere licet, *in comparatione aliorum negotiorum, sola Sacramentorum administratio nobis vilis est.* Cum enim divina remittendorum peccatorum potestas in necessariam conversa sit absolvendorum etiam inveteratorum peccatorum servitutem, qui nec mores emendarunt, nec ulla præferunt penitentiae signa, nisi centies & semper violata promissa, nullum est vel levissimum humanæ vitæ negotium, in quo major prudentia majorque cautela non adhibeatur. In rebus cæteris non verba duntaxat quærimus, sed facta & effectus optamus: in mercibus, in jumentis, in bobus probandis & diligentiam adhibemus, & dum dubium suboritur, temporis diuturnitatem postulamus, nec temporis moram inutilem arbitramur; & omnibus, & semper, & ubique absolutionem post sexcenta violata promissa, nullâ adhibitâ in dispensandis Christi mysteriis cautione impertiemur? Et si Superis placet, crudelitatis insimulabimur, si iis absolutionem differamus, qui iteratis lapsibus firmum sibi vitæ in melius commutandæ propositum non adesse fidem faciunt? Quid superest, si post innumera vitia his temporibus falsis coloribus oblita, illa etiam quæ inanum probabilitatum pigmentis velari palliarique non potuerunt, absolvendi

facilitate sicut aqua bibantur? Quâ tandem viâ scelerum frequentia, quâ orbis laborat, medebimur, si unicum quod reliquum est procrastinandæ absolutionis remedium eripiat? Ergo omnis Ecclesiastica disciplina labefactetur, omnis Christianorum salus nefariè prodatur, omnis conversionis spes extinguatur, omnibus vitiis aditus & impunitas aperiatur necesse est, si peccatoribus in eadem flagitia relabentibus absolutio toties quoties concedenda sit, etiamsi emendationis futuræ spes nulla probabilis, idest factorum testimonio probata appareat. Ergo in hoc casu non languidis voluntatis desideriis & commotiunculis sterilibus & vanis, quas nihil bonæ frugis allaturas tot præcedentibus experienciis convincitur, contentus debet esse Sacerdos, sed exigere factorum pignora, quibus nixus prudenter existimare possit, fractam toties fidem ac conversionis sponsonem tandem aliquando effectû sortituram. Imitentur viri Apostolici Jacobum Apostolum, & sicut iste fidem operibus vacuum, inanem & mortuam pronuntiavit; ita illi irrita & infrugifera, ac toties fallentia desideria poenitentiam vanam, fallacem, emortuam meritissimè judicent. Qualis enim sit voluntas exitus docet, consiliorumque sinceritas non verborum sonis, non lacrymis doctis mentiri, non pollicitationum nunquam executioni mandatarum præstigiis ab amore sui profectis, sed veris factis exploratur. Igitur relapsi peccatores antea quàm absolvantur, prius debent mentem verbi divini pabulo & cœlestium rerum meditatione pascere, animæ maculas lacrymis ac voluntariis poenis eluere, ablata re-

stituere

stitueret, cum inimicis in gratiam redire, à vitiorum consuetudine & visco se expedire, & in pœnitentiæ exercitationibus tamdiu hære, quoad necesse fuerit, ad impuras vitiorum imagines divinarum rerum meditatione abstergendas, ad curanda gemitibus mentis vulnera, ad inveterata odia ex animo evellenda, ad opprimendos lascivientes carnis motus morum depravatione fortiores, ad exitiales denique, quibus in peccati servitute detinentur, laqueos dissolvendos.

Confirmatur ex sacris Conciliis, quæ licet concessam agnoscant Ecclesiæ potestatem lapsis remittendi peccata quotiescumque ad ipsam cum vero pœnitentiæ sensu confugerint, in ejusmodi tamen potestatis usu prudentiam, cautionemque maximam adhibendam esse censuerunt, ne indulgentia promiscua & indignis concessa non modò culpas non abstergeret, sed & peccandi audaciam ingereret ac consuetudinem nutrebat. Hinc Concilium Toletanum III. sub Pelagio II. can. II. coërcendam eorum præsumptionem statuit, qui quoties peccare libuerit, toties à Presbyteris se reconciliari velint. *Quoniam, inquit, comperimus per quasdam Hispaniarum Ecclesias, non secundum Canones, sed fœdissime pro suis peccatis homines agere pœnitentiam, ut quoties peccare libuerit, toties à Presbyteris se reconciliari postulent: ideo pro coërcenda tam execrabili præsumptione id à Sancto Concilio jubetur, ut secundum formam Canonum antiquorum detur pœnitentia.* Gregorius etiam VII. in minori Britannia Synodum haberi iussit, ad morem illum perniciosum evellendum, qui in illa regione Sacerdo-

tum ignorantia inoleverat, ut eorundem criminum conscii absque ulla prævia emendatione absolverentur. *Sacerdotalis culminis dignitas* ( inquit Pontifex lib. 7. epist. 10. in Episcopos & Sacerdotes Britannia, ) tum imperitia, tum negligentia Sacerdotum, sicut vestra dilectio novit, ex longo jam tempore peccatis exigentibus fuit collapsa. Ex qua quidem re quasi ex pestifera radice innumera mala exorta sunt, adeo ut usque ad hac nostra tempora, inter cetera qua male pullulant vitia, falsa nihilominus poenitentia consuetudo inoleverit. Infructuosam enim poenitentiam dicimus, qua ita accipitur, ut in eadem culpa, vel simili, vel deteriori, vel parum minori permaneat. Unde quisque dignè vult poenitere, necesse est ut ad fidei recurrat originem; & quod in baptismo promisit, a diabolo scilicet pompisque illius abrenuntiare, & in Deum credere, videlicet recte de eo sentiendo, & mandatis ipsius obedire, sollicitus sit vigilanter custodire. Quicumque ergo taliter poenituerit, quoniam aliter simulatio dici potest, non poenitentia, illi peccatorum suorum remissionem, Apostolicâ frei potestate largimur: insuper æterna beatitudinis gaudia de Omnipotentis Dei misericordia confisi promittimus.

Idem docent SS. Patres, qui licet fateantur eos qui gratiam semel acceperint, ab ea posse excidere, criminum tamen & conversionum perpetuam vicissitudinem rem esse vulgarem & quotidianam, nunquam sibi, nunquam aliis persuadere potuerunt: sed eos nunquam poenitentia solidum sensum habuisse censuerunt, in quorum factis nullum mutationis vestigium apparet.

apparet ; rati repentinas illas conversiones, quæ punctum temporis durant, statimque evanescent, falsas esse & fallaces, verisque conversionibus minimè esse annumerandas. *Irrisor est, & non pœnitens*, inquit S. Isidorus lib. 2. sentent. cap. 16. *qui adhuc agit quod pœnitens nec Deum videtur pœscere subditus, sed subsannare superbus. Canis reversus ad vomitum, est pœnitens ad peccatum.* Multi enim indefinenter lacrymas fundunt, & peccare non desinunt. Quosdam accipere lacrymas ad pœnitentiam, & effectum pœnitentia non habere constat ; quia inconstantiâ mentis nunc recordatione peccati lacrymas fundunt, nunc verò reviviscente usu, ea quæ fleverant iterando committunt. Idem docet Magnus Gregorius 3. part. Pastoral. admonit. 31. *Considerare sollicitè sciant*, inquit, *quia flendo inriter se mundant, qui vivendo nequiter inquinant, cum idcirco se lacrymis lavant, ut mundi ad sordes redeant. Et qui admissum plangit, nec tamen deserit, pœna gravioris culpa se subicit : quia & ipsam quam flendo veniam potuit impetrare, contemnit, & quasi in lutosa aqua semetipsum volvit : quia dum flatibus suis vitæ munditiâ subrahit, ante Dei oculos sordidas ipsas lacrymas facit.* Id ipsum etiam præclare tradit Petrus Blesensis tractat. de Confessione Sacramentali, his verbis : *Putant aliqui sibi sufficere, quod aliquandiu à sua turpitudine destiterunt, atque de primitiis arrepta continentia præsumentes, veteres excessus non recolunt ; & quasi spatio temporis evanuerint culpa, vel earum oblitus sit, aut dormiat Deus, putant de omnibus debitis brevi pœnitentiâ compendio transegisse.:::*

*Non sine dolore cordis acerbissimo, & anxietate cordis afflictione sanantur, quae longo usu inolitata, & intimis animarum medullis infixae sunt. Nec horaria & levi contritione redimi possunt, quibus mors aeterna debetur. Et post plura: Nemo itaque de momentanea contritione vel affluentia lacrymarum presumat :: Si senseris in te gratiam compunctionis & affluentiam lacrymarum, non tamen ideo re statim arbitraris Domino reconciliatum. :: Vides profecto quàm gratum Deo sit sacrificium lacrymarum, & pro omnibus delictis sufficiens holocaustum. Sed quibus? Confitentibus, poenitentibus, non revertentibus ad vomitum, sed in spiritu humilitatis & in animo contrito fugientibus ad pia viscera IESU, & continuantibus dignos poenitentiae fructus.*

Ex quibus omnibus sic formatur demonstratio: Sacerdos non debet absolvere nisi quos verae poenitentiae spiritu agi probabiliter existimaverit, nisi velit existere sibi traditae potestatis dissipator, non dispensator fidelis: maxime cum Sacramentum poenitentiae non solâ poecatorum recitatorum absolutione constet, sed etiam actus poenitentis, id est veteris vitae odium, nova propositum, cessationem à peccatis, nova vita inchoatorem, laboriosamque satisfactionem, juxta Sacrum Concilium Tridentinum importet: ergo frustra eos absolvat, quos non probabiliter crediderit, velie sincerè cessare à peccatis, novam vitam inchoare, satisfactionis laboribus defungi. Atque ille qui in iterata fugitiâ nullâ emendatione interrupta relabitur, ex Patribus memoratis non verae, sed falsae poenitentiae spiritu agitur, etiamsi lacrymis affluat, quas

quas sordidas & lutasas vitæ inconstantia reddit. Ergo multò minùs hujus sæculi relabentes, qui nec compunctione vehementi anguntur, nec lacrymis affluunt, sed sterilibus verborum pollicitationibus contenti sunt, absolventi sunt, nec tales habendi, ut eos in eadem peccata revolvendos meritò credendum non sit. Certè sanitas animæ non ex verborum foliis, sed ex operum fructibus; non ex imperfectis mollis voluntatis desideriis, quæ toties infructuosa fuisse deprehenduntur, & quibus, authore Bernardo, inferi referti sunt, sed robustis & efficacibus, atque in opera sese fundentibus affectibus dignoscitur. Cum enim vitia voluntaria sint, nemo criminum morbis vexatur invitus. Ergo qui illis alternis vicibus sine ulla emendatione laborat, & quæ hodie deslet, cras admittit, nondùm ab illis plenè alienam gerit voluntatem; ad Deum converti nec fortiter vult, nec integrè, nec sincerè, sed ad summum, ut Augustinus loquitur, semisanciam hac atque hac versat & jactat voluntatem, partem assurgentem, cum alia parte cadente luctantem. Est igitur præscripto à prudente confessario tempore ac salubri pietatis pœnitentiæque exercitatione injunctâ examinandus, ne Sacramentum invaliditatis periculo temerè exponatur.

Eandem doctrinam exerte tradidit, verbisque & factis probavit Episcoporum gemma & Ecclesiasticæ disciplinæ archetypus S. Carolus Borromæus, à cujus vita & moribus sincera decretorum Sacri Concilii Tridentini intelligentia repetenda est. Quomodo enim non esset Concilii sensum germanum assequutus



Sanctissimus Cardinalis, qui sanctam Synodum apud avunculum suum Pium IV. perficiendam curavit & impetravit; qui pervenerabilis cœtus Patres & vidit, & affatus est diligenter; qui ejus aureo Catechismo præfuit; qui Congregationem Cardinalium Sacri Concilii interpretum deligendam curavit, cujus & ipse membrum fuit; qui amplissimæ Diœcesis & amplioris provinciæ suæ administrationem ad decretorum Concilii amussim exegit; qui in omnibus Conciliis Provincialibus & Episcopatibus quibus præfuit eò spectavit ut Tridentina jussa perficeret, & sancta vota impleret; qui ad restituendam collapsam disciplinam & poenitentiam, exemplum toti Ecclesiæ quàm late patet Catholicæ propositum à Deo est ad imitandum; qui inusitatis & ad miraculùm extraordinariis dotibus in unum hominem congestis designatus est, quem in instaurando poenitiæ studio universa Ecclesia intueretur; qui & generis claritate, & copiarum abundantia, & Archiepiscopalibus infulis, & purpuræ splendore, & Pii IV. affinitate tam propinquâ, & quod magis est, sapientiæ cœlestis lumine, vitæ sanctitatis præstantiâ, rarâ in tribulationibus immobilis animi firmitudine, Episcopali temperato suavissimâ dilectione zelo & vigore, incredibilis & penè importabilis poenitiæ asperitate, denique eximiis omnibus & singulis ornamentis illustris fuit; quibus vel in Ecclesia, vel in sæculo summa dignitatum eminentia & majori sanctimonia conciliari queant.

Hanc autem fuisse Viri divini mentem luculenter testantur hæc verba, quibus & anti-

quam

quam canonum disciplinam commendat, & observandam in concedenda reconciliacione cautionem præscribit: *Patres docuerunt*, inquit in *Instruct. pœnit. Actor. part. 4. pag. 523.* quàm necessaria admodum sit Sacerdotibus, qui in audiendis pœnitentium confessionibus versantur, Canonum pœnitentialium scientia. Etenim si omnia quæ ad pœnitendi modum pertinent, non prudentiâ solum ac pietate, sed justitiâ etiam metienda sunt, certè norma hæc à Canonibus pœnitentialibus sumatur oportet. Sunt namque ii quasi regula quadam, quibus cum ad culpæ commissæ gravitatem rectè dignoscendam, tum ad imponendam pro illius ratione veram pœnitentiam Sacerdotes Confessarii ita diriguntur, ut ubi singula & quæ ad peccati magnitudinem, & quæ ad pœnitentis statum, conditionem, ætatem, intimumque cordis contriti dolorem pertinent, accuratè perpenderit, tum demùm pœnitentiam iudicio ac prudentiâ suâ moderentur. Et in instructione Italica Confessariorum, quæ habetur in Actis Ecclesiæ Mediolanens. part. 4. pag. 769: Sacerdotes, inquit, *Canones pœnitentiales teneant: Quanvis enim prudenter & consideratè pro pœnitentis dolore, hominumque varietate, aliisque circumstantiis attemperari possint & debeant, eos tamen observari atque ut formam & regulam, quantum expedire videbitur, exprimi semper laudabile est.* Hanc autem sese ad Canones conformandi necessitatem non ex propria mente, sed ex Patrum fontibus haurerat B. Carolus. Sic enim decrevit Cœlestinus I. epist. 3. cap. 1. *Nulli Sacerdotum suos licet Canones ignorare, nec quicquam facere quod Patrum*

*Patrum regulis possit obviare.* Et Gregorius VII. in Concilio Romano : *Falsas pœnitentias pronuntiat, quæ non secundum auctoritatem SS. Patrum pro qualitate criminum imponuntur.* Unde nihil magis doctrinæ Patrum consentaneum, quàm pœnitentiæ exercitationes ante absolutionem & Sacram Communionem tantisper subire, & animum suum ad Sacramentorum usum excolere. Quod quidem ut omnibus peccato mortali maculatis saluberrimum foret, ita & illis toties emendationis propositum negligentibus necesse est, ut tandem verborum fidem adstruant, & conversionis sinceritatem Sacerdoti compertam efficiant.

Id ipsum apertius significavit Præsul Sanctissimus, dum docuit nihil ad fovendas vitiorum consuetudines esse præproperis absolutionibus conducibilis, nihil ad eam minuendam aptius, quàm si peccatores ad agendam aliquandiu pœnitentiam ablegentur, neque prius absolvantur, quàm veris vitæ emendatæ argumentis animi conversionem testatam fecerint. *Ut norint Confessarii ( inquit in instructione Confessariorum, pag. 765. ) non conferendum iis absolutionis beneficium, qui revera eâ indigni sunt ( quod per incogitantiam, negligentiam, vel alia ex causa plerumque contingit; unde fit ut quamplurimi in iisdem peccatis cum ingenti animarum starum exitio longo tempore perseverent. : )* Nos de confitio multorum tum ex Clero, tum ex variis Regularium familiis Theologorum, aliud in iis casibus qui frequentius incurrunt, observari debeat, infra notabimus.

Descendens autem Vir sanctus ad casus singulares,

gulares, ait in primis, iis differendam esse absolutionem, qui vestium immoderato luxu labuntur. Quia, inquit, his temporibus luxus iste eò processit, ut jam ultra quò progrediatur non habeat: idque magnam partem culpâ & negligentia Confessorum, qui sine ulla circumspectione, ac fortassis ne admonitis quidem omnino eâ de re pœnitentibus, eos absolvunt. Docet deindè iis absolutionem esse differendam qui peccandi occasiones non studiosè declinant, donec postquam promissis non steterunt, reipsa ab illis illecebris se expedierint. Nec obest quod illis sine incommodo carere non possimus: immutabilis enim & æterna Dei lex non est nostris commodis dimetienda vel inflectenda; cum voce Veritatis dictum sit, universi etiam orbis possessionem & lucrum pro nihilo putandum ubi animæ salus agatur. Si manus tua vel pes tuus scandalizat te (inquit Christus Matth. cap. 5. & cap. 18. & Marci 9.) abscinde eum & projice abs te: bonum est tibi ad vitam ingredi debilem vel claudum, quàm duas manus vel duos pedes habentem mitti in gehennam ignis. Et si oculus tuus scandalizat te, erue eum & projice abs te: bonum est tibi cum uno oculo in vitam intrare, quàm duos oculos habentem mitti in gehennam ignis. Quibus verbis res maximè utiles, charas, & quibus sine grandi incommodo & mentis acerbitate carere non possumus, procul amovere præcipimur, si spiritualis ruinæ occasionem afferant. Et si, inquit es Chrysostomi aureum hom. 17. in Matth. tantum aliquem diligas, ut eo dextri oculi utaris vice: aut ita tibi quempiam esse utilem putes, ut eum dextra manus

*manus habeas loco ; & hi tamen anima tua fortassis incommodent , etiam istos à te absconde. Et quidem vim sermonis observa. Non enim dixit , à talium societate discede : sed maximam separationem indicans : Erue , ac projice abs te.*

Ad circumstantias adhuc magis individuas progrediens vir oculatissimus & sanctissimus , peccandi occasionibus annumerat res per se & ex officio innoxias , è quibus tamen peccandi occasionem homo pæ infirmitate nanciscitur , quem absolvi vetat nisi aut illâ occasione dimissa , aut certè aliquo temporis spatio rebus illis ad peccandum non utatur. *Sunt , inquit in instructione Confessur. pag. 767. alia occasiones , quæ suapte naturâ quidem tales non sunt , sed hominum quorundam ratione : velut pœneque res per se licite , in quibus si pœnitens hæreat , ut antea fecit , merito iisdem rursus criminibus implicandus videatur. Tales plerique sunt temporum iniquitate ac vitio , militia , mercatura , magistratus , causidicorum & procuratorum munia , aliaque hujusmodi , in quibus qui sæpe mortaliter peccare consuevit , blasphemis , furtis , iniquis judiciis , calumniis , odiis , fraudibus , perjuriis , aliisque similibus culpis exploratum habet , si in eadem professione permaneat , easdem sibi peccandi occasiones eventuras : Neque verò credendum , plus sibi virium ad peccatum vitandum fore , quàm prius habuerit ; ideoque in eadem peccata prolapsurum. Quamobrem ejusmodi homines aut vita rationes sibi adeo periculosas deponere debent , aut certè in iis non versari , nisi de pii prudentisque Sacerdotis consilio , qui neminem sic affectum absolvet.*

absolvere debet, ut probabile censeat in eadem peccata recasurum, si in iisdem occasionibus perseveret, sed certum temporis spatium sumere ad emendationem illius explorandam. Atque hinc è magis evigilandum est, excubandumque animo, quod confessorum culpâ & inertia factum videmus, ut in plerisque artibus & professionibus innumera corruptela & gravissima delicta passim vigeant, sine quibus res alioquin iustissima iam à paucis admodum factitari posse videantur.

Ergo ex mente S. Caroli non solum peccatoribus in peccata mortifera sæpe labentibus absolutio differenda est, sed etiam eo authore præproperæ absolutiones fontes sunt unde innumeri abusus & infinitæ corruptelæ proficiuntur, quibus omnes artes, omnesque professiones ita inficiuntur, ut à ferè nullis sine certa pernicië tractari queant. Unde Sacerdotes non debent relabentes priusquam vitæ in melius commutatæ argumenta viderint, inconsideratâ facilitate absolvere. Quam verissimam regulam à Patribus acceperat eximius Cardinalis. Ita enim docuit Concilium Lateranense sub Innocentio II. can. 22. his verbis: *Falsa sit pœnitentia, cum pœnitens ab officio vel curiali, vel negotiali non recedit, quod sine peccato agi nulla ratione praualeat.* Ita docuit Gregorius VII. in Concilio Romæ habito: *Quicumque miles, inquit, vel negotiator, vel alicuius officio deditus, quod sine peccato exerceri non possit, si culpis gravioribus irretitus ad pœnitentiam venerit, cognoscat se veram pœnitentiam non posse peragere, nisi arma deponat, ulteriusque non ferat nisi consilio religiosorum Episcoporum*

porum pro defendenda justitia; vel negotium relinquit, vel officium deserat. Ita docuit Magnus Gregorius hom. 24. in Evangelia: Sunt, inquit, pleraque negotia, quæ sine peccato exhiberi aut vix, aut nullatenus possunt. Quæ ergo ad peccatum implicant, ad hac necesse est ut post conversionem animus non recurrat.

Denique sanctissimus Antistes totam hanc doctrinam his luculentissimis verbis eodem loci confirmat: *Confessarios monitos volumus, ut his quos peccata non dimissuros probabiliter existimabunt, quantumvis polliceantur ac spondeant ea se dimissuros, absolutionem procrastinent, quoad emendationem perspexerint. Nec non iis qui per multos annos in eadem peccata prolapsi erunt, neque operam ullam ad correctionem vitæ contulerint. Non potest autem rectè judicare Sacerdos peccatorem sæpe relapsum, sæpeque promissionum iteratarum violatorem in sancto non peccandi proposito permanens factis testatam fecerit. Soli enim illi, ut est communis Patrum omnium vox, veram pœnitentiam agere censendi sunt, qui dignos pœnitentiæ fructus vitæ ratione ad meliorem frugem deinceps institutâ exhibent, non verò qui perpetuâ peccatorum & confessionum vicissitudine & replicatione vitam alternant, qui sordes Sacerdoti aperiunt, ad eas primo quoque die redituri, qui post Confessionem & iidem sunt & eadem operantur, quorum scelera Sacramentorum usus etsi tantisper suspendat aut intermittat, non abrumpit tamen. Præclare S. Isidorus Hispalensis lib. 2. Sentent. cap. 13. & 16. Ille pœnitentiam dignè agit, qui*  
*sic*

*sic praterita mala deplorat, ut futura iterum non committat. Nam qui plangit peccatum, & iterum admittit peccatum, est quasi si quis lauet laterem erudum, quem quantò magis laverit, tantò amplius lutum facit.*

Beati Caroli vestigia sequutus est S. Franciscus Salesius Genevensis Episcopus, qui ut in ejus vita proditum est, S. Borromæum sibi ducem imitandum proposuerat. Et quanvis piissimus ille Antistes ad Hæreticos ad Ecclesiam revocandos divinitus electus sit, ideoque Genevæ Hæreticorum Babylonii Pastor præfectus; disciplinæ tamen Ecclesiasticæ & pœnitentiæ inter Catholicos restaurandæ zelo flagravit. Fuit quidem illi, fateor, cœlestis instillata lenitas atque eximia mansuetudo ad animos demulsis cordibus Deo devinciendos; fuit in illo charitatis eximia teneritudo suavitate diffuens & redundans, quâ paternis visceribus & pietate ex animo corpus velut irradiante omnibus omnia factus, peccatores omni mansuetudine & misericordiâ complectebatur, & vel durissimos flectebat, vel immanissimos ad benevolentiam alliciebat. Veruntamen iis quos regendos suscepserat, pœnitentiæ studium & praxim, arctamque mortificationis viam, quæ sola in cœlum ducit, vehementer indicebat: & quia probè noverat cor non posse divinâ charitate mutari quin pœnitentiæ laboriosæ exercitationibus vitiorum stirpes evellat, passionés compri-  
mat, illicitarum antea actæ vitæ voluptatum fluxum etiam licitarum privatione castiget, ideo pœnitentiæ labores pro gravitate criminum animabus quantum erant ad eos ferendos idoneæ imponere solebat.

Eidem



Eidem sententiæ subscripsit eminentissimus Annalium Ecclesiasticorum Scriptor, ad annum 153. num. 79. ubi cum retulisset verba Cleri Romani scribentis ad Cyprianum, quibus decernit pœnitentem morte urgente esse reconciliandum, etiam non absolutâ impolitâ pœnitentiâ; si tamen professâ frequenter suorum detestatione factorum, lacrymis, gemitibus, fletibus dolentis ac verè pœnitentis animi signa prodidisset, infert Baronius: *Quàm ergo parùm tuta, quamque dubia sit illa festinanter exhibita reconciliatio etiam petentibus eam cum lacrymis, dicta nuper sententia declaravit. Ergo ex mente sapientissimi Cardinalis præprope, & illæ absolutiones quæ idoneos pœnitentiæ fructus antecedunt, parùm tutæ & ancipites censendæ sunt.*

Idem docuit eximie sanctimonie & doctrinæ Cardinalis Joannes Gropperus in præclaro de Institutione Catholica opere, ubi non solum pœnitentiam publicam revocari exoptat, quam solâ vel incuriâ, vel inscitiâ Prasulum Ecclesiæ exolverisse & penè abolitam esse deplorat, quam rem summè necessariam esse ait, præsertim hoc deploratissimo tempore, quando omne flagitiorum genus ita ubique sine pudore inundat, ut flagitia vix pro flagitiis habeantur; sed in speciali de absolutione peccatoribus danda ait pag. 231. *Non relaxari in Ecclesia gravia crimina, nisi satisfactione susceptâ & peractâ.*

Illum etiam fuisse avitum Confessariorum Sacræ Patrum Societatis Jesu spiritum patet non solum quia P. Adornus Jesuita in condendis suprâ relatis S. Caroli decretis, quibus hæc nostra doctrina apertissimè traditur & præcipitur,

pitur, affuit, sed etiam quia S. Xaverius hanc disciplinam in primis probavit, eam Confessariis Societatis inspirare solitus: *Confessionem*, inquit, referente Turfellino lib. 6. vitæ S. Xaverii, cap. 17. *non continuò sequetur absolutio*. Arbitrabatur enim vir Apostolicus, peccatorum animos lacrymis, meditationibus, restitutionibus, reconciliationibus, aliisque voluntariis pœnis esse ad absolutionis gratiam præparandos: *Hac omnia*, inquit, *absolutionem præcurrunt rectius quàm sequuntur*. Et quanvis vir Sanctus inter confessionem & absolutionem bidui aut tridui moram exempli gratiâ afferat, quò magis peccatores ad pœnitentiam induceret, eosque refractarios brevi ac facili aditu allecigaret; est tamen judicio illius omninò consentaneum, ut cùm opus fuerit, pœnitentibus longius temporis spatium adhibeatur. Cùm enim idcirco illâ intercedere utendum censeat, ut ablata restituantur, ut similitates deponantur, ut etiam à libidinis consuetudine, ceterisque quibus impliciti sunt flagitiis expediantur, clarum est viri sancti judicio longius communiter temporis spatium adhibendum esse, cùm tantulo tempore à depravatorum morum consuetudine rarissimi emergant, etsi aliquando id contingat, cujus illustre exemplum in vita S. Vincentii Ferrerii extat. Idem S. Xaverii spiritus perspicui potest in tractatu de sanctissimo Sacramento à Patre de Bonis edito, ubi sic habetur: *Utilissimum remedium est adversus iteratos relapsus, multisque probatum experimentis, absolutionem peccatoribus differre, ut se aliquà pœnitentiâ ad Communionem compareant*. *Varia igitur pœni*

*pœnitentia officia ipsis imponenda sunt, quibus ad cognitionem, dolorem, & detestationem peccatorum perducantur. Hoc autem nisi fiat, peccatores statim ad vomitum redeunt. Hoc institutum multis peccatoribus profuisse testantur graves & prudentes Religiosi.*

Primò, inquit P. Emericus de Bonis è Societate JESU, in lib. quem *Speculum Confessionis* inscripsit, caveant qui confessiones excipiunt, ne iis temerè absolutionem indulgeant quibus negare oporteat, indignis videlicet & imparatis omnibus, qualis est quem admissorum in se criminum non pœniteret, aut cui discedendi à pristina pravitate certa voluntas non esset, vel qui damna seu bonorum, seu famæ, seu cujuslibet alius rei, quibus opus est, cùm possit, rependere abnueret, aut qui mortiferi peccati occasiones vitare nollet; quoniam eorum nemo eâ vi doloris tangitur, quâ necesse est ut absolva-  
tur, cùm vel illa imperfecta, quæ attritio dicitur, contritione careat.

Secundò, sacræ Pœnitentiæ administer pœnas non solum præteritis criminibus expiandis congruas pœnitentibus imponat, sed queis præterea tanquam salubri antidoto à futuris deinde præserventur. Nec ei muneri satisfacere putandus est, qui vel corona precaria, aut septem Psalmis Pœnitentiæ recitandis, aut levioribus etiam rebus mulctatur eos, quorum peccata multis jejuniiis, flagellis, eleemosynis, ciliciis, & peregrinationibus essent expianda. Et quia neque duræ, neque difficiles sunt impositæ pœnæ, fit ut citò ad priora flagitia relabantur.

• Tertiò, si Confessarius ille sedulò perpenderet

deret de animabus iis Deum à se exacturum esse rationem, proculdubio majori tum sibi, tum aliis cura provideret. Audiat Concilium Tridentinum sess. 14. cap. 8. sibi præcipiens: *Debent ergo Sacerdotes Domini quantum spiritus & prudentia suggererit, pro qualitate criminum, & pœnitentium facultate, salutare & convenientes satisfactiones injungere: ne si fortè peccatis conniveant, & indulgentius cum pœnitentibus agant, à levissima quadam opera pro gravissimis delictis injungendo, alienorum peccatorum participes efficiantur.*

Falsas appellat D. Gregorius, ut refetur cap. *Falsas*, de Pœnit. dist. 15. omnes piaculares pœnas justo leniores: non quòd irritam confessionem putet, sed quòd occasionem præbeant erroris pœnitentibus, qui impositis sibi à Confessario pœnis, divinæ justitiæ se fecisse satis arbitrentur.

Pius Abulensis Episcopus quæst. 49. in cap. 18. Mat. Confessarium peccare ait qui non perspecta criminum qualitate pœnam irrogat.

Adrianus Papa VI. in 4. Sent. dist. 20. ait maleficiorum, scelerum, criminum in Deum commissorum prudenter dandam à Sacerdotibus veniam esse. Et Major, non esse amici veri leviores pœnas imponere, nec prudentis & sibi rectè providentis quærere, aut adeptis gaudere. His omnibus testimoniis efficitur, ut Confessarius qui absque legitima causa, ob multas graviore noxas pœnas leviores infligit, officio suo desit, nec suscepto munere ritè fungatur.

Septem annos pœnarum ob peccata quædam lethalia Canones decreverunt. Et quanvis ad  
solum

solum Deum, cui interior animi pœnitentia patet, congruam unicuique peccantium pœnam assignare pertineat; Confessariis tamen pro qualitate criminum, proclivitate ad peccatum, admissorum dolore, emendationis spe, viribus & conditionibus pœnitentium, convenientes imponendi munus incumbit. Non enim rectas prudentiæ regulas sequeretur, qui largas eleemosynas pauperibus, longa operariis jejunia, debilibus atque ægrotis flagella & cilicia imperaret.

Ipse præterea meminerit, rem esse valde utilem, & longo plurimorum Confessariorum usu firmatam, absolutionem aliquando suspendere, & ut ii qui frequenter in peccata recidunt ad sacrum tribunal iterum se sistant, interimque duris & operosis quibusdam pœnis propitiando Numini operam dent, maximè si peccata lasciviæ sint, impellere. Id quia pauci præstant, multi ad meliorem frugem nunquam se recipiunt, cum è contrà à peccatis absoluti, sitamen absoluti dicendi sunt, ipsa die aut paulò post ad eadem sua crimina revertuntur. Unde non temerè conjectura fit, eos qui imparati ad Sacramentum accesserant, absque peccatorum venia discessisse. Confert enim ipsa gratiam, cujus ope anima certè aliquamdiu peccatis resistere potest. At illi è contrà citò, nec ab ulla gravi tentatione vexati relabuntur. Sæpe etiam ipsi peccandi occasiones quærunt & sollicitant cupidines suas. Itaque optimum est eos cogere, ut iterum redeant ad tribunal, ut majori curâ deinceps sibi caveant, & vitia sua accuratiùs perscrutentur. At fortasse non revertentur? Eo pejori loco res ipsis erit, dabunt enim argumentum certissimum

eo dolore, eâque animi præparatione caruisse, quibus deficientibus à Confessariis absolutio neganda est.

Quoad ea quæ ab aliis pœnitentiæ ministris eâ de re afferuntur, finite illos: præstabit ipsi Deo illas culpas nimiam suâ facilitate ab iis quibus nimium indulgent admissas. Multo in peccatorum reos Confessarii crudeliores sunt, quàm Medici in ægrotos, quibus ne molesti sint, ab asperis unguentis & igne, cum adhibitis est opus, abstinēt.

Quartò etiam atque etiam videant, quinam ad sacræ Eucharistiæ sumptionem sint admittendi. Nefas enim est, abusumque intolerabilis eos ad sacram Synaxim accedere, aut rem divinam facere, qui in turpium voluptatum cœno sine ulla emendatione volutantur. Sunt tamen nimium multi qui sæpius in hebdomade se inquinant, & tamen octonis, aut quinis & denis quibusque diebus Synaxim sumere, quia ita consuevere, velint. Quo fit ut tanto animi stupore occalleant, ut nec statum suum miserrimum sentire possint. Qui cum prius sancto perculsi horrore & submissâ veneratione trepidi sacrosancta illa mysteria perciperent, audaces, intrepidi, & sine pietate suscipiant. Id inde manifestè arguitur, quòd eo ipso die, dictu horrendum, ad easdem suas libidines revolvantur.

Ex his omnibus intelligere facile potest Lector, quàm ardua sit regendarum animarum provincia, quam meritò Gregorius Theologus, & postea Gregorius Magnus *Artem artium* appellarunt, quæve à Cardinali Berulio pietate magis quàm dignitate eminentissimo, usque cō-

evecta est, & unius animæ quàm regni cuiusvis quàmlibet amplissimi curam & administrationem magis arduam operosiorēque asseruerit. Nam vel nimia remissione atque indulgentiâ, vel districtiori quàm par est severitate non prolabi, hoc opus, hic labor est. Nec sine affuso sibi divinæ sapientiæ lumine potest quis jura Dei ita tueri, ut ne hominum infirmitatem opprimat; vel sic hominum imbecillitati obsequi, ut ne in jura Dei peccet. Utrunque angustia, utrinque periculum, vel si inani clementiæ umbone peccatores Sacerdos decipiens non expectet, *quoad necessaria temporis remedia conducant cicatricem*, ut Clerus Rom. epist. 31. ad Cyprianum ait; vel si rigore indilcreto *fortia tantum loqui sciat, non possibilis*, ut verbis utar Bernardi lib. 1. de consid. cap. 5. *nec compatiatur natura, nec possibilitatem aestimet*, ut Ambrosius alioquin disciplinæ retinentissimus, in Psalm. 118. faciendum monet. Quàm difficile, quàm lubricum, quàm charitatis & prudentiæ plenâ copiâ indigens ministerium est Sacerdotum, ne dum lapsos erigere volunt, ipsi collabantur, ne pernicioso obsequio vulnus benignâ attrectantes manu, ægritudinem foveant, seque ipsos vulnerent. Hinc B. Francisco Salesio 1. part. Introduct. cap. 6. teste, Avila ex mille unum ad directoris munus eligendum censebat; ipse verò ex decem millibus discernendum imperat, quia pauciores sunt quàm dici potest, qui tantæ provinciæ sint pares. Hinc B. Theresia quantum periculum sit i semidoctis, tenui & exigua eruditione præditis, in vita sua testatur. Sed quantâ præsertim in impertiendis absolutionibus discretionē opus sit,

sic, ne desistant unquam vel in acerbam  
severitatem, vel in dissolutiorem remissionem;  
ne vel in retinendo Sacerdotali vigore segnio-  
res aut verecundiores quàm par est sint, vel  
contrà nihil de proposito rigore remittant, vel  
condonent illis etiam, in quibus digni pœni-  
tentiae fructus visuntur, declarat his salubribus  
perinde ad formidolosus vocibus Magnus Basi-  
lius epist. 2. ad Amphil. cap. 84. & 85. *Hæc  
autem omnia scribimus, ut pœnitentia eorum  
fructus probentur. Neque enim hac omnino ex  
temporis spatio judicamus, sed modum pœni-  
tentia attendimus. Quod si qui à propriis mor-  
ibus non faciliè avellantur, & carnis volupta-  
tibus potius quàm Deo servire voluerint, vi-  
tamque ex Evangelio institutam non ample-  
ctantur, nulla nobis cum illis intercedit com-  
munis ratio. Nos enim adversus populum non  
credentem & contradicentem, illud audisse me-  
minimus, Salvans salvā animam tuam. Non  
ergo cum eis perire consentiamus, sed grave  
judicium reformidantes, & tremendam illam  
retributionis Domini diem præ oculis habentes,  
caveamus aliorum peccatorum ruinā involvi.  
Caveant ergo Confessarii ne per inanem cle-  
mentiae speciem præsumptuosam confidentiam  
vera pœnitentia destituti peccatoribus inge-  
rant, ne reos decipiant miseros, ut qui possunt  
per sinceram ac probatam conversionem Deo  
misericordi precibus & operibus suis securè  
reconciliari, seducantur ut magis pereant; &  
qui erigere se possent, plus cadant. Timeant ne  
in se cadat quod in sui simillimos contorquet  
his vocibus Cyprianus tract. de lapsis: Hoc*



*sunt ejusmodi lapsis quod grando frugibus, quod turbidum sidus arboribus, quod armentis pestilens vastitas, quod navigiis sava tempestas. Solatium spei aeterna adimunt, arborem à radice subvertunt, sermone morbido ad lethale contagium serpunt, navem scopulis ne in portum perveniat illidunt.*

Cùm ergo S. Carolus Episcoporum gemma, & Sacri Concilii Tridentini de pœnitentiæ disciplina instauranda, interpretes & custos hanc doctrinam luculentissimè docuerit, nec in alium scopum vir divinus collimaverit quàm confirmatæ vel restitutæ à Tridentina Synodo disciplinæ decreta diligentissimè implere, ut his verbis Ripamont. vitæ ipsius author lib. 2. pag. 107. 108. III. testatur: *Sub Concilii Tridentini finem statuis ingredi Apostolica perfectionis iter, vitæque instituta exprimere ea quæ litteris & decretis comprehensa essent.* Et iterum: *Gravissimam hanc missionem suscepit, ut Pontificatu ipso administrationeque Ecclesia Mediolanensis omnia Concilii Tridentini decreta disciplinæque repræsenteret.* Cùm, inquam, hæc ita sint, & ita esse Summi Pontifices publicè agnoverint, & locupletissimi vitæ ipsius testes prodiderint, non potest hæc praxis ad sacram Tridentini decretorum & mentis amussim exacta non haberi secuta & certa. Nec dici potest virum sanctum hac in parte sicut & in cæteris instaurandis Ecclesiasticæ disciplinæ regulis rigidiorē extitisse. Non, inquam, id dici potest: nam ut in Concilio III. Provinciali Archiepiscopus sanctissimus profiteretur, vix aut ne vix quidem inchoarat, nedum absolverat,

solverat quod aggressus fuerat. Quod si quis nostrum, inquit, secus fortasse existimat, quoniam in hac provincia aliquod majus Christiana pietatis studium elucere videt quàm antea solebat, quàmque aliis fortassis locis apparet, na iste planè quidem fallitur. Non est enim cur nos vel cum iis qua proximè antecesserunt temporibus, vel cum aliorum factis actiones nostras expendamus: sed comparemus oportet cum ea sanctè agendi formula nobis divinitus praescripta, quæ si ob oculos versabitur, facile cernemus quàm longè ab ea distemus. Nec rigidius existimandum quod vir divino spiritu actus necessarium existimavit: Si quæ oves, inquit orationibus in variis Conciliis Mediolanensibus habitis, impurâ vitiorum labe exarbescent, salis acrimoniâ sananda sunt. Quàm inanes & penè nefaria voces hominum, qui populum nostrum decipiunt dicentes: Pax, pax, & non est pax? Et qua utilitas nobis existet, si iram Dei in nos concitantes, hominum benevolentiam populari quadam indulgentiâ conciliemus? Unde non potest stabilita à nobis sententia reprehendi, quin eodem impetu Episcoporum hujus ætatis lumen S. Carolus reprehendatur.

*Solvuntur objecta contra stabilitam de differenda absolutione , temperanda-  
que ejus frequenter relapsis impercien-  
da facilitate , sententiam.*

Objicies primò: Consuetudo Ecclesiæ est in omnibus æmulanda , ne novitatis meritò infimulemur. Acqui passim in Ecclesia usus absol- vendi quoscumque asserentes se pœnitere , vi- get: ergo non est illis differendum absolutio- nis beneficium.

Respondeo hanc ipsam objectionem sæpe sibi S. Carolum proposuisse , & propositam con- trivisse. Nec verò est , inquit in Concilio II. Mediolanensi , cur à muneris nostri ratione de- terreamur , vel quia his pastoralibus nostris studiis citioribusque animos eorum exulcerari videamus qui filii sunt perditionis , vel quia populares illa , quibus quasi ficus foliis , deformes praviq; mores contegi solent , voces audiantur: Non ferunt hac tempora veterum canonum severitatem : sio jamdiu viximus ; ita vixe- runt , ita egerunt qui ætate nos antecesserunt: vita institutum nihil est quod mutemus. At nos hac atque alia ejusmodi contemnamus. An verò forasse , addit in Concilio IV. à curatione nostra deterremur , quia hoc nostro frequenti provincia sananda studio exulcerantur quorun- dam animi passim dictitantium : Non ferunt hac tempora veterum canonum & antiqua Ec- clesia medicamenta ? Imò ardentius progredia- mur , quoniam hac una medicina præstantissima  
est.

*est, maxime opportunum id remedium, ut quibus olim rationibus disciplina christiana sata & propagata fuit, iisdem ipsis & instauretur & conservetur.*

Quare adversæ sententiæ non Ecclesiæ consuetudo, sed multorum abusus favet. Neque enim Ecclesiæ consuetudinibus & moribus accensendum est quod à multis adversus Spiritûs sancti doctrinam, Apostolorum instituta, exempla Patrum, leges Canonum, Tridendas Sanctiones, Sanctorum Episcoporum vota, & summorum Antistitum decreta fieri solet. Nec obest usum illum in omnes Ecclesias serpere & dilatarî, hoc enim duntaxat suadet abusum ita effusum ardentius coërcendum esse, & Sacerdotali vigore fortius comprimendum. Errant sanè & vehementer errant qui grassantes Ecclesiasticorum abusus cum Ecclesiæ Catholicæ usibus confundunt. Nam Ecclesiasticam disciplinam hominum vitio posse depravari fatetur Concilium Tridentinum, unde tot ad eam restituendam de reformatione sanctiones edidit, nec minus de restauranda collapsa disciplina, quàm de opprimendis hæresibus fuit sollicitum. Hinc S. Carolus oratione habita in Concilio Mediolanensi I. *Nota sunt, inquit, vobis Ecclesia vulnera, gravissima mala. Miserabiliter prolapsa institutio Ecclesiastica disciplina. Propè perierat Christiana vita institutio: conciderat penè salutarium rerum usus, nulla ferè Cleri disciplina, quasique nullum populi in charitatis officiis studium: prolapsus denique miserabilem in modum erat totus ille ab Evangelii luce dimanans christianarum virtutum ornatus. Vidimus provincia nostra faciem deformatam.*

*nec planè collacrymabili illi templi Ierosolymitani aspectui dissimilem.* Unde Christianum orbem, oratione habità in Concilio VI. cum nosocomio ac valetudinario confert, in quo vis infinita languentium jaceat; additque eo deteriorem esse Christianorum infirmitatem, quò cum cæcitate ita conjuncta sit, ut in tanta peccatorum, quibus mundus redundat, colluvione ne culpam quidem homines agnoscant. Absit ut inter consuetudines Catholicæ Ecclesiæ usus illos reponamus, tametsi multùm vulgoque frequentatos, sed à Romanorum Pontificum, & sacrarum Synodorum autoritate, Sanctorum Patrum regulis, Beatorum etiam his temporibus ad imitandum solenni apotheosi ab Ecclesia propositorum factis abhorrentes. Illud ergo Ecclesiæ consuetudinibus annumeramus, non quod Ecclesia quandoque propter miserrimi ac luctuosissimi temporis calamitates gemebunda tolerat, sed quod decretis probat, quod per Episcopos divini Spiritus flammâ succensos operatur, quod in Sanctis Patrum instituta consecretantibus extollit, quod collaudant Pontifices, quod universa demùm Ecclesia cum plausu & fructu imperat, & cum religione retinet, & summo honore veneratur. Cætera quàmlibet passim & à multis frequentata, inter abusum reponenda sunt, si à Patrum institutis, Canonum legibus, summorum Pontificum decretis, veteris Ecclesiæ usu abhorreant. Res enim Ecclesiasticas non moribus humanis, sed divina auctoritate & Ecclesiæ Catholicæ traditione metiri oportet.

Quare in hoc negotio singulari & penè divina constantia Sacerdotibus opus est, ut humanarum.

manarum quarumcunque rationum oppositas sibi moles intrepidâ animi firmitate perumpant, sintque adversus omnes obsistentium frangendos impetus *columna ferrea, murusque areus*, ut loquitur Jeremias cap. I. Meminerint quantum malorum in omnes hominum ordines inconsultæ ac præcipites absolutiones invexerint, & invehant incessanter. Illud præsertim præ oculis habeant, ut impertinentes quorundam omnia sibi non probata novitatis pueriliter insimulantium criminationes despiciant ac floccifaciant, memores S. Carolum, cujus doctrinam propugnavimus, crebris tempestatibus ac procellis in omni vita jactatum, & decreta illius *violenta, dura, iniqua, & nova* vocitata. Et certè non est discipulus super Magistrum, nec Christianus super Christum, qui ut ex toto Evangelii decursu liquet, peccator; everfor legis, Cæsaris hostis, vorax, ac vini potator, peccatorum amans, insanus, blasphemus, magus & incantatorum vel maximus, in Beelzebub principe dæmoniorum dæmonia ejiciens audivit. Quin potius ille novitatis reus merito peragendus, qui à veræ Ecclesiæ tessera, antiquitate nimirum deficit, qui à Patribus, Pontificibus, & Conciliis puræ & integræ disciplinæ retinentibus recedit. Quia nimirum germanus ille puri Catholicismi character est, nihil novi de suo promere, nihil quod alii de suo depromunt accipere; omnes emergentes opiniones ad initia & fontes revocare: unde Augustinus lib. 2. contra Julian. cap. 10. de veris Catholicis ait: *Quod invenerunt in Ecclesia, tenuerunt: quod didicerunt, docuerunt: quod à Patribus acceperant, hoc filiis tradiderunt.* Hæc

erectis cordibus, intentisque animis Sacerdotes assidue spectantes solo sint Deo iudice contenti, nec aliorum aut laudes petant, aut accusationes pertimescant.

Instabis: Non minus est incorruptibilis Ecclesiae disciplina, quam fides, alioquin Ecclesia non esset peraeque agendorum ac credendorum regula immobilis: sed quod multi passim Ecclesiastici & Sacerdotes frequentant, videtur ad Ecclesiae disciplinam pertinere: ergo quod à multis alioquin doctis & piis frequentatur, tutum est & ab omni errandi & peccandi periculo alienum.

Respondeo Ecclesiae fidem & ipsum generalem de disciplina sensum nulla temporum injuria, nulla depravatione corrumpi unquam posse; portae namque inferi nunquam sunt adversus hanc petram praevaliturae: at disciplinae praxim in plerisque Ecclesiae membris posse corrumpi, & saepe reapse corrumpi, praenuntiavit Christus Matth. 24. & Luc. 11. ubi fore ait, ut refrigescat charitas multorum, Filiusque hominis secundo veniens vix inveniat fidem in terra: fatetur Ecclesia disciplinae suae deliquia & defectiones quotidie animadvertens, quotidie gemens, quotidie illius emendationem & emaculationem exoptans: agnoscunt Sancti morum peccata; & laxitates non tam orationibus quam verborum fulminibus disjiciunt & pro virili reprehendunt. Hinc Cardinalis Peronius lib. 2. replicae, obser. 4. cap. 7. ait, *Ecclesiam, si doctrina spectetur, nunquam; si mores, alui semper & expurgari oportere. Qui etiam ejusdem operis lib. 11. cap. 59. observat, Ecclesiam ad finem usque mundi veridice illud de se praedica*

prædicaturam, Nigra sum, sed formosa; nigra nimirum membrorum moribus, formosa doctrinis. Et certè non tot & tantas de reformatione cogitationes & curas Summi Pontifices, illi præsertim qui sanctitatem Pontificatûs vitæ sanctimonix accessione cumulant, qualis fuit superiori sæculo inclinante Pius V. Beatorum fastis non ita pridem ascriptus, susciperent; non tot de instauranda disciplina sanctiones Tridentinum & posteriora deinceps Provincialia Concilia edicerent, nisi probè nossent sacrum Ecclesiæ disciplinæ vigorem passim collabi posse, atque identidem excitandum restituendumque esse: quam disciplinæ restituendæ necessitatem & fatentur quotquot sunt solidè pii, & lacrymis continuis postulant, & fervidis desideriiis exoptant, ut morum integritate sarcitæ errores omnes & hæreses stirpitis convellantur. Scientia namque fidei à singularibus membris cum conscientiæ naufragio sæpe quassatur; sæpe sicut extra Ecclesiam boni mores hæresum aberratione commaculantur, ita intra Ecclesiam fidei integritatem vitæ improbitas obscurat.

Urgebis: In Ecclesia Catholica singularitas quæque vitanda & amandanda est; unde & illud pervulgatum Bernardi adagium celebratur: *Qui facit quod nemo, mirantur omnes.* Ergo non à privatorum moribus, sed à communioribus vñbus Ecclesiasticæ regulæ petendæ sunt.

Respondeo præceptorum Ecclesiasticorum observantiam, & castæ moralis disciplinæ custodiam esse quidem singularem, si cum illorum moribus conferatur qui laxiora sectan-



tur; scriptum est enim, *stultorum infinitus est numerus*: & voce Veritatis asseritur, quod lata est via quæ ducit ad perditionem, & multi sunt qui intrant per illam. At verò si utrorumque vitæ consuetudo ad Evangelicarum Ecclesiasticarumque regularum amissum exigatur, jam quæ privata & singularis videbatur, communis jure censebitur, utpote communi Sanctorum usu probata, tamen si à paucis arctam viam ineuntibus servata. Quæ verò communis habetur, privata habebitur, utpote à communibus verisque institutis recedens, & privatorum hominum incuriâ & ignaviâ superinducta. Soli ergo illi, quâmlibet numero infiniti, novam & singularem agendi rationem captant, qui à regia communium regularum viâ exorbitant; illi verò, quantumvis paucissimi sint, vitæ communis æmulatores sunt, qui Evangelii leges Christi vitâ & factis quasi divinis quibusdam coloribus expictas, & à Patribus Conciliisque illuminatas, omnibusque ad intuendum & imitandum propositas quàm religiosissimè prosequuntur. Mores ergo & usus, vel potius inclinationes & casus quacumque diuturnitate corroborati, peregrini & singulares dicendi sunt, si à primævis normis per Patres & sacras Synodos expositis illustratisque dissonent. Usus verò quâmlibet singulares à paucisque observati, communes catholicique censendi sunt, qui antiquitati, traditionibus, Patrum consensu, & priscis Ecclesiæ moribus atque institutis conveniunt. Quia antiquitas Patrumque consensus amissus est, ad quam nedum fidei dogmata, sed & mores exigendi sunt. Hinc præclare Adrianus I. in libello

per Legatos lecto in Synodo VIII. act. 5. Prima salus, inquit, est recta fidei regulam custodire, deinde à constitutis Dei & Patrum nullatenus deviare; unum quippe eorum ad fidem perinet: alterum ad opus bonum. Sicut enim scriptum est, sine fide impossibile est placere Deo; sic rursus legitur, Fides sine operibus mortua est. Nec minùs egregiè Gregorius VII. in apologia pro Concilio Romæ à se habito, dixit: Quavis modò quidam non tam apertè cum Ario & reliquis Hæresiarchis fidem Sanctorum Patrum impugnent, tamen eorum moralibus statutis cum ipsa quidem fide per eosdem Sanctos Patres eodem tempore, eadem subscriptione roboratis obstinatè resistunt, quæ & cum eadem fide ex sacratissimo fonte Scripturarum emanaverunt. Sed & in eorum nefandissima rebellionè, etiam ipsam fidem Sanctorum Patrum probantur annullare, cum in authenticis sanctionibus auctoritatem illorum pro nihilo ducunt, qui & fidem sua auctoritate confirmaverunt. Nullatenus sanè alicui fides Sanctorum Patrum præderit, qui eorum canonicis atque moralibus præceptis non obedire, sed pertinaciter resistere studuerit. Nam, ut Jacobus frater Domini testatur, fides sine operibus mortua est, qualem & Demones habere fatetur. Non ergo minùs est resistendum pertinacibus authenticarum institutionum impugnatoribus, quàm sacre fidei violatoribus, cum & Demonibus assimilentur quicumque institutionem Sanctorum Patrum in fide tantùm, & non etiam in conversatione pro viribus affectantur.

Obijcies secundo: Pœnitentibus peccata confessis, & se dolere & emendari velle affectantibus

rentibus denegare veniam & absolutionem re-  
dolet errorem Novatianorum suprà reproba-  
tum : Ergo pœnitentibus toties quoties confi-  
tentur & emendationem pollicentur impertien-  
da absolutio est.

Respondeo tantum distare sententiam no-  
stram à crudeli Novatianorum dogmate, quan-  
tum à tenebris lux, ab errore veritas discrepat.  
Novatiani enim etiam verè pœnitentibus &  
pœnitentiæ veritatem factis comprobantibus  
veniam ac reconciliationem, reconciliationis-  
que pignus Eucharistiam denegabant, quin &  
Eucharistiæ recuperandæ spem pœnitentibus  
præcidebant. Unde in eos sic invehitur Am-  
brosius lib. 1. de pœnit. cap. 16. & lib. 2. cap. 3.  
*Frustra dicitis vos predicare pœnitentiam, qui  
tollicis fructum pœnitentia. Nonne advertitis  
id evidenter jam à nobis expositum, quod me-  
rendi gratiâ Sacramenti, hoc est sacræ Eucha-  
ristiæ, ad peccandum impellimur; & hoc au-  
ferre vultis propter quod agitur pœnitentia.  
Tolle gubernatori perveniendi spem, & in me-  
diis fluctibus incertus errabit. Tolle luctatori  
coronam, lentus jacebit in stadio. Tolle pesca-  
tori capiendi efficaciam, desinit jactare retia.  
Quomodo ergo potest qui famem patitur anima  
sua studiosus Deum precari, si sacram despe-  
ret alimentum? At nos nec absolutionem, nec  
Eucharistiam verè pœnitentibus eripimus, sed  
pœnitentiam sæpiùs in pristina peccata re-  
lapsorum, verane sit, an falsa, prudenti di-  
latione experimur, ut & absolutio fructuo-  
sior, & sacra Communio sit salutarior: cave-  
mus ut ne sanguis Christi ab impiis concu-  
tur, ne caro ejus à porcis comedatur, ne Sacra-*

menta à sacrilegis perpetuò relabentibus pessumdentur. Efficimus pro virili, ne frustra pœnitentia prædicetur, si ejus antè fructus conceditur, quàm ad eam seriò agendam peccator accesserit. Sicut enim adversus marinos labores non se instruit nauta, postquam in portum inVectus est; certandi studium abjicit athleta, si ingredienti stadium deferatur corona; jactare retia desinit piscator, ubi speratam vim piscium captaverit: ita pœnitentiæ labores & curas omnes à se amovet, qui nullo negotio, sed summa facilitate & absolutionem, & sacram Communionem statim post confessa omne genus scelera consequitur. Ergone cum Novarianis convenimus, qui eos Sacerdotes non laudantes, qui crudeli conniventia id efficiunt, ut peccatores facilitate absolutionis nunquam denegatæ incensi, vel potius obstupefacti in eodem luto hæreant semper. Videant qui hanc cum Novarianis consensionem S. Caroli purissimæ & ab omnibus & singulis Patribus probatæ doctrinæ objiciunt, num ipsi ab Audianis hæreticis recedant, quorum erroribus Theodoretus Cyri Episcopus lib: 4. hæret. fabul. cap. 10. annumerat eorum assertionem & morem, qui peccatores confessos statim promiscuè absolvebant, plenam sibi condonandorum peccatorum absque ulla prævia probatione: potestatem arrogantes. *lubent, inquit, unumquemque sua peccata confiteri, deinde confessi dant veniam, non tempus ad pœnitentiam desinientes, sicut Ecclesia leges præcipiunt, sed potestate condonantes.* Leges autem pœnitentiæ publicæ quàm rigidæ fuerint hac in parte, vel ex hoc uno decreto. Concilii Ancyran.

intelligi.

intelligi potest : Placuit eos inter audientes : uno anno constitui , tribus autem aliis annis : agere pœnitentiam , tertio autem ( pœnitentia : nempe ) anno reconciliari Sacramentis. Quod idem apud Gœgorium Nyssenum , Thaumaturgum , Basilium , & alios Græcos Patres videre est. Præclare & opportunè Theodoretus lib. 5. hæret. fabul. cap. 29. Ecclesiæ doctrinam inter extremos Novatianorum & Audianorum errores , hinc denegatâ veniâ desperationem crudeliter ingerentes , hinc malâ facilitate vitia pascentes , mediâ sic exponit : *Medicabilia sunt etiam quæ post baptismum sunt vulnera. Medicabilia autem , non ut olim per solam fidem ( utique per dilectionem operantem ) datâ remissione , sed per multas lacrymas & fletus , & luctus , & jejunia , & laborem commissi peccati magnitudini respondentem. A Christo enim edocti sumus , eos qui sic affecti sunt , nec desperare debere , nec illis faciliè sacram impertienda esse. Nolite , inquit , sanctum dare canibus , nec projiciatis margaritas ante porcos. Has Ecclesiæ de pœnitentia leges habet. Nec minùs appositè S. Pacianus epist. 3. ad Sympronianum adversùs Novatianos agens docet remissionem peccatorum paucos mereri , non quòd non sit Ecclesiæ omnium omninò peccatorum remittendorum collata potestas , sed quia pauci veræ pœnitentiæ labores suscipiunt : Labor iste paucorum est , qui post casum resurgunt , qui post vulnera convalescunt , qui lacrymosis vocibus adjuvantur , qui carnis interitum reviviscunt.*

Objicies tertio : Pœnitenti sicut contra se , ita & pro se credendum est , cum ipse idem sicut

in hoc tribunali reus, actor, testis : Ergo quando post aperta Sacerdoti peccata ait se ex corde novæ vitæ rationem inire velle, illi Sacerdos fidem adhibere debet.

Respondeo quod licet in enumerandis antea vitæ peccatis, in enarrandis scelerum numero, specie & circumstantiis peccatori credendum sit, quippe qui solus malè gesta sua dignoscere potest : attamen quantum attinet ad cordis conversionem, cum multoties verba fefellerunt, non satis tutò illi creditur, unde prudenter ex factis probatio exigitur. Tum quia voluntas sincera non ita certò verbis ac operibus se prodit & indicat. Tum quia de dispositione ad veniam recipiendam idonea æstimare non ad reum pertinet, sed ad judicem à Deo constitutum; non ad discipulum, sed ad Doctorem & rectorem animarum; non ad ægrum, sed ad Medicum. Tum quia tot sunt in animis nostris recessus, tot latebræ, tot sæpe præsertim post iterata flagitia nebulæ & offusæ tenebræ, ut seipsum peccator dignoscere non possit; quia ut frequenter in Theologiæ istius decursu ex Gregorio recantavimus, nec iterare tum utile documentum piget : *Sape sibi de se mens ipsa mentitur, fitque ut aliud in intimis intentio supprimat, aliud tractantis animo superficies cogitationis ostendat. Et fingit se de bono opere amare quod non amat, de mundi autem gloria non amare quod amat.* Cujus signum est quod in præcedentibus confessionibus emendationem promittebat, & vero se proposito affici putabat; & tamen mentiebatur iniquitas sibi, nec reapse mutatus erat, qui eadem peccata, eosdem iniquitatis fructus edidit, juxta commune Philosophorum.

sophorum axioma, *idem manens idem facit idem*. Idem ergo ei intus in corde mansit, qui eadem foris protulit; & qui seipsum toties decipit, seipsum decipere moraliter prudenterque censetur, nisi certiora argumenta producat. Hujus fallacis dispositionis illustre exemplum in Antiocho Sacrae litterae repræsentant. Hic namque post flagitia à Deo percussus, scelerumque antè patratorum horrore, & miserabilis status imagine permotus, & peccatorum granditatem agnovit, & confessus est, & dolorem expressit, & satisfactionem, nimirum Iudæorum restitutionem, urbis sanctæ libertatem, templi cultum, sacrificiorum apparatus, veræ Religionis per totum quàm latè patet orbem propagationem spondit, & veniam tot verbis amarorem intrinsicum significantibus, tot conversionis indiciis, tot splendidis pollicitationibus, quibus pares non videmus in nostris relabentibus, non promeruit. Quia nimirum tunc verba sine factis, lacrymulae etiam, quibus interdum ad horam colliquescent peccatores, ad explorandam veram conversionem non sufficiunt, sed ad decipiendum & peccatorem & ministros valent. Ergo & peccatori & Sacerdoti videndum, vigilandum, orandum: videndum num vitæ christianæ æquabilitate & constantia sit in pietate stabilis, in opere efficax: vigilandum ut novæ vitæ firmitate contra hostis communis & amoris proprii insidias muniatur: orandum, ut continentem in Dei famulatu animum retineat: & interim absolutionis sententia meritò pœnitentibus ejusmodi sæpius relabentibus suspendenda est, quoad Sacerdos intimos ac reconditos pœnitentis motus pro sua



sua prudentia quibusdam dignis pœnitentiæ fructibus probatos habeat.

Instabis : In quacumque die ingemuerit peccator , salvus erit , ejusque Deus miseretur , & peccatorum ejus, testante sacro eloquio, non recordatur amplius : Ergo Sacerdos more Dei peccatori ingemiscenti, peccataque cum dolore confitenti veniam sine mora confestim imper-  
tiri debet.

Respondeo Deum eximiâ sibi potestate ab-  
dita cordis scrutari , unde peccatorem suâ gra-  
tiâ sincerè pœnitentem sine mora absolvit,  
quia internam animi affectionem pervadit, cui  
latentiora cordis arcana nuda & aperta sunt.  
At verò Sacerdos de interno hominis habitu  
non nisi exterioribus signis judicat , ut causâ  
cognitâ & exploratâ liget aut solvat , remittat  
aut retineat peccata. Cùm igitur verba fidem  
amiserint in peccatore illo toties relabente ac  
semper promissâ prorsus frangente ; ideo con-  
sultè aget, si justum spatium sumat ad facto-  
rum seriem ac novæ vitæ firmitatem spectan-  
dam , utque pervideat num peccator qui toties  
fuit irrisor , ad Deum reverti seriò meditans,  
quæ ad pravas affectiones exuendas, arctamque  
cœli viam capeffendam exequenda sunt, reapse  
exequatur. Præclare & opportunè hanc ipsam  
objectionem prævidens & præfocans Ivo Car-  
nutensis , qui sæculo Ecclesiæ duodecimo flo-  
ruit , epist. 230. sic fatur : *Quærit Fraternitas  
tua , quomodo inter se convenient prophetica  
sententia , qua dicit : In quacumque hora pec-  
cator ingemuerit , salvus erit ; & Synodalis , qua  
crimina sua confitentes aliquandiu à corporis  
& sanguinis Christi communione suspendit?  
Repugnare*



Repugnare tibi videntur, dissentireque sententia Capitis & Corporis: ut quos Caput, idest Christus, celeriter à peccato liberat, eos Corpus Christi, idest Ecclesia, sub pœna peccati diligatos retineat. Qua quaestio facile solvitur, si interni judicis animadversio, & humana fragilitatis consideratio diligentius attendatur. Cum enim criminalis culpa delinquentem separet à Capite & Corpore, rationis ordo hoc exigit, ut internus judex tantò remittat celerius, quantò solus magis videt interiùs. Judex verò qui tantum videt in facie, usque adeo delinquentes sub peccati pœna detineat, donec per manifestum poenitentia fructum quis sit poenitentis affectus intelligat. Per internum enim gemitum satisfit interno judici, & idcirco indilata datur ab eo peccati remissio, cui manifesta est interna conversio. Ecclesia verò quia occulta cordis ignorat, non solvit ligatum, licet suscitatum, nisi de monumento elatum, id est publicà satisfactione purgatum. Hinc est quod Ecclesia sua crimina confitentes à Sacramentorum Communione suspendit, & in cinere & in cilicio positos ab introitu Ecclesiarum statuto tempore excludit, ut per hoc experiatur, si jam sunt intus vivificati, cum fuerint longà poenitentia maceratione probati. Si hac attendat Fraternitas tua, videbis nec dissentire propheticam & synodalem sententiam; cum illa deferat quod suum est Capiti, & ista concedat quod suum est Corpore. In discretionem tamen Episcoporum est, secundum affectum poenitentia tempus abbreviare vel prolongare, dicente Beato Augustino: In actione poenitentiae, pro qua reus ab Altari separandus est, non adedò consideranda est mensura temporis,

ut.

*Cap. II. Absolutio à peccatis. 405*

*ut doloris.* His omnibus adde verba illa, *In quacunque hora ingemuerit peccator, salvus erit,* quæ sacræ Scripturæ nomine circumferuntur, in sacris libris non extare, neque in ulla probata versione reperiri. Et quavis Ezechielis 18. & 33. aliquid sublit quod eò accedere videatur, nunquam tamen fit peccatori spes veniæ, nisi verâ ad Deum conversione mutetur. Ad veram porrò conversionem exigit S. Propheeta, ut projiciant omnes prævaricationes suas in quibus prævaricati sunt, ut faciant sibi cor novum & spiritum novum, ut faciant pœnitentiam ab omnibus peccatis suis, quæ operati sunt, & custodiant omnia præcepta Dei, & faciant judicium & justitiam, & pignus restituant, & rapinas reddant, nec faciant quidquam injustum.

Dices: SS. Patres absolutionem & communionem ægrotis periculose laborantibus & reconciliationem extremo spiritu flagitantibus non negabant. Atqui peccatores illi sola verba & promissa habere possunt. Ergo præter verba & promissa nihil est aliud necessario absolutioni etiam à relabentibus præmittendum.

Respondeo quasdam esse circumstantias à prudentia christiana observandas, in quibus peccatori etiam infinites relapso, nullâ quàm verborum probatione defuncto absolutio atque adeo sacra Communio impertienda est, quia nulla est lex adeo justa, nulla regula adeo generalis in quam exceptio non cadat. Imò quia juxta commune effatum, *exceptio firmat regulam*, eo, verior est statuta à nobis de absolutione relabentibus denegandâ disciplina, quo eam non nisi cogente extremæ infirmitatis

tatis necessitate violare licet. Quia ergo absolutio moribundis nullâ præter verborum & lacrymarum pœnitentiâ exculcis, quia nullum erat pœnitentiæ factis probandæ tempus, à Patribus impensa est, quoties tutioris viæ capefendæ copia existit, toties est absolutio inventeratis relabentibus deneganda. Illud etiam diligenter observandum, Ecclesiam primis sæculis reconciliationem iis denegasse, qui instante morbi periculo, quando peccata satisfactione redimere & expiare non peterant, veniam postulabant. Idcirco pœnitentiam non agentes, inquit Cyprianus epist. 52. *nec dolorem delictorum suorum toto corde, & manifesta lamentatione sua professionis testantes, prohibendos omnino censuimus à spe communicationis & pacis, si in infirmitate atque periculo cœperint deprecari; quia rogare illos non delicti pœnitentia, sed mortis urgentis admonitio compellit; nec dignus est in morte accipere solatium, qui se non cogitavit esse moriturum.* Idem statuit Concilium Arelatense I. quod à Concilio Arelatensi II. vocatur *Magna Synodus, & ex omnibus mundi partibus congregata.* De his qui apostatant, inquit can. 23. *& antequam se ad Ecclesiam representent, nec quidem pœnitentiam agere quarunt, & postea infirmitate correpti petunt Communionem, placuit eis non dandam Communionem, nisi revaluerint & egerint fructus dignos pœnitentia.*

Et quanvis postea Ecclesia, ne Novatiani negantis veniam, asperitatem & duritiem sequi videretur, aliquantulum de illa disciplinæ severitate remiserit, & peccatoribus totam vitam peccatis lethalibus maculantibus in extremo

vitz

vite periculo non solum veniam, sed etiam Communionem quasi viaticum profecturis indulserit, eas tamen morti vicinas pœnitentias & absolutiones semper suspectas habuit. Dico, inquit Augustinus homil. 4. in conspectu Dei timori vestro timorem meum. Qui autem non timet, timentem contemnit, sed malo suo. Certus sum, quia homo baptizatus, si vitam, non audeo dicere sine peccato (quis enim sine peccato?) sed vitam sine crimine duxerit, & alia peccata habuerit, quæ quotidie dimittantur in oratione dicenti: Dimitte nobis debita nostra, sicut & nos dimittimus debitoribus nostris: quando vitam finierit, vitam non finit, sed transit de vita in vitam, de laboriosa ad quietam, de misera ad beatam. Baptizatus autem desertor & violator tanti mysterii, si agat pœnitentiam ex toto corde, si egerit veraciter pœnitentiam, & solutus fuerit à ligamento quo erat obstrictus, & à Christi corpore separatus, & benè post pœnitentiam vixerit, sicut ante pœnitentiam vivere debuit; post reconciliationem quandocumque defunctus fuerit, ad Deum vadit, ad requiem vadit, regno Dei non privabitur, à populo diaboli separabitur. Si quis autem postus in ultima necessitate agnitiois suæ voluerit accipere pœnitentiam, & accipit, mox reconciliatur, & hinc vadit: fateor vobis, non illi negamus quod petit, sed non presumimus quia benè hinc exit. Non presumo, non vos fallo, non presumo. Fidelis benè vivens securus hinc exit: baptizatus ad horam securus hinc exit. Agens pœnitentiam & reconciliatus, cum sanus est, & postea benè vivens, securus hinc exit. Agens pœnitentiam ad ultimum &

recon

reconciliatus, si securus hinc exit, ego non sum securus. Unde securus sum, & do securitatem: unde non sum securus, pœnitentiam dare possum, securitatem dare non possum. Vt te de dubio liberare, vis quod incertum est evadere? Age pœnitentiam dum sanus es. Tene certum, dimitte incertum.

Idem repetit Doctor sanctissimus serm. 57. de tempore, his gravissimis verbis: Ego vos, dilectissimi Fratres, hortor atque commoneo, ut si quis ex vobis conscius criminum suorum, indignum se Communione Ecclesiastica putat, dignum se esse faciat. Dicitis, quomodo aliquis dignum se facere possit? Quomodo? Nisi errores pristinos relinquat, & pœnitentiam petat; ut qui criminum suorum sorde pollutus est, exomologesis satisfactione mundetur? Nec illud servet ut in extremo vita sua tempore tunc pœnitentiam petat, quando jam agere non possit. Inutilis est enim, dilectissimi, ista persuasio: parum est peccatorem pœnitere, nisi pœnitentiam peregerit. Ad emendanda enim crimina vox peccatoris sola non sufficit: nam in satisfactione ingentium peccatorum non verba tantum, sed opera quaruntur. Datur quidem etiam in extremis pœnitentia, quia non potest denegari: sed authores tamen esse non possumus, quod qui sic petierit, mereatur absolvi. Quomodo enim agit pœnitentiam lapsus? Quomodo agit pœnitentiam in extremis vita finibus constitutus? Quomodo pœnitentiam agere possit, qui nulla jam pro se opera satisfactionis operari potest? Et ideo pœnitentia qua ab infirmo petitur infirma est; pœnitentia qua à moriente tantum petitur, timeo ne ipsa moriatur. Et ideo, dilectissimi, quicumque

que

*que invenire vult misericordiam Dei, sanus agat pœnitentiam in hoc saculo, si sanus esse vult in futuro.*

Si igitur juxta Ecclesiæ sensum clarissimis illis Augustini verbis expressum, morientium pœnitentia ex eo parum secuta & suspecta est, quod eam nulli pœnitentiæ fructus antevertant, profectò sanis, robustisque peccatoribus iteratis prolapsionibus vitam suam maculantibus post peracta sinceræ pœnitentiæ opera absolutionis beneficium tutius conceditur, ut tanta sit in vulnerum curatione devotio, quanta fuit abrupta & vegeta ad malum mentis intentio; ut factis & operibus solidè se velle pœnitere probent, qui toties verborum fidem perfregère; ut peccata peccator dimittat, non ipsum peccata; votisque facta respondeant, non voluntatem facta refellant, juxta illud Augustini hom. 41. *Quare securus es? Quia egisti pœnitentiam eo tempore, quo & peccare potuisti. Si autem tunc vis agere pœnitentiam ipsam quando jam peccare non potes, peccata te dimiserunt, non tu illa.* Hac de causa Patres moribundos in extremis compellente necessitate absolutos ad pœnitentiam, si fortè convalescerent, adigebant, non secus ac si absoluti minimè fuissent. *Qui recedunt de corpore pœnitentiâ acceptâ* ( inquit Concilium Arausicanum I. can. 3. ) *placuit sine reconciliatoriæ manûs impositione eos communicare, quod morientis sufficit consolationi secundum definitiones Patrum, qui hujusmodi Communionem congruenter viaticum nominarunt. Quod si supervixerint, stent in ordine pœnitentium, ut ostensis necessariis pœnitentiæ fructibus, legitimam*

*Communione cum reconciliatoria manus impositione recipiant. Idem sancivit Concilium Carthaginense IV. can. 76. Si supervixerit ( infirmus in extremis absolutus. ) subdatur statutis pœnitentia legibus , quoadiu Sacerdos qui pœnitentiam dederit , probaverit.*

Instabis : Uulgaris vox est , vulgarisque sententia , nunquam homines ad cœlum facilius convolare , quàm è patibulo & carnificina , quibus tamen peragendæ ante obitum pœnitentiæ spatium deest : Ergo pœnitentia non est criminosis qui vitam in flagitiis contrivere , ante absolutionem diu necessariò peragenda.

Respondeo alienos fuisse Patres ab illa vulgari sententia , unde pro reis damnatis tam studiosè deprecabantur , ut vitâ diutiùs productâ pœnitentiam factis' miseri illi probarent. Nullo modo , inquit Augustinus epist. 54. *culpas , quas corrigi volumus , approbamus ; nec quod perperam committitur , ideo volumus impunitum , quòd placet ; sed hominum miserantes , facinus autem seu flagitium detestantes , quanto magis nobis ipsis displicet vitium , tanto minùs inemendatum volumus perire vitiosum. Morum porrò corrigendorum nullus alius quàm in hac vita locus est ; nam post hanc vitam quisquis hoc habebit , quod in hac sibimet conquisierit. Ideo compellimur humani generis charitate intervenire pro reis , ne istam vitam sic finiant per supplicium , ut non possint finire supplicium.* Rebantur nimirum Patres paucarum horarum spatium ad mortem sanctè obeundam non posse nocentissimos comparari , rarum esse & arduum post longam ætatem pravè & nequiter actam cum Deo reconciliari , nisi iusto tempore

tempore accurata pœnitentia peragatur; serò-  
que illum sapere, quide faciendo Deo satis-  
tum demùm cogitare connititur, cùm ad vitæ  
anteactæ, innumerisque flagitiis sorditatæ red-  
dendam tremendo Judici rationem vocatur.  
Quia nimirum multorum annorum debita vix  
ac ne vix quidem pauculis horis exsolvuntur;  
sed diuturna flagitia diuturnis lacrymis elu-  
genda, & profunda vulnera profundæ humi-  
litis & pœnitentiæ medicinâ curanda  
sunt.

Dices: Si absolutio sacramentalis foret re-  
labentibus differenda quoad mentis ad me-  
liora conversionem, spatio accepto, quibusdam  
pœnitentiæ fructibus testatam fecissent, posset  
peccatorum salus in discrimen venire: si enim,  
ut humana ferunt, repentinâ morte interim  
opprimerentur, periclitaretur æterna eorum  
salus. Quod est magnum inconueniens.

Respondeo inanissimum esse istud terricu-  
lamentum, & longè periculosissimum: inanissi-  
mum quidem, utpote ab omnibus Patribus, ta-  
met si de animarum salute sollicitissimis, pro ni-  
hilo habitum, à S. Carolo Borromæo absolutio-  
nem sæpe differri iubente floccifacium, à Theo-  
logis affirmantibus fas esse Sacerdoti in pluri-  
bus casibus ad certum tempus absolutionem  
differre, nihili factum. Periculosissimum verò  
& maligni spiritûs arte confictum, ut una re-  
staurandorum peccatorum via præcludatur.  
Sanè miranda vel potiùs deploranda est pec-  
catoris absurda calliditas, quando vita sordibus  
immergebatur, quando mores ethnicos & bel-  
luinos ducebat, quando in medio flagitiorum  
atque impuritatum cœno securâ mente volu-



tabatur, nullo tunc impendentis mortis periculo exagitabatur, nullâ incessebatur iudiciorum Dei cogitatione, nullum sibi repræsentabat discrimen, ut à peccatis concipiendis patrandisque abduceretur, sed omnem pellebat extinguebatque timorem, ut in crimina & crebriùs rueret & suaviùs. Jam verò dum crimina tantisper lugenda sunt, dum factis dignisque pœnitentiæ fructibus probanda firmandaque est mentis conversio, mortis metum opponunt, ubi timendum fuerat nihil veriti, ibique absurdissimè trepidantes timore ubi non est timor. Assimilatur inanis ille metus fallaci peccatoris pudori, quem deponit ut pudenda committat, quòve iterum perfunditur, ut commissa ne fateatur.

Accedit præterea primò, valde decipi miseros cæcosque peccatores & Confessarios, dum putant hac præproperâ præcòcis absolutionis facilitate salutem contra mortis pericula in tuto collocare. Tum quia experienciâ rerum magistrâ & agendorum luce compertum est facilitate veniæ peccatorem semel absolutum, sin mox, certè post pauculos dies in scelera relabi ad plures menses. Ergo absolutione, quam ne temporis quidem momento differendam vult, non expeditur peccator ab exitiali peccati servitute, nec ejusproinde salus in tuto collocatur. Ille enim duntaxat salutem consequetur, cujus firma est & stabilis in Dei famulatu voluntas: quam utique firmitudinem non absolutionum prodigalitas, sed salutaris dilatio & diuturni pœnitentiæ labores formant.

Accedit secundò, verum pœnitentem, qui  
cum

cum spe veniæ ad Deum convertitur, his ter-  
riculamentis non permoveri, tum quia iram  
Dei quam provocavit, placare duntaxat satagit.  
Tum quia jactans cogitatum suum in Domino,  
illique omnem spem suam committens, cujus  
providentiæ legibus omnia gubernantur, illius  
se clementiæ permittit, ab eaque lucis usuram  
expiandis criminibus tantoperè necessariam  
sperat, quæ eum tum vivere sivit, cum vitæ  
beneficio ad multiplicanda scelera abuteba-  
tur: nec ab eo se deserì extimescit, cujus pa-  
tientia in mediis criminibus peccatorem per-  
tulit, ut eum ad pœnitentiam adduceret. Si  
enim coacervantem per impœnitentiam the-  
saurum iræ peccatorem tam amanter accepit:  
Deus, absit ut tum iram profundere incipiat,  
cùm ad thesaurum misericordiæ seriis pœni-  
tentia fructibus properare pro virili cona-  
tur.

Accedit demùm, quod si pœnitens in pœ-  
nitentiæ stadio moriatur ( quod ægrè pror-  
sus advenit ob Sacerdotum copiam qui in  
mortis articulo absolvere quemcunque pos-  
sunt, & ob casus rarò contingentes qui non ca-  
dunt sub scientiam, non est evertenda funda-  
tissima & omnibus utilissima disciplina; ) de  
illius tamen salute benè sperare congruit, qui  
ad beneficium absolutionis, quam ardentè  
concupiscit, constitutis à Patribus modis se  
instruit. Felix illa mors censenda est, quæ pœ-  
nitentem in tam sancta exercitatione occupat.  
Supplebit sine dubio Sacerdos invisibilis visi-  
bile Ecclesiæ ministerium, in gratiam eorum  
qui ab absolutione Sacramenti pœnitentiæ hu-  
miles recesserant, ut pœnitentiam honorarent.

*Ero his, inquit Concilium Valsense sub Leone I. can. 2. qui pœnitentiâ acceptâ, in bono viæ cursu satisfactoriâ compunctione viventes, sine Communione inopinato nonnunquam transitu in agris aut in itineribus praveniuntur, oblationem recipiendam, & eorum funera, ac deinceps memoriam Ecclesiastico affectu prosequendam: quia nefas est eorum communicationes excludi à salutaribus sacris, qui ad eadem sacra fidei affectu contendentes, dum se diutius reos statuunt, & indignos salutiferis mysteriis judicant, ac dum purgatiores restitui desiderant, absque Sacramentorum viatico intercipiuntur, quibus fortasse nec absolutissimam reconciliacionem Sacerdos denegandam putasset. Quia nimirum semper existimavit Ecclesia, humilitatem animi divinis pœnitentiæ legibus sese subjicientis, nulli unquam detrimento, sed singulari emolumento esse: nec Deum ei defuturum qui à Sacramentorum usu discessit, quo ad sacramenta paratior evaderet. Ut eorum exemplo posset confirmari, qui cum baptismi sincero voto ante susceptum baptismi mortem obeunt, de quibus dum de baptismo diserebamus, satis actum est; cum tamen non minùs catechumeno Baptisma, quàm peccatori Sacramentum pœnitentiæ necessarium sit. Ergo ex mente Patrum certiùs salutis suæ consulit, qui Sacramentorum puriori animo adeundorum causâ stadium præscriptæ pœnitentiæ constanter decurrit, etiamsi repentinâ morte abripiatur, quàm qui præproperam medicinam quærens, sui que judicis judicem agens, nullum veræ conversionis argumentum priùs edere vult, quàm*

ut Sacramentorum usu reconcilietur. Quia à cœlesti Altari æternùm illos non separatum iri credendum est, qui peccatorum suorum verò dolore ab Altari Ecclesiæ seipsos removent. Et sicut testante Veritate, qui se humiliaverit exaltabitur; ita qui se ab altari secessione noluerit humiliari, in æternum deicietur.

Objicies quartò : Præcepto Ecclesiæ in Magno Concilio Lateranensi edito tenetur omnis utriusque sexûs fidelis ad minus in Pascha Eucharistiæ Sacramentum reverenter accipere : ad Eucharistiam verò nemo peccati conscius accedere debet, nisi præviâ confessione & absolutione sacramentali munitus, si Sacerdotis copia non desit, ut ex alio Concilii Tridentini decreto liquet. Ergo ut relapsus post iterata flagitia præceptum illud possit implere, debet sine cunctatione absolvi, ut intra quindenam Paschalem cœlesti cibo pasci queat.

Respondeo Magnum Lateranense Concilium præceptum Communionis Paschalis edicens, hanc objectionem occupasse, decretum suum hac exceptione temperans : *Nisi forte de consilio proprii Sacerdotis ob aliquam rationabilem causam ad tempus ab ejus perceptione duxeris abstinendum.* Causa autem maxime rationabilis, imò ferè unica differendæ ad tempus absolutionis & Communionis, est cura agendæ pœnitentiæ, quâ quis non contemptu, vel negligentia, vel animo alieno, sed humilitatis, modestiæ, ac doloris causa à tremenda mensa tantisper abest, quo deinde pœnitentia purgatus ad ipsam religiosius & paratius sese

referat. Cujus etiam signum est, quod Ecclesia tempus Paschali Communioni definiens, Confessionis tamen tempus pœnitentium arbitrari permisit, nec ad festum Paschatis Confessionis itidem ut Communionis præceptum astrinxit, ut nimirum integrum esset fidelibus post confessionem in pœnitentia versari, quo ad cœlestis cibi esum paratiores possent accedere. Hinc in Diœcesibus admonentur peccatores, ut lethalia scelera ineunte Quadragesima confiteantur, ut illa quadragesimali jejunio orationibus & eleemosynis munito purgantes, ad Paschalem sese Communionem accingant. Hujus moris meminit Petrus Blesensis in sermone diei Cinctum: *Cum initio jejunii*, inquit, *debet esse initium confitendi. Unde in fine Quadragesima de ablutione pedum discipulo um legitur vel dicitur: Qui lotus est, non indiget nisi ut pedes lavet, sed est mundus totus. Non dixit qui lavandus est, sed lotus: nec dixit, nisi ut faciem & pedes lavet, sed tantum pedes. Ac si dicat: In principio jejunii debet quis criminalia peccata lavare, pure, & humiliter confiteri; in fine venialia qua contraxit.* Meminit etiam S. Thomas in opusculo de Sacramento Altaris, cap. 16. *Ideo*, inquit, *statuti fuerunt ante Pascha quadraginta dies pœnitentia, ut his peractis in jejunis & orationibus, & continentia, & bonis operibus, tunc possint communicare pœnitentes cum aliis bonis Christianis.* Meminit etiam sacrum Concilium Tridentinum moris ejusdem sess. 14. cap. 5. aitque, *cum ingenti animarum fidelium fructu observari morem illum salutarem confitendi sacro illo & maximè acceptabili tempore Quadragesimæ.*

*dragesima*, non quidem in fine, ut abusus irrep-  
sit, sed sub ipsis sacri illius temporis initiis,  
ut olim constitutum erat. Ita enim habetur in  
notis ad Concilium Tridentinum ex Biblio-  
theca Cardinalis Bellarmini : ita intellexit S.  
Carolus Borromæus, ut in actis & decretis  
ejus non semel patet : ita Synodus Camera-  
censis anno 1604. coacta, tit. 8. cap. 16. & Bitu-  
ricensis titul. 11. cap. 21. & titul. 22. can. 5. mo-  
rem illum instaurarunt : Ne quis sine contri-  
tione & confessione, & satisfactoriis operibus  
non dignè præmunitus ad Eucharistiam su-  
mendam accedat.

Urgebis : Opera pœnitentiæ ante gratiam  
justificationis elicita nihil prosunt ad salutem,  
quippe quæ sine charitate mortua sunt, & quia  
ex arbore mala (qualis est homo à charitate  
desertus) non possunt boni fructus proficisci.  
Ergo prius gratia remissiva peccati beneficio  
promptæ absolutionis impertienda foret &  
non differenda, ut fructuosa & non inania  
evaderent injuncta pœnitentiæ opera.

Respondeo bona quævis opera, putà jejunia,  
vigilias, orationes, carnis afflictationes, elee-  
mosynas, aliasque virtutum exercitationes ni-  
hil illis quidem prodesse qui peccato mortali  
ita hærent, ut illius voluntatem semper fo-  
veant, nec ab eo se expedire conentur ; & in  
hoc sensu verum est Theologorum prolo-  
quium, nihil fieri ab homine mortali culpæ  
addicto, quod Deo probari & gratum esse  
possit ; veræ etiam in hoc sensu sunt Scriptu-  
ræ voces contestantes peccatorum oblationes  
& sacrificia Altissimum abominari, orationes  
quoque eorum fieri in peccatum. Et hæc est à

Patribus damnata falsa quorumdam securitas, qui sceleratissimè viventes, vitamque & mores corrigere non curantes, quibusdam operibus ex officio bonis peccata sua se redimere opinantur; rati, ut ait S. Eligius hom. 8. *ut cum crimina quotidiana committant, quod Deus corruptorum judicum more pecuniam accipiat, & peccata dimittat. Accipit planè, subdit S. Pater, Deus pecuniam, & eleemosynis delectatur; eâ tamen ratione, ut unusquisque peccator, quando offert Deo pecuniam, offerat illi & animam suam. Quenam enim, Fratres, justitia est, ut aliquis criminofus pecuniam suam per eleemosynam Deo offerat, & animam suam diabolo per iniqua opera tradat? Per pecuniam imaginem Imperatoris offert Deo, & in seipso imaginem Dei tradit diabolo. Frustra ergo qui hujusmodi sunt, confidunt cœlum emere, dum quotidianis sceleribus æternam sibi damnationem accersunt.*

At longè alia de illis ratio est, qui sacro compunctionis spiritu acti, & peccatorum dolore à Spiritûs sancti impulsu profecto commoti, vitam reformare, & in novitate vitæ ambulare incipiunt. Unde in illis hujusmodi opera, quæ ad gratiam viam parant & muniunt, non irrita & vana, non supervacanea vel mortua censenda sunt, utpote ab authore vitæ inspirata, & desiderio melioris vitæ effecta. *Verè enim, inquit egregiè Cardinalis Bellarminus lib. 3. de bonis operibus in particulari, cap. 3. Ejusmodi eleemosyna, partim ut dispositiones ad justificationem, peccatum etiam quoad culpam suo modo delent, cum gratiam impetrant justificationis. Et cap. sequenti probat ejusmodi opera*

*Cap. II. Absolutio à peccatis. 419*

opera ad gratiam justificationis disponere, si fiant ab eo qui pœnitentiam agere incipit. Peccatores quidem Deus non exaudit, qui peccare & in peccato perseverare intendunt; sed exauditur peccator, qui vult desinere esse peccator; exauditus enim est, qui oculos in terram demittens & pectus percutiens, de corde bono aiebat: *Deus propitius esto mihi peccatori.* Videatur Augustinus tract. 44. in Joan. & lib. 2. cont. epist. Parmen. cap. 8.

Insistes: Nullum bonum sine gratia homo efficere potest; nam ut concinit Ecclesia in prosa Spiritûs sancti, *sine tuo numine nihil est in homine, nihil est innoxium.* Ergo supervacanea opera quæque sunt ante gratiam justificationis ( quæ Sacramento absolutionis alligata est ) elicitæ.

Respondeo nomen *gratia* ( ut ex toto de gratia tractatu satis liquet, ubi rem hanc accuratè distinximus ) non solum pro gratia habituali & sanctificante usurpari, sed pro auxilio etiam Dei moventis & adjuvantis accipi. Nam præter donum gratiæ habitualis, quam Scriptura & Patres vocant *gratiam regenerationis, gratiam remissionis peccatorum, gratiam adoptionis, gratiam inhabitationis, quâ amici & filii Dei constituimur, quâ ejusdem consortes natura evadimus, quâ Dei templa consecramur, quâ totâ Trinitate specialiùs inhabitante fruimur, quæve in parvulis baptizatis inveniuntur*, præter illam, inquam, gratiam, aliud est auxilium ad singulos actus bonos necessarium, mentem illustrans, voluntatem movens, & ad opera sancta applicans, quod Augustinus lib. de gestis.



Pelagii, cap. 14. appellat *subministrationem Spiritus*, ut ad actus singulos adjuvemur; & lib. 4. ad Bonifac. cap. 5. *inspirationem dilectionis*, ut cognita sancto amore faciamus. Hanc distinctionem paucis expressit idem Augustinus epist. 105. his verbis: *Aliter Spiritus adjuvat nondum inhabitans, aliter inhabitans.*

Itaque ut opera sint bona, non est necesse quod à gratia habituali proficiantur, sed sat est quod à gratia actuali oriantur; unde & opera justificationem antecedentia, ab eo auxilio manantia, bona esse, & ad gratiam justificationis disponere, sacrum Tridentinum Concilium verissimè contra Novatores definivit. Quia nimirum licet tota justificationis œconomia gratuita sit, & à sola Dei misericordia dependeat; ita tamen suaviter à Deo disponitur, ut ad majora dona homo per minora instruat, & per auxilia & opera ab illis profecta ad gratiam sanctificantem præparetur. *Ignoscis confitenti*, ait Augustinus in Psalm. 37. Deum alloquens, *ignescis, sed scis sum punienti.* Ita servatur misericordia & veritas: misericordia, quia homo liberatur; veritas, quia peccatum puniatur. Plangenda sunt peccata, quomodo audistis planere istum: Quoniam ego cognosco, & curam gero pro peccato meo. Ne securus sis cum confessus fueris peccatum, tanquam semper præparatus ad confitendum & committendum peccatum. (Ecce graphicè descriptam eorum falsam fiduciam, qui de peccatis duntaxat confitendis solliciti sunt.) Sic pronuncia iniquitatem, ut curam geras pro peccato tuo; hoc est enim curam gerere pro delicto, semper nisi, semper intendere, semper studiosè & sedulo agere;

*agere, ut sanes peccatum. Ecce de die in diem plangis peccatum tuum, sed fortè lacryma currunt, & manus cessant: fiant eleemofyna, redimantur peccata, gaudeat indigens de dato tuo, ut tu gaudeas de dato Dei. Hoc est, curam geram pro peccato meo, faciam omnia quaecumque facienda sunt ad ablucendum & sanandum peccatum meum.*

Argumenta etiam facta falsum supponunt, nempe peccatores inveteratos post infinitos relapsus, mox ut confessi fuerint, beneficio absolutionis gratiam obtinere, unde possint opera deinde sequentia Deo accepta & grata effici. Id autem gratis supponitur, cum juxta Patres & recentiores etiam Doctores spiritales, vel falsa, vel certè suspecta sit illa pœnitentia quæ semper plangenda committit, & præpropere absolutio, non remissio peccati, sed facilitate veniæ incentivum sit culpæ; non peccati remedium, sed blandimentum, & inane & noxium operimentum. Quod cum variis Patrum locis demonstraverimus, visum Papæ Gelasii epist. 3. testimonium satis superque sufficiet: *Remitti culpa de præterito potest, inquit, correctione sine dubio subsequente. Nam si deinceps finitur mansura perversitas, non est benignitas remittentis, sed consentientis assensio.* Atqui innumeris experientis constat, nullam subsequutam fuisse correctionem & emendationem, sed perversitatem mansisse. Ergo frustra sperant absolutione veniam, qui factis probant veram se non agere pœnitentiam: frustra conqueruntur sibi denegari absolutionem, qui Sacramento ad sacrilegium abuterentur; nec ipsi absolverentur, sed Sacerdotem ligarent, ac reum efficerent male

malè dispensati sanguinis Christi, ac Sacramenti invaliditati temerè expositi. Expectanda ergo tunc est cordis pœnitentis per quædam facta probatio, sine quibus suspecta est inverteratorum relabentium conversio. *Tunc benè conversum peccatorem cernimus* (ait Magnus Gregor. lib. 6. in 1. Regum,) *cùm dignâ afflictionis austeritate delere nititur quod loquendo confitetur.*

*Hac de Pœnitentia scribentem, & nihilo seciùs populis per Adventûs conciones commendabilem Authorem immatura mors oppressit, Creolii Diœcesis Bellovacensis, die 27. Decemb. ann. 1674. atatis 34. Atque hoc acerbo casu magnæ expectationes extinctæ sunt, & egregii Operis cursus interruptus. Iacturam tamen tantisper consolatur, quòd quæ de reliquis Sacramentis hîc desiderantur, ejusmodi sunt, ut Operis perfectioni non multùm derogent. Parciùs enim in Scholis attingi solent, ut quæ casuum Tractatores magna ex parte sibi suo jure vendicant, apud quos facilè legi poterunt.*

F I N I S.















